


G 6.33

R53366





Digitized by the Internet Archive  
in 2016









*27 Libris*  
C O N S P E C T U S

MEDICINÆ THEORETICÆ.

AD USUM ACADEMICUM.

*Publ. Coll. Regiæ*  
*Medic. AUCTORE Edin<sup>o</sup>*

JACOBO GREGORY, M.D.

*R. i*

MED. THEORET. IN ACAD. EDIN. PROF. COL. REG.

MED. EDIN. SOC. SOCIET. REG. MED. EDIN.

SOD. HONOR. ET SOCIET. PHILOS. EDIN.

SOD. EJUSDEMQUE A SECRETIS.

EDITIO ALTERA

AUCTIOR ET EMENDATIO.

V O L. II.

---

E D I N B U R G I:

APUD GULIELMUM CREECH; ET

L O N D I N I,

APUD T. CADELL, ET P. ELMSLY.

MDCCLXXXII.



CONSPICUUS

MEDICINAE THEORETICAE

AD USUM ACADEMICUM

AUCTOR

JACOBO GREGORY, M.D.

MDCCCXXXIII

MDCCCXXXIII

MDCCCXXXIII

MDCCCXXXIII

CAP.

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

MDCCCXXXIII

INDEX CAPITUM,

QUÆ IN UTROQUE VOLUMINE CONTINENTUR.

IN VOL. I.

CAP.	Pag.
I. <i>De functionibus vivi corporis ; de natura et causis morborum ; de viribus corpori insitis, quæ sanitatem tuentur, morbosque depellunt ; et de natura et viribus et actione remediorum,</i>	I
II. <i>De solida materia ex qua corpora animalium fiunt, variisque ejus dotibus, tum chemicis tum mechanicis : de conjecturis circa ejus fabricam ; de tela reticulata ; et de adipis origine, et natura, et usu,</i>	39
	CAP.



# vi INDEX CAPITUM.

CAP.	Pag.
III. <i>De solido vivo, seu genere nervoso, ejusque dotibus, et fabrica, et usibus; et de conjecturis quæ circa ejus naturam et actionem prolatae sunt,</i>	- 57
IV. <i>De sensu, ejusque varietatibus, et usibus, et voluptatibus, et molestiis, et vitiis,</i>	- 68
V. <i>De tactu, ejusque vitiis; et de dolore, et anxietate, et pruritu,</i>	92
VI. <i>De gustu; ejusque usibus, et varietatibus, et vitiis,</i>	- 104
VII. <i>De olfactu; ejusque usibus, et varietatibus, et vitiis: et de natura odororum, eorumque effectibus in corpus humanum,</i>	111
VIII. <i>De auditu, et sonis; et vitiis auditus; et tinnitu aurium,</i>	- 116
IX. <i>De visu, ejusque varietatibus et vitiis,</i>	- 125
X. <i>De sensibus qui dicuntur interni, memoria, imaginatione, judicio; eorumque varietatibus et vitiis,</i>	148
XI. <i>De motu muscutorum,</i>	- 165
	CAP.



# INDEX CAPITUM. vii

CAP.		Pag.
XII.	<i>De vitiis motus musculorum; mobilitate nimia, torpore, paralyfi, spasmo, - - -</i>	197
XIII.	<i>De somno; ejusque usibus, et causis, et varietatibus, et vitiis, defectu, excessu; eorumque noxis: et de ratione et causis somniorum, - -</i>	208
XIV.	<i>De sanguinis circuitu, -</i>	223
XV.	<i>De motus sanguinis varietatibus et vitiis, - -</i>	238
XVI.	<i>De sanguinis natura; et varietatibus, et vitiis, -</i>	260
XVII.	<i>De respiratione, ejusque usibus, et varietatibus, et vitiis; voce, loquela, nixu, suspirio, oscitatione, risu, fletu, singultu, dyspnæa, tussi, sternutatione,</i>	284
XVIII.	<i>De concoctione alimentorum,</i>	319
XIX.	<i>De vitiis concoctionis, variisque organorum quæ concoctioni inserviunt affectionibus morbosis,</i>	333
XX.	<i>De secretionem et excretionem; earumque varietatibus et vitiis,</i>	358

viii INDEX CAPITUM.

IN VOL. II.

CAP.		Pag.
XXI.	<i>De generandi facultate in utroque sexu, variisque ejus et quæ ei inserviunt organorum affectionibus morbosis,</i>	- 1
XXII.	<i>De corporis nutrimento, incremento, statu, imminutione, et morte; morbisque qui varias ætates comitari et affligere solent,</i>	- - 50
XXIII.	<i>De constitutionum varietatibus,</i>	96
XXIV.	<i>De medendi ratione; de natura remediorum; de consiliis medendi, ad sanandos, aut mitigandos, aut præcavendos, morbos,</i>	- - 113
XXV.	<i>De diætâ ægrotantium,</i>	- 133
XXVI.	<i>De remediis astringentibus,</i>	181
XXVII.	<i>De remediis emollientibus,</i>	200
XXVIII.	<i>De remediis roborantibus,</i>	216
XXIX.	<i>De remediis infirmantibus,</i>	257
		CAP.

CAP.	Pag.
XXX. <i>De remediis stimulantibus,</i>	267
XXXI. <i>De remediis sedantibus,</i>	314
XXXII. <i>De remediis quæ corrigunt       varia humorum vitia; spif-       santibus nimirum, attenu-       antibus, demulcentibus, an-       tacidis, antalkalinis, an-       tisepticis,       -       -</i>	364
XXXIII. <i>De remediis evacuantibus,</i>	402
XXXIV. <i>De remediis vomitoriis,</i>	428
XXXV. <i>De remediis catharticis,</i>	459
XXXVI. <i>De remediis diureticis,       -</i>	480
XXXVII. <i>De remediis diaphoreticis et       sudorificis,       -       -</i>	493
XXXVIII. <i>De remediis errhinis, et si-       alogogis, et expectoranti-       bus,       -       -</i>	518
XXXIX. <i>De remediis emmenagogis,</i>	538
XL. <i>De sanguinis detractiōe,</i>	563
XLI. <i>De remediis epispasticis,</i>	591
XLII. <i>De remediis anthelminticis,</i>	608
XLIII. <i>De remediis lithontripticis,</i>	622



# ERRATA.

<i>Par.</i>	<i>Lin.</i>	<i>pro</i>	<i>lege</i>
1072.	8.	re- —	ri-
1122.	10.	exhauriatur —	exhauriantur infirmetur; — infirmentur;
1269.	9.	fiunt, —	fiant,
1340.	20.	necessatis —	necessitas
1386.	11.	exhauriendis—	exhauriendas
1527.	2.	necessaria, —	necessarius,

# C O N S P E C T U S

## MEDICINÆ THEORETICÆ.

---

### C A P. XXI.

*De generandi facultate in utroque sexu, variisque ejus et quæ ei inserviunt organorum affectionibus morbosis.*

748. **Q**UONIAM singuli, secundum Naturæ leges, homines, labentibus annis, senescunt, et moriuntur, ne genus ipsum pereat, cautum est, mirabili facultate qua homo et omne animal fruitur, ex sese prolem sui similem gignendi.

749. Quamvis nemo hominum hoc ultimum Naturæ arcanum hætenus perscrutatus sit, neque fortasse cuiquam mortalium rei adeo obscuræ penitus explorandæ aut explanandæ unquam facultas fuerit; tamen operæ pretium omnis medicus facturus est, qui res veras singulares, huc pertinentes, didicerit, utcunque exiguas et imperfectas, quas vel ratio docuit, vel observatio comprobavit: præsertim quum non modo ipsa haud levis momenti functio suis obnoxia sit vitiis, sed status quoque organorum, quæ eidem inserviunt, universum corpus multum afficiat, variosque sæpe morbos vel inducat (46.), vel jam urgentes solvat.

750. Prima ætate, nulla vis genitalis est: certa vero ætate, plerumque circa decimum quartum annum, quum jam compago corporis firmior facta, partesque quædam ad justam formam et magnitudinem appropinquantes, sanguinis cursum alio dirigunt, organa genitalia masculina prius  
inutilia,



inutilia, et parva, et lente, pro rata tantum parte cum reliquo corpore crescentia, mutantur subito, crescunt, et evolvuntur, ad propria munera idonea facta. Tum pubes venit, semenque fœcundum secernitur, cujus stimulo adolescens ad grata Veneris munera incitatur.

751. Hoc stimulo quem multa juvant, multa augent, nimirum quæ imaginationem accendunt, secundum consensus leges, sanguinis cursus genitalia organa versus augetur, quo tandem sanguine copiosiore per arterias influente, quam per venas reducitur (419.), inguen tumet, riget, et glans demum plurimo sanguine turgida acutissimum sensum adipiscitur (141. 168.); ita ut levis ejusdem titillatio, qualis in Venere fuerit, vehementissimum sensum et voluptatem det, totumque *genus nervosum* mirum in modum convellat, musculosque præsertim vicinos, *levatoros ani* dictos, ad contractionem cieat, qua tandem compressione vesiculæ feminales, ductusque deferentes

A 2                      exprimuntur

exprimuntur atque deplentur. Semen vero, in *urethram* effusum, novum dat stimulum, cui musculus *accelerator* paret, in reddenda urina voluntarii motus, in expellendo semine inviti motus organum, cujus contractione valida et repetita, semen tandem ejicitur insigni vi, quanta nimirum fat fuerit ad humorem foecundum, qua debet penetrare, vel saltem in uterum, projiciendum.

752. Neque solus *accelerator* musculus convellitur; levis plerumque tremor aut convulsio, aliquando vero vehementissima convulsio omnium muscutorum, in Venere observatur: hinc anhelatio, palpitatio, *syncope*, *epilepsia* nonnunquam, vel demum subita mors, quæ nonnullos Veneris cultu occupatos, nec tale quidquam timentes, abripuit.

753. Finito opere, corpus nonnihil semper languet, aliquando diu; inguen detumet, sanguine parciore affluente, copiosiore per venas resumpto; cupido pacatur, irritatio

irritatio summovetur, corpus solvitur, et somnus facilius obrepit.

754. Tardius pubescunt homines in regionibus frigidis, maturius in calidis. Pubertas quoque tardior venit pueris valido labore occupatis, et victu parco et tenui utentibus; maturior fere laute viventibus et luxuriosis. Eadem sæpe festinatur non bene, colloquiis aut cogitationibus quæ imaginationem accendunt, vel turpi usu partium, priusquam Veneris arma vibrare fas sit.

755. Neque sola genitalia organa mutantur pubertate: totum corpus graves, et sæpe saluberrimas, mutationes subit. Barba pullulat, vox fit gravis et magis sonora, corpus firmitus et validius evadit, et sæpe multum et subito crescit, multique morbi, vel a nimia laxitate partium solidarum, vel a mobilitate *generis nervosi* provenientes, convulsiones, struma, &c. sæpe sua sponte evanescunt. Quin et nova vis  
animo



animo æque ac corpori accedit, moribusque puerilibus exutis, juvenis brevi viriles induit. Eunucho vero nihil hujusmodi accidit: neque vox mutatur, neque barba venit: et corpus debile manet, et raro justam formam adipiscitur; et ipsi fere languidi sunt, animique levis, mollis, effœminati. Non dubium igitur est, istas mutationes, similesque sed majores adhuc, quæ in aliis animalibus observantur, a femine quodammodo pendere, quacunque demum ratione fiant. Parum refert, siue retentum fuerit diu, siue juxta Venere exhaustum semen. Hæc vero nimis culta valde nocet, præsertim junioribus, quorum animos pariter ac corpora multum degenerat: cujus rei ratio haud obscura erit, si quis secum reputaverit quanta vis universo corpori, et *generi nervoso* imprimis, inferatur Venere.

756. Florente ætate, et virili, homines ad Venerem optime valent. Prima senectute apti adhuc, sed pigriores ad Veneris prælia. Novissima vero senectute Venus

aut

aut nulla est, aut sterilis, et elumbi et ex-  
fucco corpori gravis, neque fere impune  
toleranda; nimirum quia senibus sensus  
omnis deficit, et vis *nervosa* minor est, et  
sanguinis motus languidior, et secretiones  
fere parciore, imprimis feminis, musculi-  
que qui hoc ejiciunt debiles, et fere para-  
lytici, propter innumera horum organum  
partiumque vicinarum mala, quibus senec-  
tus obnoxia est (708.). Magna autem de  
his rebus hominum differentia: decantan-  
tur enim exempla senum, in castris Ve-  
neris strenuissime merentium, postquam  
centum annos compleverant; neque sane  
dubium, aut adeo rarum, octogenarium  
patrem fieri.

757. Deficit aliquando maribus generan-  
di facultas, et nulla cupido est, neque un-  
quam arrigit inguen, neque semen emitti-  
tur, propter vitia fere ignota organorum,  
puta pravam ab ipsa natura derivatam fa-  
bricam, vel defectum sensus vel secretio-  
nis. Sæpius vero talis impotentia oritur  
ab

ab aliis partium genitalium morbis, lue venerea, vel læsa fabrica a contusione aut vulnere : haud raro oritur a nimia venere, præsertim solitaria, scilicet, cui nullus modus est. Hinc quoque tanta organorum debilitas, vesicularum seminalium imprimis, ut semen citra venerem vel sponte effluat, vel levi nixu, veluti inter alvum evacuantem, exprimatur.

758. Verisimile est, viros aliquando steriles esse a vitio feminis, quamvis nulla organorum vitia appareant, et ipsi ad Venerem probe valeant ; multaque exempla ostenderunt, non omnem hominem cum omni fœmina fœcundum esse, quamvis uterque cum aliis satis foret fœcundus.

759. Nonnunquam inguen pertinaciter et cum dolore arrigit, vel citra cupidinem, vel cum ingente et inexplebili libidine. Rarum vitii genus, cui nomina *Tentigo*, *Priapismus*, *Satyriasis* dantur. Oritur fere a gravi irritatione ipsius membri, vel partium  
tium



tium vicinarum, vesicæ præsertim, vel acris medicamentis, veluti cantharidibus, sumptis, stimulatæ, vel multa et acriore urina distentæ: hinc levior tentigo expurgiscentibus, alioquin sanissimis, familiaris: hinc quoque inguen sæpe riget infantibus puerisque impuberibus, quamvis nondum ita evolvatur ejus fabrica, ut tumeat et arrigat, sicut viris solet.

760. Eadem fere ætate qua pueri pubescunt, puellæ solent nubiles fieri: genitalia organa evolvuntur, et ad propria munera valent; pubes venit, mammæ efflorescunt, nova venustas ori, nova elegantia universæ formæ accedunt. Valetudo quoque, si quando antea infirmior fuisset, sæpe et subito in meliorem vertitur, non secus ac adolescentibus alterius sexus accidit. Multum vero abest ut tanta universi corporis mutatio scæminis accadat, quanta in viris observetur. Neque enim vox mutatur, neque barba venit, neque eadem vis et robur aut corpori aut animo contingunt: et nunc



demum differentia sexuum, quod ad corporis constitutionem in infantibus fere nulla, in pueris atque puellis obscura neque semper observanda, manifeste se prodit.

761. Gravissima autem in intimis puellæ visceribus mutatio absolvitur, qua uterus, prius inutile organum, pauxillum sanguinis singulis mensibus effundat, et idoneus evadat ad prolem suscipiendam, et gestandam, et alendam, donec suo tempore in auras lucemque prodeat.

762. Multum disputatum est inter medicos, quo pacto menses evenirent, et quo consilio rerum magna Parens solis fœminis adeo iniquam ut videtur legem tulisset. Nondum enim constat, num aliis quoque animalibus menses contingant: si ullis, certe paucissimis, iisque tantum quæ generi humano simillima sunt.

763. Nemo sanus conatus fuerit rationem reddere, cur talis fœminis, iisque solis,

lis, fabrica data fuerit, qualis hujusmodi fluxum efficiat: neque medici est istiusmodi arcana perscrutari. Sat erit si quænam ista fabrica sit, explicaverit, et ostenderit quomodo mensium fluxus fiat, quibus usibus inferviat, quibus causis vitietur, qua ratione vitiatus noceat, et quibus remediis ejus vitia corrigantur. Plurima autem desiderantur adhuc, ut talis fluxus menstrui ratio reddatur.

764. Quum, corpore indies crescente, partes quædam justam fere adeptæ sint molem, et figuram, et firmitatem, sanguinis cursum dirigunt alias partes versus laxiores et nondum evolutas.

765. Fœminis vero, præ viris, arteriæ omnes capaces et laxæ, cum venis comparatæ, observantur: *aorta* descendens imprimis, ejusque rami præsertim qui ad uterum tendunt, præ cæteris capaces et laxi sunt. Porro, rami arteriarum uteri, ampli, flexuosi, serpentinii, ad congerendum

B 2                      sanguinem

fanguinem aptissimi videntur: congesto vero sanguine turgidi, in uterum multis osculis hiant, sanguinemque in eum fundunt, per vaginam brevi elapsurum.

766. Probabile igitur est, fœminas, præ viris, ad sanguinis plenitudinem proclives esse; quod sane plurima confirmant, præsertim, quum, lentius crescente corpore, humor nutriens qui paratur non omnis nutrimento ejus impenditur: probabile quoque est, nimiam sanguinis copiam in arteriis præcipue congeri, et imprimis in ramis laxioribus, qui facillime distenduntur, ideoque in vasis uteri. Hæc vero distenta et irritata ad novos et validiores motus incitantur, humoremque, primo tenuem vix coloratum, per oscula in uterum hiantia jam nonnihil patefacta exprimunt, postea vero sincerum sanguinem fundunt.

767. Quamvis hæc omnia quodammodo obscura et incerta videantur; tamen haud parum confirmantur observatione multorum



multorum signorum, quæ erumpentes menses præcedunt et comitantur. Cujusmodi sunt fluxus humoris albidus e vagina, incertis intervallis, sæpe longis, recurrens, per annum unum alterumve ante plenam pubertatem; lassitudo insolita, dolor lumborum et capitis, vertigo, nausea, mammarum tumor et aliquando dolor, per intervalla recrudescentia, donec tandem sanguis sincerus prorumpat; quod simul fit, hæc mala evanescunt, reditura vero, quamvis incerto tempore. Sic puellis nondum plene puberibus menses sæpe longis et incertis intervallis redeunt: paulatim vero ad intervallum menstruum reducendi, præcedentibus fere signis jam recensitis, nunc levioribus nunc gravioribus.

768. Ratio intervalli adeo æqualis nulla hætenus reddita est: habent tamen sua tempora pleræque res, quibus incipiunt et absolvuntur: vis consuetudinis (314.) non-nihil hic facere videtur. Neque tamen intervallum adeo æquale fœminis est,  
quin

quin multis, alioquin fanissimis, per breviora aut longiora spatia, menses redeant. Rarissima sunt exempla mulierum bene valentium, quæ nullos menses habent, et rariora adhuc, sine mensibus, fœcunditatis: puellæ quædam vero prius matres factæ sunt, quam menses erupissent: postea vero more solito profluxuri.

769. Labentibus vero annis, nostris in regionibus vix ante quadragesimum, et fere ante quinquagesimum ætatis annum, menses desinunt, et cum iis fœcunditas. Quo citius incipiunt, eo fere maturius desinunt. Neque subito plerumque reprimuntur: aliquando insolitis intervallis, sive brevioribus sive longioribus justo, redeunt, et ingente copia; cum gravibus sæpe uteri partiumque vicinarum et conspirantium morbis, *fluore albo* imprimis, neque mediocri valetudinis discrimine. Harum rerum ratio videtur esse totius corporis, arteriarum præsertim, firmitas et rigiditas, indies crescentes, et vim venarum tandem superantes.

Hinc

Hinc ultima arteriarum plenitudo in parte laxissima ; paullatim tardior, sed inordinata, et tandem nulla. Nonnunquam, quamvis rarissime, menses simul et fœcunditas ultra quinquagesimum annum manent. Plerumque vero, si vetula menses habet, morbosum est.

770. Menses igitur, ut videtur, mulieribus contingunt hac potissimum ratione, quod universam corporis fabricationem, ad plenitudinem seu sanguinis abundantiam comparandam, aptam habent, et idoneum organum in promptu est, per quod sanguis excernatur. Viri cæteraque animalia haud ita facile sanguine nimis pleni fiunt, neque si ita facti fuerint simile organum habent. Deficiunt vetulis, quia fabrica uteri haud parum mutatur, præsertim firmitas ejus arteriarum. Porro, dum mulier uterum gerit, menses nullos fere habet, quia pars uteri unde profluere solent a *placenta* occupatur : neque per plures menses, dum infantem alit mulier, fluunt menses, nimirum



rum quia ad aliam partem, cui mirus cum utero consensus est, sanguis divertitur.

771. Menses parum vel nihil ad cupidinem conducunt. Auctus, ætate pubere, genitalia organa versus sanguinis fluxus, humoresque, ut creditur nonnulli (627.), assidue secreti, non possunt non stimulare et calefacere. Fœminæ autem quam viri, et omnium fere animalium fœminæ quam mares, minore impetu in Venerem feruntur; neque hi sane in quibusdam animalium generibus, sine vi quadam suas fœminas subigunt. Nihil vero ad fœcunditatem facit major minorve cupido rerum venerearum. Fœminæ aliquando calidioris constitutionis steriles observantur; dum frigidissimæ sæpe, quibus Veneris gaudia fere nulla, mira fœcunditate sunt. Effrænata vero et inexplebilis libido, in fœminis non fecus ac in viris, morbus demum est, aliquando vere corporeus, forte a vitiis genitalium organorum, irritatione, nimio sanguinis fluxu, nimia humorum fœcundorum

dorum secretione, inductus; sæpius vero a læsa et corrupta imaginatione originem ducens.

772. In fœcunda Venere probabile est, non modo *clitoridem* cæterasque partes exteriores genitalium organorum fœminarum, sed intimas quoque, tubas imprimis *Fallopianas*, influente sanguine turgere et erigi; hæque tubas ad *ovaria* admoveri, eademque suis fimbriis amplecti, semenque masculinum ad ea deferre, ovumque vel separatum ex *ovario*, postquam semine masculino fœcundatum fuerit, vel forte rupti tantum ovi humorem, cum semine mixtum, in uterum deducere.

773. Hæc vero num ita fiunt, vel quodenum tempore, parum adhuc constat: scilicet, quia observandi occasiones in hominibus raræ admodum sunt, multaque vetant adhibere fidem plurimis, quas varii auctores protulerunt, observationibus. Quantum vero ex inspectionibus animalium

um, a peritissimis medicis institutis, vel denique paucarum mulierum, quarum cada-vera brevi post conceptum tempore inspi-ciendi facultas fuerit, colligi possit, neque fœtus, neque ovum, ante viginti dies post conceptum, detegi possunt: humor tantum tenax, glutinosus, pellucidus in utero aut tubis conspicitur; qui tamen primordia novi animalis continet, quamvis oculi, etiam armati optimis vitris, aciem fugien-tia. Quamprimum vero tantum firmita-tis et coloris adeptæ sunt partes crudi fœ-tus, ut possint distingui, tum ovum obser-vatur ex molli et tenui membrana constans, et aquulam pellucidam continens, in qua novum animal, incurvum, per funem um-bilici a *placenta* et membrana ovi pendu-lum, deforme, ingente pro rata parte ca-pite, parvo corpore, nullis adhuc artubus instructum, natat, mollissimum hætenus et fere fluidum.

774. Semen masculinum ad *ovaria* fœ-minarum, per tubas *Fallopianas* quodammodo



modo penetrare, aliquid ad generationem necessarium ex *ovariis* derivari, et per easdem tubas descendere ad uterum, docent sterilitas a conclusis tubis, corpora lutea ut vocantur in *ovariis* semper post conceptum, nunquam ante, reperta, fœtusque demum, vel in *ovariis*, vel in tubis hærentes, vel ruptis tubis in abdomen delapsi.

775. Primordia novi animalis ex utroque parente pariter derivari, suadet similitudo parentum, vel alterius tantum, vel utriusque mixta in liberis reviviscens: ita tamen ut liberorum, qui mixtam similitudinem habent, alii ad patrem, alii magis ad matrem, inclinent; et constitutio singularis patris vel pura renascatur in filio, vel mixta et correctâ, et sic proclivitas ad multos morbos suscipiendos a parentibus in prolem transeat, aliquando nihil immutata, immo forte gravior facta, sæpe vero mitior et levior, et paullatim delenda, si tanta hominum generationi impenderetur

cura, quanta equis, et juvencis, et catulis propagandis datur. — Maxima quæ in genere humano observatur varietas, scilicet inter Æthiopes et Europæos, post aliquot generationes, quatuor ut fertur, deletur penitus, et evanescit, si mixta proles cum altero tantum genere nuptias habuerit.

776. Parum vero profecerunt hætenus qui conati sunt rationem reddere variarum partium quas uterque parens ad generationem conferret. Nec melius intelligitur quænam virtus feminis masculini, quisnam minutissimorum quæ ibi scatent animalium usus, aut quid ex *ovario* aut corpore luteo depro-matur. — Non dubium vero est, fabricam quandam, utcunque imperfectam, novi animalis, ab ipso conceptu subesse, quamvis nostris non obviam sensibus: nimirum, quia simul conspici potest, fœtus cerebrum habet, et cor et *aortam*, et actionem cordis, et motum sanguinis, quamvis nondum rubri, et ideo actionem cerebri (356.);  
neque

neque facile quisquam contenderit nihil istiusmodi adfuisse pridie quam tota fabrica nostris oculis visibilis facta esset.

777. Variæ autem partes quæ ad vitam omnino necessariae sunt, unde veniant, et quando et quo ordine perficiantur, nemo est qui dixerit, aut quomodo talis conditio rudi indigestæque, ut videtur, massæ detur, qualis eandem idoneam fecerit, ut certo modo distendatur, et crescat tandem in pulcherrimam formam.

778. Juvabit tamen novisse talem, a principiis vitæ, subesse fabricam, certo tempore et ordine evolvendam, et magnam et constantem vim quæ distendat, et compagem foetus mollissimam, et ideo ad extensionem aptissimam (79. 82.).

779. Vis distendens est actio cordis et arteriarum humores quaquaversum per totum corpusculum propellens : hæc forte vis a primo qui conspicitur cordis ventriculo



culo incipiens, *aortam* evolvit, extenditque primo in simplicem tubum, paullatim in ramulos dividendum, qui venas sibi respondentes inveniant, vel aperiant, vel evolvant.

780. Hæc vis, prima ut videtur corporis fabricatione, varia proportionem in alia atque alia organa dirigitur, et hæc igitur certo ordine crescunt, et sane admodum inæqualiter. Sic caput grande efficitur, et *thymus* et jecur ingentia magnam thoracis partem occupantia, cum pulmo adhuc exiguus est, et artus nulli apparent. Hi vero suo ordine veniunt, et prius superiores pullulant.

781. Totus homunculus, quum primo conspici potest, vix formica major, et granum unum alterumve pendens, natat in ovo, quod facile duas trefve aquæ uncias contineat: quo plus vero crescit ovum, eo minus pro rata parte aquæ in eo est, et fœtus qui habitat major, donec tandem sub  
finem

finem graviditatis ingens ovum fere impleat, parca relicta aqua, ipse tum sesquipedalis, et circiter octo libras pendens.

782. A primis diebus funis ex umbilico prodit, ex binis arteriis constans, quibus unica vena respondet, et *placentam* format, quæ intima ovi membrana tecta concavam partem, externa convexam, ovo et utero plerumque prope partem superiorem utriusque adnectitur, et commeatum inter matrem fœtumque efficit, sanguinem, ut videtur, ab altera ad alterum ducens reducensque.

783. Nondum profecto constat apud medicos, quo modo hic commeatus absolva-  
tur, five per vasa sanguinem vehentia continua, iter a matre ad fœtum sit, five sanguis ex utriusque vasis effundatur in cavernulas, per vasa hiantia denuo resorbendus. Lis ipsa, experiendo non arguendo dirimenda, parum ad usum medicum pertinet. Oportet tamen meminisse, auctum  
sanguinis

sanguinis in vasis uteri impetum *placentam* sæpe separare, et ideo abortum inducere, et hanc quocunque modo separatam, five partu naturali, five abortu, five magna vi funi umbilici admota, veluti ab imperita obstetrice post enixum foetum, aliquem semper sanguinis fluxum, nonnunquam ingentem et lethalem, efficere.

784. Singularis sanguinis in foetu cursus, ab eo qui in adulto observatur longe diversus, nimirum per foramen *ovale*, et ductum *arteriosum* inter arteriam *pulmonalem* et *aortam*, et arterias *umbilicales* et *placentam*, et venam *umbilicalem* et ductum *venosum*, jam descriptus est (414.); neque igitur hic fufius repetendus.

785. Parum constat de origine variarum quæ ovum formant tunicarum, five ex liquoribus foecundis utriusque sexus formantur, non secus ac ipse foetus, five ab utero deriventur. Exterior saltem membrana *chorii*, decidua dicta, ab utero videtur esse, nimirum



mirum quæ in utero adfuisse fertur, quum  
fœtus ovumque in tuba *fallopiana* hærerent.

786. Uterus ipse, dum mulier gravida  
est, mirum in modum crescit, quinquagies forte capacior factus quam in virgine  
fuerat. Neque ideo tenuior fit: vasa scilicet sanguinem vehentia evolvuntur, et  
plurimum sanguinem continent, et tela  
forte reticulata, quæ fibras musculosas nec-  
tit, crescit quoque.

787. Nonnullæ mulieres, ut fertur, sta-  
tim ut conceperint, id norunt, certo sensu,  
qualis a sterili venere abfuit, et horrore  
aliquo illico ingruente, et nausea postridie  
forte, vel saltem paucis diebus, accedente.  
—Plerisque mulieribus, dum uterum ge-  
runt, os ejus clauditur, et menses nulli  
sunt, et hoc potissimum signo norunt se  
concepisse. Neque tamen adeo rarum est,  
gravidam primis mensibus solitum fluxum  
habere.

788. Multæ a conceptu ad partum usque a stomacho laborant, et importunissima nausea, et vomitu, præsertim horis matutinis, vexantur: paucæ quidem ab his malis omnino immunes sunt, ita ut vix morbosa habeantur. Abnormis cibi potusque appetitus, qualis *Malacia* (638.) vocatur, nonnunquam gravidis accidit. Hujusmodi mala a consensu inter stomachum et uterum oriuntur, neque ab hujus organi mole reliqua viscera comprimente: quippe quia prius incipiunt sæpe, quam uterus tumeat, et aliquando desinunt, vel sublevantur, ultimis mensibus graviditatis, cum uterus amplissimus est.

789. Alia quoque haud pauca a graviditate aliquando oriuntur incommoda; pedum præsertim et crurum tumor, hæmorrhoids, et quædam urinæ vitia (736. 737.); quarum rerum ratio haud obscura est.— Nonnullæ vero mulieres, dum plenæ sunt, optima et firmissima valetudine fruuntur:  
ita

ita ut his graviditas multarum sæpe ægritudinum remedio fuerit.

790. Finis graviditatis nono mense est: rarissime ultra decem menses uterum gerit mulier. Partus sex mensium rarissime superstites observantur: septem vero et octo mensium sæpe, et quo propius ad justum tempus ventum fuit, eo infans validior, et in meliore spe.

791. Justo demum tempore, quum fœtus tandem adeptus est debitam molem et vigorem, et liquor *amni* pro rata parte multo parcius factus est (781.), uterusque igitur, pondere et motu infantis magis stimulatur, dolores puerperii adoriuntur, juvante sæpe, ut videtur, molimine naturali ad menses producendos.

792. Isti dolores paullatim frequentius recrudescunt uterum ipsum, et qui cum eo consentiunt respirationis musculos, ad validam contractionem excitant, quæ tandem



os uteri patefaciat, membranasque ovi per hoc in vaginam propellat: ibi vel vi contractionis, vel arte externa, ruptæ vel laceratæ, liquorem *amni* cum pauxillo sanguinis effundunt, qui partes per quas focus exire debet, laxet atque emolliat.

793. Tum dolores paullisper fere mitescunt, brevi autem vehementiores redituri, tandemque cum immani cruciату, et totius corporis tremore, aliquando etiam convulsione (forte lethali nonnunquam), infantem præcipitem expulsuri: quam primum vero caput ejus exiverit, reliquum corpus facile sequitur.

794. Brevi post partum, *placenta* ab utero separatur, et cum reliquis ovi partibus expellitur, non sine magna plerumque sanguinis jactura, qualis sæpe periculo non caruerit, præsertim si vis aliqua ad separandam placentam admota fuerit. Plerumque vero sanguinis fluxus brevi compescitur, vel temperatur saltem, subita et  
validissima

validissima uteri contractione: ita ut fluxus, qui *lochia* vocatur, brevi parcius et pallidior, et tandem serofus omnino evadat. Idem serius ocyus reprimatur penitus, secundum puerperæ constitutionem, et vitæ rationem: nonnullis die uno vel altero, nonnullis vero vix intra mensem; recurrit quoque interdum, quum primo puerpera ad solita munera rediverit.

795. Corpus, doloribus, et nixu, et sanguinis jactura, exhaustum, et debilitatum, non illico vires recuperat, et partim propter infirmitatem, partim propter auctam mobilitatem et sensum, a levibus sæpe causis multum et male afficitur. Neque sane absurda omnis quæ puerperis datur cura: multum vero erraverunt, qui omnem puerperam pro morbosa habentes, eas nimia sollicitudine custodire voluerunt, et non modo a gravi irritatione, aut frigore defendere, sed perpetuo calore fovere, vel forte remedia adhibere ad sudorem excitandum: scilicet, quia talis tractandi ratio ipsa periculo  
non

non caret, et corpus magis magisque debilitat, et ad morbos suscipiendos aptius reddit.

796. Incerto post partum tempore, sanguis, uteri contractione ab eo pulsus, mammas versus majore copia fertur, quæ tumet brevi, et lac incipiunt secernere. Aliquando tantus sanguinis ad mammas fluxus accidit, ut ipsæ multum turgeant, et nonnunquam inflammentur et suppurentur, et sic vel lactis secretio impediatur, vel lac jam secretum exfugiri nequeat præ dolore, et tumore mammæ, papillam fere obruente. Aliquando etiam mulieres, alioquin sanæ, nullum lac habent; quod tamen multo rarius vitium est, quam vulgo creditur. Plerumque, si infans paucis post partum horis mammæ admovetur, ut ipsa Natura faciendum esse docet, neque lac deficit, neque nimis subito venit, neque vehemens tumor, neque inflammatio mammarum, neque febris, accidunt, et sanguinis ab utero fluxus eo citius reprimitur.

797. Lac,



797. Lac, quale primum post partum fecernitur, tenue est, et parum nutriens, et, ut vulgo creditur, fere infantem deorsum purgat; quod tamen minus certum est; paullatim vero crassius fit et magis nutriens. Si mulier suum infantem alit, menses plerumque non redeunt per maiorem partem anni, vel forte per annum integrum; neque hoc tempore nutrix facile gravida fit, quamvis a Venere non abstinerit; sin minus, menses redire solent menstruo fere post partum spatio.

798. Si nutrix infantem nutrire pergit, lac manebit forte per plures annos. Si vero infans a mamma depulsus fuerit, secretio lactis brevi reprimetur. Observatur lac, instantibus mensibus, infantem male afficere, quamvis dum fluunt, eidem non noceat.

799. Quædam mulieres infantem alendo exhaustuntur, et male se habent. Pleræque vero optima hoc tempore sanitate fruuntur:

fruuntur : cibum præter solitum appetunt, et bene concoquunt, et bene dormiunt, et boni coloris sunt, et sæpe pinguescunt.— Neque profecto rarum est, plures morbos, præsertim quales a distributione sanguinis abnormi (469. 473.) originem ducunt, arceri, vel depelli, donec mulier uterum gerat, vel postea infantem alat.

800. Postremo, observatu dignum est, quamvis periculum in puerperio haud exiguum fuerit, foecundas quam steriles, easque quæ prima juventute nupserant, et foecundissimæ fuerant, quam eas quæ serius matres factæ erant, diutius et sanius vivere. Verisimile est, nonnullos quibus amabilis sexus plectitur morbos, qui non modo ipsa genitalia organa afficiunt, sed totam valetudinem sæpe labefaciunt, vel induci virginitate, vel multum ingravescere; scilicet, ad quam non natæ sunt foeminae: neque absimile est, eosdem sæpe morbos, haud obscura ratione, connubio sanatum iri.

801. Cuncta

801. Cuncta demum munera muliebri sexui propria sæpe vitiantur, non sine gravi incommodo, et magno valetudinis periculo.

802. Vitium plane est, si menses solita ætate non profluxerint: ætas qua puellæ menses habere incipiunt variat multum, salva adhuc sanitate, scilicet, qui maturius fere accidunt in regionibus calidis, puellis-que bene pastis, et luxuriosis, et desidibus, iisque quæ subito crescunt, et justam corporis formam cito adipiscuntur, tardius vero, etiam citra morbum, in regionibus frigidis, et puellis debilibus, lente crescentibus, victu tenui vitam tolerantibus, et valido labori assuetis.

803. Plerumque vero, si menses justo tempore non prorumpunt, valetudo multum afficitur. Vigor omnis perit, singulæ fere corporis functiones plus minusve impediuntur, appetentia cibi deficit aut vitatur, concoctio ejus corrumpitur, totum corpus solvitur, flaccescit, pallet, marces-



cit, sanguis ipse tenuis et pallidus evadit, et sic plurimis morbis via sternitur.— Talis mensium defectus, *Emanfio* apud medicos dicitur. Lenta valetudo ex ea oriunda, *Chlorosis* vocatur.

804. Sæpe vero, postquam menses diu, ut decet, justis intervallis profluxerint, vel solito tempore, citra graviditatem, non redeunt, vel jam fluentes subito reprimuntur. Hoc mali genus *Amenorrhœa* vocatur, seu Suppressio Mensium.

805. Plurima hinc mala; varia autem secundum constitutionem ægræ, multasque res externas concurrentes: plenitudo primo vasorum sanguinem vehementium uteri, postea universi corporis, distributio sanguinis abnormis, et auctus ejus impetus, febris, congestiones sanguinis in variis partibus, sanguinis fluxus a naribus, pulmonibus, ventriculo, ano, in quibusdam ut fertur exemplis, ab omni fere corporis parte: dolor lumborum, capitis, pectoris, ventriculi,

ventriculi, vertigo, nimia mobilitas, *hysteria* aliquando, tandem debilitas generalis, omnesque functiones impeditæ, et valetudo ab omni parte labefacta.

806. Variæ sunt causæ mensium vel suppressorum, vel nunquam profluentium, eo magis attentione dignæ, quod ex earum natura bene perspecta, morbi sanatio et fluxus revocatio potissimum pendent.

807. Deficiunt aliquando forte menses, sed rarissime, propter pravam uteri fabricam, qua minus valeat ad sanguinem congerendum et effundendum; interdum etiam, quamvis haud multo frequentius, sanguis in uterum effusus ibi reprimitur, via scilicet ex utero præter naturam impedita.

808. Sæpius vero, salva omnino organorum fabrica, menses solita ætate non prorumpunt, propter corpus non bene nutritum, aut gravi labore aut valetudine exhaustum, vel denique quacunque causa valde

debilitatum, ita ut vel nulla sanguinis abundantia fieri possit, vel siqua facta fuerit, vis nulla adsit quæ sanguinem per vasa uteri propellat. Ex iisdem causis, menses sæpe supprimuntur fœminis, quæ antea eos naturali modo habuissent.

809. Sæpe etiam impediuntur jam instantes menses, vel subito sistuntur, dum fluunt, variis causis, quales vel istiusmodi debilitatem, vel contractionem, aut *spasum* utero ejusque arteriis inducere, vel sanguinem alio divertere possint: cujusmodi sunt vehementes animi affectus, sive excitantes sive deprimentes, frigus, præsertim pedibus admotum, magnæ exinanitiones, medicamenta fortiora, varii demum morbi.—Menses quoque eo facilius impediuntur instantes, vel reprimuntur fluentes, a causis quæ viderentur levissimæ, suppressive quoque eo magis nocent, quod insolita, dum instant vel fluunt, universi corporis mobilitas viget.

810. Hinc



810. Hinc ratio in promptu erit, cur plurima, et admodum diversa remedia, aut inducant aut revocent menses, aut mala sublevent ex eorum suppressione proveniente; nimirum, quæ corpus impleant, depleant, roborent, laxent, stimulent, sopiant, sanguinemve uterum versus dirigant: qualia sunt victus lautior, sanguinis detractio, stimulantia medicamenta, veluti helleborus, aut gummi calida, aura *electricæ*, exercitatio, balneum, fomenta, opium, &c. neque mirum erit omnia, etiam laudatissima remedia, spem medici sæpe fallere; neque fane credibile, remedium quodvis, vel casu vel ratione unquam repertum iri, quod semper utile fuerit, morbumque sanaverit, qui tot tamque varias agnoscat causas, corporique tot tamque diversis modis noceat.

811. Porro, menses haud raro vel nimia copia profluunt, vel nimis frequenter redeunt: alterumque cum altero vitio sæpe jungitur; nimirum, quia utrumque similes fere causas agnoscit,

812. Causæ

812. Causæ talis vitii frequentissimæ sunt, nimis sanguinis abundantia, auctusque impetus, præsertim uterum versus directus, vel stimulantibus huic partibusque vicinis admotis, vel *spasmo* seu contractione aliqua aliis et remotis partibus inductis (470. 471.); impeditus sanguinis ex utero per venas reditus, propter varias obstructions; laxitas et debilitas uteri ejusque arteriarum, a crebra graviditate, aut frequente abortu, vel demum varia uteri vitia, ulcus, erosio, carcinoma.

813. Ratio igitur in aprico erit, cur multiplex vitium, varia, et quæ videantur contraria, medicamenta aliquando postulet; veluti sanguinis detractionem, tenuem dietam, laxantia, roborantia, refrigerantia, anodyna, &c.

814. Tale profluvium corpus exhaurit, solidas partes laxat, fluidas attenuat, uterum debilitat, *fluorem album* inducit, mulieres vel steriles reddit, vel ad abortum proclives,

proclives, et demum omnes functiones impedit, universam valetudinem labefactat, raro subito lethale, aliquando vero insanabilem fere morborum origo et causa.

815. Huic quodammodo affine videtur aliud vitium, sexui muliebri familiare et molestissimum, quod *Fluor Albus* vocatur: fluxus scilicet humoris albidi e vagina.

816. Mensium profluvium hoc vitium sæpe comitatur, eosque tum fere præcedit et consequitur; nimirum, quum vasa sanguinem vehentia, foraminaque in uterum hiantia, nondum ita dilatantur, ut crassum et rubrum sanguinem transmittere possint; pars ejus tenuior sola transit, et spissata nonnihil per remoram, aliterque forte mutata, et cum mucositate mixta, e vagina elabitur: parique ratione, postquam eadem vasa et foramina aliquantum contracta cruorem cohibent, tenuis adhuc et albidi humoris fluxus paullisper superest. In-  
gravescebat



gravescens vero malum constans fit, totumque mensium intervallum occupat.

817. Hoc malum non secus ac mensium profluvium, uterum debilitat, corpus exhaurit, mulierem sæpe sterilem facit, et universam valetudinem labefactat. — Frequentissime a profluvio mensium, uterum debilitante, totum corpus laxante, sanguinem attenuante, originem ducit; ex iisdem fere causis oritur (812.), similibusque sæpe remediis reprimitur. Haud raro tamen oritur a suppressis vel deficientibus mensibus. Mulieres, quæ tali morbo laborant, haud ita facile ac sanæ gravidæ fiunt, vel, si conceperint, crudus foetus sæpe brevi effluit. Quod si prospere uterum gesserit talis mulier, morbus quo prius laboraverat fere reprimitur, forte nunquam rediturus, præsertim si post enixum partum idonea vitæ ratio fuerit.

818. Vitium demum est, si menses quamvis neque suppressi neque nimis copiose profluentes,

profluentes, ægre tamen et cum dolore uteri, lumborum, capitis, gravique totius corporis ægritudine, solitis et naturalibus intervallis erumpunt. Multæ fœminæ, quæ nulla vel levia admodum hujusmodi, primis puberibus annis, expertæ erant incommoda, florente adhuc ætate, ipsæque vegetæ, et alioquin sanæ, hoc modo fere ægrotant, quoties menses debent fluere. Incommodum vel a crescente solidarum partium firmitate, vel a nimia arteriarum et foraminum uteri contractione oriundum, remediis laxantibus et anodynis optime sublevatur: neque temere ad calefacientia, stimulantia, aut *cardiaca* remedia, qualia mulierculæ amant adhibere, confugiendum est; quamvis istiusmodi profecto remedia, incitato nimirum sanguinis motu, renixum illum a firmitate uteri ejusque arteriarum contractione ortum superare, mensesque promovere, possint.

§19. Vitium quoque est, si mulier, ætate qua debet esse fœcunda, sterilis est. Hoc aliquando fit propter pravam uteri, aut

tubarum, aut *ovariorum*, fabricam, qualis, in nonnullis quamvis admodum raris exemplis, inspectione cadaverum detecta fuerit; neque fivisset semen masculinum ad *ovaria* penetrare, vel muliebri quicquid fuerit ad generationem necessarium cum eo misceri, vel justum cum utero commeatum habere; puta, uterum obstructum, aut *schirrosus*, vel tubas conclusas, vel *ovaria* hydropica facta, &c.

820. Sæpius vero a vitiis mensium, suppressione, profluvio, *fluore albo*, mulieres steriles fiunt, scilicet quæ eas vel non sinunt concipere, vel fœtum adhuc fluidum eji- ciunt, vel justum et naturale nutrimentum ejus per *placentam* et vasa umbilici impediunt.

821. Humores ipsi, quotquot fœminæ ad generationem conferre debent, corrumpi possunt, non fecus ac semen virile (758.), et parum fœcundi fieri. Venus quoque nimis culta fœminas solet steriles facere.

822. Fœcunditas



822. Fecunditas pendet multum a prima et congenita corporis constitutione; quippe quæ mira et fere constans in quibusdam familiis observetur, dum stirpes quædam antiquæ unicum per plures generationes filium tulerint.

823. Ignavia et luxus omnis homines vel steriles paullatim reddunt, vel prolem producunt debilem atque morbosam, qualis infantiam ægre superaverit, et raro virilem ætatem attigerit. Sic rustici fere omnes fœcundi sanæ et vegetæ prolis: urbani vero, sæpe vel steriles, vel miserandæ progeniei parentes. Solum rus ferax hominum, quos non sibi soli educat, sed urbibus quoque, quæ aliter brevi inanes forent: rara enim exempla familiarum artificum quæ per quatuor generationes floruerunt. Quin et nobilissimæ et antiquissimæ gentes optimatum, et principum, et regum, indies minuuntur, et pereunt; ita ut nulla brevi nobilitas superesset, nisi cum plebe nuptiæ fierent, et novi homines ad summos ho-

nores evecti, antiquis familiis adscriberentur; quamvis non dubium sit, longe alium ac nuptiæ demonstrarent patrem, nobilem stirpem, vitiis et morbis animi et corporis viginti atavorum, onustam, multum sæpe emendasse, et aliquando renovasse perituram.

§24. Quamvis utriusque parentis constitutio, luxu et ignavia corrupta, ad hanc degenerationem aut sterilitatem conferre possit; tamen satis constat, maximum sæpe vitium et causam sterilitatis in fœminis esse, scilicet, quæ tali vitæ genere solvuntur, et debilitantur multum, et sanguine nimis plenæ fiunt; et menses ideo copiosiores habent, quam rusticæ et robustæ mulieres habere solent, et sæpe *fluore albo*, sæpe profluvio sæpe suppressione mensium, laborant.

§25. Abortus vocatur crudi fœtus expulsio; vitium sane frequentissimum; sæpius tertio mense accidens; aliquoties repetitum

petitum facile in consuetudinem transiens difficillime rumpendam: eo fere periculosius quo propius ad iustum tempus ventum fuerit.

826. Easdem fere agnoscit causas ac mensium profluvium, cuius sæpe pars est et effectus; plerumque, si a vitio interno oritur, tempore mensium accidens, et, ut videtur, a solito naturæ molimine ad eos producendos originem ducens. Quicquid præterea commeatum inter matrem et fœtum (782. 783.) rumpit, vel uterum stimulat, debilitat, vel ullo modo lædit, vel *genus nervosum* convellit, vel corpus calefacit, abortum inducere potest: auctus scilicet sanguinis impetus, præsertim in uteri vasis; febris vehemens, quæ sane raro gravidis accidit, neque fere sine abortus periculo vel vitæ ipsius discrimine; exercitatio valida, defatigatio, nixus ingens, vis externa corpori, præsertim ventri, illata, Venus immodica, irritatio partium vicinarum, veluti a fortibus medicamentis; graves



ves animi affectus, sive excitantes sive deprimentes, ingens debilitas, vel generalis, vel uteri tantum, vel *syncope* demum, veluti ab enormibus exinanitionibus; et vitia denique nonnulla fœtus ipsius, mole vel figura monstrosi, ejusque minus idoneus in utero situs, vel morbi qui circuitum sanguinis per *placentam* languere faciunt, vel mors denique, quæ omnem humorum per *placentam* motum sistit, commerciumque cum matre rumpit.

§27. Ratio igitur haud obscura erit ab instante malo præcavendi, sanguinis distractione, decumbendo, quiete animi et corporis, anodynis remediis, frigore variis modis admoto, aliisque remediis, prout res postulaverint, adhibitis. Neque semper aut mulier abortum facit, aut infans perit, quamvis aquæ nonnihil, vel sanguinis etiam, effluerit, nimirum quia placenta, si separata aliquantum fuerit, cum utero rursus concrelescere potest, et liquor *amni* iterum suppleri.

§28. Quum

828. Quum vero jam ad justum tempus ventum fit, partus sæpe difficilis, et laboriosus, aut periculosus, fit, propter plurimas causas, quas speciatim perpendere, et idonea singularum auxilia excogitare, obstetricis est. — Sat erit hic memorasse, partum naturalem et felicissimum, neque dolore neque periculo quodam penitus carere: periculum vero et dolorem pariter fere majora esse, puellis junioribus, fœminisque annosis primiparis, nimirum, quia illis nondum justa est magnitudo, aut conformatio, aut robur, partium quæ in puerperio patiuntur; et his contra nimia omnium rigiditas transitum fœtus difficiliorem reddit; maximum vero periculum instare, si prava vel uteri vel ossium pelvis fabrica fuerit, ita ut hæc partum transmittere nequeant, nec ille justam vim edere, neque eam sine lacerationis periculo tolerare. Mulieres quoque delicatæ, debiles, valde mobiles, doloris impatientes, morbis exhaustæ, quam sanæ et validæ, majore periculo versantur. Porro, varia fœtus, *placenta*, funisque

nisque vitia, partum sæpe difficilem reddunt, aliquando prorsus impediunt; veluti deformitas fœtus, ingens caput, situs monstruosus; *placenta* insolitæ parti uteri concref-cens, funis nimis longa, præter naturam circa fœtum contorta, &c. Hujusmodi vitiorum plurima simul concurrere possunt, variasque igitur et inexpectatas pariendi difficultates efficere.

829. Denique, *lochia* post partum sæpe aut nimia copia fluunt, aut subito supprimuntur: utriusque vitii ratio et damnum facile intelligentur, ex dictis (804.) præsertim si animum ad hoc attendamus, nimirum, corpus, doloribus puerperii et sanguinis jactura exhaustum et debilitatum, valde mobile et irritabile fieri; utrumque ipsum, delicatissimum organum, multum irritatum, ad inflammationem proclivem reddi: quo fit ut levissimæ causæ puerperas sæpe male afficiant, febremque vehementem, aut inflammationem uteri ad vicina viscera aliquando serpturam, et in gangrænam



gangrænam facile desituram, accendant. Vitiorum lactis post partum fecernendi, maxime frequentium, ratio jam (796.) redita est.

830. Observandum est, quo plus parienti et lactandi negotium naturæ committitur, eo fere utrumque felicius succedere; quod peritissimi qui obstetricis munus susceperunt medici nunc demum agnoscunt, et qui soli opem ferre norunt, parum arti, plurimum Naturæ, confidunt, nisi in raris exemplis jam (828.) recensitis.

C A P. XXII.

*De corporis nutrimento, incremento, statu, imminutione, et morte; morbisque qui varias ætates comitari et affligere solent.*

831. **E**N aliud Naturæ arcanum, ipsa generatione vix minus mirabile, neque eo melius intellectum quod magis aperte perficitur. Infans nimirum, parvus, debilis, animi pariter ac corporis impotens, paullatim crescit, et pulcherri-  
mam et perfectam formam adipiscitur, omnium tandem animi corporisque facultatum compos factus (14.).

832. Aliquamdiu corpus humanum viget, forma, sanitate, viribus, perfectissimum, labentibus vero annis, lenta ruina dilabitur

dilabatur (12.); flos ille juventæ perit, et vis animi et vigor corporis. Robustissimum quemque invida ætas minuit, immedicabili morbo, qui omnes mortales eodem cogit. Et profecto, tantis tamque continuis malis senectus premitur, ut mors ipsa, tot ægritudinum finis, optata, si scaperent homines, omnibus veniret.

§33. Philosophi et medici conati sunt rationem reddere harum rerum, et explicare quomodo corpus suum nutrimentum acciperet, cur certo tempore cresceret, cur crescere tandem desineret, et demum suo tempore decresceret. Quamvis multum hic subsit obscuri et incerti adhuc, tamen oportet novisse, quid de gravissimo argumento propositum fuerit, quid stabilitum, quid fictum: præterea, plurimi morbi ab ætate pendent, scilicet qui a mutationibus quas corpus variis ætatibus subit oriuntur; horum igitur naturam et causas medicum decet intelligere (22. 45.).



834. Certissimis et simplicissimis experimentis constat, omnes corporis partes, solidas pariter ac fluidas, variis functionibus vivi hominis assidue dissipari et deteri. Neque dubium est alimenta quæ sumimus hanc jacturam reparare. Hæc vero primo in ore, et ventriculo, et intestinis, confecta, et soluta, et concocta (608. 9.), postea forte in pulmone amplius mutata (559.), in sanguinem demum vertuntur (487. 499.), cujus gluten ut videtur solidis partibus nutrimento est.

835. Facile intelligitur humores corporis tali subsidio reparari posse: multo vero obscurior ratio qua solidæ partes reficiantur.

836. Sunt qui credunt, neque profecto parvi nominis auctores, particulas solidarum partium, vasorum, fibrarum, ossium, telæ reticulatæ, variis vitæ muneribus detritas, serobes seu fossulas relinquere; hæcque fossulas, puta in intima superficie vasis  
cujusdam

cujusdam sanguinem vehentis, humore glutinoso qui præterfluit impleri, crassam ejusdem humoris partem attrahere sibi, tenuem demittere, juvante et exprimente perpetuo quo omnes partes agitantur motu et compressione; si fossula non penitus impleta esset, minorem quæ tunc superesset serobem, pari ratione, plus glutinis sibi attrahere et detinere; si vero plus justo hoc modo glutinis receptum esset, ita ut frustum vel minimum excresceret et emineret in medium vas, hoc brevi præterfluente rivo deteri, donec superficies interna ut antea levis et æqualis facta esset. Crediderunt porro hi auctores partes vasorum externas, et telam reticulatam, et fibras nervorum et muscutorum, et ossa demum simili fere modo nutriri, vel per vasa minuta gluten et terram vehentia et apponentia, vel per exhalatum humorem glutinosum (432.) qui omnia cava corporis irrorat: tandemque, expressa, et exhalata, et re-sumpta, tenuiore parte humoris nutrientis, solidam

solidam demum relinqui materiam, tantam et talem, qualis detrita fuerat.

837. Hujusmodi nutrimenti exemplum et demonstrationem crediderunt se conspexisse, in concretione vulneris, veluti parvæ arteriæ, quæ sua sponte coalescit, et fere hac ratione, quod brevi obturatur glutine effuso et concrecente in massam quæ sanguinis fluxum compescat, arteriamque ipsam refarciat, ita ut post paucas horas, humores iterum per eam more solito fluant, ne guttula quidem elabente: quicquid nimirum massæ glutinosæ in arteriam emeret, humorum rivus secum rapuit; quod superesset motus compressit in firmam substantiam, humoremque expressum vasa resorbentia hausiverunt. Massa vero glutinosa quæ circa fauciam arteriam formatur, haud ita subito abraditur; quamvis hæc quoque paullatim fere minuitur et evanescit, præsertim si vulnus leve fuisset: aliquando tamen, imprimis a graviore vulnere, fabrica vasorum aliarumque partium quæ



quæ vulnerata fuerant, ita læditur, ut nunquam bene refarciatur, et cicatrix major minorve, forte nunquam penitus delenda, immo ingravescens interdum, relinquatur.

838. Verum enimvero multum abest, ut hæc et hujusmodi commenta nutrimentum corporis bene explanent. Quamvis non dubium sit, humorem nutrientem per arterias ad omnes corporis partes deferri, et varios earum et muscutorum motus, ipsas arterias partesque vicinas, et sane omnes partes, usque comprimere; tamen non bene intelligitur quomodo materia adeo diversa, ex diversis quodammodo elementis constans, diversam prorsus fabricam habens, diversisque omnino dotibus gaudens, variis partibus, dentibus, ossibus, nervis, musculis, cartilaginibus, ligamentis, telæ reticulatæ, &c. apponatur.

839. Plurima enim ossibus inest terra, cujus parum omnino in aliis partibus reperitur. Neque ossa fere tantum comprimuntur

muntur ac partes quædam molles, veluti arteriæ. Quin et a vitio, raro profecto, sed interdum observato, parum istius terræ in ossibus deponitur, quæ ideo molliuntur: et interdum contra, substantia ossea in alienis partibus, musculis, visceribus, &c. deponitur, ita ut miser ita affectus, si vixisset, forte totus os factus esset.

840. Præterea, minuta et delicatissima organorum, puta musculorum nervorumve, fabrica, inter nutriendum conservatur, ita ut singulis suæ consent dotes, quod vix fieret, tali artificio quale auctores finxerint, nimirum, quod massam rudem et indigestam sufficeret in locum pulcherrimæ fabricæ detritæ et dilabentis.

841. Crediderunt alii summi viri nutrimentum per nervos, non per arterias, fieri; glutenque sanguinis in cerebro secretum, attenuatum, ab omni sale qui corrumperet purgatissimum, per nervos quodammodo percolari,

colari, adque varias partes deferri, juvante et propellente fluido quodam subtilissimo, mobilissimo, præstantissimo, quod in nervis inesse creditum est. — Simili fere modo plantas nutriri multi opinantur, quamvis sane nondum de his bene constet, multaue potius ostendant eas longe diversa ratione suum nutrimentum accipere. Neque profecto hæcenus constitit, cerebrum ullum discernere humorem, aut fluidum ullum in nervis inesse, aut tenue et purum gluten per eos percolari; nam neque tument ligati, neque secti ullum humorem fundunt; neque subtilissimam auram, qualem inesse iis nuper et olim opinio fuit, talem humorem, aqua saltem crassiolem, propellere posse; neque demum nutrimentum per nervos fieri; nam ovum, et *placenta*, et funis umbilici sine nervis nutriuntur et crescunt, et fœtus sine capite nati sunt satis bene aliti, et in animalibus frigidi sanguinis, vitæ multo quam homo tenacioribus, artus, puta crus et femur, bene alitur, neque marcescit, secto magno qui eum adit nervo. Ne-



que demum melius intelligitur quo pacto per nervos, potius quam per arterias, sua singulis organis materia (838.) sua singulis fabrica daretur.

842. Utcunque hæc se res habuerit, scire semper juvabit, nutrimentum multum affici, et vel promoveri vel impediri, non modo statu et actione arteriarum nervorumque, sed plurimis aliis rebus de quibus melius constat. Obstructo vel immutato sanguinis per arteriam motu, artus quem hæc adibat, friget, torpet, et simul marcescit, donec motus sanguinis vel per solitas vias restituatur, vel per novas, forte per ramos communicantes, quas brevi sibi legit: aliquando tamen artus, post talem obstructionem, nunquam ut antea torosus fit. Plurimo quoque detracto sanguine, totum corpus marcescit.

843. Sæpe quoque a paralyfi, vel generali vel partis cujuslibet, partes affectæ marcescunt; quod signum semper malum est, morbumque vel prorsus insanabilem, vel

vel fanatu difficillimum, indicat. Talis artus paralytici tabes fieri potest, vel propter vim arteriarum simul cum vi muscutorum pereuntem aut labefactam, quod aliquando accidit; vel propter perpetuam artus quietem, quæ citra paralyfin, vel vitium motus sanguinis, vel sane morbum ullum, partes omnes, præsertim musculofas, marcescere facit, non secus ac justus usus eas torofas reddit; vel, denique, propter vim ipsam quæ jacturam solidarum partium novis appofitis particulis reparat, deficientem et corruptam, si hæc creditur in nervis sita esse.—Marcescunt quoque partes quædam, forte nunquam pristinam recuperaturæ molem aut vigorem, a magna sanguinis jactura, aut gravi vulnere, aut ulcere eas diu infestante.

844. Nutrimentum pendet multum a quantitate nec minus a qualitate ciborum quos fumimus, nimirum qui sub eadem mole aut pondere plus minus materie nutritis continent. Multum quoque pen-

det a concoctione bona vel imperfecta cibi qui sumptus fuerit.

845. Ut homo qui secunda fruitur valetudine fere bene nutritur, dummodo sat habuerit cibi idonei; sic qui adversa valetudine laborant plerumque male nutriuntur, et sæpe et subito marcescunt: scilicet, quia dum ægrotat quisquam cibum raro bene appetit, rarius adhuc bene concoquit, et sæpe insolito dispendio exhauritur, dissipatis nimirum ultra modum fluidis corporis partibus, et solidis multum detritis vehementiore cui subjiciuntur motu; quod in febribus omnibus imprimis notabile est. Neque profecto absurda videtur opinio, plurimos morbos, præsertim quos auctus sanguinis impetus comitatur, ipsi nutrimento obflare, impedita novarum particularum appositione.

846. Non dubium est maximam partem quod amittunt ægroti ponderis adipem esse (99. et seqq.), qui facillime consumitur,



tur, et brevi sæpe reparatur. Quædam vero exempla ostenderunt, omnes partes, solidas pariter ac fluidas, interdum consumi, deteri nimirum et dissipari citius quam novæ particulæ apponerentur.

847. Certa ætate accurate nutrimur sine incremento aut imminutione: quotidiana scilicet jactura quotidiano nutrimento reparatur. Prima autem ætate, multum et subito crescimus; proveciorem non crescimus, sed pinguescimus; novissima decrescimus iterum et contrahimur, ipsaque corporum nostrorum ossa diminui videntur.

848. Neque profecto adeo difficilis aut obscura harum rerum ratio, ac nutrimenti ipsius explicatio. Existente enim vi seu facultate quæ novam materiam corpori apponat, vetustamque deterat et ejiciat, a statu corporis variis ætatibus ostendi potest, hoc aliquamdiu auctum iri, certo vero tempore desitutum crescere, tandemque inceptum decrescere, et indies minutum iri, donec

donec vita ipsa, impeditis prorsus functionibus, deficeret.

849. Prima scilicet ætate, (neque aliter res se habet dum in utero latet homunculus), corpus mollissimum est et aptum extendi, et magna vis adest, fere a centro corporis incipiens, quæ totum distendat; cor scilicet multo grandius pro rata parte quam in adulto viro, multo magis irritabile, multoque frequentius micans. Vasa quoque quæ sanguinem vehunt adfunt numerosiora, molliora, magisque irritabilia, quam provecta ætate.

850. Hac vi omnes arteriæ, et quotquot cum iis connectuntur partes, totum scilicet corpus, centies et quinquagies milles quotidie aliquantum distenduntur, neque tanta solidis partibus corporis adhuc mollis et teneri, vis resiliendi est, ut pristinum situm et molem statim recuperent: nova autem dum distenduntur appositæ materia, non modo extenduntur, sed crescunt

cunt usque, perpetuaque compressione induratae, firmiores et validiores fiunt, et renituntur magis, ægrius in posterum extendendae, præsertim quum vis ipsa quæ distendit non æque augeatur: præterea, ista vis majori moli impensa, quamvis firmitas ejus eadem fuisset, eo minus valet, quod frictio omnis, et renixus a pondere partium quæ debent moveri, augeantur simul cum mole corporis.

851. Sic corpus aliquamdiu crescit, sed indies fere lentius. Novem mensibus quos in utero transit homunculus, staturam pedis cum semisse acquirit; trium annorum spatio, quadruplo scilicet istius temporis, infans alium pedem cum semisse adipiscitur; quindecim vel viginti forte annis mox sequentibus, si tamdiu creverit, juvenis plenam staturam jam adeptus vix ultra sex pedes habet.

852. Neque tamen omnes partes crescunt pariter; quædam in fœtu mature formatae,



formatæ, et magnam, quum ex latebris suis prodeat infans, molem jam adeptæ, aut lentius in posterum crescunt, aut plane minuuntur; dum aliæ bene multæ, thorax nimirum, et pulmones, et artus, præsertim inferiores, multum, et subito, et plus quam aliæ partes, crescunt.

853. Sic variæ trunci corporis et artuum proportionēs variis ætatibus contingunt; quod pictores et sculptores bene norunt, ita ut colossus centum pedes altus infantem trimestrem exprefferit, et imago dimidium pollicem longa virum adultum et procerum repræsentaverit.

854. Caput imprimis, in crudo fœtu tertia vel forte dimidia pars totius homunculi, in infante quinta vel sexta pars, in puero septima, in viro perfectissimæ formæ, vix nona pars totius longitudinis erit. Quocitius vero pars quævis per primam corporis fabricationem evolvitur, et crescit in justam molem et formam, eo maturius tantam

tantam firmitatem et vim resiliendi adipiscitur, ut amplius distendi recusset, et sanguinis cursum igitur dirigat alias partes versus minus renitentes, et aptiores distendi. Hinc pubertas utriusque sexus, et mirum aliquando et subitum incrementum, imprimis artuum, eodem tempore quo partes superiores, et caput præsertim, fere desinant crescere.

855. Porro, corpus non statim quoquo-  
versum crescit. Justam et plenam statu-  
ram juvenis forte adipiscitur decimo octavo  
vel vigesimo ætatis anno, sed gracilis ad-  
huc, et forma adulto viro dissimilis, et vi-  
ribus impar. Paullatim vero aliud incre-  
mentum, et aliam adipiscitur formam, et  
quadratus fit et torosus, et thoracem am-  
pliolem, humeros latiores, ossa grandiora,  
juncturasque artuum validiores habet.

856. Verisimile est singulas corporis  
partes primo in longitudinem crescere,  
quia vis distendens secundum axes vaso-

rum agit maxime, donec hæc multum distenta, et firmiora facta, magis magisque indies renitantur, neque amplius se patiantur distendi. Tum vero eadem vis distendens quoquoeversum diffunditur per ramos e magnis truncis prodeuntes, qui ideo extenduntur ipsi, partesque quibuscum connectuntur extendunt simul.

857. Plurimæ aliæ res prima ætate concurrunt, quæ incrementum corporis multum promovent. Abundantia quædam sanguinis subesse videtur, minime profecto morbosa, quæ vasa sanguinem vehentia probe impleat atque distendat, præsertim arterias, quoniam hac ætate venæ multo majore vi quam arteriæ pollent (439.); quin et hæc sanguinis abundantia non modo vasa distendit, sed plus quoque nutrimenti suggerit, quam ad corpus sine incremento reparandum necessarium fuerit: neque dubium est plerosque infantes plenissimos fore, nisi vel huic usui impenderetur sanguinis abundantia quam habent, vel



vel plurimum ipsi semet exercerent; quippe qui multo plus pro rata parte quam adulti homines cibi sumant, et optime fere concoquant, et multum dormiant, et laxi, et ideo ad plenitudinem proclives, existant.

858. Et profecto, quamvis ista plenitudo, dum crescunt pueri, minime noceat, dummodo non ingens fuerit, quamprimum desinunt crescere, manifestissimis signis sæpe se prodit, nec raro, si debilioris constitutionis adolescens fuerit, gravissimos morbos inducit.

859. Finem incremento imponunt aucta moles, auctaque rigiditas universi corporis, et imprimis arteriarum perpetua actione et compressione rigescentium, et firmitas ossium, et, ut clari quidam auctores opinantur, ingens renixus cartilaginum fines eorum tegentium, jam multum crescentibus ossibus compressarum, neque ulteriorem compressionem tolerantium.

860. Justo demum inter vim distendentem et renixum, interque arterias et venas, æquilibrium stabilito, corpus aliquamdiu neque crescit amplius neque minuitur. Postea vero aliud minus verum nutrimentum acquirit, plurimo scilicet secreto et collecto adipe sub cute, et in abdomine, et inter musculos, cujus ratio suo loco jam reddita est (99. et seqq.).

861. Paullatim vero corpus marcescit iterum, non modo resumpto adipe, sed omnibus fere partibus male nutritis. Rigescent indies nimirum omnes partes solidæ, et maxime arteriæ, et hæ quoque arctiores fiunt, et plurimæ minores penitus concluduntur, et renixus ubique corporis major est, et sanguinis motus languidior, et aliquatenus impeditus, et cor et arteriæ minus irritabilia facta, lentius, et debilius quoque micant, et plus æquo sanguinis in venis congeritur, minus in arteriis, et plurimæ functiones impediuntur, et vires omnes deficiunt, et tota machina ab omni parte dilabitur.

862. Non

862. Non est igitur dubitandum, quin vita ipsa citius vel ferius mortis causa foret. Pauci vero hac naturali et inevitabili morte senili absumuntur: innumeri enim qui vitæ semitam obsident morbi, maximam gentis humanæ partem semper rapuerunt, ita ut vix decimus quisque septuaginta, vix millesimus quisque nonaginta annos compleverit; et ex iis qui senium attigerint, longe maxima pars non mera senectute, sed variis, quibus ætas illa opportuna facta est, morbis absumpti fuerunt.

863. Languente tandem propter rigiditatem omnium partium solidarum, et torporem et debilitatem virium moventium, sanguinis motu, cordeque non amplius ad proprium munus valente, sanguinis motus in partibus corporis extremis primo perit, in pectore, et trunco, et capite adhuc superstes. Idem in pulmone jam deficiens, anhelationem quandam, et respirationem laboriosam inducit (593.), ad promovendum sanguinis transitum per pulmonem. Hoc tandem conatu parum valente, viribusque penitus



tus exhaustis, ultimæ inspirationi, exspiratio longa, plena, sua sponte succedit; omnibusque functionibus ad vitam necessariis simul cessantibus, hæc facile et sine convulsione cum morte commutatur.

864. Varia autem, præter hanc senilem et naturalem, quæ forte omnium fere rarissima habenda est (862.), existunt mortis genera; variæ nimirum, et prope innumeræ causæ sunt, quæ machinam adeo delicatam atque compositam, totque functionibus conservatam ac corpus humanum, corrumpere possint, et tandem ad finem perducere; præsertim quum variæ ejus partes variæque functiones ita conjunguntur, ut aliæ ab aliis plane sustineantur; et igitur siquid cuivis earum acciderit mali, non ejus solum, sed totius forte machinæ vires simul collabantur.

865. Omnes vero istiusmodi causas enumerare, neque res ipsa postulat, neque operis nostri propositum finit. Sat fuerit monuisse,

monuisse, eas numerosissimas esse, et ab omni parte instare ; plerumque tamen, (forte semper, nisi propter summam mortis celeritatem observandi locus plane desit), qualiscunque fuerit origo seu causa remotior mali, aliquam functionum vitalium, actionem nempe cerebri nervorumque, aut sanguinis circuitum, aut respirationem, prius impediri aut lædi, aut aliquo demum modo præter solitum affici, quam vita penitus extinguatur. Quoniam vero, ut jam expositum est, arctissimus has inter functiones intercedit nexus, (408. et seqq.), læsa una alterave earum, omnes plerumque simul laborant.

866. Perspicuum quoque est ex signis illarum functionum deficientium, aut impeditarum, aut variis modis male se habentium, medicum in plerisque morbis periculum agrotanti instans præscire posse, et vel mortem, si spes nulla superest, prædicere, vel si læsio neque natura neque magnitudine prorsus insanabilis fuerit, tum

idoneis

idoneis adhibitis remediis miserum quasi ex mortuis revocare.

867. Medicum igitur et decet et oportet signa appropinquantis mortis novisse: quæ quidem licet in variis morbis haud parum varient, et non modo singula accidentia, sed plurima simul juncta, sæpe incerta sint, tamen plerumque in iisdem morbis et fatis constantia observantur, et fatis superque certa; præsertim si non modo ad signa manifesta, sed simul ad naturam et causam morbi, et conditionem ægri, medicus animum attenderit.

868. Imprimis igitur, ingens debilitas (377.), tum subita tum usque augescens, ita ut æger neque se movere, neque sustinere ut solebat in lecto, neque demum loqui, neque cibum sumere aut devorare possit, cadente scilicet maxilla, et vi propria gulæ percunte; tremores, aut contractiones, aut convulsiones musculorum aut artuum; defectus vel amissio sensus cujusvis,



cujusvis, five externi five interni, præsertim visus, vel tactus; stupor, torpor, delirium grave, in plerisque morbis, acutis pariter atque vetustis, mala signa sunt.

869. Porro, pulsus arteriarum multum vitiati, five valde celeres five tardi facti fuerint, five præter modum validi, five demum, admodum debiles, et obscuri, et vix sentiendi, aut abnormes et intermittentes, cum vultu pallido et collapsio, oculorum splendore extincto, artubus frigentibus, sudore frigido et tenace, spuma circa os, et gravi anxietate, plerumque summum periculum, sæpe instantem mortem, ostendunt.

870. Respiratio quoque imperfecta, difficilis, laboriosa, et strepens facta, ubi prius organa respirationis non laboraverant, pessimum est.

871. Sæpe etiam in longis morbis, nonnunquam vero in acutis, magna corporis

macies, aspectus cadaverosus, et facies illa *Hippocratica* dicta, et in utroque genere morborum, foetor insolitus, et tandem putredo generalis, aliquamdiu ante mortem observantur.

872. Hæc quidem et hujusmodi signa in variis morbis accidunt, eorumque magnitudinem atque periculum probe declarant. Plurima vero alia, et longe diversa, in aliis atque aliis morborum generibus, secundum horum naturam, partesque corporis quibus maxime incumbunt, se ostendunt, eorumque periculum, interdum fortasse insanabilem naturam, ab ipso initio commonstrant.

873. Ipsa autem signa (867.) quæ maxime infauſta, et plerumque lethalia habentur, periculo sæpe carent, ſcilicet cum a cauſis levibus aut fugacibus, vel ſaltem facile medicabilibus, oriuntur; veluti in *hysteria*, *asthmate*, *scorbuto*, febribus quibusdam

busdam intermittentibus, multisque aliis morbis.

874. Causa mortis, saltem proxima ejus causa, debet esse semper eadem, nimirum quæ consistit in amissione illius ignoti status *generis nervosi*, qui vitam, quatenus corporea est, efficere videtur. Quoniam vero status ille adhuc prorsus ignotus est, plenam et proximam mortis causam, quæ nihil aliud est quam ejus extinctio, pariter ignotam esse plane oportet.

875. Quin et causæ mortis remotiores, quales nimirum ignotum istum statum *generis nervosi* inducunt, in longe plerisque exemplis vix melius intelliguntur; neque sane inspectione cadaverum detegi possunt. Sæpe enim, ut videtur, vis *generis nervosi* deficit, cum fabrica ejus, quatenus aut scalpello aut sensibus nostris explorandi facultas data sit, sana et integra manet. Hujusmodi exempla quotidie observantur, in corporibus eorum qui febribus quibus-



dam, aut multis similibus morbis, aut paralyfi, aut convulfionibus, aut gangræna, aut variis venenis, vel in ventriculum, vel in pulmones, vel in fanguinem receptis, aut fulmine, aut gravibus animi affectibus, aut subita morte, aut demum interdum vi externa vel capiti vel ventriculo illata, extincti fuerint.

876. Haud raro tamen læfiones infignes, vel ipsius cerebri, vel alicujus faltem partis *generis nervosi*, in cadaveribus deteguntur, quæ vulgo, quamvis parum accurate, pro plena et proxima causa mortis habentur; veluti si cervix aut calvaria fractæ fuerint, aut cerebrum compressum, aliterve læsum, five a depressa aliqua parte calvariæ, five a tumoribus intra caput, five a sanguine, aut sero, aut pure, aut aqua in eodem effusis, five tantum a vasis sanguine plus æquo turgentibus, ut in *epilepsia*, *apoplexia*, paralyfi, hydrope, febribus quibusdam, nonnunquam accidit.

877. Sæpe

877. Sæpe quoque impedimenta aliarum functionum vitalium, et interdum etiam insignes læsiones fabricæ partium quæ iis inserviunt, deteguntur, et merito pro causa, quamvis, ut jam expositum est, non proxima causa, mortis habentur; veluti cor vel vas aliquod magnum ruptum, vel erosum, vel obstructum, vel pulmones inflammati, vel sanguine, aut fero, aut muco, aut pure, aut aqua impleti, vel tumoribus vicinarum partium, aut plurima aqua in pectore collecta, impediti; et similia.

878. Sæpe tamen nulla, aut *generis nervosi*, aut partium quæ sanguinis circuitui aut respirationi inserviunt, detegi potest læsio, sed tantum vitium aliquod organorum functionum naturalium, vel demum, labes quædam, aut sua natura generalis, aut partem aliquam corporis primo inficiens, quamvis paullatim, totum corpus corrumpens; unde quædam functiones ad vitam necessariæ (8. 9.) impeditæ, valetudo

do ab omni parte labefacta, infirmitas indies augefcens, et tandem mors inevitabilis.

879. Hæc ultima linea rerum provida Natura curavit, ut fua formidine non careret; neque obfcurum confilium cur ita mortalia pectora effinxerit, ut repugnanter omnino hanc vitam, utcunque gravem et ærumnofam, cum alia et ignota commutemus. Multum vero erraverunt mortales, et male fibi confuluerunt, qui terrorem mortis intendere, fibimet perfuadentes graviffimum illam femper fecum angorem ferre, nec fine fummo cruciatu cuiquam unquam effe moriendum. Quod profecto eo magis verifimile hominibus vifum eft, quod immanes dolores aliquando necant, et moribundi fæpe agitantur multum, et anhelant, et gemunt, et convelluntur, non fecus ac miferi gravibus doloribus cruciati.

880. Nihilominus



880. Nihilominus vero et ratio et observatio satis demonstrarunt, nullum unquam esse moriendi sensum, causasque quæ vitam extinguant tales sæpe esse, quales neque dolorem neque sensum ullum dare possint, corporisque demum conditionem, diu plerumque antequam animam exhalaverit moribundus, illiusmodi esse, quæ et dolorem et omnem sensum pariter auferat.

881. Illis imprimis qui morte senili (quæ sola naturalis dici potest) absumuntur, placida mors est; scilicet qui nulla adhibita vi quæ e vivis raperet, tamen vivere desinunt, ut matura poma ex arboribus sponte cadunt. Quin et tantus in his stupor adesse solet, ut longe prius sensus omnis sopitus et extinctus fuisse videatur quam vita. Neque profecto in iis aut causa ulla doloris adesse videtur, aut ulla observantur inter moriendum doloris indicia.

882. Porro,

882. Porro, eadem fere ratio est eorum lethi quos magis viridi ætate varii morbi rapiunt. Hi morbi, puta febres, similesque, sine dubio donec vires vitæ et sensus integri supersunt, sat superque doloris et molestiæ faceffunt: sed quum jam ad extrema ventum est, fractis viribus, et deletis fere omni sensu, neque causa doloris vehemens esse potest, neque si fuerit, propter corporis conditionem, dolorem ullum excitare.

883. Causa vero mortis sæpe talis est, qualis non modo non creet dolorem, sed sensum omnem plane sopiat adimatque. Sic multi sunt morbi somniculosi, in quibus ægri nunquam de dolore, vix quidem de molestia, conqueruntur. *Syncope* quoque sæpe morti continuata est, neque in alterutra aut dolor, aut sensus ullus, adesse videtur. Moriuntur quoque interdum non rupto somno, qui sani prorsus et vegeti obdormiverant.

884. Quin

884. Quin et in iis exemplis in quibus mors violentissima est, five intus five extrinsecus ejus causa fuerit, summa mortis celeritas omnem moriendi sensum plane aufert.

885. Satis perspicuum est, multos morbos, aliasque mortis causas, insignem dolorem, et molestiam, et anxietatem facere; veluti si magna vis parti sentienti admota fuerit, aut inflammatio oborta, vel denique, si actiones aliquæ ad vitam necessariæ impeditæ fuerint, quod a mera debilitate sæpe fit. Neque profecto est negandum, multos hoc modo mortem sibi met instantem scivisse, et igitur amicis et astantibus in ipso fere mortis articulo comiter valedixisse. Semper vero memoria tenendum est, talem molestum sensum inter vivendum, non inter moriendum, adesse, eundemque fere prius desinere et extinguere quam animam moribundus esset. Ad summam igitur, ut videtur, morimur, non secus ac animo linquimur, aut con-



vulsionibus corripimur, sine dolore, aut sane sensu ullo, quamvis eo perducere queant variæ causæ quæ plurimum cruci-are possint.

886. Ridiculum forte primo aspectu videretur, ad testimonium tali de re provocare; sed multa extiterunt exempla hominum in vitam reducum postquam tam pene exanimes fuissent, plurimis et admodum diversis mortis generibus, ut neque ulla vitæ indicia exhiberent, neque credibile esset sensum ullum superstitem fuisse. Talibus vero hominibus nulla solet esse memoria gravis doloris aut molestiæ sensus, ne quidem cum vehementissimis convulsionibus agitati fuissent. Minime igitur absurda videtur pulchra clari et elegantis auctoris sententia, initii et finis vivendi eandem quod ad sensum rationem esse, neque cum altero voluptatem quantum recordamur, neque cum altero dolorem quantum novimus, aut conjicere possumus, necessario conjungi.

887. Efflata

887. Efflata anima, cadaver friget totum, rigit, putrescit, et brevi in pristina elementa solvitur.

888. Homo, utcunque de brevitate vitæ conqueri soleat, cum aliis animalibus comparatus, longævus habendus est. Quamvis plurimum hic pendeat a prima atque congenita corporis fabrica et constitutione nondum plene intellectis, multum quoque conferre potest mollior totius corporis compago, tardius rigescens, diu crescens, et fero ad justam formam perducta.

889. Verisimile est, molliores et laxiores homines modo fani fuerint, quam firmiores et validiores diutius vivere, et tardius senescere; cujus rei plurima exempla exstiterunt. Plurimis vero aliis adhuc opus erit, priusquam hanc sententiam stabilire liceat. Satis autem constat, vetulas, si modo ætatem qua menses solent desinere feliciter superaverint, diutius et sanius vivere quam senes, et mentis viribus minus

imminutis frui: probabile enim videtur desipientiæ et mortis senilis candem fere rationem esse (300.).

890. Satis superque etiam constat, durum et perpetuum laborem quali magna pars hominum sibi suisque victum quærun, quamvis a multis morbis tueatur, senectutem festinare, et ideo mortem præmaturam inducere. Optimates enim et divites, quamvis luxu et ignavia debilitati, et multis sæpe morbis fracti, tamen tardius senescunt, et igitur diutius vivunt, quam inopes artifices atque agricolæ, quibus res angustæ domi temperantiam et laborem fatis persuaferant.

891. Vitæ hominis spatium, post diluvium *Nôachi*, idem fere videtur fuisse ubique terrarum orbis. Rarissima hominum exempla qui centum annos compleverint, et vix unum alterumve exemplum humana potest memoria recordari, vitæ ad centum et quinquaginta annos protractæ.

892. Nonnulli



892. Nonnulli diuturnitatis vitæ prærogativam ab ipsa natura et prima et congenita corporis fabricatione habent, scilicet quæ sæpe hæreditaria est, et in quibusdam familiis fere constans. — Alii, natura debiles et morboſi, vel intemperantia, et vitæ genere parum idoneo, fracti, perpetua cura, et sollicitudine, et temperantia, sæpe novam et meliorem constitutionem corporis sibi met compararunt, et vitam ultra solitos limites interdum protraxerunt: cujus rei eximium *Cornaro* exemplum et documentum existat.

893. Mens quoque læta, et bene recta, et modicis et gratis affectibus leniter excitata, neque studiis intensioribus, neque gravibus curis, neque miseris tumultibus, lacerata, ad vitæ diuturnitatem haud parum conferre videtur.

894. Quamvis non sit credibile remedium unquam repertum iri quod juventutem præteritam revocaverit, tamen haud absimile videtur, varia remedia senectuti  
moram

moram afferre posse, ejusque mala sublevare, et vitam suaviorem reddere, et nonnihil forte protrahere; victum scilicet fatis nutrientem et concoctu facilem, exercitationem modicam, aliquantum potus generosi, et remedia nonnulla quæ laxant corpus, aëra imprimis calidum, et balneum aliquando. Hujusmodi victus et vitæ genus corpus nutrit, et non onerat, *genus nervosum* grate excitat alitque, sanguinis motum jam languentem juvat, secretiones promovet, et omnes solidas partes molliores, et mobiliiores, et magis sentientes, reddit.

895. Statura quoque hominum, non secus ac vitæ diuturnitas, eadem fere videtur semper et ubique fuisse, nisi in regionibus nonnullis frigidissimis, quas aliud et brevius genus hominum habitat. Parum adhuc constat de gigantibus *Patagoniæ*; non dubium vero est, quosdam solitam hominum magnitudinem tantum excedere, ut non immerito gigantes appellentur; hi vero raro bene formati observantur, et sæpe

ſæpe debiles, et hebetes, et ad omnes labores parum apti. Quin et ex principiis mathematicis demonſtrari poteſt, gigantem, qui ſolitam hominum ſtaturam multum excederet, dummodo ex eadem confectus eſſet materia ac alii homines, penitus inhabilem fore, propriumque corpus ægre tracturum.

896. Nani quoque aliquando ſpectantur, qui vix dimidiam, vel ſane tertiam partem, juſtæ magnitudinis attigerint. Hi autem deformes fere ſunt, gibboſi ſæpe, aut ingente capite inſtructi, raro fœcundi, nunquam gentem nanorum daturi. Morbus aliquis plerumque cauſa fuiſſe videtur, cur tales nani vel non creſcerent more ſolito, vel forte decreſcerent.

897. Variat tamen nonnihil ſtatura apud diverſas gentes, et magis adhuc in ſingulis hominibus; ita ut differentia pedis et amplius inter bene formatos homines obſervetur; neque ſane vis et robur corporis



ris a magnitudine ejus multum pendent. Proceritas in quibusdam familiis fere perpetua observatur; sæpe igitur pendere oportet a prima et hæreditaria corporis fabrica et constitutione. Viri in universum quam fœminæ haud parum proceriores sunt, et longe diversam formam habent. Cætera animalia paucis generationibus crescunt vel minuuntur multum, prout cibus abundaverit vel defecerit. Homo quoque nonnihil hujusmodi experitur, quamvis haud tantum ac belluæ.

898. Primo forte aspectu absurda videtur opinio, mutationes istas, quas variis ætatibus corpus subit, morborum causas esse, præsertim quum animalia fere omnia, et multi etiam homines, sani omni tempore vivant, et alia sanitas infanti, non fœcus ac alia facies, alia viro, alia seni, esse debeat.

899. Verum enimvero non eo minus certum est, plurimos morbos certa tantum vitæ tempora infestare (45.), eosque a statu corporis,

corporis, tum nonnihil a perfectissima sanitate deflectentis, et ad quosdam morbos proclivis facti, pendere: ita ut, dum annilabuntur, et corpus alia atque alia ratione mutatur, proclivitate ad quosdam morbos correcta vel penitus deleta, aut sane vivatur, aut novi accedant, et prioribus contrarii, morbi.

900. Difficillimum foret indicare res omnes quæ variis vitæ temporibus corpus tot diversis morbis opportunum reddant. Sat fuerit memorasse, istas mutationes, morbosque igitur qui ex iis profluunt, ad certa capita non inepte referri: scilicet ad statum universæ compagis (69. 92.) partium solidarum, mollioris, aut firmioris iusto, ad statum *generis nervosi* (107. et seqq.) nimis, vel nimis parum sentientis aut mobilis, debilis aut validi (367. et seqq.), ad statum circuitus sanguinis liberi aut impediti, languidi aut vehementis, æquabilis aut abnormis (438. et. seqq.), ad statum secretionum et excretionum, copiosarum, vel deficientium et impeditarum (700. et seqq.), et

denique ad statum quarundam partium quæ certo tempore evolvuntur, et agunt aliquamdiu, et tandem desinunt agere (750. et seqq.). Nonnihil quoque ad varios singularum ætatum morbos conferre videtur conditio humorum, qui multum variant copia, crassitudine, acrimonia (507. et seqq.).

901. Sic infantes, quibus omnes solidæ partes mollissimæ et debiles sunt, et *genus nervosum* valde irritabile, et liberrima sanguinis distributio, et secretiones et excretiones copiosissimæ, sæpe deformes fiunt, sæpe hernia varii generis, aut prolapsu, et strumis, et *rachitide*, plectuntur, et sæpe convulsionibus aut febriculis a levissimis causis afficiuntur. Idem vero, gravi febre, aut valida inflammatione, aut sanguinis profluviiis, aut phthisi, aut paralyfi, aut podagra, aut rheumatismo, aut hydrope, nisi capitis, qui sæpe vel a strumosa corporis constitutione vel a nimio sanguinis caput versus fluxu pendet, raro laborant.

902. Infantes



902. Infantes quoque sanguinis jacturam male ferunt, tenuiorum humorum bene; male etiam inedia tolerant, marcescunt subito dum ægrotant, sed cito convalescunt, et pinguescunt iterum. Medicamentis omnis generis vel levissimis, facile afficiuntur, sopiuntur, excitantur, purgantur. Mirus autem teneris eorum corporibus contra morbos renixus, ita ut sæpe præter omnem spem convalescant, vitæ quam adulti homines multo tenaciores.

903. Adolescentes, aut juvenes, aut viri, firmiores et validiores quam infantes, et minus irritabiles, a morbis infantilibus plerumque immunes facti, aliis sæpe opportuni fiunt. Scilicet quum desinunt crescere, sanguine nimis pleni fiunt, qui fere in arteriis (439. 40.) pro rata parte magis quam in venis congeritur, et sæpe e partibus quæ amplius distendi recusant (854.) sponte erumpit, et primo e naribus, postea e pulmone, non sine magno sæpe phthisicos periculo. Juvenes quoque, par-

tim ob hanc nimiam sanguinis abundantiam, partim ob auctum universi corporis vigorem, gravissimis febribus et inflammationibus obnoxii fiunt. Puellæ præterea, singularem constitutionis mobilitatem, prius vix observandam, et, ut creditur, a statu genitalium organorum quodammodo pendentem, acquirunt, qua ad *hysteriam* proclives fiunt.

904. Virili ætati optima plerumque et firmissima valetudo contingit; nimirum quum omnes corporis partes justam proportionem, et formam, et vigorem, jam adeptæ sint, neque nimia vel universæ compaginis vel quarundam præ aliis partibus rigiditas accesserit, neque vis *ner-voſa* deficiat, neque motus humorum languescat; et sic viri a morbis infantiae aut juventutis fere immunes, senii morbis nondum facti sint obnoxii.

905. Status autem corporis humani, strictius sic dictus, nullus profecto existit:  
quam-

quamprimum enim suam perfectionem attigerit, statim, quamvis sæpe lente, dilabitur, et sane per vim et actionem perpetuam earundem causarum, quæ id prius ad suam perfectionem perduxerant (12. 19.).

906. Rigescunt primo partibus quæ maxime comprimuntur, arteriæ brevi nimis duræ et validæ fiunt, et coarctantur paullatim, et vim et firmitatem venarum tandem æquant vel superant (439. 40.), quo fit ut plus justo sanguinis in venis congeratur, præsertim in iis partibus in quibus languidius movetur, et quarum venæ valvis carent, et parum auxilii habent a motu muscutorum. Sic in abdomine (417.) et in capite (418.), provecta ætate, plurimus sanguis sæpe congeritur, unde *hæmorrhoids*, et viscerum obstructions, et hydrops aliquando, et paralyfis, et *apoplexia*.

907. Hujusmodi mala, a statu venarum et arteriarum pendentia, eo frequentius accidunt,



cidunt, quod multi senes sanguine plus justo pleni fiunt, scilicet qui sæpe bene valent, et bene concoquunt, et epulis lautioribus indulgent, et corpora parum exercent, et parcam per cutem exhalationem habent, nimirum cujus plurima vasa et foramina fere concluduntur.

908. Citra vero nimiam sanguinis abundantiam, ejusve congestiones aut distributiones abnormes, deficiente vi *nervosa*, et languente sanguinis motu, paralyfi et hydropi varii generis, et obstructionibus, et carcinomati (744. et seqq.), senes obnoxii fiunt: ob easdem quoque causas, visus obtunditur, auditus hebescit, et omnes demum sensus fatiscunt.

909. Porro, innumeris vitiis plerique senes plectuntur organorum quæ urinæ inserviunt (730. et seqq.), diu forte sine gravi periculo aut incommodo: iidem vero morbi indies ingravescentes, et fere immedicabiles,

medicabiles, suo tandem periculo non carebunt.

910. Aliis demum morbis senes magis quam juvenes opportuni sunt, veluti podagræ, calculo, &c. quorum ratio magis obscura est: quippe qui non senibus proprii sint, qui multum pendeant a prima et congenita corporis fabricatione, et qui sæpe jungantur cum aliis morbis, præsertim ventriculi.

911. Denique, haud absimile videtur vitium quodvis diu latens, neque forte suspectum (43.), tum demum se manifeste proditurum, quum, viribus omnibus deficientibus, omnes functiones impedian-  
tur, et malum in partes jam debiles et morbosas præcipue incumbat (360.). Hæc videtur esse ratio cur multi morbi hæreditarii, prima ætate, vel etiam consistente, raro observandæ, senectute demum erumpant.

C A P. XXIII.

*De constitutionum varietatibus.*

912. **S**Anitas non omnibus prorsus eadem est ; sua enim singulis hominibus constitutio constat, non secus ac sua facies, aut forma corporis. Hujusmodi varietates medici attentionem jure sibi vindicant, quippe quæ tantæ et tales sæpe observentur inter homines ejusdem ætatis, et regionis, eodem cibo et vitæ genere utentes, ut alii aliis plectantur morbis, et quod aliis profit, aliis valde noceat, neque sane eadem remedia, aut diætæ, aut vitæ genus, omnibus conveniant. Res igitur haud levis momenti erit uniuscujusque ægroti constitutionem corporis penitus novisse.

913. Hujusmodi



913. Hujusmodi vero notitiam sola experientia docet: quædam vero differentię, quales frequentius occurrunt, ab antiquissimis temporibus observatę sunt, et certis nominibus insignitę. Hę varietates, *temperamenta* dicuntur, (tanquam a mixtura, et quasi temperatione, variorum quę in humano corpore *insunt* elementorum, originem ducerent); eorumque quatuor primaria *temperamenta* vulgo numerantur; sanguineum, scilicet, melancholicum, cholericum, et *phlegmaticum*. De ratione nominum parum constat; nec multum refert quo vocabulo utamur ad rem quamlibet exprimendam, dummodo id vocabulum bene definiatur; et nefas certe foret nomina mutare, quę omnibus in ore sunt, et bene intellecta.

914. Plurimum revera hallucinati sunt medici omni tempore, qui *temperamentorum* varietatum conati sunt rationem reddere, et unumquodque retulerunt ad certum humorem vel elementum plus justo in corpore

abundans, veluti aquam, sanguinem, bilem, atram bilem, gluten, terram. Neque soli veteres observarunt bene, et descripserunt fideliter, quamvis male de iisdem rebus ratiocinati sint. Erit quoddam saltem, descriptiones et observationes istas novisse, quatenus ad usum medicum spectent, utcunque obscura ratio earum videatur.

915. *Temperamentum sanguineum* dignoscitur constitutione corporis pleniore, compagine molliore, cute delicata, tenui, molli, calida, venis magnis, conspicuis, cæruleis, eximio vultus colore, capillis sæpe rufis aut flavis, aliquando nonnihil fuscis. Homines tali constitutione præditi, præter solitum sentientes et irritabiles observantur, et pulsus habent solito frequentiores, et sanguinis motum liberrimum, et secretiones et excretiones fere copiosas, raro obstructas, et animum plerumque lætum et hilarem, aliquando levem; nam animi

nimi non fecus ac corporis varietates a *temperamento* sæpe pendent.

916. Hoc *temperamentum*, præ aliis, sanguinis nimix abundantix et vehementi motui, febribus, morbisque inflammationem habentibus, *rheumatismo*, anginx, &c. et morbis *nervosi generis*, *hysterix* imprimis, obnoxium est. Huic igitur temperantia in victu et potu, et exercitatio crebra conveniunt, et aliquando exinanitiones, quas bene tolerare solet.

917. *Temperamentum* melancholicum huic fere contrarium videtur, compagine firmiore, sæpe macra, cute crassa, fusca, hirsuta, magnis venis, crinibus et superciliis et oculis nigris, atro vultus colore, notatum. Hoc *temperamento* præditi pulsus fere habent tardos, et sanguinis motum languidiorem, sanguinem ipsum, ut fertur, crassiores solito, et secretiones et excretiones parcas, aliquando deficientes, *genusque nervosum* parum sentiens aut mobile, et ani-



num gravem, sæpe tristem, meditandum, haud facile commovendum, quo semel commotus est affectus tenacissimum, in negotiis indefessum, in studiis acutissimum, in amore ferventissimum, fidelissimum, ad poësin sæpe aptum, in melancholiam et insaniam aliquando proclivem (289. et seqq.). Idem patiuntur multum a vita otiosa et sedentaria, et stimulantibus et calefacientibus remediis: sæpe male concoquunt, et a ventriculo laborant, et *hypochondriaci* obnoxii sunt, quæ in aliis constitutionibus rarius observatur. Dicuntur præ aliis hominibus obstructionibus viscerum abdominis obnoxii esse.

918. Medium fere hæc inter locum occupat cholericum *temperamentum*: nimirum, quod denotatur corpore molliore, mobiliore, cuti minus fusca et hirsuta, colore vultus magis vivido, pulsu frequentiore et validiore, secretionibus liberioribus, et animo irritabiliore, et, ut creditur, ad  
iram

iram præfertim magis proclivi, quam in melancholico *temperamento* observantur.

919. *Phlegmaticum temperamentum* insignitur, laxa et debili corporis compage, sæpe cum obesitate, vultu pallido, cute levi sine pilis, capillis albis, pulsu tardo, debili, vasis sanguinem vehentibus parvis, humoribus, ut fertur, aquosis magis et blandioribus solito, eorumque motu languido, concoctione, secretionem, excretionem, tardis, interdum impeditis, animo hebetem, torpido, aliquando somniculofo, haud facile commovendo, ad metum et avaritiam maxime proclivi. Tali constitutione præditis, exercitatio, et stimulantia remedia aliquando, conveniunt; neque multum nocet interdum caluisse mero.

920. Omnia hæc *temperamenta* variis modis et proportionibus miscentur: veluti *phlegmaticum* cum sanguineo aut melancholico; cujusmodi conjunctiones quotidie spectamus.

921. Aliud

921. Aliud demum *temperamentum* nonnulli describunt, quod *nervosum* vocant; nec immerito, quippe cui insignis *generis nervosi* debilitas et mobilitas contingant. Talis *generis nervosi* conditio in omnibus *temperamentis*, facilius vero in sanguineo vel puro vel cum *phlegmatico* mixto, effici potest, vitæ genere scilicet otioso et sedentario, nimia sanguinis abundantia, calore, aliisque causis jam (367. et seqq.) recensitis; hinc apud divites, et ignavos, et luxuriosos, frequentissima; veteribus fere ignota, saltem multo rarius inter eos observata, recentibus jam fere per centum annos satis superque cognita.

922. Hoc *temperamentum*, multis morbis *generis nervosi*, veluti *hysteria*, *dyspepsia*, &c. opportunum est: exinanitiones fere omnes, præsertim jacturam sanguinis, et medicamenta pleraque fortiora, male fert; et roborantia remedia sæpe postulat.

923. Alia



923. Alia fere viris, alia fœminis, constitutio datur. Hæ nimirum plus habent sanguinei, vel aliquando *phlegmatici temperamenti*; scilicet quæ molliores, et delicatiores, et debiliores sunt quam viri; et animos pariter ac corpora mobilia habent, et humores blandiores; et magis opportuna sunt morbis *nervosi generis*, minus vero morbis qui inflammationem habent.—Pari igitur ratione fœminæ a viris differunt quod ad corporis constitutionem, quamvis haud tantum ac infans differt ab adultō (901. et seqq.).

924. Neque variis ætatibus idem cuiquam *temperamentum* constat. Omnia enim mutantur tempore, aliudque interdum fere in aliud transit. Sic prima ætate sanguineum purissimum observatur; idem vero media ætate ad cholericum, novissima ad melancholicum, appropinquat; et melancholicum contra, prima ætate sanguineum fere participat.

925. Præterea,

925. Præterea, a natura cœli sub quo vivimus, victusque et vitæ genere quo utimur, corpus haud parum afficitur, hominesque sic aliis morbis obnoxii fiunt, ab aliis immunes vivunt.

926. Quamvis nulla fortasse regio fuerit generi humano prorsus inhabitabilis, tamen verisimile est quasdam reliquis præstare, hominesque producere animo et corpore perfectissimos. Temperatæ, mediæ inter nimium calorem et frigus, hac creduntur excellentia gaudere. Plurima autem vetant gentium varietates solis cœli effectibus tribuere; quippe quæ multum afficiantur ab aliis causis, tum naturalibus tum moralibus. Varietates autem gentium haud exiguæ a cœlo manifestissime pendent.

927. Sic in calidis regionibus corpus solvitur et debilitatur, *genus nervosum* valde mobile fit, motus sanguinis liberrimus est, et secretiones copiosæ, præsertim exhalatio

tio per cutem, humoresque fere tenuiores, et in putredinem magis proclives, quam in regionibus temperatis aut frigidis. Incolæ igitur calidarum regionum plerumque (nam hæc res minime constans est) ignavi, imbelles, ad omnes labores inhabiles observantur, voluptatibus plerumque dediti, præsertim Veneri; in omnes animi affectus proni, vividi, sed leves, parum vis animi habentes; victu tenui, ex frugibus conflato maxime utuntur, neque fere abutuntur liquoribus generosis, quippe quibus parum egent.

928. Morbis *nervosi generis*, morbisque putridis et biliosis, maxime opportuni sunt; inflammationibus rarius afficiuntur: ideoque, dum ægrotant, remediis quæ putredinem et bilem corrigant multum egent, et exinanitiones, sanguinis imprimis destructionem, ægre tolerant.

929. Frigidarum contra regionum incolæ corpora habent firmiora et validiora,



*genus nervosum* minus irritabile, humores crassiores, eorumque motum languidiorem, et parcam per cutem exhalationem; et sæpe obesi fiunt: victu multum utuntur validissimo, ex carnibus præsertim constante, et vino, aliisque liquoribus generosis. Robustiores quam calidarum regionum incolæ observantur, et animosiores, et ad omnes labores et militiam magis apti, minore hilaritate, majore autem vi animi præditi; minus etiam mulierosi, sed non eo minus fœcundi.

930. Febris vehementissimis et inflammationibus obnoxii sunt; haud tantum morbis *nervosi generis*, nisi malo vitæ genere vim nativam fregerint, neque putridis neque biliosis morbis. Dum ægrotant, validioribus fere medicamentis egent, et sanguinis jacturam plerumque bene tolerant.

931. Similes porro varietates, quamvis haud tantæ, diversis anni tempestatibus observantur;

observantur; quo fit ut alii aliis temporibus graffentur morbi, iisdemque fere morbis alia vere, alia autumnò, medendi ratio conveniat.

932. A victus genere varietates non leves oriuntur. Sic qui victu ex carnibus pro maxima cibi parte utuntur, et epulis lautioribus et liquoribus generosis indulgent, robustiores fere sunt aquæ potoribus, iisque qui frugibus solis vescuntur; sed sæpe minus sani, ad nimiam sanguinis abundantiam, et inflammationes, et putredinem, procliviores.

933. Vitæ genus, præsertim quod ad exercitationem aut ignaviam, multum facit, hominesque ab aliis morbis incolumes præstat, ad alios proclives reddit. Sic exercitatio, modo non nimia fuerit, corpus roborat, concoctioni opitulatur, secretiones et excretiones promovet, sanguinis metum intendit, neque finit plus justo sanguinis

congeri; ideoque multos morbos vel arcet, vel jam inductos atque urgentes depellit.

934. Ignavia vero corpus solvit, debilitat, mobile reddit, motum sanguinis languidum facit, secretiones et excretiones fere minuit, et plenitudinem et obestitatem efficit; et igitur plurimis morbis, *hysteriæ*, *dyspepsiæ*, podagræ, sanguinis profluviis, *apoplexiæ*, paralyfi, obstructionibus, hydropi, viam sternit.

935. Exercitatio autem vehemens, quamvis corpus sæpe firmet, et roboret, et excitet, nonnullis tamen morbis opportunius facit; partim forte ob majorem densitatem aut acrimoniam humorum, magis vero propter insignem solidarum partium vim et robur, auctumque ideo humorum impetum; quo fit ut febres quædam, et inflammationes, facilius et vehementius incumbant.—Durus vero et perpetuus labor, alia prorsus ratione, corpus exhaurit, debilitat,



bilitat, indurat, et ideo senectutem præmaturam (890.) inducit.

936. Regimen quoque mentis ad sanitatem non minus quam ad vitæ diuturnitatem (893.) conducit. Vehementes animi affectus, five excitantes five deprimentes, et graves curæ, varia ratione (342. 3.) efficiunt valetudini: studia quoque nimis intensa, neque ut decet intermissa, et animo et corpori nocent; *generi nervoso* imprimis, et ventriculo, et capiti.—Damnum autem quod a studiis vulgo oriri creditur, melius plerumque tribuitur vitæ generi parum idoneo, quod multi literarum cupidi degere solent, scilicet qui corporis exercitationem fere negligunt: neque sane obscura ratio qua vita sedentaria (934.) nocet.

937. Cæterum, quamvis multi in armis, multi in negotiis, multique demum in otio, et luxu, et voluptatibus, consenserint, fanique omni tempore vixerint, tamen plurimorum

rimorum philosophorum exempla demonstrant, vitam quietam, temperatam, contemplativam, ad sanitatem, et ideo ad vitæ diuturnitatem, maxime conducere, quippe quæ haud paucis careat periculis et morborum causis, quibus vita actiuosa obnoxia est.

938. Postremo, memoria semper tenere oportet, hominem adeo versatilem existere, ut ad omnes cœlos, utcunque diversos, et ad vitæ genera maxime contraria, unus omnium animalium se accomodet, et sane ad omnia videatur esse natus. Pari fere ratione, ad diversissima cibi genera se accommodat, et demum gravissimis morborum causis, rebusque quæ non immerito venena habentur, assuescit, ita ut non modo parum ex iis detrimenti capiat, sed iisdem sæpe, sive sanus, sive ægrotans, sive convalescens, ægre, nec sine periculo, carere possit.

FINIS PARTIS PRIMÆ.

C O N S P E C T U S

MEDICINÆ THEORETICÆ

P A R S   A L T E R A,

In qua de THERAPEIA agitur.





C O N S P E C T U S

MEDICINÆ THEORETICÆ.

---

C A P. XXIV.

*De medendi ratione ; de natura remediorum ;  
de consiliis medendi, ad sanandos, aut miti-  
gandos, aut præcavendos, morbos.*

939. **I**NNUMERA, quæ vel provida  
Natura fuggefferit vel humana  
industria comparaverit, remedia,  
quamvis admodum inter se diversa, tum  
quod ad cæteras et magis manifestas dotes,  
tum maxime quod ad vires suas medici-

nales, tamen haud inepte ad pauca genera referri possunt, secundum effectus generales atque manifestos, viresque simplicissimas, quibus in corpore humano pol-  
lent.

940. Nullus enim aut modus aut ordo, aut vera et utilis medicamentorum facultatum scientia foret, si remedia nominata atque ordinata essent, ut olim apud medicos solebant, et adhuc apud populum solent nominari, secundum eorum vires et facultates occultas, eorumque usus in variis morbis compositis sanandis, aut demum secundum varia organa corporis, quibus maxime prodesse, et quasi dicata esse, credebantur. Medicos tandem tædet et pudet, diutius garrere de remediis *specificis*, et *alexipharmacis*, et *febrisugis*, et *cephalicis*, et *ophthalmicis*, et *cardiacis*, et *stomachicis*, et *restorativis*, aut de *antiphthisicis*, aut *anti-hydropicis*, aut *anti-paralyticis*, nisi eorum naturam et modum quo operantur, quodammodo



dammodo ostendere et explanare possint.

941. Neque profecto fat medico est scire quædam remedia adversus quosdam morbos prodesse solere, nisi simul intelligat qua ratione id boni efficiant, et cuinam simplicissimorum morborum, qui manifestum atque compositum morbum faciunt, potissimum occurrant: sin minus, eorum etiam remediorum quæ optima sunt usus et administrationis incertus, neque diversis ægris, aliter atque aliter se habentibus, sua remedia accommodare poterit, neque idonea seligere, neque in uno quovis ægro quæ maxime idonea sunt tuto et efficaciter dare. Nam in administrandis remediis memoria semper tenere oportet, non nominis morbi solum, neque sane generalis ejus naturæ, rationem esse habendam, sed multas vel minutissimas sæpe res esse respiciendas, tum quæ ad morbi originem et causas, et indiciorum varietatem et conjunctionem, tum quæ ad ægri statum, et vi-

res, et peculiarem forte corporis constitutionem, attinent.

942. Præterea, si remedia ordinata essent vel secundum partes corporis quibus opem ferrent, vel secundum morbos compositos quos crederentur sanare, perspicuum est, confusionem nunquam expediendam in materia medica esse orituram, multaque remedia sub variis et diversissimis generibus comprehensum iri; quoniam, secundum varios morbos qui infestant, variasque horum causas, et ægrotantium status et constitutiones, eadem res nunc capiti nunc ventri prodesse potest; interdum adversus febrem, interdum adversus paralyfin, interdum adversus hydropem valere; modo lippitudinem, modo podagram, modo alvi fluxum, lenire vel sanare.

943. Igitur remedia nominari et ordinari debent, ex effectibus eorum constantissimis et simplicissimis. Hinc porro sequitur, quo melius perspectæ et intellectæ fuerint

fuerint medicamentorum facultates, et quo perfectior et accuratior fuerit scientia et ars medica, eo simpliciores factum iri materiam medicam, eoque pauciora nomina seu genera remediorum medicos in ore esse habituros. Quamvis enim hæc medicinæ pars nuper adeo exulta sit, et, rejectis multis medicamentorum generibus, majorum ignorantix et credulitatis præclaris monumentis, in formam perspicuam et elegantem redacta, tamen non dubium est, quibusdam remediorum generibus quæ medicis adhuc in ore sunt, eam facile et sine damno esse carituram ; nimirum si nomina quæ facultatibus remediorum danda essent, tantum ab effectibus illorum simplicissimis fuissent derivata.

944. Singula porro remedia, quæ sub unoquoque nomine vel titulo generali comprehenduntur, quatenus a se invicem differant, simili modo ordinari et distingui possunt ; sive tantum magnitudine, et quasi gradibus, ejusdem effectus generalis discrepent,



pent, five, præter generalem et communem effectum, quædam ex iis alias possideant et sibi proprias vires.

945. Remedium vero est omne auxilium, quod mutationem salutarem in corpore humano efficere potest.

946. Talia auxilia ad tria capita generalia referri solent; chirurgiam scilicet, medicamenta, et vitæ genus, seu regimen, ut vocatur; sub quo comprehenduntur non modo victus, variarumque corporis, quatenus a nobis regantur, functionum regimen, sed animi quoque administratio.

947. Remediorum virium, et modi quo in corpore humano operantur, scientia, *Therapeia* generalis vocari solet.

948. Explanatis jam quatenus facultas fuerit sani corporis muneribus, morborumque simpliciorum indiciis et causis,  
proximum

proximum est ostendere, secundum instituta medicinæ rationalis (66.), qua ratione remedia sunt ita accommodanda morbis, ut, causis eorum correctis vel sublatis, ægrotantes iterum integra fruantur valetudine.

949. Medicinæ vero rationalis principiis imbutus, perspecto probe ægri statu, tum quod ad morbi signa tum simul quod ad res non morbosas, judicat quid sibi faciendum, quid nimirum in ægro corpore mutandum, ut sublata vel totius morbi vel partis aut signi ejus cujusvis causa, vel in integrum sanetur morbus, vel mitior saltem, et tutior, et tolerabilior fiat.

950. Tale judicium vocatur *consilium mendi*, seu *indicatio curatoria*: res ipsa, qualiscunque sit, in ægro, quæ istud judicium medico suggerit, vocatur *indicans*: mutatio vero quam medicus necessariam factu credit, *indicatum* dicitur: mutatio ista de-

mum

munum efficitur, et *medendi consilium* absolvitur, ope remediorum.

951. Plurimum profecto inter medicos disputatum est, unde sumenda essent *consilia medendi*. — Si medicina prorsus perfecta esset, omniumque morborum causæ cognitæ, et remedia ad quamlibet mutationem efficiendam idonea cognita et in promptu essent, tum perspicuum foret, a proxima causa (posthabita remotiorum consideratione) in omni morbo *consilia medendi* sumenda esse, adque eam fere solum respiciendum; quippe qua sublata, tota simul tolleretur signorum morbosorum caterva. — Tantum vero abest ut ars salu- tiferæ talem hæcenus attigerit perfectionem, ut raro ad causam morbi proximam remedia accommodandi facultas sit, neque alias res, tum causas remotiores, tum quoque signa præsentia morborum, negligere liceat.

952. Sunt



952. Sunt tamen quatuor res quibus maxime nititur medicina rationalis, et unde, omnium medicorum consensu, *consilia medendi* recte deduci possunt: causæ imprimis remotissimæ, quæ corpus tantum morbo opportunum reddunt; causæ remotæ excitantes, quæ corpori sic opportuno existenti admotæ, morbum inducunt; causa proxima, concursu priorum effecta, ipsaque morbum efficiens; et demum singula morbi signa vel indicia, variæque ægrotantis conditiones, vel præsentia, vel præterita, vel etiam futura, si quando signis quibusdam præsentibus, forte satis levibus, de aliis et gravioribus mox venturis quodammodo monemur.

953. Nonnulli autem, neque profecto parvi nominis auctores, contendunt, *consilia medendi* sæpe sumenda esse ab experientia rerum juvantium et lædentium, et a viribus seu conatibus Naturæ ipsius in aliis exemplis cum similibus morbis conflictantis (59. et seqq.); et interdum etiam

a variis appetentiis aut desideriiis insolitis ægris contingentibus, quibus, tanquam instinctu quodam, perducuntur et invitantur ad res salutare, et divertuntur a perniciosiis (639.).

954. Alii vero negant *consilia medendi* ab his rebus recte deduci, talemque medendi rationem nomen medicinæ rationalis mereri. Vocabulum certe non meruit ut de eo disputetur; neque de re ipsa ulla existere potest controversia; nemo enim sanus negaverit, boni et sapientis esse medici (siquidem rationalis vocari nequeat) ad Naturæ conatus, et ægri desideria, et experientiam rerum quæ juvant vel lædunt, omni attentione respicere, et ab iis sæpe doceri, et in arte sua exercenda dirigi.

955. Sæpe revera disputarunt medici, quibus in exemplis Naturæ conatus adjuvandi promovendique essent, quibus sopiendi et compescendi. Neque sane de tali re præcepta ulla certa et fixa dari possunt; quippe

quippe quia curatio omnis accommodari debet singulari uniuscujusque ægri conditioni. Medici igitur erit, in singulis morborum exemplis, quid maxime profuturum sit ægro judicare, et Naturæ conatus, si tuti et utiles visi sint, secundare; sin minus, ipsos pro morbis, vel saltem pro signis morborum, habere, arte sua vel temperandis vel penitus sistendis.

956. Pari ratione, sagax medicus de utilitate aut periculo variorum appetituum in morbis accedentium judicabit, et quando et quousque iis indulgere conveniat. Et de singulis hujusmodi conatuum seu instinctuum, non secus ac de remediis arte comparatis, caute et sedulo considerabit, quid morbus postulet, quid ægri conditio finat, quid præ omnibus vires ejus ferant, quidque demum ferre recusent.

957. Quin et omnes boni medici ad ea remedia semper confugient (sive modus quo operantur intellectus fuerit necne),



quæ certa experientia prodesse comproba-  
verit, et ab iis abstinebunt, quæ eadem ex-  
perientia, nocere, aut nil prodesse, ostenderit.  
Tantum enim prodest scientia medica,  
quantum ad bona remedia bonamque cu-  
rationem perducatur; neque profecto aut  
leges philosophandi, aut quidem sensus  
communis, sinunt fidem adhibere ulli ra-  
tiocinationi, utcunque speciosæ, cui ex-  
perientia adversatur.

958. Quoniam plurimæ sæpe et admo-  
dum diversæ in eodem ægro simul existere  
possunt morbosæ conditiones, variaque  
morborum signa eodem tempore urgere,  
quorum nonnulla quam ipse primarius  
morbus plus molestiæ facessant, forte etiam  
plus periculi afferant; satis perspicuum  
est, multa simul *medendi consilia* (949. et  
seqq.) interdum esse oritura, quibus vel  
omnibus eodem tempore, vel aliis post  
alia, prout res postulaverit, vel ipsi facultas  
fuerit, medicus satisfacere debet.

959. Variæ aliquando res in eodem ægro simul observatæ, idem remedium requirere possunt, vel, ut auctores loqui amant, idem indicare. Sæpe autem res adeo diversæ observantur, ut remedia non modo differentia, sed prorsus contraria, et sibimet invicem opposita, postulent. Hinc quæ vocantur *co-indicantia* et *contra-indicantia*, de quibus tantum differuerunt medici.

960. Priora nullam afferunt difficultatem; posteriora sæpe maximam, vixque, aut ne vix quidem, semper expediendam. Datur autem (quo simplicius esse nequit aut certius præceptum) plana illa et utilissima regula, majori necessitati, quæque magis urget, satisfacere primo, posthabita minoris cura; summoto enim, vel sublevato tantum, graviore periculo, tempus datur ad leviora mala respiciendi; vel hæc forte, solis Naturæ viribus, ad suum opus jam propter levamen melius valentis, brevi quoque submovebuntur.—Juvat tamen monuisse, plerasque istiusmodi difficultatum

tum

tum quæ medicos tantum solitæ fuerant morari, imaginarias esse; scilicet quæ à solis morbi signis observatis, nulla illorum causarum ratione habita, oriebantur.

961. Nemini vero latere potest qui ad morborum causas et signa animum attenderit, plurima et admodum diversa mala ab eadem causa, puta morbo vel vitio quovis simplicissimo in corpore hærente, suam originem trahere. Neque sane aut negandum est hoc aut ridendum, tanquam diversi vel contrarii effectus eidem causæ imputarentur; præterquam enim quod corporis conditio admodum variat, et vix unquam in diversis hominibus, ne quidem in iisdem, diversis temporibus, prorsus eadem est; et sic varii ab eadem causa affectus profluunt; unusquisque fere istorum affectuum seu indiciorum morbidorum pro alia causa morbida haberi potest, unde, veluti a novo radice, novi morbi, nova vitia, nova morborum indicia, continuata serie pullulant.

962. Igitur



962. Igitur in tali statu bene perſpicuum eſt, a contemplatione uniufcujuſque ſigni morbi compoſiti, novum *medendi conſilium* eſſe oriturum ; totque ideo remediis fere opus futurum ad morbum quemlibet ſanandum, quot in ſingulis ægris præter naturam res obſervatæ eſſent : et pari ratione, non modo innumera fere medicamenta eodem tempore, vel breviffimis intervallis, ab ægris eſſe devoranda, ſed hæc quoque diverſiffimæ naturæ, forte etiam penitus contrariæ ; ita ut ſiquid ſingula valerent remedia ſibiſmet adeo adverſantia, ſuos mutuo effectus turbare et impedire oporteret, non ſine gravi ægrotantium incommodo, vel forte periculo.

963. Quin et ratio pariter docet, et multa experientia demonſtravit, parum plerumque in curatione morborum profici ab iis qui talem curandi rationem inſtituerint ; nimirum qui, neglecta origine et cauſa mali, in ſingulis ſublevandis morborum ſignis toti ſemet occupaverint. Sæpe enim

enim nullis aut tolli aut sublevari potest remediis molestissimum morbi signum, nisi prius sublata fuerit ejus morbi causa. Vel si forte fortuna remediis quibusdam validissimis suspensa fuerit ejus molestia, deleta scilicet vel superato ejus sensu, tamen multum abest ut cum hac molestia periculum quoque morbi submoveatur.

964. Plerumque sane, mitigatis quibusdam vel omnibus morbi signis, totus simul sublevatur morbus, et non solum mitior, sed tutior quoque et sanatu facilior evadit; forte etiam Naturæ viribus interdum sanatur penitus: quod tamen non constans esse, plurima experientia comprobatum est. Nec major aut frequentior fere in arte medica reperitur difficultas, quam ut sciat clinicus quando et quousque mitiganda sint molestiora morbi signa, posthabita generali curatione mali, quæ sublati ipsius causis absolvi debet.

965. Facile

965. Facile igitur ex jam dictis intelligetur differentia inter *indicationes curatorias* et *indicationes palliativas* auctorum medicorum; quarum hæ in mitigandis, illæ in sanandis morbis, locum habent. Ratio quoque in aprico erit, qua utriusque generis, præsertim posterioris, *medendi consilia* alteri proposito interdum inservire queant. — Quin et exempla nimis frequenter occurrunt, in quibus perfectæ curationi non est locus, siue sua natura morbus insanabilis existit, siue tantum imperfecta medicinæ conditio idonea et efficacia adversus eum remedia non suggerit. Et profecto in omnibus morbis, quum jam ad extrema ventum est, et instantis mortis indicia spem nullam curationis relinquunt, aliquid adhuc solerti medico faciendum superest: erit enim quoddam, in tali miserrimo et desperato statu, lenire mala quæ summovere nequeat, et *ἐπιβραδύειν* faltem moribundo moliri, siquidem vitam ejus neque conservare possit, neque amplius producere.



966. Aliud denique neque leve neque inutile opus medici suscipere voluerunt, et arte sua non modo morbos jam præsentés sanare, si sanabiles existerent, vel lenire saltem, si spes nulla sanationis data esset, sed sanitatem quoque tueri, morbosque ita arcere, ut quicumque eorum instituta rite servassent, nunquam ægri forent, sed sani semper viventes extremam vitæ humanæ metam facile attingerent. Multa sane, et quædam bona, de his rebus præcepta a medicis dari solent, quorum notitia in multis occasionibus egregio usu non carebit, quamvis multum absit ut omnia bona sint, vel ut ipsum de sanitate tuenda propositum sit adeo facile ac sibi met persuaserint. Neque profecto multum profecerunt hactenus, qui ad normam medicam vivendi rationem semper accommodare tentaverint; et minus adhuc qui ope remediorum prosperam valetudinem firmare et conservare conati sint.

967. Omnis

967. Omnis autem tuendæ sanitatis cura, omnisque morborum arcendorum spes et fiducia, hoc solo cardine versantur, nempe, ut a causis morborum remotis, cum iis quæ proclivitatem faciunt, tum iis quæ in corpore sic proclivi factò morbum quemlibet excitent, quantum fieri possit, præcaveatur, et hæ omni cura evitentur, illæ corrigantur; nam nisi utrisque concurrentibus (38.), nullus fieri potest morbus. Sæpe vero vel ab altero vel ab utroque genere causarum morbosarum, homines defendere aut liberare possumus, et sic vel infirmissimos et maxime valetudinarios nonnunquam diu præstare incolumes. Interdum mala ad quosdam morbos proclivitas in constitutione inhærens, nullis potest aut tolli aut corrigi modis: in hoc statu, evitando noxas externas res peragetur. Interdum vero ab alia magis parte difficultas premit; scilicet cum istæ noxæ, propter suam frequentiam atque constantiam, et vitæ genus parum idoneum quod multi degere coguntur, vix possunt penitus evitari: tum

ad proclivitatem ipsam corrigendam et minuendam, vel, si facultas fuerit, prorsus eradicandam, summa ope niti oportet. Neque obscura ratio, qua eadem remedia eodemque consilio data, quæ adversus morbos jam formatos prodesse solent, huic quoque proposito inservire queant. Talis enim proclivitas ad morbum pro leviori quasi morbo (39.) haberi potest, a quo magnitudine tantum, non genere differt, iisdemque igitur modis atque remediis ac gravior morbus submovebitur.



C. A. P. XXV.

*De diætâ agrotantium,*

968. **A**rgumentum, idque profecto haud levis momenti, prius sese considerandum offert, quam ad varia medicamentorum genera enumeranda, eorumque vires et administrationem explanandas, progredi fas sit; qualis nempe diætâ ægris conveniat, et qua ratione hæc prout res postulaverit varianda sit, diversisque morbis quibus homines plectuntur accommodanda.

969. Quantum in hac re fiduciæ olim posuissent medici, nemo potest ignorare qui veterum libros vel semel inspexerit. Tanta enim

enim cura et diligentia hanc medicinæ partem excoluere, ut bene perspicuum sit, plerosque eorum diætæ multo magis quam remediis fuisse confisos. Quin et secta medicorum apud veteres aliquamdiu floruit, quibus persuasum erat omnes morbos iisdem rebus esse sanandos quibus sani quotidie utimur, sed tantum pro mutata corporis conditione mutatis, variisque morborum causis atque naturis rite accommodatis. Probe etiam noverant, ex gymnasiis, et athleticis in iis educatis, quanta vi in corpore humano polleret diætæ, et tota vivendi ratio. Hinc factum est, ut de singulis fere morbis sanandis, et de prospera valetudine tuenda, innumera, et quæ videantur accuratissima, præcepta ab antiquis acceperimus, quorum nonnulla bona atque idonea sunt, scilicet quæ ipsi vel multa experientia vel sana ratiocinatione didicerant; longe vero plura futilia, inepta, et pene absurda reperiuntur, nimirum quæ præjudicia a longa consuetudine, aut experientia vaga, et parum accurata, et  
male

male intellecta, aut prorsus imaginaria, aut demum, falsæ opiniones de natura et causis morborum, et de effectibus variorum generum diætæ, iis suggesserant.

970. Hujusmodi veterum commentis, post multa sæcula, vix, aut ne vix quidem, deletis, novi accesserunt et vix minus graves errores, ex opinionibus *chemico-medico-rum* superioris sæculi plerumque derivati, variisque quæ tunc et nuperius receptæ sunt de causis morborum conjecturis, pro more medicorum, accommodati. Sic, dum medici credebant unumquemque fere morbum in corrupta aliqua humorum conditione maxime consistere, omnia fere de diætæ ægrotantium præcepta hoc præsertim cardine versabantur, ut cibi potusque assumerentur contrariæ naturæ illi humorum conditioni quam morbum facere credebant, quamque per mixturam et vim *chemicam* alimentorum correctum iri sperabant.

971. Quantum



971. Quantum vero cunque his de rebus aut veteres aut recentes scriptores medici erraverint, tamen nemo qui naturam corporis humani morborumque quibus obnoxium est vel minimum intellexerit, unquam dubitaverit, ingens sæpe et certissimum adversæ valetudinis præsidium, interdum forte solum auxilium, in idonea diætâ esse positum. Imprimis, quia, ut jam (49. 635. et seqq. 937.) dictum est, multi et quidem graves morbi a natura diætæ qua homines utuntur plane suam originem ducunt, five hæc, vel qualitate, vel quantitate, vel demum utraque, minus idonea fuerit assumpta; et in hoc statu, ut malus effectus tollatur, prius tollenda est ejus causa: tum porro, quia multa alimentorum genera in aliis atque aliis morbis aut perniciofa fiunt aut salutaria, quamvis morbus ab alia prorsus causa ortus sit, prout ipsa alimenta sua natura vel faveant vel adversentur isti morbosæ corporis conditioni in qua malum maxime consistit, five hoc in humoribus five in partibus solidis infederit:

rit: tum denique, quia in omni fere morbo, acuto pariter atque vetusto, ipsa alimenta, quæ sua natura optima sunt et sano homini saluberrima, sæpe minus idonea fiunt, non magis propter generalem infirmitatem corporis, quam propter debilitatem specialem organorum et virium quæ cibi concoctioni, et partium quæ superfluentes et noxiæ in corpore factæ sunt expulsionem, inserviunt; ita ut quicquid fere alimenti assumptum fuerit segnius et tardius concoquatur, vel forte nunquam in idoneum nutrimentum convertatur, et sic corpus non modo non reficiat, sed multum gravet, ventriculumque imprimis et intestina ita opprimat, ut ægrius in posterum sua fungantur officia: rebus vero sic se habentibus, non mirum erit, si primis morbi indiciis haud parum auctis nova insuper et graviora accedant mala; neque profecto dubium est, alimenta notissima atque tutissima, quæque in usu quotidiano sunt, ægrotantibus intempestive concessa, pessimos sæpe habuisse effectus, neque semper morte caruisse.

972. Igitur bene perspicuum erit, curam atque attentionem haud leves dandas esse diætæ ægrotantium ; et multa peritia sæpe opus esse, ut sciat medicus qualia alimenta et quo tempore singulis ægris sint permit-tenda. Quoniam vero neque limites neque propositum hujus operis, aut finunt aut postulant, ut de cura singulorum morborum agatur, sat fuerit in hoc loco consilia et præcepta quædam quam maxime generalia tradidisse, de diætâ quæ in duobus morborum generibus, acutis scilicet atque vetustis, conveniat. Hæc bina morborum genera, quum adeo diversa et fere contraria existunt, omnesque morbos quodammodo comprehendunt, doctrinam generalem de diætæ administratione satis illustrabunt, quam unusquisque singulis morbis (perspectis prius specialibus eorum naturis) facile noverit accommodare.

973. In plerisque morbis acutis, febribus scilicet, aliisque affectionibus ejusdem naturæ, talis fere existit appetituum naturalium



ralium status, ut ægri cibum non modo non appetant, sed multum fastidiant, sæpe etiam nullis argumentis aut precibus inducantur, ut hanc repugnantiam ita vincant, ut unicam buccam cibi, vel delicatissimi, fument.

974. In hoc igitur statu, absurdum certe foret multum cibum cujusvis generis ægrotanti præscribere; præsertim quum et ratio docet, et plurima experientia comprobavit, cibum quem repugnante natura, et deficiente appetitu, aut sani aut ægri, febricitantes imprimis, sumpserint, ægre concoqui, et corpus parum nutrire aut reficere, et nihil prodesse, et sæpe multum nocere, gravatis scilicet et irritatis ventriculo et intestinis plurima sabburra corrupta, et acri, et putrida; nam parum omnino in talibus morbis nutrimenti ex iis resorbetur in sanguinem ut decet deferendi, et ideo multo plus stercoreis quam in sanis ex eadem cibi quantitate in intestinis congeritur, ejusque multum corrupti; præfer-

tim si alvus, ut fere accidit, diu astricta fuerit; unde sæpe calor auctus, propter nimium stimulum corpori jam præter naturam calenti admotum, et infirmitas augescens, et anxietas ingravescens, et dolor capitis, et sitis, et nausea, et vomitus, et tormina, et haud raro ingens alvi fluxus difficillime sistendus; quæ omnia et mollellissima ægro sunt, eumque miserrime agitant, et revera sua natura perniciofa sunt, et quædam ex iis valde periculosa.

975. Cibus igitur acutis morbis decumbentibus quam parcissime dandus est; et potius concedendus petentibus quam imperandus repugnantibus; quoniam hac de re plus fere periculi est in excessu quam in defectu; natura enim in talibus morbis tenuissimo victu contenta est, et validiore facile opprimitur, et sæpe nihil fere præter potum idoneum requirit. Non tamen idcirco cibus febricitantibus, vel ab ipso morbi initio, omnino denegandus est, præfertim si æger quicquam appetit; sed magis

gis adhuc quum malum inveteravit, aliquantum idonei cibi convenit; tunc enim et vires multum collabuntur, et corpus mirum in modum marcescit, et sæpe humores multum putrescunt. Cibo igitur in hoc statu plane opus fuerit, qui, dummodo ut decet concoctus sit, optimum remedium fiet, et corpus simul reficiet aletque, et vires sustinebit, et putridam corruptionem humorum quam optime corriget.

976. Quod qualitatem vero cibi acutis morbis decumbentibus permittendi attinet, Natura ipsa usque monet, eum ex frugibus et oleribus, non ex carnibus, esse desumendum. Rarissime observantur exempla febricitantium, qui carnes, cibosque ex iis confectos, quamvis delicatissimos, aut appetunt, aut sine fastidio contemplantur; iidem vero ægri, poma, aut legumina, aut demum panem communem, avidissime interdum devorabunt.

977. Quin



977. Quin et ratio docet, fruges in talibus morbis pro alimento carnibus longe præstare : imprimis quia hæ, si modo recte concoquuntur, plerumque nimis nutriunt, et nisi concoquuntur, perspicuum est nocituras esse ; tum quoque quia corpus nimis excitant et calefaciunt, et sitim inducunt vel augent, et febrem sæpe intendunt ; tum porro quia ipsæ facile et sponte putrescunt, et humores corporis, ad istum statum jam nimis vergentes, velocius in putredinem rapiunt ; et demum, quia difficilius et tardius in ventriculo solvuntur et concoquuntur quam fruges, et ideo diutius in eo commorantur. Fruges vero facile solutæ, et brevi concoctæ, statim ex ventriculo in intestina transeunt, et alvum laxam faciunt, et corpus modice alunt, sed non onerant, neque ságinant, idem refrigerant potius quam calefaciunt, et sitim sedant, et febrem temperant, et putredini fortiter occurrunt.

978. Omnes

978. Omnes igitur, vel faltem pleræque fruges quæ in communi ufu funt, poma matura, radices esculentæ, olera, legumina, et far omne, hordeum, avena, triticum, oryza, &c. et glutinosa quædam alimenta ex plantis derivata, veluti gluten radicis orchis, aut *sago*, ut vocatur, variis modis cocta et præparata, acutis morbis laborantibus tuto possunt concedi. Neque res levis momenti est, tot prodigam Naturam suggerere alimenta idonea, eaque tam facile variari posse, quoniam ægri fere semper omne cibi genus, utcunque idoneum et primo gratum fuisset, cui aliquamdiu assueverint, fastidiunt, et alium cibum, vel eundem aliter coctum, magis appetunt.

979. Ex cibis (978.) enumeratis, poma atque olera tenuissimum alimentum præbent; legumina atque radices (præsertim quæ farinam habent, veluti *battata*) paullo validius, far vero omnium frugum longe validissimum, triticum imprimis atque oryza, quæ multo magis nutrire creduntur

tur quam hordeum vel avena. Ex omnibus vero nullum forte cibi genus sua natura melius est, aut ægrotantibus accommodatius, quam bonus panis fermentatus, quippe quo nihil fere solutu et concoctu facilius fit, aut magis nutriens, aut plerisque ægrotantibus jucundius. Panis itaque fermentatus, aut mollis, sed non nimis recens, aut cum aqua coctus, et in massam tenuem et mollissimam redactus, quæ *panada* ab Italis dicta est, aut demum tostus, siquando æger ficiorem aliquem cibum appetit, quod sæpe accidit, monente nimirum ipsa Natura fluidum prorsus cibum non convenire (613.), idoneo febricitantibus alimento erit.

980. Hordeum vero, præ omnibus aliis cibi generibus, ab antiquissimis etiam temporibus in morbis acutis præscriptum fuit atque laudatum, multaque de eo rite coquendo, et variis modis præparando, tradita sunt præcepta ab ipso medicinæ patre. Sic ptisana variæ crassitudinis, vel aqua hordeacea



hordeacea, ut nunc vocari solet, pro cibo pariter atque potu in febribus a medicis præscribitur. Quin et hordeum ipsum probe coctum et mollitum, aut purum, aut cum uvis passis, aut pauxillo sacchari, aut vini, mixtum, bonum et tutum in acutis morbis alimentum est.

981. Ex avena quoque aliqui comparantur cibi, febricitantibus satis idonei. Pulmentum ipsum avenaceum haud malus cibus est; frequentius vero datur tenuissimum pulmentum, seu decoctum avenaceum, quod potus simul atque cibus esse potest. Nostrates quoque, præsertim rustici, optimum et febricitantibus accommodatissimum cibum ex furfure avenaceo præparare norunt, cui multam aquam calidam affundunt, et agitant ut probe misceantur: deinde post aliquot dies, subsidente furfure, liquorem qui supernatat jam spissescentem et acefcentem effundunt, et coquunt donec coëat in pulmentum,

vel potius gluten tenue, concoctu facillimum, et leniter acidum.

982. Radices esculentæ, et legumina, et olera, febricitantibus rarius dantur; nec quicquam peculiaris commodi habere videntur: præterea, quædam ex iis difficilius concoquuntur, et ideo corrumpuntur, et nimis diu retinentur in ventriculo aut intestinis. Nihil vero obstat, quo minus, petente ægro, aut deficiente magis idoneo cibo, febricitanti pleraque eorum concedantur.

983. Poma vero mitia, et omnes fructus maturi, in acutis morbis nunc ægris libere plerumque permittuntur, nisi aliquid præter solitum, veluti ventriculi affectio vehemens, aut gravior alvi fluxus, usum eorum prohibeat; neque tamen semper etiam in hoc statu nocent, quoniam alvi fluxus, et aliæ ventris affectiones, in febribus, sæpe a putredine, non ab acore, oriri videntur; et tum verisimile est pomorum  
omne

omne genus profuturum potius quam nociturum esse,

984. Neque demum carnes ipsæ, cibique ex iis conflati, febricitantibus semper sunt deneganda, imprimis sub finem longarum febrium, cum sæpe mera debilitas plus quam vera febris signa urget, et plus periculi minitatur; tum forte alimento quod æger concoquere possit validissimo et maxime nutriente opus erit, ad alendas corporis vires.

985. Quin et ægri in hoc statu nonnunquam tales cibos ultro appetunt, et avidè sumunt, et postea melius se habent; et plurima et valde mira decantantur exempla ægrotantium, qui, postquam omnia remediorum auxilia frustra tentata fuissent, et diætæ tenuis, quæ fere imperatur, potius nocuisse visa esset, ope multæ carnis avidè assumptæ, vel potius devoratae, a morbo quo conficiebant penitus fuerint liberati.



986. Hujusmodi vero exemplis non nimis fidendum est; præterquam enim quod talia in re medica miracula suspicione quadam raro careant, satis probabile est, istiusmodi morbos acutos, qui solo carni-um usu sublati esse videbantur, alia prorsus ratione, sive solis naturæ viribus, sive auxilio remediorum, fuisse sanatos, neque tantum carni-um appetitum prius accidisse quam malum jam levatum esset, et ægri redeuntis sanitatis vires atque beneficia experiri inciperent; ita ut talis voracitas signum potius quam causa sublevatæ aut decedentis febris haberi debuisset. Certe nemo sanus talibus historiis, utcunque veræ fuerint, ita confidet, ut prandium ex carnibus pro remedio præscribat febricitanti, jam forte nauseanti, omnemque vel delicatissimum cibum prorsus fastidienti.

987. Carnes igitur, cibique ex iis parati, febricitantibus semper caute atque parce, et tum maxime permittenda sunt, cum neque febris vehemens, neque calor magnus,

magnus, neque fitis immodica, neque signa multæ putredinis, adfunt, sed ingens debilitas, a longo morbo, et diuturna inedia, valde urgent, et ægri ipsi carnes appetunt; quod profecto raro accidet nisi profuturæ sint: vel si forte, propter delirium, aut tædium tantum diætæ vulgo præscriptæ, carnes flagitaverint, quum hæ, propter naturam morbi et statum corporis, minus idoneæ sunt, tum ipsas quas adeo cupiverant quamprimum gustaverint, statim fere fastidiunt, neque tantum plerumque earum sumunt quantum corpori multum possit nocere.

988. Quod formam vero attinet quales cibi febricitantibus concedi debeant, id maxime observandum est, ut ita coquantur et præparentur, ut concoctu sint quam facillimi, et ventriculum quam minime onerent, et corpus quam minime excitent aut calefaciant; quocirca rarius puræ et solidæ carnes, sive assæ sive elixæ, in acutis morbis permittuntur ægris, ni-  
mirum

mirum ad quas solvendas et concoquendas ventriculus et intestina, ob infirmitatem, minus valent; et decocta vel juscula tenuia ex carnibus, vel juscula gelata, quibus paululum vini, et sacchari, et succi limonum, adjici solet, sæpius præscribuntur. Hæc profecto satis idonea sunt, et quantum opus fuerit alunt, forte etiam plus quam solidæ carnes in statu adeo debili, et facile plerumque concoquuntur, neque calefaciunt corpus, neque sitim augent, neque putredini favent, sed potius obsistunt, et ægris sæpe gratissima sunt.

989. Cavendum autem, ne aut nimis fortia aut nimia copia dentur juscula ex carnibus parata, ne plus æquo alendo, corpus gravent, vel proprio stimulo calefaciant. Præterea, talia juscula, imprimis fortiora, nonnunquam ægrius digeruntur quam solidæ carnes modica quantitate assumptæ, et magis nutriunt, et ideo plus calefaciunt. Ventriculus quoque interdum tenuem fluidumque cibum male concoquit,



quit, tum propter fastidium talis cibi, quod sæpe accidit (613.), tum propter defectum soliti stimuli, quem crassior vel solidior cibus ventriculi solet impertire. Quapropter et licet et oportet nonnunquam, cum propter statum corporis cibus ex carnibus idoneus videtur, solidas carnes ægris, quamvis adhuc febricitantibus, permittere, (quæ interdum melius quam juscula tenuia concoquuntur), vel saltem cum jusculis tenuibus panem tostum dare, ut aliquid solidi in ventriculo sit; interdum etiam stimulantia seu condimenta quædam, veluti cyathus meri, aut forte paululum salis communis, (quamvis sua natura parum idonei), necessaria fiunt, quippe sine quibus ægri cibum aut nolint sumere, aut, si sumperint, nequeant concoquere.

990. Medium denique locum inter carnes et fruges tenet lac, cibique nonnulli ex lacte parati. Lac autem et satis nutriens est, et parum stimuli habet, et natura acescens, non modo non putrescit ipsum, sed

sed corporis putredini obstat: igitur febricitantibus pro cibo et potu simul concedi potest, aut purum, (modo non nimia copia detur), aut, quod melius est, quia purum lac et nimis alit, et ventriculo valde debili oneri esse potest, multa aqua dilutum, aut extracto suo oleo, seu butyro, tenuius et magis acefcens factum; aut demum, quod optimum est, pro lacte ipso, serum ejus, sublata et rejecta parte coagulata, maxime convenit, scilicet quod aliquantum alit, et multum reficit, et sitim temperat, et corpus refrigerat, et putredinem arcet, et alvum leniter solvit.

991. Quod potum vero attinet, tenuissimus fere debet esse in morbis acutis, et subacidus, et frigidus, (nisi in nonnullis raris exemplis, in quibus, propter affectionem quandam singularem aut ventriculi ipsius aut alius cujusvis organi, frigus tolerari nequeat), et qualis ægris ipsis haud insuavis sit; quapropter nunquam medicatus esse debet, sicut olim mos erat, et etiam

nunc

nunc est apud multas gentes. Quicquid medicamenti ægris conveniat, detur iis ut medicamentum, et modo et forma quam minimum insuavibus: procul vero absint infusiones et decocta medicamentorum pro potu communi usurpanda, quippe quæ sitim plerumque non modo non sedant, sed multum augent, et anxietatem intendunt, et nauseam et vomitum aliquando movent, et vires frangunt, et alvi fluxum interdum inducunt; nimirum aut propter fastidium quod creant, ægros a bibendo terrent, quum potus apprime necessarius esset, aut si, imperante medico, copiose bibantur, tum a ventriculo jam fastidiente et nauseante non concoquuntur, neque per vasa resorbentia *lacteæ* ex intestinis hauriuntur, in sanguinem deferenda; sed hæc et ventriculum distendunt retenta, vel calore et humore suo laxant, et solvunt, et infirmant, eorumque ideo munera impediunt, et generalem debilitatem mirum in modum augent.



992. Potus vero tenues, qualibus fani ad corpus quovis modo calens reficiendum et sitim restringendam utuntur, febricitantibus quoque, et sine periculo, et cum omni commodo quod a medicata potione expectari potuisset, permittuntur; aqua scilicet pura et gelida, vel quæ super panem tostum infusa est, vel cui paululum vini aut succi limonum mistum est, vel cerevisia nostra tenuis, vel liquor ille quem *Russi* coquunt, et *quas* vocant, omnia bona sunt contra calorem, sitim, putredinem, alvi duritiem, debilitatem, cunctaque demum febris peculiaria indicia; nisi forte siquando, propter acorem in ventriculo, aut alvi fluxum vehementem, acida et aciescentia, qualia sunt vinum mixtum, et cerevisia, et omnes liquores fermentati, minus conveniunt. Tum aliis jam dictis potionibus, aut decocto avenaceo, aut hordeaceo, quæ nonnulli ægri amant magis et ultro petunt, uti oportet. Observandum quoque est, potus tenues fermentatos, vel vini paululum cum aqua mistum, vel demum nonnunquam

nonnunquam cyathum meri, ægris gratiora esse, et sitim melius et certius restinguere, quam ullus potus aquosus; nimirum, quæ putredini fortiter occurrunt, et vires reficiunt; neque vinum semper calefacere corpus, sed nonnunquam plane refrigerare; neque, demum, potus acedentes alvi fluxum semper augere, sed eundem haud raro reprimere (983.).

993. Denique, potus febricitantium plurimum variari, et, aut ipsis petentibus, aut tantum quem primo habuerant nauseantibus, mutari debet, ut ad libere bibendum quodammodo invitentur, suavitate potus, et recreatione quam ex eo sentiunt; neque imperentur bibere ad arbitrium medici, ne nimis sumere cogantur, (quod gravi incommodo, vel interdum periculo, non carebit), nisi propter delirium, aut stuporem, neque sentire, neque petere quicquam possint; tum quidem de bibendo eos monere decet (211. 641.).

994. Hæc præfertim de cibo potuque ægrotantium in morbis acutis observanda. Quod vetustos vero attinet, quique febre vel prorsus carent, vel ex alio atque primario malo febriculam quandam oriundam habent, hi sæpe aliam longe curam postulant, quamvis sane multa de diæta monita utrique morborum generi communia existent, neque hic igitur repetenda.

995. Imprimis igitur infigne eos inter discrimen intercedit, quod dum in acutis cibi appetitus adeo deficit, ut metus aliquando sit, ne ægri, quibus morbus pepercisset, inedia absumantur; in quibusdam vetustis contra, appetitus adeo valet, ut periculum sæpe haud leve a nimia corporis plenitudine sit; scilicet quum propter naturam morbi ventriculus aut non laborat, aut quum ita afficitur ut appetitus minus infirmetur quam potestas concoquendi cibum, et sic inutili et nocituro onere gravatur; aut demum, cum appetitus pariter atque concoctio ciborum bene se habent,  
et



et sic, instigante præsertim prava luxur  
 consuetudine, tantum alimenti sumitur et  
 concoquitur a debili et morbido homine,  
 quantum sanissimo et validissimo cuiquam,  
 plurimæque corporis exercitatione utenti,  
 plus quam suffecisset; dum ille, propter  
 morbum, atque infirmitatem, tali vitæ  
 genere, corporisque imprimis exercitatione,  
 uti nequit, qualis sola tantum cibi onus  
 exhalâsse potuit, aut constitutionem ab ejus  
 noxa defendisse. In tali igitur statu et vi-  
 vendi modo, nil mirum si primus morbus  
 ingravescat, aut novi et graviores morbi  
 accedant.

996. In multis morbis vetustis, veluti in  
 sanguinis nimia abundantia, aut sanguinis  
 profluviiis, phthisi, paralyfi, podagra, alvi  
 fluxu, hydrope, *hysteria*, *dyspepsia*, infania,  
 carcinomate, melancholia, *epilepsia*, strumis,  
*scorbuto*, &c. curatio vel omnis, vel magna ex  
 parte, diætæ committitur; et innumera, et  
 valde peculiaria, quæ medici de ea ægro-  
 tantibus dare solent præcepta, ad varias res,

tum

tum morbi naturam et originem, tum quoque ægri statum, spectare oportet.

997. Oportet imprimis cibus natura et copia talis sit, qualis et aptus sit alendo et reficiendo corpori, et simul non nimis nutrimenti præbeat, et concoctu facilis sit, et nulla morbi indicia augeat, nec nova mala inducat, sed morbosæ corporis conditioni quantum fieri possit adversetur, et quasi remedio sit. Neque profecto levis momenti est, ut diæta præscripta ægris ipsis non nimis ingrata sit; sin minus metuendum erit, ne medici de ea præcepta aut prorsus negligantur, aut parum accurate observentur; pauci enim tanta vi atque constantia animi gaudent, ut in his rebus quamdiu opus fuerit sibi imperent, morbiq; sanationem tam dura lege accipiant.

998. Quod copiam cibi attinet, vix aut ne vix quidem definiri potest; præterquam enim quod copia quæ necessaria prorsus fuerit

fuert variat quam maxime in diversis hominibus, aut in iisdem, diversis temporibus, multo difficilius est in quantitate quam in qualitate escæ sibi temperare. Multi a voluptatibus splendidæ mensæ, quas nocituras sciunt, lubentes abstinaerint, qui tamen famem quotidie importunam ægrius toleraverint; quapropter, nisi periculum aliquid gravius urgeat et instet, aut ipsi ægri incommodum suæ voracitatis jam experti sint, vix opus erit quantitatem alimenti præscribere; tum quidem diæta parcissima et tenuissima necessaria esse potest, forte etiam inedia ipsa per aliquod tempus haud inutilis.

999. Quoniam vero adeo difficile atque ingratum est quantitatem cibi præscribere, medici sæpe conantur qualitatem ejus ita determinare, ut æger, dum appetitui suo indulget, tantumque cibi assumit quantum huic satisfaciat, neque nimis alimenti accipiat, nec quicquam edat quod ventriculus concoquere nequeat; et sic neque  
hunc



hunc oneret, neque totum corpus plus æquo impleat.

1000. Carnes vero, cibique ex iis parati, multo plus nutriunt quam fruges aut lac, et ideo sæpe prohibentur, dum hæc fere ad libitum permittuntur ægris. Hoc præceptum in plerisque forte exemplis fatuerit ad determinandam nutrimenti copiam, ita saltem ut corpus non nimis impleatur. Sæpe autem cavere oportet, ne victus ex lacte et frugibus, veluti pane communi, propter quantitatem assumptam nimis plenus fiat. Quod si libræ duæ boni panis fermentati, cum tribus libris lactis vaccini in die, sat erit ad alendum hominem sanum et validum, et multum se exercentem, perspicuum est, dimidiam, vel forte tertiam partem istius quantitatis, nimium futuram pro ægro, debili, ignavo, et lecto quasi affixo; tamen tantum et amplius sæpe assumitur ab ægris, qui credunt se victu tenuissimo uti.

1001. Multum

1001. Multum quoque nocuit præceptum illud commune atque plaufibile, quamvis revera ineptum prorfus, et sæpe periculofum, de victu valetudinariorum; nempe, ut sæpe in die edant, et parum affumant uno quovis tempore; præ metu fcilicet ne ventriculus nimio onere fimul accepto opprimatur. Sed dum ab hoc præcavetur, in aliud vitium curritur; nam multi hoc modo, quamvis ægri et debiles, plus nutrimenti fpatio unius diei devorabunt, quam fani fumere solebant; forte etiam fic ventriculus multum infirmabitur, nunquam fere ut debet evacuatus; nam nihil magis ad ejus vires confervandas, aut reficiendas fi defecerint, confert, quam tempeftiva exinanitio, et interdum etiam inedia aliqua, per fpatium faltem folito longius (610. 612.).

1002. Non minimum certe commodum diætæ ex lacte et frugibus comparatæ in hoc confiftit, quod cibi forma fatis fim-  
plice et naturali fere fumuntur, neque condimentis corrupti neque arte coqui

mutati, ut ad ingluviem invitent. Pariratione carnes æque ac fruges, quum, propter naturam mali aut statum ægri, in longis morbis permittuntur, quam simplicissime coctæ, assæ scilicet, vel elixæ, esse debent; cavendumque a condimentis, cavendumque a varietate alimentorum, quæ ambo famem quandam aliter non efuri-enti conciliant, et sic ad voracitatem invitant (631.).

1003. Non tamen sat est cibum ægris vetustis morbis laborantibus concessum eos satis nutrire, neque nimium alimenti præbere, oportet quoque concoctu facilis sit, neque ventriculum gravet, aut male afficiat; res sane eo majoris momenti, quod nonnulli morbi vetusti a morbofo ventriculi statu plane oriuntur, multique alii cum ventriculi affectionibus arctissimo nexu conjunguntur, ita ut maxima eorum sanationis spes in restitutis ventriculi viribus posita sit. Difficillimum vero est præcepta ulla certa aut fixa dare de re adeo incerta ut  
facilitas



facilitas concoctionis alimentorum, quæque a tot variis rebus pendet, imprimis autem a constitutione ægri, et statu præsentis ventriculi, et natura morbi, et vi consuetudinis, et vitæ genere quam ille degit, ejusque interdum fastidio et repugnantia, vel cupiditate aut amore, quorundam ciborum. Multi enim et optimi cibi, sua natura neque faciles neque difficiles concoctu, dici possunt; sed tantum prout ventriculus se habuerit, aut bene digeruntur in eo aut corrumpuntur.

1004. Tuto vero dici potest, omnes cibos, carnes pariter ac fruges, crudos quam coctos difficiliores esse concoctu (631.).

1005. Carnes quoque plurimum assæ vel elixæ, quam modice tantum aut leviter coctæ, duriores sunt concoctu, nisi hæ fastidium moveant, quod concoctionem omnis cibi impedit.

1006. Omnia oleosa, adeps, butyrum, olea plantarum, fere semper ægrius concoquuntur quam aliī cibi; præsertim usta vel fricta; quapropter ab ægris semper evitanda sunt, vel saltem parcissime utenda, five pro cibo, five pro condimento ad alios cibos, quorum concoctionem, aliter bonam et facilem futuram, aliquando corrumpunt. Hæc ratio est cur carnes sæpe ægris hac tantum lege permittantur, ut cum nullo alio condimento quam proprio succo aut jure istas comedant. Ob eandem quoque causam ægri semper monendi sunt, ne cum frugibus, veluti oleribus aut radicibus esculentis, multum butyrum vel oleum sumant, sicut mos est apud multas gentes.

1007. Carnes salitæ, vel fumo vel aromatis conditæ, vel siccæ, et duræ, et tenaces, difficillime concoquuntur, et ideo ægris fere semper prohibendæ sunt, nisi forte siquando vehementi cupiditati obtemperare oporteat, vel, propter infirmitatem ventriculi, cibo præter solitum acri et gustui

tui grato opus fit, qui cum, sui muneris aliter impotentem, stimulet, et ad justam actionem incitet.

1008. Inter carnes terrestrium animalium quæ mensis imponi solent, haud magnum discrimen existit. Carnes juniorum quam adultorum, carnesque avium quam quadrupedum, contra vulgarem notionem, nonnihil difficiliores videntur esse concoctu. Feræ, quam domi nata atque educata animalia, magis salutare et faciliores concoctu habentur, scilicet quæ minus quam hæc sagineantur, et sanius et magis naturaliter vivunt. Carnes vero avium quarundam aquatilium, veluti anatum, anserum, et similiarum, validiorem et fere graviorem cibum quam carnes aliorum alitum præbent.

1009. Majus autem discrimen intercedit inter carnes piscium. Omnes sane plurimum nutrimenti suggerunt; quidam vero, si modo simpliciter cocti fuerint, facillime



cillime digeruntur, alii contra difficillime; omnes vero fricti, aut cum multo oleo vel butyro assumpti, ægerrime concoquuntur. Pisces imprimis maritimi, quorum carnes albæ sunt, cibum præbent bonum et levem. Idem dici potest de ostreis, canceribus, astacis, cæterisque fere conchyliis. Pisces vero quorum carnes subrubræ sunt, cum fluviatiles, tum quoque maritimi, veluti salmo, halec, scomber, &c. nutrimentum validissimum præbent, sed difficiles plerumque concoctu existunt, partim forte propter naturam carniū, partim quoque propter plurimum oleum quod habent.

1010. Lac ipsum vaccinum, quamvis plerumque optimus atque levissimus cibus, nonnunquam ægre concoquitur, ventriculumque multum gravat; scilicet postquam semel coactum est (627.), haud facile iterum solvitur, propter duritiem et tenacitatem quam adipiscitur. In hoc statu, lac natura tenuius, veluti asininum, melius respondebit,

ve!

vel etiam lac vaccinum cum aqua dilutum et saccharo commistum. Flos lactis, cujus magna pars merum oleum est, fere semper difficilis concoctu reperitur: pressum vero lac ex omnibus fere quibus vulgo utimur cibis difficillime concoquitur, præsertim tostum, cum propter insignem tenacitatem, tum quoque propter oleum suum ustum et frictum. Vetustior quidem caseus, et jam præne corruptus, a multis concoctu satis facilis reperitur; quin et multi putant, eum non modo ipsum facile concoqui, sed aliorum quoque alimenterum concoctionem promovere, præsertim quæ naturaliter ad acorem vergunt. Hoc autem, ut videtur, beneficium, potius tribuendum est stimulo quem infirmiori ventriculo impertit, quam putridæ ejus naturæ, quæ vulgo creditur acori adeo adversari.

1011. Far omne priusquam fermentatum fuerit, concoctu difficile est, et ideo validioribus tantum ventriculis accommodatum;

datum; probe autem fermentatum facillime concoquitur, ita ut vel delicatissimis ægrotis conveniat. Pari ratione radices esculentæ, veluti *battata*, quæ multam farinam habent, ægrotantibus parum accommodatæ sunt. Quin et ob eandem causam legumina multa, veluti pisa, fabæ, et similia, quæ dum tenera et viridia adhuc sunt adeo facile concoquuntur, ut plerisque ægrotis tuto permittantur, quamprimum maturescunt, et naturam farris adipiscuntur, difficiliora concoctu fiunt.

1012. Pleræque radices esculentæ, atque olera, veluti rapum, aut pastinaca, aut brassica, aut *spinacea*, quo ipsa teneriora sunt, eo facilius fere ab infirmo ventriculo concoquuntur. Neque tantum ad genus plantæ quam ad teneritudinem ejus spectare oportet; brassica enim communis pro cibo assumpta, robustissimis interdum oneri est, dum *cauliflorem* aut *brocoli*, infirmissimi sæpe impune edunt, et bene concoquunt.

1013. Poma



1013. Poma mitia plerumque admodum salutaria sunt, et a multis morbis aliquando defendunt, et quosdam præsentis summovent, et brevi solvuntur et facile concoquantur in ventriculo, modo neque nimia copia devorata fuerint, neque tempore minus idoneo. Tutissima sunt vel pro jentaculo vel pro cœna assumpta, vel aliquamdiu ante vel aliquamdiu post prandium; nam statim a prandio, pleno scilicet ventriculo, vel forte nimis jam onerato, si fuerint assumpta, perspicuum est haud parum esse nocitura. Quod si ventriculus valde infirmus est, et acori imprimis obnoxius, tum poma, quamvis maturissima, aut omnino deneganda sunt ægro, aut caute et parce admodum concedenda.

1014. Plurimi ægri, diætæ ex carnibus pro maxima parte diu assueti, frugibus, siquando hæ propter varias causas magis aptæ creditæ sunt, atque præscriptæ, difficillime assuescunt, neque has sine fastidio sumere, aut sumptas sine magno tumultu

in ventriculo concoquere, possunt. Tamen prudentia atque perseverantia, subducta vel minuta paullatim carniū quantitate, auctaque pro rata parte frugum copia, omnes fere homines eo perducī queunt, ut has et satis appetant, et siue incommodo allūmant, et vel solis frugibus, (si opus fuerit) vel iis saltem pro maxima cibi parte vescantur, idque non modo sine periculo aut incommodo, sed cum magno beneficio.

1015. Ex iis rebus quibus pro jentaculo uti solemus, *thea*, *coffea*, *cacao*, hæc sola aliquid nutrimenti suggerit; priores enim duæ res nihil nutriunt, nisi ope lactis et sacchari quæ cum iis commiscuntur. Præterea vi quadam sedante et solvente in ventriculo pollent, præsertim quum calidæ bibuntur, et ideo parum salutares fiunt; quapropter omnibus fere ægris vetustis morbis laborantibus prohibendæ sunt, vel parcissime permittendæ. *Cacao* vero, multum olei et quasi farinæ continens, valde nutriens

trians est; potiusque ex eo confectus, dummodo bene coctus sit, et non nimis crassus factus, et fabæ in pollen tenuissimum tritæ fuissent, neque cum aromatis mixtæ, a multis hominibus bene concoquitur, et iis igitur satis aptus cibus est.

1016. Ova demum recentia atque forbilia, et multum nutrimenti præbent, et concoctu facilia sunt, et ideo bonus et salutaris cibus plerumque sunt, et sæpe cum insigni beneficio in locum aliarum rerum pro jentaculo aut cœna sufficiuntur.

1017. Delectus denique cibi haud levis momenti in morbis vetustis fieri debet, ratione habita naturæ morbi, cui cibus ita accommodari debet, ut ei quam maxime adversetur, et morbosum corporis flatum aliquatenus corrigat: sic, in morbis hydropticis, sicca et solida diætæ ex carnibus assis et similibus rebus; in morbis putridis vero diætæ tenuis ex frugibus, pomis, &c. maxime idonea erit. Sed de his rebus su-



fius postea agendum erit, sub variis titulis remedium quæ adversus singulos morbos corporis status valent.

1010. Potui quoque ægrotantium in longis morbis cura non levis danda est, scilicet qui vel solum ventriculum vel totum corpus pari ratione ac cibus afficere potest. Potus omnis, origine, et natura etiam pro maxima parte, aqua est; quæ quidem pura, sive fontana sive fluviatilis, nihil mali in se habet, et omnibus ægris et omnibus ventriculis, utcunque delicatis atque infirmis, (nisi prava consuetudine aliquid meraci necessarium factum fuerit), apta et accommodata est. Sunt profecto multæ aquæ quæ alia atque alia ratione corpori nocere possunt; sunt quoque multæ medicinales aquæ in variis morbis saluberrimæ. Sed de his non hic est locus agendi.

1019. Pura autem aqua fontana, præsertim recens et frigida, optimus, et saluberrimus, et fere gratissimus sitientibus, sive fanis

nis five ægris, potus est ; nimirum qui sitim restinguit, corpus refrigerat, acria diluit et sic obtundit, urinam, et sæpe sudorem, movet, noxia expellit, putredini obstat, concoctioni opitulatur, et demum ventriculum roborat.

1020. Sunt tamen, quamvis paucissimi, quibus frigida, propter insignem vel totius corporis vel ventriculi tantum infirmitatem, suo frigore nocere videtur. His interdum eadem aqua, vel levissime tepescata, vel cocta et iterum frigescens, et sic quasi mollita, satis conveniet.

1021. Homines vero semper et ubique in liquoribus quibusdam fermentatis et inebriantibus sibimet comparandis solertes fuere ; et tenuioribus saltem hujusmodi liquorum pro potu communi, sicut meracioribus luxuriæ causa, sæpe utuntur ; ita ut multi per plures annos, aquam, quæ sola fere naturalis potus dici queat, ne semel quidem gustaverint. Quin et multi iis ita assuecunt,

cunt, ut potu quodam meraco sine gravi incommodo carere nequeant,

1022. Ex iis liquoribus, vina et cerevisiæ variorum generum maxime in usu sunt, et sanis hominibus fere tuta, et multis ægris salutaria, modo sua natura bona fuerint, (fatis scilicet fermentata, neque adhuc ad acorem nimis vergentia), neque nimia copia assumpta.

1023. Incommodo vero quodam, vel aliquando periculo aliquo, in multis longis morbis non carent. Corpus imprimis nutriunt, quod aqua non facit, idque forte cum tali subsidio minime opus est, et sic nocent. Præterea, excitant et calefaciunt corpus, quod forte jam nimis calet. Et denique, natura sua acescentia, ventriculo jam infirmo sæpe nocent, acorem in eo gignant, concoctionem alimentorum, et nutrimentum, et refectionem corporis, impediunt, et hoc ideo brevi infirmant.

1024. Quædam



1024. Quædam ex iis propter tenuitatem ad acorem valde proclivia existentia, quædam contra natura magis meraca, excitando primo, postea infirmando stomachum et totum corpus, ægrotis maxime nocent. Si parce bibendum est, meraciora Hispaniæ et Lusitaniæ vina optima sunt et maxime salutaria; si largius, puriora et saniora Galliæ vina tutiora sunt et ægris et sanis. Ex cerevisiis vero, Londinensis illa fortis atque amara, quæ *porter* vocatur, saluberrima est, et ægrotantibus, iis præsertim qui a stomacho laborant, accommodatissima, et fere sola permittenda.

1025. Præter vero omnes liquores fermentatos, meracissimi illi latices, qui *spiritus destillati* vocantur, apud multos in usu quotidiano sunt, aut meri, aut cum aqua et aliis rebus commisti. Hi sane incommodis quibusdam vinorum plane carent; neque enim corpus nutriunt, neque acefcunt in ventriculo, sed potius acorem in eo impediunt: commoda quoque haud exigua

exigua plane possident; ventriculum et totum corpus excitant, et sic concoctionem alimentorum, aliter difficillimam futuram, sæpe promovent. Nihilominus vero plurima et pessima incommoda nunquam non habent, et merito omnium rerum quas hætenus luxuria humana excogitaverit perniciosissimi habentur. Nimis excitando sæpe nocent; sæpius adhuc et magis infirmando: *generi nervoso* imprimis inimici sunt, et ventriculo, et jecori; unde infirmitas generalis, et dirus et insanabilis hydrops, vel ab hac, vel ab obstructionibus viscerum, quas liquores isti gignere solent. Rarissime igitur ægrotantibus permittendi sunt *spiritus* isti *destillati*, utcunque diluti, nam vi consuetudinis, quamvis primo parum grati, paullatim suaviores fiunt, et meraciores bibuntur.—Mitescunt aliquantum et obtunduntur in potu nostro *punch*, non modo multa aqua diluta, sed cum saccharo simul et succo pomorum quorundam commisti. Sed tum nihil peculiaris commodi habent; nam liquor ille, ficut

sicut vinum, sed magis adhuc, in ventriculo acescit, et toti corpori magis nocet.

1026. Superest et una alia res, quæ et cibo et potu, cum sanis tum maxime ægris, five acutis five vetustis morbis laborantibus, magis necessaria est, et sæpe omnibus medicamentis et medicina ipsa præstantior; ær nimirum purus et bonus, quo nihil ad vitam retinendam, et sanitatem conservandam, magis necessarium est, nec quicquam ad multos morbos sanandos utilius; scilicet sine quo medicamenta alioquin optima et efficacissima parum omnino valent, et morbi natura leves et facile sanabiles, maligni prorsus et sæpe insanabiles fiunt.

1027. Aër enim purus venenatam illam mephitim quam sanissimi etiam homines, et multo magis ægri, a pulmone et cute usque exhalant, aufert, et per auras diffundit, donec tandem, deposita vi sua pestifera, et ipsis et aliis innoxia fiat. Purus præterea ær corpus reficit atque refrigerat, vires forte



multum labefactas confirmat, cibi appetitum et concoctionem juvat, et putredini fortiter occurrit, præsertim frigidulus. In acutis morbis apprime necessarius fit, propter rationes satis manifestas; præsertim in febribus a contagio ortis. In omnibus istiusmodi morbis, aër purus, et quam sæpissime renovatus, salutaris et necessarius est. In multis, aër aliquantum frigidior quam sanis aut gratus aut tutus esset, et saluberrimus, et ipsis ægris jucundissimus existit. Non omnes vero morbi acuti adeo frigidum aëra tolerant, præsertim qui a frigore collecto oriuntur, vel in quibus pulmones multum afficiuntur, cujuscunque fuerint originis. In omnibus vero morbis aër calidus, et impurus, et morbosus effluviis corruptus, et stagnans, neque ut decet mutatus, haud parum nocet.

1028. Neque mediocris in morbis vetustis est vis, neque mediocris utilitas, idonei aëris, qui profecto in quibusdam morbis unica spes atque præsidium est. Ille  
autem

autem semper debet esse purus, quod nullo modo obtineri potest nisi subinde renove-  
tur. Plerumque ficcus aër saluberrimus est; nimirum qui corpus maxime roborat et excitat, et exhalationem per cutem pro-  
moveret, et cibi appetitum conciliat, et con-  
coctioni favet, et respirationi fere accom-  
modatissimus est. Fertur tamen, quosdam  
a pulmone laborantes, in aëre crasso et hu-  
midiore, quam in puro, et sicco, et fere-  
no aëre, melius se habere. Interdum cali-  
dior aër, interdum frigidulus, magis pro-  
dest in morbis longis, prout hi vel a fri-  
gore, et torpore, et repressa per cutem ex-  
cretionem, vel a calore et nimia laxitate et  
mobilitate corporis profluxerint. Cœlum  
denique temperatum, serenum, modice ca-  
lidum, et præ omnibus æquale, saltem non  
subitis tempestatis mutationibus obnox-  
ium, in omnibus fere morbis saluberri-  
mum est, et in nonnullis, in quibus re-  
media parum valent, veluti in phthisi,  
præstantissimum remedium.

1029. Vires autem aëris, cum in inducendis tum quoque in levandis aut fummovendis morbis, tum denique in corpore aut roborando aut infirmando, nondum fatis intelliguntur. Argumenta vero et observationes etiam haud pauca non defunt, quæ ostendant, aëra in his rebus plurimum valere, plurimumque præsidii in eo esse positum, si modo administratio ejus esset plenius intellecta.



C A P. XXVI.

*De remediis astringentibus.*

1030. **Q**Uoniam, ut suo loco jam dictum est (78. et seqq.), partes solidæ humani corporis, vel per totam compaginem vel in parte tantum singulari, five natura, five prava consuetudine et vivendi ratione, five variis causis morbosæ, five demum vi morborum quorundam præcedentium, sæpe relaxantur ultra modum, et debiles et flaccidæ fiunt, ad vitæ munera parum valentes; remediis quibusdam plane opus est, quæ talem debilitatem et laxitatem corrigant, partesque nostras solidas ad pristinam et sanam firmitatem

mitatem reducant. Hujusmodi remedia, Astringentia apud medicos vocantur.

1031. Talem vim partes solidas animalium corporum densandi, et firmandi, et roborandi, res quasdam possidere multa docent, et præsertim ars illa communis et bene nota corii cum cortice querno aliisque similibus rebus densandi et præparandi, donec insignem duritiem et firmitatem acquirat.

1032. Plurimas quoque res simili quodammodo vi in corpore vivo pollere, et ratio docuit, et experientia fatis demonstravit. Modus vero quo hunc effectum præstant, parum hætenus intellectus est; sive, ut quidam opinantur, novas particulas inter pristinas interponendo, quæ has fortius annectant, totamque ideo compagem firmiorem reddant; sive, ut aliis magis placet, parum vel nihil novæ materiæ adjecto, vincula tantum adhæfionis priorum particularum constringendo, quæ sic ad propriorem

propriorem contactum perductæ, materiam duriores reddant. Præstat certe de re adeo obscura atque incerta nihil conjectare, quam variis opinionibus, ipsisque parum accuratis, neque ad rem bene explanandam idoneis, neque usui medico accommodatis, nosmet irretire. Tamen satis certum est, materiam solidam animalium corporum, interdum ductis tantum particulis ex quibus constat in arctiorem contactum, citra ullam vel minimam compositionis mutationem, et interdum etiam dissipatis particulis humidioribus quæ eam mollem fecissent, firmiorem reddi. Medicamenta vero astringentia, num simili quovis modo, an alia prorsus ratione, suum effectum præstent, parum constat; nec multum refert, dummodo effectus ipse certus sit, eorumque natura et administratio satis perspecta.

1033. Multa sane, et quidem diversissimæ naturæ medicamenta, inter astringentia merito recensentur. Omnia vero medicamenta



dicamenta quæ hac facultate pollent, vel ex plantis vel ex fossilibus corporibus sunt derivata.

1034. Innumeris fere in plantis, inque variis earum partibus, inest vis astringens; veluti in radicibus, corticibus, lignis, foliis, floribus, fructibus, et demum in succis propriis spissatis; quorum omnium exempla esse possunt, quercus, *bistorta*, *tormentilla*, lignum *Campechense*, *uva ursi*, rosa, *balauſtia*, mala Cydonia, pruna sylvestria, granata, terra *Japonica*, ut vocatur, gumm *kino*, &c. Maxima autem vis astringens in corticibus plantarum fere reperitur: quin et in radicibus astringentibus, et in fructibus quibusdam simili vi gaudentibus, veluti in granato, maxima vis in cortice eorum plane infidet.

1035. Balsama quoque, ut vocantur, succi scilicet plantarum quarundam resinosi, inter astringentia medicamenta annumerantur, et in quibusdam morbis pro astringentibus

astringentibus remediis præscribuntur, neque inutiliter; quamvis veram et puram vim astringentem plane non habeant, multaque ostendant, ea longe alia ratione in istis morbis prodesse.

1036. Vis demum astringens haud exigua inest in succis quarundam plantarum, cum in iis qui natura acidi sunt, veluti succus citrei, tum quoque in iis qui natura dulces et blandi existentes, tantum postquam fermentati fuerint, acorem et vim astringentem adipiscuntur. Sic multa vina, præsertim rubra, quamvis recentia, et sua natura optima, vi quadam astringente gaudent; omnia vero vina, omnesque liquores fermentati, cerevisia, &c. jam acida facta, haud parum astringentia existunt.

1037. Observatu dignum est, plerasque plantas quibus radices amaræ sunt, cortices plus minus astringentes habere. Præterea, omnes fere plantæ amaræ nonnihil

facultatis astringentis possidere creduntur, et revera pro astringentibus remediis a medicis sæpe præscribuntur. Vis demum astringens, siqua plantæ cuidam inest, facile detegitur, non modo sapore illo aspero atque ingrato qui omnibus substantiis astringentibus communis et constans est, sed facilius et certius adhuc, nigro colore, qui statim fere effici solet, ut planta ipsa, vel infusio tantum ejus, commissa fuerit cum *sale Martis* in aqua soluto.

1038. Omnia medicamenta astringentia quæ a plantis desumuntur adeo mitia et tuta sunt, ut facile, et sine periculo, vel largius vel parcius, secundum ipsorum facultates, ab ægris devorari possint, eorumque usus diu continuari.

1039. Ex fossilibus quoque rebus plurima derivantur medicamenta astringentia. Hæc vero sunt vel terræ, vel metalla, vel demum sales, sive puri, sive terrei, sive metallici.

1040. Ex



1040. Ex terris puris, quamvis multæ olim pro astringentibus remediis usurpatæ fuerint, et a nonnullis haud parum laudatæ, tamen adhuc valde dubium est num ulkæ earum talem vim habeant. Boli, ut vocari solebant, non sunt astringentes, nisi forte propter mixturam quandam aliarum rerum. Calx vero aliquid istiusmodi vis possidere videtur, quocunque demum modo explicanda sit; quoniam non modo in vivo corpore effectum aliquem astringentem habere videtur, veluti in *fluore albo*, in quo morbo aqua calcis prodesse visa est, (cujus forte rei alia prorsus ratio reddi possit), verum etiam ad desendendum et indurandum corium apprime utilis est; nisi hoc quoque ad effectum ejus in cortice querno totum referre placeat.

1041. Ex metallis, quatuor, cuprum scilicet, plumbum, *zincum*, et ferrum, pro astringentibus remediis usurpantur; quorum priora duo adeo periculosa et fere venenata existunt, ut nunquam ab agris

devorari debeant, nisi minutissima quantitate, et maxima cum prudentia et circumspeditione. Ferrum vero, et copia haud exigua, et cum insigni beneficio, sæpe devorari potest, vel in particulas minutas limando tritum, vel ad formam rubiginis per humorem et trituram redactum. *Zincum* quoque aliquando satis large assumptum est, sub forma *florum*; quorum vires et usus, utcanque laudati fuerint, adhuc parum certa videntur.

1042. Ex salibus demum, nonnulli magna vi astringente pollent. Sales imprimis acidi, puri, ad unum omnes, talem vim habent, ut ex effectibus eorum manifestissimis, cum in vivo corpore, tum quoque in corio preparando, satis constat. Non omnes vero tales acidi vim hanc æque fortem habent. *Acidum vitrioli* omnium fortissimum est, quod ad vim astringentem, cum in medicina, tum quoque in aliis artibus. Proximum forte huic locum tenet *acidum muriaticum*; deinde *nitrosum*; quæ ambo,

ambo, pura faltem, raro ufurpantur. Acetum demum, aut fucci plantarum acidi, aut vina fubacida (1036.), fimili vi, fed debiliore adhuc, gaudent. Hæc vero multo magis et multo facilius in noftris corporibus fubiguntur et permutantur quam illa, priftina dum fermentantur (621. 559.), fere depofita, novaque induta natura; ita ut brevi neque acida amplius neque forte aftringentia exiftant. Foffilia autem *acida*, propriam naturam, ut videtur, diutius fervant, et corpori igitur pro aftringentibus remediis magis et certius profunt.

1043. Ex falibus terreis, alumen longe optimum remedium aftringens videtur, et fere folum nunc in ufu eft; validiffimum profecto remedium, et fimul minime periculofum aut nocens, fatis libere adhiberi poteft, vel forma ficca et folida, vel in idoneo liquore folutum. Vim fuam aftringentem alumen habere videtur, magna faltem ex parte, ab *acido nitriolico* quod continet.

1044. Ex



1044. Ex salibus vero metallicis, ii fere soli qui ex cupro, aut *zinco*, aut plumbo, aut demum ferro, formantur, pro astringentibus remediis usurpari solent; eorumque igitur facultates ex jam dictis (1041.) facile intelligentur.

1045. Sal *Martis*, ut vocatur, validissimum, et simul satis tutum et idoneum medicamentum astringens est; sed partim ob saporem suum ingratum, partim ob stimulum quem ventriculo dare solet, interdum ad nauseam usque et vomitum, non tanta copia ac pura rubigo ferri (1041.) devorari potest: minore vero copia assumptus, eisdem salutare effectus in corpore habet. Verisimile quoque est ferrum ipsum, forma rubiginis devoratum, universo corpori tum maxime prodesse, cum ab acido humore in ventriculo et intestinis solutum fuerit, et in salem quendam sali *Martis* haud dissimilem versum; qui per vasa resorbentia *lacte* haustus, et in sanguinem delatus, cum eo totam corporis compaginem pervadat.

1046. *Vitriolum*

1046. *Vitriolum* vero album, quod ex zinco constat, multo validius medicamentum astringens existit, sed ad devorandum minime idoneum, propter vehementem et subitum vomitum, quem statim fere ut in ventriculum receptus fuerit excitat. Partibus autem externis pro astringente admotum, eximium omnino remedium est.

1047. *Saccharum Saturni*, aliaque quotquot ex plumbo præparantur medicamenta astringentia, quamvis bona et valida remedia, gravius adhuc incommodum in se habent: nam copia vel minima in corpus recepta, ei fere veneno sunt, et largius sumpta, certissimo exitio. Quapropter, etiam cum partibus externis admoventur, prudentia aliqua in eorum usu necessaria erit.

1048. Quod sales demum ex cupro paratos attinet, princeps ex iis, *vitriolum cæruleum*, et periculosissimum est, propter naturam suam venenatam, et adhibitu difficillimum,

difficillimum, propter insignem qua pollet acrimoniam, ita ut ne quidem partibus externis facile admoveri, multo minus in ventriculum tuto recipi, pro remedio astringente queat. Cuprum quidem *ammoniacum* ex hoc præparatum multo mitius remedium est, sed non adeo ut large devorari possit, propter nauseam et vomitum quem solet excitare; et parca copia assumptum parum efficax videtur.

1049. Ex iisdem porro metallis *tincture* quædam parantur, ex ferro imprimis, ope *acidi* salis communis, et ex plumbo ope *spiritus vini* et aceti; quarum pleræque easdem vires eademque incommoda habent ac metalla ipsa, aut sales metallici (1041. et seqq.), unde parantur. *Tinctura Martis* sane, et satis efficax remedium est, et ventriculo gratius aut tolerabilius quam aut ipsum ferrum aut sal ejus; forte etiam magis idoneum ut in sanguinem recipiatur, per totum corpus deferendum. *Tinctura Saturnina* raro et parce forbenda datur, propter venenatum plumbi naturam (1047.);

partibus



partibus vero externis libere et feliciter sæpe admovetur. In hujusmodi *tincturis*, et medicamentum quod solvitur, et liquor ipse qui id solvit, prodesse possunt.

1050. Præter vero omnia medicamenta, aut in corpus recipienda, aut eidem extrinsecus admovenda, sunt et alia remedia (945, 6.) quæ sæpe pro astringentibus cum insigni beneficio præscribuntur, interdum etiam medicamentis jam recensitis multum præstant; ut ex causis quæ corpora nostra laxant (80. et seqq.), et nimis flaccida reddunt, bene intellectis, satis perspicuum erit. Sic, ut cibus tenuis et aquosus, potus nimis largus, vitæ genus ignavum et sedentarium, et nimius aut nimis constans calor corpori admotus, variis modis omnes solidas ejus partes solvunt et laxant, facile constabit, contrarium vitæ et victus genus, et plurimam corporis exercitationem, et cibum siccum et nutrientem, et potum parcum, et frigus demum cum prudentia admotum, ista mala correctura esse, et

justam et naturalem firmitatem ægrotantium corporibus efficacissime conciliatura. Neque rei quam ratio adeo plane docuit adversatur experientia, sed eandem sine dubio comprobatur atque confirmat. De hujusmodi vero remediis fusius postea dicendum erit, quum de roborantibus sermo erit; quoniam non modo partes nostrorum corporum, quæ, distinctionis causâ, mortuæ vocantur (70. et seqq.) afficiunt, verum etiam in *solidis vivis* (107. et seqq.), magna vi pollent, eorumque vigorem, simul cum firmitate aliarum partium, plurimum augent.

1051. Effectus primus et simplicissimus remedium astringentium est, partes solidas nostrorum corporum firmare, densare, indurare; idque satis certe et efficaciter in iis partibus quibus proxime admoventur, sed multo minus efficaciter in aliis et remotis partibus, aut demum in universo corpore, siquando hoc præter naturam totum solutum fuerit; quamvis  
admodum

admodum verisimile fit, multa eorum in sanguinem parum mutata, pristinisque viribus adhuc pollentia recipi, et ideo totum corpus pervadere, et effectum in eo quam maxime generalem habere.

1052. Neque sane aut solæ fibræ simplicissimæ, aut minuta tantum solidarum partium elementa, qualiacunque hæc fuerint (93.), sed tela quoque reticulata, et organa omnia ex iis formata, ab astringentibus remediis afficiuntur. Vasa imprimis quæ sanguinem vehunt, cum arteriæ tum quoque venæ, vires eorum probe experiuntur, et multum, et sæpe subito, constringuntur: quin et *solida viva* (107.) pariter ab iis afficiuntur, et propter nexum insignem qui inter dotes eorum proprias, (sensum scilicet et mobilitatem), et dotes *mechanicas*, quas cum aliis solidis partibus communes habent (370. 376.), intercedit, dum hæ mutantur, et major firmitas atque rigiditas omnibus corporis partibus accedit, sensus



atque mobilitas pro rata fere parte minuantur, et torpor quidam inducitur.

1053. Hinc facillime intelligetur remedium astringentium usus in omnibus fere morbis in quibus præscribi solent; et simul perspicuum erit, ea in multis egregie esse profutura.

1054. Imprimis igitur, in laxitate partium solidarum, five universæ corporis compaginis, five in loco tantum singulari, necessaria fiunt, aut parti maxime affectæ proxime admota, veluti oculis post inflammationem, aut faucibus et gutturi post anginam; aut in ventriculum recepta, aut toti corpori admota, veluti in hydropicis, vel jam ex hoc aut aliis morbis convalescentibus, vel in iis quorum corpora malum vitæ genus aliæque causæ nimis laxarunt atque solverunt.

1055. Præterea, ex effectibus quos in vasis sanguinem vehentibus (1052.) habent,  
plurimum

plurimum sæpe profunt in compescendis sanguinis profluviis, cum sponte accidentibus, tum quoque vi externa aut arte inductis. Pari insuper ratione, profluvia quædam alia, veluti *fluorem album*, cui mulieres adeo obnoxie sunt (815. et seqq.), aut fluxum istum mucosum ex *urethra* qui diu sæpe post sanatam *gonorrhæam* virulentam manere solet molestissimus et pertinacissimus, optime reprimunt, nimirum qui, magna saltem ex parte, pendent a laxitate et infirmitate vasorum.

1056. Porro, utilissima sæpe reperiuntur in cohibendis secretionibus aut excretionibus quibusdam præter modum auctis, veluti sudore aut urina, quorum excessus sæpe vel oritur, vel saltem augetur, aut generali corporis infirmitate, aut peculiari relaxatione partium, et præsertim vasorum, quæ iis maxime inserviunt.

1057. Denique, in alvi fluxu, cujus mali tot tamque varia existunt genera (655.

et

et seqq.), molestissima sepe, et periculosissima, et sanatu aliquando difficillima, astringentia remedia haud raro plurimum profunt, morbumque vel prorsus depellunt, vel saltem minuunt et temperant, etiam ubi, propter causam ejus sua natura immedicabilem, perfectæ sanationis neque spes neque locus existit. Pari ratione, in proVectiore statu *dysenteriae* (661.), purgatis jam ut decet intestinis, sed manente adhuc importunissimo alvi fluxu, perutilia fiunt; partim ob confirmatas aliquantum omnes solidas partes intestinorum, vi morbi haud parum solutas; partim ob minuta vasa atque foramina in intestina liantia, suosque humores nimis large fundentia, contracta atque coarctata; partim demum ob minutam aut sublatam morbosam illam mobilitatem viscerum (368. et seqq.), quæ vel causa et origo morbi extitisset, vel a morbo diu persistente et recrudescente inducta fuisset (656.).

1058. Postremo,



1058. Postremo, quamvis remedia astringentia partes solidas quas mortuas vocamus, primo, et proxime, et maxime, afficiant, tamen et *solida viva* aliquando multum afficiunt, eorumque vigorem augent, mobilitatem vero minuunt (368. 377.), et in humoribus etiam vi haud exigua pol-  
lent, et putredinem vel arcent, vel aliquando jam præsentem corrigunt. Quapropter, et in nimia mobilitate *generis nervosi*, et in ejus debilitate, et in putredine, aut generali (529. et seqq.) aut partis cujusvis singularis, sæpe utilissima fiunt. De hujusmodi vero astringentium remediorum effectibus postea fusius agendum erit.

*De remediis emollientibus.*

1059. **Q**Uoniam duplici modo vitari possunt partes solidæ humani corporis, et vel nimis duræ et rigidæ, vel nimis molles et flaccidæ, fieri (79.), remediis emollientibus pariter ac astringentibus opus est, ut illæ, præter naturam rigidæ et duræ factæ, ad justam, et sanitatis legibus consentaneam, mollitiem iterum reducantur.

1060. Res quasdam tali vi in materia illa ex qua corpora animalium constant (70. et seqq.) jam mortua, et a corpore separata, pollere, notissimum est. Nonnulla etiam  
remedia

remedia in corpore vivo eundem effectum habere, multa et certissima experimenta et observationes satis demonstrarunt.

1061. Minor vero horum medicaminum copia, minor saltem eorum varietas, quam astringentium, a Natura suppeditata est. Haud pauca sane remedia quæ pro emollientibus usurpantur atque laudantur, ex variis plantis atque animalibus desumuntur: omnia vero ad duo genera facile referuntur; oleosa scilicet, et mucosa, seu *mucilaginosa*, ut solent vocari.

1062. Talem mucum, mollem, et aliquantum tenacem, variæ plantæ ubertim fuggerunt; idem in variis variarum plantarum partibus, veluti in radicibus, et foliis, et seminibus inest; cujus rei exempla esse possunt, lilium album, cepe, althæa, malva, linum, &c.

1063. Olea vero blanda et mollia, plurima animalia, pariter ac plantæ, magna



copia fuggerunt. Quamvis multa olim credulitas, et fere superstitio, apud populum, et etiam apud medicos, invaluisse, de singularibus et miris viribus et excellentiis oleorum seu adipum variorum animalium; nunc fatis constat, facultates vel prorsus easdem, vel parum diversas, in omnibus inesse.

1064. Proximum vero animalium adipi locum tenet butyrum, oleum scilicet, quod lac fatis magna copia præbet. Lac quoque ipsum, cum ob aquosam suam naturam, tum etiam ob oleum quod continet, remedium emolliens jure habetur.

1065. Naturæ demum haud multum ab his alienæ, videntur esse olea plantarum mitia et crassa (99.) qualia per pressuram ex quibusdam fructibus aut seminibus copiose derivantur; veluti ex olivis aut amygdalis, &c.; et hæc igitur inter remedia emollentia merito recensentur.

1066. Omnium

1066. Omnium vero hujus generis remedium longe validissimum atque certissimum est pura aqua, præsertim calida; innumera enim decocta, et fomenta, et infusiones, quæ tam sæpe præscribuntur, tantumque propter vires suas emollientes laudantur, nihil aliud fere sunt, neque alias vires habent, quam pura aqua calida. Et profecto, multa experimenta de industria instituta ad hanc rem investigandam satis ostenderunt, pleraque ex oleis, et succis, aliisque rebus quæ vulgo adeo pro viribus suis emollientibus laudari solent, multo minorem vim possidere quam aqua ipsa. Non tamen idcirco concludere æquum est, substantias illas oleosas et mucosas, quibus uti solemus, nihil prodesse. Certissimum enim est, eas solidas partes animalium corporum molliores et magis flexiles reddere, scilicet ob has quodammodo humectatas, vel fortasse oleo illitas, quod motum particularum in se mutuo faciliorem reddit, minuta nimirum, vel fere sublata, frictione illa quæ motum impediēbat.

Præterea, pura calida, et etiam plurimi liquores aquosi, five calidi five frigidi admoti fuerint, per vaporationem brevi dissipantur, partesque ideo externas quas fovebant et emollicbant aridas et rigescentes relinquunt. Oleosa vero et mucosa medicamina ab hoc incommodo fere immunia sunt; saltem multo tardius dissipantur. Merito igitur cum omnibus fomentis, ad emolliendas partes nostrorum corporum externas, miscentur.

1067. Quod rationem vero attinet, quæ vel pura aqua vel plurimi aquosi liquores profunt in emolliendis partibus solidis humani corporis quæ nimis rigidæ factæ sint, explanatu minime difficilis est. Hæ enim, ut suo loco jam expositum est (80.), aut duriores aut molliores fiunt, secundum copiam variorum elementorum quæ iis insunt; et rigescunt ob defectum, et molliuntur propter abundantiam, humidæ materiæ in eorum compositione. Aqua vero, aut aquosi liquores, corpori admota,  
aut



aut in id recepta, omnes ejus partes pervadunt, vel per minuta vasa hausta atque delata, vel per foramina invifibilia penetrantia, feque cum ficcioribus quibus occurrant particulis conjungentia.

1068. Præter vero medicamenta emollientia, aut devoranda, aut corpori variis modis pro fomentis, &c. admovenda, funt et alia remedia, quæ fimili vi, eaque haud exigua, in corpore humano pollent.

1069. Calor imprimis, præfertim cum humore junctus, partes folidas noſtrorum corporum mirum in modum ſolvit atque emollit. Calor profecto ficcus, ſimilem, quamvis haud tantam, vim habet. Præterea, corpora noſtra natura haud parum humida exiſtunt, et ideo facilius et magis a calore afficiuntur. Partes quidem corporis internæ, calorem ſuum proprium et naturalem parum mutatum fere ſolent ſervare; partes vero externæ a calore plurimum affici poſſunt, et molliri, et flexiles reddi,

reddi, quamvis antea valde rigidæ factæ essent. Quod si calor insolitus parti internæ admotus fuerit, veluti ventriculo aut pulmoni, quorum in utrumque res calidæ quædam fatis facile et tuto recipi possunt, hæ quoque partes similem effectum, aliquando salutarem, aliquando valde perniciosum, experiuntur.

1070. Porro, quoniam partes solidæ nostrorum corporum, natura molles, magna et insolita distentione valde rigescunt (88.), et relaxatione iterum flaccescunt et molliuntur, perspicuum est, hanc aliquando pro remedio emolliente utilem futuram. De hujus vero remedii viribus atque effectibus, alibi locus erit dicendi.

1071. Crebra et valida corporis exercitatio, ut suo jam loco (86. 89.) dictum est, vel totum corpus, vel partes tantum ejus quæ maxime exercentur, efficacissime firmat, sæpe etiam nimis rigida facit, cum ob dissipatas ultra modum humiditas partes,

tum

tum ob solidas particulas plus æquo compressas atque densatas; et modo igitur noxæ, modo remedio, corpori est. Longa vero requies, et ignavia, contraria prorsus ratione, corpora nostra solvunt atque emolliunt. Sed multa vetant ut hæc pro remediis sæpe præscribantur.

1072. Postremo, quoniam rigiditas aliqua longa requie sæpe inducitur (90.), ratio ipsa docet, motum et exercitationem, quatenus facultas fuerit, partium sic rigescentium, idoneum aliquando remedium emolliens fore; quin et partes jam aliquantum rigidæ factæ, qualiscunque fuerit prima ejus mali causa, eo facilius regidiores fiunt, quod, ad solitos motus parum valentes, fere quiescere coguntur. Quapropter, in omni fere morbosa rigiditate, cum partium quæ alias movent (109. 301. et seqq.), tum partium quæ ab aliis moventur, veluti artuum, et omnium juncturarum, ad motum crebrum, sed levem, et facile tolerabilem, et postea, cum aliquatenus



quatenus jam superata est rigiditas, ad vehementiorem exercitationem, tanquam certissimum auxilium atque præsidium, properandum est. Vel si forte talis exercitatio prorsus impossibilis fuerit, motusque levissimus non sine magno dolore perficiendus, tum ad frictionem crebram et validam (quæ fere exercitationis munere fungatur), confugere oportet. Hæc quoque faciliior et efficacior sæpe fit, si partes quibus adhibenda est, oleo, aut oleosis quibusdam remediis (1063. et seqq.), prius unctæ fuerint.

1073. Quod effectus vero attinet remedium emollientium in corpore humano, simplicissimi sunt, et facillimi intellectu. Partes scilicet solidæ, ab eorum usu molliiores, minus resilientes aut renitentes, magis vero flexiles fiunt; et ideo quædam partes, antea ægre movendæ, postea multo facilius moventur.

1074. Hi

1074. Hi autem effectus prius et magis manifeste in partibus quibus remedia proxime admoventur, puta in artu quodam, aut per totam cutem, quam in remotis partibus, aut in universo corpore, observantur. Partim vero, propter consensum seu nexum istum generalem (353.) quo omnes corporis partes conjunguntur, partim propter quædam ex remediis emollientibus in corpus recepta, et per totam compaginem delata, remotissimæ aliquando ejus partes, vel forte omnes, similiter quodammodo afficiuntur. Quod profecto eo minus mirum videbitur, et facilius intelligetur, si quis secum reputaverit, non modo simplicissima et minutissima solidarum partium elementa atque particulas molliiri et solvi, sed organa omnia, et imprimis vasa, ex iis formata, eundem effectum participare. Neque obscura ratio, quæ, mollita atque laxata aliqua parte vasorum quæ sanguinem vehunt, omnia brevi laxentur, sublata nimirum, vel minuta saltem, distentione illa (88. 318. et Vol. II. D d seqq.),

seqq.), qua firmitas eorum, et fane omnes fere vires, magna ex parte nitebantur.

1075. Porro, ob arctissimum illum nexum qui inter dotes *mechanicas* et vires vitales *generis nervosi* intercedit, fieri non potest, quin, dum omnes partes solidæ totius compaginis ope remediorum emolliuntur et laxantur, facultates *generis nervosi* peculiares simul afficiantur et perturbentur. Præterea, quoniam, ut modo dictum est (1074.), vasa sanguinem vehementia plurimum afficiuntur et laxantur actione remediorum emollientium, perspicuum est, ex hac mutatione totum *genus nervosum* magis adhuc et citius affectum iri; nam motus sanguinis et vires nervorum et muscutorum tam arcto vinculo copulantur (408.), ut sæpe, dicto citius, affectio alterius functiones alterius valde afficiat.—Igitur non difficile explanatu erit, quo pacto ab actione horum remediorum, relaxatio omnium muscutorum, et infirmitas aliqua  
generalis,



generalis, et mobilitas aucta, et alii ejusdem generis effectus, inducantur.

1076. Ex his variis effectibus remediorum emollientium facile patebit, plurima eorum, in aliis atque aliis morborum generibus, variis modis, esse profutura; scilicet quæ non modo primo suo et primario effectum in partibus solidis simplicissimis prodesse possunt, verum etiam magis adhuc viribus suis in mutando statu vel partium quæ sanguinem movent, vel *generis nervosi*, aut in parte aliqua præ cæteris, aut per totum corpus.

1077. Imprimis itaque, in rigiditate morboſa generali, remediis emollientibus plane opus est, propter effectum eorum primarium et simplicissimum. Talis profecto nostrorum corporum conditio rara vitium est; nisi in senibus, quibus omnes partes solidæ nimis rigidæ fieri solent, propter varias causas jam expositas (80. et seqq. 861.); unde ipsi haud parum sæpe

D d 2

patiuntur

patiuntur incommodi, deficientibus viribus, hebescentibus sensibus, motuque omni difficiliore facto. Quamvis hujusmodi rigiditatis nulla existant remedia, tamen in hoc ipso statu, certissimum est remedia quædam emmollientia, levamen (965.) aliquando haud exiguum attulisse, vitamque ideo jam fere deficientem quasi renovasse, et sæpe per plures menses, interdum etiam per aliquot annos, protraxisse. Sic æstas calidior post longam et duram hyemem accedens, aut migratio in regionem fervidiore sole calentem, aut frequens usus balnei calidi, aut vestitus tantum plenior et calidior, et diætâ tenuis, et exercitatio modica, et frictio cutis crebra, senibus haud raro utilissima fuerunt.

1078. Frequentius vero, rigiditas quarundam tantum partium, veluti unius artus, vel forte unius juncturæ, observatur. Ad hanc autem minuendam aut tollendam emollientibus remediis opus est, sed partibus affectis maxime adhibendis. In hoc igitur

igitur statu, varia fomenta calida, ex oleosis et mucosis rebus, et balneum, et aqua calida in partem rigidam ex alto cadens, et frictio crebra et valida cum oleo, et exercitatio modica, sed frequens, &c. optima remedia sunt.

1079. Porro, cum partes quædam multum tensæ, rigidæ factæ sunt, veluti arteriæ in inflammatione partis cujuscvis, emollientia bona sunt loco inflammato pro fomentis admota, easque laxant, partesque vicinas solvunt et molliunt, et inflammationem temperant, et effusioni humorum qui debent effundi, et benignæ suppurationi, favent. Pari fere ratione, post inflammationem peractam, ulcusque factum, ad hujus sanationem plurimum sæpe conducunt; præsertim si labia ulceris callent, et vasa humorem fundentia durescunt, et humor parcus et acer, et suppuratio maligna, fiunt.

1080. Simili



1080. Simili quoque modo, in inflammatione magis generali, et in febribus varii generis, emollientia remedia profunt; cum ob arterias, simul cum reliquis solidis partibus corporis, laxatas, et impetum sanguinis sic temperatum, tum maxime ob cutem solutam, ejusque minuta foramina laxata et patefacta; unde facilis et libera per eam exhalatio, vel forte sudor, quæ ægritudinem multum solent levare, febremque ipsam haud raro penitus solvere.

1081. Alias porro secretiones aut excretiones, vel nimia firmitate, vel saltem nimis rigida contractione, vasorum aliarumque partium quæ iis inserviunt, deficientes aut impeditas, remedia emollientia sæpe expediunt et promovent, et sic, verbi gratia, urinam vel salivam aliquando movent. In alvo autem solvenda, si hæc præter naturam astricta fuerit, plurimum valent; interdum per os assumpta, quod rarius tentatur, et vix nisi alia simul remedia ad  
alvum

alvum movendam data fuerint; maxime autem pro lotionibus per anum infusa.

1082. Denique, ex effectibus suis in *genere nervoso*, quæcunque horum ratio fuerit (1075.), interdum utilia fiunt: veluti in nimio et morboſo vigore, vel generali, qualis in infania aliquando observatur, vel partium quarundam præ aliis (373.), qualis in *diathesi phlogistica*, aut febre vehemente, aut inflammatione, accidit; aut in nimia *generis nervosi* excitatione, somnum repudiante (297.), solitiſque remediis vix, et ne vix quidem, ſopienda, qualis mente captis sæpe contingit. In his igitur et ſimilibus exemplis, remedia emollientia, laxato et ſoluto corpore, *genus nervosum* infirmabunt, vigoremque ejus morboſum minuent, et ſomnum diu vigilantibus conciliabunt. De his vero et hujusmodi emollientium remediorum effectibus, ſub alio capite, poſtea plenius erit agendum.

C A P. XXVIII.

*De remediis roborantibus.*

1083. **P**roximum iis remediis, quæ universas solidas partes humani corporis afficiunt, locum tenent illa quæ partes solidas vitales, cerebrum scilicet, et nervos, et musculos, afficiunt, earumque vires aut deficientes excitant atque intendunt, aut nimias minuunt et reprimunt.

1084. Utcunque vero obscuræ et incomprehensibiles sint harum partium facultates (115. et seqq.) atque actiones, vitia saltem earum neque pauca neque levia (367. et seqq.) satis manifesta sunt, quamvis profecto nondum bene intellecta. Hæc quoque



quoque vitia remedia valida et efficacia eo magis postulant, quod et ipsa frequentissima sint, et innumerorum fere et gravissimorum quorundam morborum origo et pars; quoniam in omnibus quotquot corpus humanum fungitur officiis, nervi et musculi primas sibi partes vindicant. His igitur læsis, et alia atque alia ratione male se habentibus, perspicuum est, functiones corporis, vel quasdam, vel omnes, prout vitium plus minus generale fuerit, necessario impeditum iri.

1085. Ex vitiis autem *generis nervosi*, quorum naturæ, et effectus, et noxæ, et remedia, quodammodo intelliguntur, quatuor primaria evidentissima et frequentissima existunt; defectus scilicet vigoris, sive debilitas; excessus ejusdem, seu nimius vigor; defectus mobilitatis et sensus, seu torpor et stupor; et demum, excessus sensus mobilitatisque, sive mobilitas morbosa. — De horum malorum na-

turis, et caufis, et noxis, jam fuo loco (367. et feqq.) dictum; de fingulorum remediis nunc ordine dicendum eft.

1086. Remedia imprimis quæ adverfus debilitatem valent, roborantia non inepte vocantur; sæpe autem apud medicos *tonica* appellantur, quafi omnis eorum actio et virtus confisteret in augenda tensione, feu *tono* (ut multi vocant), fibrarum mufculofarum (318. et feqq.). Vires mufculorum pendere multum a tensione fibrarum ex quibus constant, et hac minuta vel fublata, minui vel tolli; eadem vero aucta, intra certos limites (320. 321.) augeri, certiffimum eft: quædam etiam ex remediis roborantibus, tensionem fibrarum mufculofarum, vel in parte qualibet, vel in univerfo corpore, augere, admodum verifimile eft. Omnia vero eodem modo prædeffe minime probabile videtur; quod profecto de nonnullis vix credibile eft. Præftat igitur, femperque præftabit, ubi fieri poteft, vocabulum evitare quod aliquid conjecturæ in

in se continet, quæ minus cautos in errorem duceret, nomenque in hoc, sicut in aliis exemplis, remediis imponere, ex effectibus eorum certis et manifestis.

1087. Primum inter roborantia locum remedia astringentia (1030. et seqq.) merito sibi vindicant. Omnia enim medicamenta aliaque remedia quæ corpora nostra firmant, eorumque carnes quodammodo indurant, vires fibrarum musculosarum intendere, et sic debilitati occurrere possunt.

1088. Primo statim aspectu, inutile videretur, distinctionem ullam facere astringentia inter et roborantia remedia, diversaque iis nomina dare, diversasque vires diversaque loca in Conspectu Medicinæ *Theoreticæ* iis assignare; præsertim quum pleraque remedia quæ alteri proposito inserviunt, alteri quoque haud male accommodata existunt.

1089. Verum enimvero differentia satis certa, neque profecto exigua, inter illa



videtur intercedere. Vires enim muscutorum deficiunt, et magna aliquando debilitas urget, cum nulla præter solitum carniū molliities adest, neque ideo astringentibus remediis opus est; immo etiam cum nimia potius rigiditas universæ compaginis adest, ingens debilitas accidere potest. Præterea, quamvis omnia astringentia remedia, roborantia interdum fieri possint, non omnia pariter roborantia vim astringentem habent; quin et quædam ex iis sunt, quæ partes solidas mortuas nullo modo afficiunt. Neque demum in ipsis verissimis remediis astringentibus, vis roborans pro rata parte cum altera viget, sed sæpe magna observatur cum hæc exigua est, et contra, parva interdum, saltem minime notabilis reperitur, cum vis astringens maxima existit.—Minime ergo absurda est distinctio illa medicorum inter roborantia et astringentia remedia.

1090. Vis roborans, qua pleraque medicamenta astringentia gaudent, facile intelligitur,

telligetur, ex nexu illo insigni qui dotes *mechanicas* inter et dotes vitales solidarum partium humani corporis intercedit, et de quo jam sat superque dictum est. Nam si mollities nimia debilitatem facit, manifestum et certum est, medicamenta quæ illam corrigant, huic simul opem esse la-tura.

1091. Ex medicamentis autem vere astringentibus, quædam præ cæteris insigni vi roborante in fibris musculosis, vel forte in toto *genere nervoso*, pollere videntur. Sic cortex *Peruvianus*, quamvis non validissimum astringens remedium, inter efficacissima roborantium merito habetur, et si qua scriptis medicis fides, multo magis roborat corpus quam medicamenta astringentia haud parum fortiora. Idem quoque de ferro, variisque medicaminibus ex eo præparatis (1041. 5. 9.), verum est, quæ sæpe pro roborantibus remediis usurpata egregie profunt, quamvis etiam copia tam exigua devorata, ut vix credibile sit per  
mixturam

mixturam aut appositionem particularum ex quibus constant, solidas partes humani corporis densari et firmari, ut ab astringentibus remediis solent. — Observandum tamen est, parum adhuc inter medicos constare num mera hac vi roborante, num alia prorsus et minus intellecta ratione, cortex ille *Peruvianus*, per multos jam annos adeo laudatus, inque tot morbis præscriptus, tam salutares effectus edat. Et facile patebit, quocunque modo remedium illud morbosæ cuiquam corporis conditioni occurrat, vim aliquam roborantem simul esse habiturum; quoniam omnes fere morbi, utcunque natura, et origine, et effectibus, inter se diversi, hoc saltem commune et constans habent, ut corpus, vel totum, vel partes ejus quasdam præ reliquis, plus minus infirmant.

1092. Cuncta demum fere amara, præfertim quæ ex plantis derivantur, quorum vis astringens exigua sæpe, et extra corpus fere nulla videtur, vim aliquam roborantem possidere



possidere creduntur, et hoc consilio, multum, et sæpe nimis, usurpantur. Multa enim ex iis, forte omnia, large assumpta, corpori nocent, neque suspicione vis alicujus venenatæ omnino carent. Nonnullis saltem animalibus plane veneno sunt. Actio eorum in corpore vivo, et modus quo fibras musculosas, præterquam vi sua astringente, roborant, parum intellecta sunt.

1093. Vina quædam, præsertim rubra et astringentia (1036.), inter optima et efficacissima remedia roborantia jure habentur; et profecto omnia bona vina, aliique liquores validi, sive astringentia existent sive non, vim aliquam roborantem plane habent; quæ forte stimulo eorum maxima ex parte tribuenda est.

1094. Alia enim stimulantia remedia varii generis pro roborantibus sæpe præscribuntur, et nonnunquam egregie profunt; neque obscura ratio, qua remedium quodvis stimulans, excitato universo *genere nervoso*,

*voso*, fibras musculosas ad validiorem contractionem cieat, et sic totum corpus quodammodo roboret.

1095. Quædam vero ex remediis inter astringentia jam enumerata, multo majore vi roborante pollent quam ulla medicamenta astringentia, aut sane ulla medicamenta quæ ægris devoranda dantur. Cujusmodi exempla sunt, idonea corporis exercitatio, frigus rite adhibitum, apta diæta, et demum, nonnulli animi affectus.

1096. Quod idoneam corporis exercitationem attinet, pro remedio roborante omni laude major est, cum ad tuendam sanitatem, si hæc natura bona est, tum ad reficiendas aut renovandas vires, si hæ, vel morbo, vel pravo vitæ genere, vel aliis forte minus manifestis causis, fractæ et exhaustæ fuerint, tum quoque ad sanandos plurimos morbos qui a debilitate, vel generali vel speciali, suam originem ducunt, vel quorum saltem debilitas pars magna est.

1097. Plurimis

1097. Plurimis quoque et admodum variis modis prodesse videtur, et effectum suum roborantem præstare; et imprimis ut astringens remedium nonnihil valet, firmatis scilicet atque densatis partibus musculosis, unde hæ auctum vigorem adipiscuntur. Magis vero proficere videtur corporis exercitatio, robore illo quod omnes muscoli, iusta, et crebra, et modica actione acquirunt (335.), et auxilio quod sanguinis motui (424. 5.), et quotquot ex eo pendent functionibus, impertit, et stimulo illo subtilissimo quem cerebro, et nervis, et musculis dat, et bono appetitu quem solet etiam infirmis conciliare, et sana alimentorum concoctione quam efficit, et idoneo corporis nutrimento, cui multum favet, et libera per cutem exhalatione quam adeo promovet, et omnibus fere secretionibus et excretionibus expeditis atque promotis, et animo demum ipso, forti, et æquo, et hilari, facto. Neque obscura ratio, qua, dum istis functionibus aut singulis aut universis adeo efficaciter opitu-



latur, reliquas simul juvet, totumque ideo corpus roboret. Neque dubium est, ut-cunque obscurum videatur, omnes partes musculofas vigorem quem aliquæ earum fibimet nactæ sint, quodammodo partici-pare, et sic, dum quidam muscoli voluntarii motus, idonea exercitatione, multo vali-diores fiunt quam antea fuissent, reliquos, quamvis parum exercitos, simul cum iis roborari. Neque demum dubium est, ex-ercitationem corporis, et prosperam ejus valetudinem quam efficit, animo prodesse, et firmitatem, et vim, et hilaritatem, huic conciliare, et vicissim animum lætum et hilarem multis corporis functionibus plu-rimum favere, adque ejus generalem vigo-rem tantum tamque manifeste conducere, ut optimo jure egregium remedium robo-rans habeatur.

1098. Inter varia autem exercitationum genera, optima fere sunt (dummodo cor-pus ad ea valeat) quæ maxime generalia sunt, et in quibus plurimi muscoli exer-centur.

centur. Sic omnium exercitationum, ambulatio et maxime naturalis est, et fanis saluberrima, et, in quibusdam morbis, ægrotantibus etiam haud male accommodata. Plerisque vero ægris minus convenit, cum propter suam vehementiam, quæ vires musculorum cito exhaurit corpusque infirmat, tum quoque propter impetum sanguinis, crebra et valida tot musculorum contractione (425.), nimis auctum; unde incommodum, et sæpe periculum non leve, oriri potest in variis morbis, veluti in plerisque sanguinis profluviis, et in omnibus malis in quibus pulmones laborant, aut respiratio, quacunque de causa (584. et seqq.), impeditur. Per ambulationem enim, similesve exercitationes, plus brevi sanguinis in pulmones congeritur quam hi, sic impediti, transmittere queant; unde cito anhelatio, palpitatio, suffocatio, &c.

1099. Ob easdem causas (1098.) omnes vehementiores corporis exercitationes, veluti gladiatoria, aut cursus, aut saltatio

violenta, et similia, utcunque fanis et validis convenient, ægrotis raro præscribenda sunt, et vix quidem permittenda, et nunquam sine maxima prudentia et circumspeditione, ut ægri iis paullatim assuescant; qua sane cura, infirmissimi aliquando athleticam vim et robur sibi met compararunt, et ad exercitationes facile valuerunt, quales primo ne quidem tentare ausi essent, quæque, si tentaverant, primo fere conatu eos oppressissent.

1100. Hoc vehementiorum corporis exercitationum incommodo bene perspecto, medici solent mitiores ægrotis suadere, et sæpe pro exercitatione gestationem præscribere; quas inter hoc interest, quod hæc alienis atque externis illa vero propriis atque internis corporis viribus perficitur. Facile igitur patebit, quantum idonea gestatio exercitationi actuosæ sæpe præstet, in iis præsertim exemplis, in quibus maxima infirmitas actionem muscutorum difficilem aut nimis laboriosam reddidit,  
vel



vel in quibus infirmitas pulmonum, aut respiratio impedita et imperfecta, velociorem sanguinis motum periculosum fecit.

1101. Differentia vero exercitationem inter et gestationem non ita intelligenda est, quasi in hac nulla prorsus fieret musculorum nostrorum actio. In omnibus enim quædam musculorum actio fit, et plane necessaria est, sed levis omnino, si cum illa comparetur quæ in vera exercitatione perficitur, et minus laboriosa, et qualis igitur diutius possit continuari citra lassitudinem vel defatigationem.

1102. Ut inter exercitationes ambulatio, sic inter gestationes equitatio, cæteris omnibus longe præstat; actio enim musculorum haud exigua in ea requiritur, sed adeo levis, et ita variata, ut etiam valde infirmis, iisque qui plane ambulare non possent, tolerabilis, et grata, et valde salutaris fiat. Neque minima equitationis excellentia est, quod cursum sanguinis leniter

ter omnino expedit, neque pulsus nimis festinat, neque tantum sanguinis in pulmones conjiciat quantum eos opprimere possit, aut respirationem laboriosam aut difficilem facere. Est quoddam etiam, inter equitandum, non corpus modo leniter excerci, sed mentem etiam aliquantum, neque injucunde, occupari; tantum enim animi attentionis regendo aut compefciendo equi cursui requiritur, quantum et eam leniter excitet, et a solitis curis, aut studiis, aut cogitationibus, sæpe haud parum nocentibus, forte clam homine ipso, subducat.

1103. Ægro vero, neque ad ullam exertationem, neque ad hanc optimam gestationem valenti, mitiora præscribenda sunt gestationis genera, et maxime gestatio in curru, cujus effectus et usus ex jam dictis de equitatione facile intelligentur, quæque revera sæpe quam optime profuit. Hujusmodi gestatio commodum non leve habet, nempe ut per eam ægrotantes valde infirmi

infirmi aliquid exercitationis tentare possint, et etiam itinera satis longa, quamvis intempesto cœlo, tuto et facile emetiri.

1104. Navigatio insuper, tanquam levissima gestationis species, et infirmis ægris optime accommodata, a multis medicis, iisque haud parvi nominis, plurimum laudata est: neque dubium est, hanc, aliqua demum ratione, utcunque obscura, nonnullis ægrotantibus jam pene desperatis mirabiliter profuisse. Insigne hujus gestationis commodum et excellentia est, quod infirmis quosque non opprimat, et quod per multos dies, vel per totos menses, si opus fuerit, diu noctuque continuari possit. Nausea ipsa quam movere solet, a quibusdam egregie interdum prodesse creditur; quin et multis persuasum est, aëra maritimum, qui inter navigandum trahitur, suis usibus non carere.

1105. In omnibus demum exercitationibus et gestationibus quas pro roborantibus



bus remediis præscribere cupimus, hoc præ omnibus usque observandum est, ut ægrotantium viribus ita accommodentur, cum quod ad vehementiam, siue naturam, tum quod ad tempus, seu continuationem, earum attinet; ut neque multum sudorem eliciant, neque magnam defatigationem relinquant. Quantum enim cunque idonea exercitatio corpori profit, et musculos roboret, certissimum est, nimiam haud parum nocere etiam sanissimis et robustissimis, sed multo magis ægris atque infirmis; quorum corpora exhaurit, viresque mirum in modum convellit, forte etiam novos et graves morbos inducit. Signum plerumque fatis certum erit valetudinarios semet quantum iis profuturum sit exercuisse, cum lassitudo aliqua obrepit, et corpus calefcit, et frons sudore madet, et sudor levis per totam cutem profluere incipit. Sistere autem oportet, et paullisper quiescere, citra copiosum sudorem aut defatigationem, quæ musculos, et sane totum corpus, adeo debilitat (337.). Hæc præcep-

ta incipientibus maxime observanda sunt ;  
nam festinando lente, homines, utcunque  
infirmi et valetudinarii, sæpe eo usque per-  
venire possunt, ut ad vehementissimas ex-  
ercitationes probe valeant, et in palæstra, et  
sub sole fervido, se exerceant et fudent, nec  
quicquam mali a tanto labore sentiant ;  
quod tamen non omnibus esse tentandum,  
satis perspicuum est.

1106. Denique omnis exercitatio atque  
gestatio, sub pleno Jove, et in aëre puro,  
et sicco, et frigidulo, fieri debet. Bonus  
enim aër (1026. et seqq.) ipse inter effica-  
cissima roborantia remedia jure habetur.  
Siccus quoque et frigidulus aër corporis  
vires auget atque conservat, et sudorem  
inter exercendum reprimit. Nihil vero ob-  
stat, quo minus, secundum ægrotantis vi-  
res et constitutionem, et morbi quo tenta-  
tur naturam, exercitatio sub sole quamvis  
fervido, et multo cum sudore, aut per-  
mittatur aut etiam imperetur.

1107. Postremo, cum neque exercitationi locus est neque gestationi, tum ad frictionem confugiendum est, quæ aut sicca, cum strigili, aut panno laneo, aut manu calida, aut demum cum oleis, aut cum vaporibus medicatis, (ad satisfaciendum ægrotantium animis), remedium roborans haud contemnendum fiet. Viribus musculorum opitulari videtur; et certe sanguinis cursum juvat (424. 5.), et actionem vasorum reforbentium multum promovet (435.), et exhalationi per cutem favet, et generalem ideo vigorem corpori conciliat.

1108. Frigus quoque inter præstantissima remedia roborantia optimo jure recensetur, quippe cujus effectus satis certi et manifesti sunt, quamvis ratio eorum admodum obscura sit.

1109. Imprimis, ut videtur, tanquam astringens remedium nonnihil proficit; sed magis adhuc ex effectibus suis in *genere nervoso*. Parum certe conveniret, argumentum



mentum inire de re adeo obscura atque difficili, ut actio caloris aut frigoris est, et modus quo tot miros et graves effectus in corpore humano præstent. Neque profecto istiusmodi arcana tantum ad usum medicum spectant, quantum scientia rei factæ et veræ de ipsis mutationibus quas in corpore humano efficiunt.

1110. Hoc autem certum atque idoneum calorem in se habet, quem plerumque parum mutatum conservat, quamvis temperies aëris externi ambeuntis quod ad calorem aut frigus admodum varia fuerit (566.). Sunt tamen certi fines quos ultra neque calorem neque frigus facile aut sine damno toleremus, neque ita quin corpora nostra præter solitum vel caleant vel frigescant. Erit igitur gradus seu punctum quoddam caloris externi, internæ nostræ caloris gignendi (565.) facultati ita respondens et accommodatum, ut illo existente, hæc ad caloris corporis jacturam reparandam quam accuratissime sufficiat,

neque hoc ideo aut calidius aut frigidius fiat. Perspicuum quoque est, gradum istum non ita certum aut fixum fore, quin variet aliquantum secundum hominis vestitum, aut exercitationem qua utitur; nam hæc facultatem gignendi caloris plane intendit et auget, et ille, licet nullam gignat calorem, tamen illum qui genitus est conservat et retinet, neque eum per aëra, tam facile ut aliter fieret, dissipari finit. Porro, verisimile est consuetudinem, cujus in aliis rebus tanta vis est, in hac etiam nonnihil valere; hominesque sic variis caloris gradibus ita assuescere, et quasi accommodari, ut alii alios facile tolerant, qui minus assuetos aut nimis calefacerent aut refrigerarent.

IIII. Quicumque vero gradus ille caloris fuerit qui hominibus leviter vestitis et quiescentibus ita accommodatus est, ut suus corpori calor constet, augmentum vel imminutio ejus hoc variis et fere contrariis modis afficit. Major enim calor sensum et mobilitatem auget, sed vigorem simul minuit

nuit (368. et seqq.); ita ut tandem exercitatio omnis, vel lenissima, difficilis et laboriosa fiat, et labores graves (quamvis sub frigido Jove tolerandi) fere impossibiles, vel si tentati fuerint, in summam debilitatem, et animi defectionem, vel forte subitam mortem, desituri. Neque tanta infirmitas musculis voluntarii motus solis incumbit, sed omnes fibras musculosas plane pervadit. Frigus vero, hoc est calor minor, corpori admotum, intra certos, eosque satis arctos limites, contrarium effectum habet: nimirum quod sensum et mobilitatem aliquatenus minuit, et simul vigorem auget, et musculos roborat, et exercitationem omnem facilem reddit, et labores tolerabiles. Neque hoc in magnis tantum voluntarii motus musculis fit, sed in omnibus quodammodo accidit.

1112. Hinc facile intelligetur, frigus satis modicum, puta frigidulum aëra, remedium roborans haud levis momenti interdum fore, in variis morbis, cum vetustis



tis tum acutis, præsertim in iis ubi morboſa debilitas (quod minime rarum eſt) a nimio calore oriri vel ingraveſcere viſa eſt.

1113. Neque ſolus aër frigidulus, aut univerſæ cuti admotus, aut in pulmones per ſpiritum receptus, tali vi roborante gaudet, et hoc conſilio a medicis præſcribitur; aqua etiam frigida ſimili facultate, ſed ſæpe haud parum validiore, pollet, et merito in magno uſu et æſtimatione eſt.

1114. Aqua imprimis frigida pro potu hauſta, vel potio quælibet tenuis et frigida in ventriculum recepta, vi ſua roborante et refrigerante, ſimul prodeſſe poteſt; et revera haud raro profuit in variis morbis, cum acutis tum vetuſtis. Veriſimile etiam videtur, vires et uſum frigoris hoc modo adhibiti, nondum ſatis cognita et explorata eſſe.

1115. Sæpius vero, et majore cum beneficio, uſus balnei frigidi pro roborante remedio

medio præscriptus est; ejusque saluberrimi effectus in plurimis morbis tam bene jam sunt noti, ut nemo medicorum de iis dubitare possit.

III 16. Frigus autem per aquam corpori admotum, aut in ventriculum receptum, eo majore vi pollet quam aër æque frigidus, quod per materiam tanto densiorem calor corporis multo promptius aufertur, et omnes igitur effectus frigoris, tam boni quam mali, citius et fortius inducuntur. Quapropter id semper omni cura cavendum est, quodocunque lavatio frigida utenda est, ne frigus vel nimium sit, vel æger in eo nimis diu maneat; sin minus pro robore infirmitatem sibi comparabit (III 11.); nam frigus, ut nimia experientia et sanorum et ægrotantium jam probe compertum est, si valde intensum fuerit, vel diu continuatum, quamvis haud adeo intensum, corpus mirum in modum debilitat, et sæpe tremores, et aliquando paralyfin, et nonnunquam demum mortem, inducit.

Pari

Pari ratione, idem sedulo observandum est de potione frigida ; nonnunquam enim debilitare, et sic haud parum nocere, visa est (1020.) ; neque profecto defuerunt exempla hominum, qui, quamvis sani, et quidem robusti, brevissimo tempore post hauritam multam frigidam subito exanimes corruerint.

1117. Nullum vero frigoris punctum gradusve definiri potest, quod omnibus ægris aptum sit qui lavatione in aqua frigida uti debent ; nimirum quod multum variat in diversis hominibus, et in iisdem, diversis temporibus ; quodque pendet a constitutione corporis, et natura morbi, et statu præsentē, et demum a consuetudine singulorum ægrotantium.

1118. Scire tamen juvat, id frigus non nimium esse, neque nimis diu continuatum, quod brevissimus tantum artuum tremor, et brevi rubor, et postea calor, et humor, aut mollities saltem, cutis, et vigor musculorum,  
et



et bonus cibi appetitus, bonaque concoctio, et animi hilaritas, excipiunt; contra, nimium esse frigus, vel faltem nimis diu adhibitum, quod magnus et diuturnus membrorum tremor, et vultus et cutis pallor, et frigus, et siccitas, et artuum imbecillitas, et spiritus demissi, et ventriculus male affectus, veluti nausea aut appetitus defectu, consequuntur.

1119. Sæpe etiam cum ægri balneum frigidum solitæ temperiei, puta graduum quadraginta, propter hæc incommoda (1118.), primo cum tentant tolerare nequeunt, si aliquantum calidæ cum frigida aqua balnei commistum fuerit, id tum bene tolerabunt, et consuetudine (1110.) vel paucorum dierum, subducta paullatim calidæ copia, eo usque pervenient, ut balneo quam frigidissimo non modo sine incommodo aut periculo, sed cum insigni beneficio utantur.

1120. Haud absimile videtur balneum frigidum pro roborante remedio prodesse

aliqua faltem ex parte, ob ftimulum illum vehementem quem fubitus defcenfus in pifcinam gelidam univerfo corpori dat, quique et *genus nervofum* probe excitat, et vafa quæ fanguinem vehunt, et una cum iis cor ipfum, ad validum motum incitat; unde expeditior fanguinis motus, et excretio per cutem liberior, et quotquot ex his beneficia accipiuntur (1097.).

1121. Quod fi ita res fe habet, tum fati perfpicuum erit, lavationem frigidam iis maxime profuturam efle qui parum diu in aqua manent, neque in ea natant, fed vel femel tantum fe in eam præcipites dant, vel iterum iterumque, prout vires tulerint, id repetunt; nam fic quicquid boni a ftimulo tanti frigoris fperari poffit obtinebitur, neque vis ejus fedans atque infirmans (1116.) corpori nocere poterit.

1122. Quod victum vero attinet, haud verbis opus eft, ut probe conftet, idoneum cibum, tempeftive affumptum, et bene coctum,

coctum, corpus humanum præ omnibus aliis rebus roborare. A natura enim ita fabricata et constituta sunt corpora nostra, ut propriis actionibus, cum voluntariis, cum quoque invitis, quæque ad vitam ipsam retinendam prorsus necessariæ sunt, brevi exhauriatur et infirmetur; neque aliud fere tantæ debilitatis remedium a natura suggeritur, quam bonus et nutriendus cibus; neque alio fere opus est. Sæpe etiam quum corpus, aut longa inedia, aut gravibus laboribus, aut vehementioribus morbis, five acutis five vetustis, aut magnis exinanitionibus, præter modum exhaustum fuerit, adque summam et periculosissimam debilitatem reductum, brevissimo post tempore, ope tantum idonei cibi, quam plenissime convalescit; et in tali statu, alia remedia, saltem omnia medicamenta roborantia, utcunque bona et efficacia, parum omnino proficere potuissent. Præterea, experientia athletarum satis compertum est, homines certo victus genere robur præter naturam ingens, et vix



credibile, et quasi morbosum, sibi met posse comparare; quod non verisimile est validissima quæque medicamenta roborantia unquam fuisse effectura, quamvis vivendi ratio quod ad omnes alias res prorsus eadem fuisset. Ille autem corporis vigor et robur quem athletæ acquirunt, adeo pendet ab ejus plenitudine et tempestivo alimentis subsidio, ut si hoc strenuissimo cuiquam pugili per duos tresve dies fuerit negatum, solutis lacertis, viribusque subductis, membra sua ægre trahens, non modo non ad palæstram, sed ne quidem ad levissimam corporis exercitationem, neque ad communia vitæ officia, valebit. Qualis autem victus ægris exhaustis atque debilitatis pro roborante remedio sit præscribendus, ex jam (968. et seqq.) dictis perspicuum erit; præsertim si memoria tenemus, id genus victus corpus maxime roborare, quod simul partes ejus solidas, musculosque imprimis, optime nutrit et firmat, et vasa sanguinem vehementia bono et denso cruore implet.

1123. Pari fere ratione ac bonus victus, fatis large assumptus, et bene concoctus, ad corporis vigorem et robur conducit, aliæ quædam ejus functiones variis modis ad eundem effectum conducere possunt; nimirum quarum nullæ non ad sanitatem, et ideo ad vigorem, vel necessariæ vel saltem utiles existant, nullæque fere lædi aut impediri possint, quin brevi vires corporis plus minus collabantur. Hic autem fat fuerit unam ex iis (siquidem functio vocari possit) memorare, quæ proxime post subsidium idonei alimenti ad robur corporis maxime necessaria est, forsan etiam vix minus necessaria quam nutrimentum ipsum, quæque si fuerit impedita, vires musculorum mirum in modum attenuat; somnum scilicet, vigiliæ justa per intervalla succedentem. Inter vigiliam enim, quamvis parum actiuosa vita fuerit, vires fatis subito exhauriuntur, ut sanissimi et robustissimi in se ipsis probe possunt experiri; ægrotis vero, et jam imbecillis, longa vigilia ita nocet, et corpora ita debilitat, ut nihil  
magis;

magis ; eisdemque sæpe somnus præter omnem spem et fidem, nisi minime rares esset, reficit roboratque. Reputandum quoque est, vires, forsan antea labefactas, per somnum renovari, et in sanis quasi integrari ; et etiam magnum illud dispendium quod longa vigilia effecisset non accidere, somnumque igitur in morbis duplici ratione prodesse, et conservando quod virium superesset, et reparando quod defuerat atque decesserat. Quapropter eo minus mirum crit, varia remedia quæ somnum in variis morbis alia atque alia ratione invitant atque conciliant, ad corporis robur quodammodo, vel egregie fortasse, conducere, quamvis proximus et generalis eorum effectus sit, id haud parum infirmare ; qualia sunt, remedia quædam emollientia et laxantia, nonnullæ exinanitiones, et demum medicamenta aliqua quæ vocantur *narcotica*, veluti opium, et similia.

1124. Denique, ex animi affectibus (342.) nonnulli tanta vi roborante pollent, ut merito



rito inter præstantissima hujus generis remedia recenseantur: et maxime quidem dolendum est, eorum regimen et administrationem tam parum in manibus nostris esse, ut raro quum tali auxilio maxime opus esset, animi affectus qui convenirent, pro remediis ad arbitrium nostrum excitare aut adhibere possimus.

1125. Omnes animi affectus excitantes vim quandam roborantem plane possident, et quidam eorum vim insolitam et vix credibilem hominibus valde infirmis et vere paralyticis subito aliquando dederunt. Bene quoque notum est, multos istiusmodi affectuum, vires omnium musculorum, cum voluntarii tum quoque inviti motus, prompte et efficacissime reficere atque augere.

1126. Vehementiores autem affectuum vere excitantium, veluti ira gravis, aut gaudium subitum et effrænatum, quamvis insignem vim musculis nostris statim concilient, tamen hæc ipsa vis adeo subito inducta,

ducta, brevi solet disperire, succedente sæpe mira debilitate atque languore, quæ corpori multo plus noceant quam vigor adeo fugax compensare potuisset. Igitur, nisi in quibusdam et sane rarissimis exemplis summæ et diuturnæ debilitatis nullis aliis remediis summovendæ, neque decet neque licet remedium adeo ambiguum experiri; utcunque decantentur exempla, ubi gravissimis, et quæ fere insanabiles haberentur morbis, vehementes et subiti animi affectus remedio fuissent.

1127. Leviores vero istius generis affectus, gaudium scilicet non nimis subitum aut vehemens, et spes, et hilaritas, optimos semper effectus præstant, in reficiendis viribus, cunctisque ideo corporis functionibus rite promovendis juvandisque; neque ullam post se relinquunt debilitatem, neque ullo modo corpori nocent. Quoniam vero rarissime penes medicum est, hilaritatem mœrenti, aut spem infelici, aut gaudium tristi et misero conciliare,  
oportet

oportet ad ea niti quæ proxima sunt, magisque in potestate nostra posita, et ærumnis et mœstitiis ægrotantium, quantum in nobis facultas sit, opem et solatium præbere, eosque verbi gratia de sua salute desperantes firmare atque erigere, et hortari ut sint bono animo, neque tam tristitia de se augurentur. Rara enim exempla ægrotantium quibus non prodest tali spe et fiducia, utcunque vana, erigi, et magnitudinem et periculum morbi quo laborant nescire; et rariora adhuc exempla ægrotantium, quibus non plurimum nocet periculum omne quo versantur novisse. Neque profecto aut dubium aut rarum est, ægrotantes ex variis et gravissimis aliquando morbis convalescere tali ignorantia, et spe, et fiducia, nullis scilicet adhibitis, nullis saltem juvantibus medicamentis aliisque remediis: neque sane alia ratio est multarum sanationum quæ vulgo multum jactantur, et fere pro miraculis habentur, et remediis quibusdam tribuuntur.



tur secretis atque ignotis ; hæc autem quamprimum deteguntur, pristinas excellentias haud raro perdunt, et sæpe inutilia, interdum etiam nocentia reperiuntur ; ita ut minime credibile sit ea unquam ægrotantibus profuisse, quantumvis ipsorum spes et fiducia profuisset.

1128. Animi vero lætitia atque hilaritas, et magis adhuc spes aut gaudium, ægrotantibus non semper sunt aut concilianda aut conservanda. Proxima autem animi lætitiæ est idonea ejus occupatio et exercitatio, quæ multo magis a nobis pendet, quæque et similes bonos effectus in corpore præstat, et revera animum ipsum plerumque lætum et hilarem reddit. Talis igitur animi pariter et corporis exercitatio, qualis non nimia fuerit, neque alterutrius vires attenuaverit, plurimis ægris atque infirmis, præsertim qui morbis *ner-  
vosi generis*, veluti *dyspepsia*, *hysteria*, *hypochondriasi*, melancholia, &c. laborant, præ omnibus persuadenda est. Non enim sat  
est

est corpus ut decet exerceri, si mens suis curis, et ærumnis, et sollicitudinibus, anxia et fixa inhæret. Quicumque enim sibi suæque valetudini plus æquo animum attendit, ille aliquid mali in se aut inveniet, aut finget, aut revera tandem faciet. Quapropter, multis ægrotis aliquid negotii aut occupationis quod animum detineat necessarium est, non modo cum corpora aut nequeunt aut nolunt exercere, verum etiam apprime utile cum semet maxime exercent, veluti ambulando, equitando, &c. Non verbis opus est, ut quisque qui naturam humanam vel minime intellexerit, probe perspiciat, exercitationem quamlibet, puta ambulationem quotidianam, aut longum iter, longe aliter homini esse profuturam, quem venatus amor, aut plantarum studium, ducit per campos, et montes, et sylvas, et littora, indefessum a mane ad vesperem usque, et quem pulchra naturæ facies, et mirabilis ordo, delectat atque exhilarat, ac tristi et misero ægrotanti, cui nihil aliud coram oculis aut in animo ver-

fatur, quam morbus quo laborat, et periculum et mors quæ credit sibi instare.

1129. Cum vero, propter summam infirmitatem, aliasque causas, exercitationi corporis locus plane nullus est, tum eo magis ad idoneam animi occupationem attendere oportet, quæ fere alterius vice fungi possit. Sæpe enim cum medicamenta sua natura optima parum vel nihil valent in reficiendis jam labefactis viribus, lectio jucunda, vel forte studia non adeo levia, aut spectacula, aut ludi, aut convivia læta, eximia remedia fiunt. Hujusmodi autem occupationibus solis confidere parum convenit, quippe quia hæ citius fere delectare desinunt quam negotia magis seria, et animum quoque minus fortiter detinent. Quin et in iis etiam exemplis, quæ quidem minime rara sunt, ubi curæ graviores, et negotia non satis intermissa aut variata, animum pariter ac corpus infirmaverint, quamvis ægrum tanto oneri subducere oporteat, merum otium haud idoneum



neum est, et magis prodest varia negotia, gratiora, et leviora, in locum priorum quæ nocuissent, sufficere.

1130. Ex jam dictis de viribus roborantibus exercitationis omnis, cum corporis tum animi, et affectuum grate excitantium, facillime intelligetur quanta pars beneficii quod multi ægri a variis aquis medicinalibus, aut aëre quorundam locorum, aut longo itinere, aut lavatione maritima, se accepisse credant, tribuenda sit exercitationi corporis, aut occupationi et delectationi animi a tot novis et gratis rebus, et conviviiis fere perpetuis, quæ maxime tristes et melancholicos quasi a se ipsis surripiant. Multæ enim ex laudatissimis etiam aquis medicinalibus, parum medicamenti cujusvis in se continent; et medicamenta quæ in aliis insunt longe majore copia quam per aquas ipsas tuto dari possunt; sed revera frustra plerumque ægrotis dantur.

1131. Postremo,

1131. Postremo, quamvis debilitas aliquando adeo purum et simplex vitium sit, ut nullum aliud prius aut simplicius vitium, unde illa penderet, in corpore adfuisse videatur, et sic roborantia remedia inter simplicissima jure recenseantur; tamen revera frequentius multo non primum aut primarium vitium existit, sed ab alio, et priore, et fortasse simpliciore quodam vitio pendet. Hinc tot fere debilitatis medicamina, seu roborantia remedia, quot morbi simplices aliæque causæ illam effecerint. Quod profecto adeo verum est, ut non modo remedia astringentia, et nutrientia, et stimulantia, et exercitatio corporis, et frigus, et animi affectus excitantes, debilitati occurrant; sed interdum etiam remedia quædam, quorum communis et quasi naturalis effectus est, corpus plurimum infirmare. Sic cum propter nimiam sanguinis abundantiam, aut febrem vehementem, totum corpus languet et debilitatur, male omnino, ad integrandas ejus vires, medicus victum nutriendum,

tem, et vinum, et corticem *Peruvianum*, tentaret, scilicet quæ omnia debilitatem augerent. In tali statu, victus tenuissimus, et requies, et sanguinis detractio, et aliæ exinanitiones, debilitati remedio forent.

1132. Ad summam igitur, ut videtur, idoneum corpori humano vigorem et robur Natura ipsa, per varia quibus illud fungitur officia, dat conservatque. Homines autem, Naturæ vestigia quam arctissime persequendo, veluti ope plurimi et valde nutrientis cibi, et crebræ et validæ exercitationis, vires suas haud parum augere possunt; quod tamen parum ad usum medicum pertinet; nam vires sic præter naturam intensæ vix non morbosæ sunt, et talis corporis conditio ad multos morbos viam sternit. Quod si vires deficiunt, tum aliquando per facultates parum intellectas quorundam remediorum istud vitium corrigere possumus; sæpius vero ad varias causas remotiores talis vitii respicere oportet,



tet, iisque, quantum in nobis facultas fit,  
per idonea remedia, singulisque rite accommodata, obviam ire.

C A P.

C A P. XXIX.

*De remediis infirmantibus.*

1133. **R**emedia infirmantia dicuntur illa, quæ vires fibrarum musculosarum minuunt, earumque ideo actionem minus validam efficiunt. Multas res tali vi in corpore humano pollere, fatis certum et manifestum est; hasque inter remedia enumerare, et sæpe pro remediis adhibere, haud adeo inutile aut absurdum est ac primo aspectu videretur; nimirum quia vigor ipse, ut jam (372. et seqq.) expositum est, nimis, et igitur morbidus, interdum etiam valde periculosus, esse potest. Remediis igitur aliquando opus erit, qualia istud vitium corrigere possint, fibrasque musculo-

fas, jam nimia vi pollentes, quodammodo debilitare, et sic ad statum sanum et naturalem reducere.

1134. Hujusmodi remedia a nonnullis vocantur *atonica*, quasi non aliter prodesse quam minuendo tensionem, seu *tonum*, fibrarum moventium. Hoc autem nomen, utpote opinionem, eamque parum certam, in se continens, propter rationes jam dictas (1086.), potius evitandum videtur, nomenque remediis imponendum ex effectu eorum generali, et certo, et manifesto. Quamvis enim pleraque, et quidem efficacissima, remediorum infirmantium, talem effectum et actionem plane habeant, tamen alia, neque pauca eorum, aliis, et sane longe diversis, modis agere videntur.

1135. Nimius autem et morbidus vigor, vel magnis musculis voluntarii motus, vel minutis tantum fibris partium quæ voluntatis imperium non agnoscunt, accidere potest.

1136. Quod



1136. Quod illos attinet, nimius eorum vigor, quamvis revera morbosus, parum nocet, neque sane aut periculi aut incommodi multum in se habet, neque fere remediis eget; medicorumque igitur attentionem et curam tantum sibi vindicat, quantum aliud, et gravius, et minus intellectum vitium *genus nervosum* infestans probe com-  
monstret, veluti in phrenitide aut infania, quorum morborum aliquando pars et indicium, sed minime causa, existit.

1137. Quod nimis validam vero contractionem attinet fibrarum musculosarum inviti motus, puta cordis et arteriarum, et frequentius multo et majoris momenti vitium est, scilicet quæ non modo multorum morborum pars et indicium, sed quorundam etiam causa existit, ipsaque suo, et quidem gravi incommodo et periculo non caret, et remediis igitur validis et efficacibus sæpe eget.

1138. Quoniam autem excessus vigoris five contractio nimis vehemens in utroque genere musculorum a variis causis oriri potest, veluti a nimia fibrarum tensione, forte etiam et nimia firmitate, aut a stimulo solito validiore, aut novis stimulis et irritationibus corpori admotis, aut demum a statu cerebri nervorumque pene vel penitus ignoto (nisi per suos effectus), qualis furentibus aliquando contingit, perspicuum est, plurima et admodum diversa medicamenta aliaque remedia vim infirmitatem esse habitura. Imprimis igitur, omnia remedia emollientia, fomenta, balneum, calor, requies, &c. de quibus satis jam dictum est, infirmitas quoque fiunt, et actionem fibrarum moventium fere semper debiliorem reddunt, qualescunque causæ eam præter naturam intenderint, ob nexum illum insignem inter dotes *mechanicas* viresque vitales musculorum.

1139. Porro, remedia quæ vocantur *narcotica*, opium scilicet, et similia, actionem fibrarum

fibrarum musculofarum sæpe temperant et reprimunt, minuendo sensum et mobilitatem corporis, idque sic a vi multarum irritationum quasi tuendo, quæ aliter vehementem musculorum, vel omnium, vel quorundam saltem, actionem effecissent. Pari quoque ratione, evitando, vel minuendo, si prorsus evitari nequeant, plerasque vel omnes irritationes quæ corpus excitarent, haud parum sæpe proficitur in debilitanda multorum musculorum actione, siquando hæc nimis valida facta fuerit. De hac vero administratione, et etiam de *narcoticis* remediis et eorum variis effectibus, postea locus erit fufius dicendi.

1140. Omnium vero remediorum infirmantium longe efficacissima, et communi usui accommodatissima, sunt variæ exinanitiones, præsertim copiosæ, aut sæpe repetitæ; sanguinis imprimis detractio, aut valida alvi purgatio, aut frequens vomitio, aut magnus sudor, aut etiam ingens urinæ vel salivæ excretio,

1141. De



1141. De variis autem effectibus uniuscujusque generis exinanitionis, postea nominatim agere oportebit. Hic igitur sat fuerit indicasse, varias exinanitiones corpus plurimum infirmare, non modo detracto multo humore ex vasis quæ sanguinem vehunt, horumque sic tensione simul et vigore, cum ipsorum, tum quoque aliorum muscutorum, sublati, vel saltem minutis, verum etiam nonnullas earum alia prorsus ratione *genus nervosum* statim afficere, et plurimum sæpe debilitare; nimirum in quibus non mera arte externa humor aliquis detrahitur, sed vehemente aut abnormi actione partium quarundam internarum e corpore expellitur. Talis autem actio abnormis, vel saltem vehemens, veluti intestinorum, aut ventriculi, aut vasorum quæ sanguinem movent et sudorem fundunt, arte excitata, fibras musculosas istarum partium mirum in modum infirmat; et, partim ob consensum generalem quo omnes corporis partes conjunguntur, partim ob functiones quasdam  
segniùs

Regniius exinde procedentes, aut plane impeditas, totum corpus talem infirmitatem brevi participat.

1142. Pro infirmante quoque remedio sæpe et cum insigni beneficio præscribitur diætata præter solitum tenuis et parca, et interdum, cum res urget, inedia absoluta. Neque profecto obscura ratio est qua per talem diætam aut inediam omnes corporis musculi, cum voluntarii tum pariter involuntarii, brevi infirmentur, exhaustis nimirum et dissipatis magna ex parte humoribus, qui plenitudinem, et tensionem, et vigorem, vasis sanguinem vehentibus, et sane omnibus musculis, dabant, labefactis ideo viribus cerebri ipsius nervorumque, quæ a tensione et actione arteriarum et motu sanguinis multum pendent, musculisque forte ipsis ob defectum nutrimenti haud parum debilitatis.

1143. Frigus etiam, quod nuper inter roborantia remedia, neque sane immerito, recensitum

recensitum fuit, pro infirmante aliquando usurpari potest, et revera haud parum sæpe profuit; nimirum si fatis intentum fuerit, et diu adhibitum. Effectus vero frigoris infirmans pendere videtur partim a vi ejus sedante, (de qua fusius postea dicendum erit), unde sensus et mobilitas ita minuuntur, ut plurimi stimuli, qui corpus aliter multum afficerent, vehementissimamque musculorum actionem excitarent (1138.), nihil fere valeant; partim quoque ab alia ejus actione in cerebro, et nervis, et musculis, unde, in sanissimis etiam et robustissimis, brevi debilitas insignis (1116.), et tremor, et paralyfis.

1144. Hujusmodi remedia infirmantia (1138. et seqq.), in variis morbis in quibus nimis valida fibrarum musculosarum contractio accidit, veluti in infania, aut febribus violentis, aut inflammationibus, tuto, et facile, et cum magno beneficio, adhiberi possunt. In his quidem morbis primæ origini mali fortiter occurrunt, et igitur  
vel



vel sola, vel saltem efficacissima ejus remedia fiunt. Et in ipsa infania, quamvis vigor morbosus qui adest, effectus morbi et minime causa ejus sit, tamen observatu dignum est, eadem remedia sæpe haud parum prodesse: ita ut haud abfimile sit, ea (quamvis ratione admodum obscura) ignoto isti cerebri nervorumque statui occurrere, unde tantus vigor, pariter ac cætera morbi indicia, penderet.

1145. Superfunt tamen quædam res, quæ tanta vi infirmante in corpore humano pollent, ut satis verisimile sit eas aliquando pro remediis utiliter adhiberi posse; magna scilicet corporis exercitatio, five labor gravis et diuturnus, et animi affectus deprimentes.

1146. Quod ingentem et diu continuatam corporis exercitationem attinet, effectus ejus in infirmandis omnibus corporis musculis satis notus et certus est: multa autem vetant tale remedium in febribus

violentis, aut inflammationibus, et similibus morbis tentare; in insania vero aliquando tentatum est, et, ut fertur, haud raro egregie profuit.

1147. Deprimentes autem animi affectus (quamvis vires eorum infirmantes neque dubiæ neque exiguæ sint) difficillime pro remediis adhibentur, et profecto rarissime, si unquam, licet remedium adeo anceps tentare. Certe ægrotis acutis morbis decumbentibus nunquam convenire possunt. Sunt tamen qui credunt mente captis aliquando multum prodesse mœrorem illum, quem longa solitudo, et dura coercitio, forte in cellula obscura, inducere solent, et metum quem custodum cura, vel forte sævitia, et vincula, et verbera incutiunt. Hæc res vero non adeo certa est quin adhuc suspicari liceat, talia experimenta talesque animi affectus etiam maxime furiosis multo magis nocuisse quam profuisse. Non temere igitur ad remedium adeo anceps confugere licebit.

*De remediis stimulantibus.*

1148. **R**Emedia stimulantia vocantur illa, quæ vel sensum in partibus sentientibus, vel motum in partibus musculosis excitant. Pleraque sane remedia stimulantia, sed non omnia, utrumque pariter effectum præstant; conjunctissimæ enim sunt, quamvis naturæ diversæ, istæ binæ dotes nervorum musculorumque, ita ut quod in illis sensum excitat, hos quoque ad contractionem cieat. Quin et sensus ipse vehemens, qualiscunque fuerit ejus causa, vim aliquam stimulantem sæpe habet, partesque musculosas ad novos et validos motus incitat. Non tamen idcirco



temere concludendum est, nullum in partibus musculosis motum per stimulantia remedia excitari posse, nisi hæc prius sensum aliquem effecerint.

1149. Plurima medicamenta, aliaque remedia, talem stimulandi facultatem possidere, satis certum et manifestum est: nec minus notum est, alia remedia, et alia medicamenta, contrarium prorsus effectum præstare, et non modo non stimulare corpus, sensumve motumve efficere, sed sensum omnem obtundere atque sopire, motumque reprimere, corpusque demum ita afficere, ut signius in posterum (dum illorum effectus durat) a veris stimulantibus remediis excitetur.

1150. Quamvis vero hæc res adeo certæ sint ut nihil magis, tamen ratio earum valde obscura et difficilis est. Imprimis, quia multa medicamenta, aliæque res, naturæ si non prorsus ejusdem saltem simillimæ, contrarios penitus effectus habent; dum

dum alia bene multa, quàmvis diversissimæ naturæ, eosdem vel simillimos saltem effectus præstant. Maxima autem difficultas atque obscuritas hujus rei in hoc consistit, quod magnitudo effectus talium remediorum minime respondet magnitudini causæ; ita ut hanc intendendo non semper effectum pro rata parte augere possimus. Tam longe aliter enim res se habet, ut sæpe primus et quasi naturalis remedii vel stimulantis vel sedantis effectus, si hoc multum intendimus, brevi desinat, et tandem veluti in contrarium transeat: quin et secundum varias corporis, et præsertim *generis nervosi* conditiones, quæ plurimæ et admodum diversæ existunt, cum in diversis hominibus, tum quoque in iisdem variis temporibus, actio horum remediorum sæpe aut impeditur, aut mirum in modum turbatur; ita ut effectus ab iis haud raro observentur a solitis, et quæ ideo creduntur naturales et proprii, omnino diversi.

1151. Hinc iis qui verbis pugnare amant egregia occasio disputandi, et, ut vocant, philosophandi, plurimasque, et subtilissimas, et ab omni usu medico alienissimas doctrinas ædificandi, de viribus et actione remediorum stimulantium et sedantium, quorum effectum primum et naturalem, simplicissimum et constantissimum semper esse contendunt, variasque quas revera in corpore humano ab eorum usu spectamus mutationes, oriri, non a diversis remediorum in eo effectibus, sed ab ejus actione in se, sive renixu, ut quidam vocant, per vires suas insitas et salutare, de quibus jamdudum satis dictum fuit (59. 64. 361. 5.).

1152. Sic nonnulli sibimet persuadent, nullum existere, aut posse existere, remedium per se vere stimulare, quale scilicet corpori admotum, statim, et prima sua actione, sensum motumque excitaret; omniaque potius remedia quæ corpus stimulare videntur, id efficere per vim suam sedantem,



dantem, quæ corpori noceret idque debilitaret, hocque demum viribus suis salutaribus contra talem debilitatem reniti, eandemque brevi superare, contrariumque aliquando statum inducere. Dum alii simili fere et vix minore ratione (siquidem ratio vocari possit talis *λογομαχία*) contendunt, multa ex remediis quæ vulgo sedantia habentur, natura sua primaque in corpore actione stimulantia esse, et tantum per excessum vis et effectus stimulantis, vel per vim quandam minus adhuc intellectam, sedantia fieri.

1153. Parum certe conveniret de talibus commentis disputare, scilicet quæ non modo nihil ad usum medicum pertineant, nec unquam, quamvis verissima fuerint, conferre possint, sed ne quidem nodum istum qui multos adeo solet morari ullo modo solvant. Nam nisi contenderint aliquid voluntariæ vis istis salutaribus corporis viribus inesse, (quod nemo sanus crediderit), nihil omnino proficitur; eadem enim difficultas

ficultas redit, semperque redibit, quamdiu effectus adeo diversi ab iisdem remediis observantur. Nil refert five unus tantum five mille gradus intercedant inter remedium corpori admotum et effectum ultimum et manifestum qui in eo spectatur; quorum scilicet graduum, quotquot fuerint, unusquisque effectus ejus qui antecedit et causa ejus qui consequitur habendus est, ita ut pari ratione ac nexus inter primum et proximum certus et constans esse debet, omnium continuatio et quasi catena fixa et immutabilis foret. Præterea, neque per hæc neque per alia commenta hætenus prolata, ulla aut explicatio redditur, aut sana conjectura proponitur, de modo quo remedia de quibus agitur corpus afficiant, qualiscunque prima eorum actio fuerit. Neque profecto hanc primam, et obscuram, et vix detegendam remediorum actionem medici interest novisse, (scilicet quæ adeo levis et fugax est, ut neque prodesse multum neque nocere possit), sed effectum ultimum, et validum, et manifestum, et

et durabilem scire, in quo vis et usus eorum plane consistunt, et rationem intelligere hunc utilem effectum seu salutarem in corpore mutationem inducendi. Quamvis vero talia de his et multis aliis remediis commenta nullius medici, neque profecto ullius sani attentionem mereantur, tamen et decet et oportet a philosophia adeo vana et fallace, scientiam nostram pessime corrumpente, nihil utilis in se continente, neque ad ullam utilitatem tendente, sed medicorum, et præsertim tironum, animos ab aliis et feriis rebus avocante, quales et potuissent et meruissent intelligi, omni cura et diligentia cavere. Nequis igitur temere confidat effatis illis de Naturæ ordine et philosophandi legibus quibus nonnulli se credentes philosophos semet circummunire tentant; nimirum quorum alia vaga et futilia vel etiam prorsus falsa existunt, alia forte quodam sensu vera et utilia, sed neque adeo generalia ac quidam sibi persuadent, neque adeo certa et



fixa ut adversante etiam experientia pro veris sumenda sint.

1154. Minime enim licet medico, aut experientiæ aut sanæ ratiocinationi incumbenti, hujusmodi effatis, quæ multis semper in ore sunt, et ab iis pro veris fixis et immutabilibus habentur, semet impedire :

“ Eandem causam eundem semper præ-  
“ stare effectum ;” “ eisdem vel similes ef-  
“ fectus, ab iisdem vel similibus causis  
“ semper oriri ;” “ magnitudinem effectus  
“ semper pro rata parte respondere mag-  
“ nitudini causæ,” &c. Ex his enim ef-  
fatis, posteriora duo manifestissime falsa et  
futilia sunt, et primum adeo vagum et ge-  
nerale, ut quamvis sano sensu verissimum  
sit, tamen temere receptum ad gravissimos  
errores perducatur. Non enim verum est  
eandem causam eundem semper habere ef-  
fectum ; nam hic multum pendet a condi-  
tione rei quæ a causa quavis affici de-  
bet, et etiam multarum rerum quæ primo  
aspectu nihil fere ad effectum manifestum  
conferre

conferre visæ essent. Has vero varias conditiones, sæpe neque intelligere, neque prævidere, neque præsentis scire, possumus. Verisimile est, (siquidem certum dici nequit), et omnis scientiæ naturæ principium et fundamentum, Naturæ cursum et ordinem constantem et immutabilem esse, eandemque igitur causam eundem semper præstare effectum, dummodo et ipsa prorsus eadem sit, aliæque res similiter omnino se habeant; sin minus, et in medicina pariter et in omnibus aliis rebus, diversissimi aliquando effectus ab eadem manifesta causa observantur; quod profecto nil mirum, cum hæc non plena sit causa, sed pars tantum causæ, mutationis quæ consequitur. Certissimum quoque est, eosdem, vel simillimos saltem, effectus, sæpe a causis valde diversis, nonnunquam plane contrariis, oriri, tantumque abesse ut effectus semper pro rata parte respondeat magnitudini causæ, ut sæpe a majore causa effectus minor, interdum novus, nonnunquam demum solito contrarius, fiat.

1155. Missis igitur hujusmodi ambagibus, de re adeo obscura atque inutili ac modus est quo remedia stimulantia corpus excitent, magis ex re nostra erit ad effectus quos manifeste præstant animos attendere.

1156. Principio igitur observandum est, multas res, cum medicamenta tum quoque et alia remedia, vi tam manifeste stimulante pollere, ut vel sano et integro corpori, vel musculo cuivis jam separato, sed vitam et vim suam contrahendi adhuc retinenti, admota, contractionem aliquam in partibus quas contingunt statim excitent. Quin et eadem remedia nervo qui musculum quemvis adit admota, hunc ad motum cient (1110. et seqq.); et nonnulla eorum neque musculo neque nervo ejus admota, sed tantum in cerebro agentia, plerisque vel omnes forte corporis musculos similiter afficiunt. Hujusmodi res, ex prima sua ut videtur actione, remedia vere stimulantia non immerito haberi possunt; quamvis etiam majore quam par esset copia

pia



pia data, aut corpori præter solitum quodammodo se habenti admota, contrariam vim possidere viderentur, motusque sensusque reprimere atque sopire.

1157. Aliæ vero res, quarum natura et communis effectus est vel sensum sopire motumque reprimere, vel quæ saltem musculo cuivis admotæ, blandæ, et omni stimulo et acrimonia vacuæ, videntur, tamen haud raro (utcunque obscura ratio talis rei videatur) motus novos et satis vividos excitant.

1158. Aliæ demum res ancipitis et quasi mixtæ naturæ sunt, et duplicem vim in se habent, stimulantem scilicet et sedantem; unde varii aliquando, et miri, et vix non contrarii effectus, alii aliis vel statim vel brevissimo post intervallo succedentes.

1159. Remediorum autem vere stimulantium (1156.) effectus hujusmodi fere sunt: sensus aliquis, nunc levior nunc  
acrior,

acrior, secundum vim remedii admoti tempusque per quod adinoveatur, in parte quam stimulus contingit, hæcque pars, partesque sæpe vicinæ, vel forte omnes corporis partes, magis quam antea fuerant sentientes factæ; et motus aliquis fibrarum musculosarum, cum majorum, quæ forte afficiantur a stimulo quovis iis aut partibus vicinis admoto, tum quoque minutissimarum, veluti in arteriis, aut organis discernentibus, quæ necessario afficiuntur, ubicunque remedium stimulans fuerit admotum; unde auctus partem stimulatam versus sanguinis impetus, majorque hujus ad illam, et minor igitur ad alias delata copia, et rubor, et calor, et sæpe tumor et dolor, et aliquando vera inflammatio partis stimulatæ, et nonnunquam secretio vel excretio per eam plurimum aucta vel perturbata. Neque profecto solæ partes quibus remedia stimulantia adhibentur partesque iis vicinæ ita afficiuntur. Partes sæpe valde remotæ, sed per consensum cum prioribus conjunctæ, ad vehementes motus incitantur,

tantur, et interdum etiam totum corpus, per consensum illum generalem de quo suo jam loco (353. 4.) dictum est, partium quarundam affectionem brevi participat, et manifestissime excitatur; et omnes ideo corporis partes, tum quæ ipsæ stimulatae fuerint, tum quoque reliquæ, novam sæpe alacritatem, et sane vigorem et mobilitatem, et mens ipsa haud raro novam et insignem hilaritatem adipiscuntur.

1160. Non omnia vero remedia stimulantia æque idonea sunt ad stimulum istiusmodi generalem per partem aliquam universo corpori impertiendum: neque sane omnes corporis partes tantum cum tota compagine consensum et quasi commercium habent, ut quævis earum affectio cum reliquis brevi et facile communice-  
tur.

1161. Stimulantium igitur remediorum alia magis, alia minus diffusilia dici possunt; aliorum quoque effectus magis durabiles,



rabiles, aliorum magis fugaces reperiuntur: omnibus autem hoc vitium est, quod effectus eorum excitans plerumque nimis fugax fit, et quod pejus est, sæpe in contrarium effectum definat; ita ut gratissimam illam alacritatem, et mobilitatem, et vigorem corporis, et suavissimam animi hilaritatem, quæ certa remedia stimulantia efficere solent, insignis languor, et debilitas, et hebetudo, et mœstitia, brevi excipiant.

1162. Hinc facillime intelligetur cur tot remedia vere stimulantia luxuriæ causa vulgo usurpentur; qua ratione et grata et nonnunquam hominibus quamvis sanis non inutilia fiant; quo pacto per multum usum aut longam consuetudinem nocentia simul et necessaria assuetis fiant; quanta solertia a tali consuetudine et incommodo præcavendum sit, quantaque cura et prudentia opus sit ut talis prava consuetudo jam inveterata tuto abrumpatur.

1163. Quod

1163. Quod varias corporis partes attinet quarum affectiones a remediis stimulantibus promptius vel segnius cum reliquis communicantur, nulla fere pars sentiens et mobilis multum affici potest quin inde totum *genus nervosum*, et ideo totum corpus, quodammodo afficiatur, eandemque conditionem participet. Quo magis vero sentiens et mobilis pars quælibet fuerit, eo promptius et ipsa a remediis afficietur et reliquum corpus afficiet. Sic multa remedia, aut naribus, aut cuti, (quibus plurimi nervi et acutissimus sensus sunt), aut musculis ipsis, aut vasis quæ sanguinem vehunt, aut organis quibusdam fecermentibus admota, non modo has partes stimulant, sed totum simul corpus excitant. Nulla autem pars corporis consensu magis prompto aut generali cum toto *genere nervoso*, et ideo cum toto corpore pollet, nec ulla igitur magis idonea existit cui plurima remedia stimulantia, quæ totum corpus afficere cupimus, admoveantur, quam ventriculus, cum ob plurimos quibus instrui-

tur nervos, tum ob insignem suam mobilitatem, tum forte ob consensum illum egregium quem cum cerebro habere videtur. Interdum quoque cum propter devorandi difficultatem aliasque causas, idonea remedia vix in ventriculum recipi aut in eo retineri possent, eadem remedia per anum in intestina infundere optime profuit: scilicet quia his non secus ac ventriculo plurimi sunt nervi, et insignis mobilitas, et egregius cum universo *genere nervoso* consensus.

1164. Sæpe etiam, ut fertur, egregie profuit stimulantia remedia neque partibus male affectis admoveere, neque ita adhibere ut totum corpus fere pariter afficerent, sed eadem prope originem nervorum partium laborantium admoveere, veluti cervici et inter scapulas cum brachia male se habent, aut lumbis et ossi sacro cum crura vel vesica afficiuntur. Interdum quoque, ut clarus auctor testatur, cum vitium quarundam partium a malo aliarum et remotarum



tarum quasi per consensum aliquem oritur, veluti brachiorum et crurum a *colica Pictorum*, oportet remedia stimulantia partibus primo affectis, vel quam proxime, adhibere, quæ tum omnem suum usum præstabunt, quamvis partibus ipsis jam laborantibus adhibita parum omnino valuissent.

1165. Ex variis remediorum stimulantium in corpore humano effectibus jam (1159.) recensitis, perspicuum est, ea in plurimis et quidem satis diversis morborum generibus interdum esse profutura, variisque ideo consiliis a medicis sæpe præscriptum iri.

1166. Imprimis igitur ad excitandas partes quasdam natura sentientes sed morbo torpentes, vel ad integrandum et quasi acuumendum universi corporis sensum siquando hic præter naturam defecerit, veluti in *Anæsthesia* generali, aut stupore membri cujusvis (171. 2.), aut in cæcitate illa quæ a

minuto vel amisso nervi sensu, non a vitiis humorum oculi, oritur, et quæ *Amaurosis* (253.) vocatur, sæpe usurpantur, et haud raro utilissima fiunt. Scilicet nervis aliquando sentiendi facultas plane deficit, fabrica eorum adhuc integra atque intacta, propter causas valde obscuras vel penitus ignotas, quæ tamen non adeo fixæ aut validæ sunt, quin, ope idonei stimuli finibus nervorum tenuissimis admoti, ipsæ vel prorsus submoveantur, vel sensus saltem iis nervis redeat. Maxime vero dolendum est hoc non perpetuum esse, sensumque sæpe vel deficere vel penitus deleri a causis adeo validis et fixis, veluti a compressione aliqua, aut læsa fabrica cerebri nervorumque, ut neque dum hæ causæ adsunt per hæc aut ulla remedia sensus in partibus affectis ut decet renovetur, neque ipsæ per stimulantia remedia nervis adinota tollantur.

1167. Porro, ad renovandam aut reficiendam movendi facultatem fibrarum musculosarum,

musculofarum, quæ sæpe deficit, cum in iis musculis qui voluntatis imperio subjiciuntur, tum quoque in iis partibus quæ hujus imperium non agnoscunt, veluti in paralyfi, aut generali aut quarundam tantum partium, stimulantia remedia cum prudentia adhibita, et satis diu continuata, sæpe multum profunt, et aliquando morbum penitus tollunt. Hoc autem non constans aut perpetuum esse satis superque notum est: quod profecto nil mirum, quum paralyfis, non secus ac defectus sensus, tam sæpe oritur a causis vel prorsus fixis et immedicabilibus, vel quæ saltem per stimulantia remedia nullo modo tolli possunt.

1168. Citra vero paralyfin vel generalem vel specialem, actiones multarum partium (quæ omnes forte, magna saltem ex parte per motum muscutorum fiunt) languent aut plane deficiunt, non sine magno incommodo aut periculo. Tale vitium haud raro oritur vel a torpore aliquo partis ipsius, vel a defectu soliti et naturalis



turalis stimuli, ideoque per remedia stimulantia optime et efficacissime corrigitur, nimirum quæ per suum effectum generalem totum corpus aliquantum excitant, et mobilitatem aliquam partibus etiam maxime torpentibus conciliant, et his partibus admota naturalis stimuli quacunque de causa deficientis vice funguntur.

1169. Hoc modo omnes fere secretiones et excretiones aut deficientes promovere et restituere, aut ad libitum excitare et augere possumus, per stimulantia remedia rite adhibita. Pari etiam ratione idonea remedia stimulantia certis partibus admota novos et minime naturales, sed sæpe necesarios et saluberrimos motus in iis efficiunt. Hoc fundamento nititur administratio multorum remediorum evacuantium, veluti quæ vomitum, aut alvum, aut urinam, aut sudorem, aut salivam, &c. movent, quod tamen hic indicasse sat fuerit, quippe de quibus nominatim postea agendum fit.

1170. Pari

1170. Pari quoque ratione hujusmodi remedia haud raro præscribuntur et egregie profunt ad mutandum et quasi dirigendum sanguinis cursum, siquando hic præter naturam partes quasdam versus ductus fuerit, quod minime rarum aut leve vitium est. Excitata autem per vim remedium stimulantium actione arteriarum partis cujusvis, plus sanguinis ad eam necessario derivatur, et minus igitur pro rata parte ad alias defertur; unde sæpe multarum affectionum levamen subitum, et quidem præter omnem spem et fidem, nisi adeo manifestum esset, magnum atque durabile.

1171. Quin et remedia stimulantia sæpe utilissima reperiuntur, interdum omnino necessaria, in magna debilitate partium musculosarum, præsertim quarum actiones a voluntate nostra non pendent, sed ad vitam et sanitatem conservandam omnino necessaria sunt, veluti cordis, et arteriarum, et ventriculi. Sunt quidem remedia stimulantia

mulantia quæ vires cordis et arteriarum adeo potenter excitant, et reficiunt, et augent, ut non immerito aliud et peculiare nomen, omnium fere medicorum consensu, sibi met nacta sint, et *cardiaca* vocentur. Multa quoque medicamenta stimulantia ad excitandas aut augendas (si forte defecerint) ventriculi vires et actionem vulgo præscribuntur, et sæpe cum insigni et durabili beneficio. Hæc ideo a multis *stomachica* vocantur. Hujusmodi stimulantia remedia, *cardiaca* scilicet, et *stomachica*, et quidem multa alia, roborantia quoque fiunt (1093.4.): neque mirum erit cuiquam, effectus eorum in augendis musculorum viribus aliquando satis esse durabiles, si modo secum perpenderit quam arctus inter varias corporis functiones intercedat nexus, et quam mirum in modum omnes ad generalem vigorem sustinendum conducant, et quam prompte beneficium quod partes quædam ab idoneis remediis stimulantibus acceperint cum reliquis communicetur.



1172. Tanta etiam vis est remediorum quorundam stimulantium, tantusque inter varias partes et varias functiones corporis nexus atque consensus, ut vita jam pene extincta per ea denuo integretur : neque dubium est, multos tam prope exanimis ut sibi relictis nunquam revixissent, ope idoneorum remediorum stimulantis generis, veluti ab ipso sepulchro fuisse ereptos, et ad vitam reductos, et plures adhuc simile beneficium esse accepturos, si modo remedia satis prompte et perseveranter fuerint adhibita.

1173. Ex effectibus remediorum stimulantium in excitanda vel augenda arteriarum actione, sæpe præscribuntur, neque inepte, ad solvendas obstructions quales haud raro in variis partibus corporis, et præsertim in organis secernentibus (744.), accidunt, et vel impedita partis affectæ functione toti corpori nocent, vel in alios et graviores morbos desinunt. Dolendum magis est quam mirandum, optima et effi-

cacissima horum remediorum (quamvis nonnunquam mirabiliter profint) adversus tales obstructions non semper valere.

1174. Quædam ex iis olim credita fuerunt multum prodesse in attenuandis variis corporis humoribus præter naturam spissifcentibus, et ideo ægre movendis. Tale autem vitium, præsertim in sanguine, multo rarius est quam auctores medici sibimet persuadebant. Et quamvis certum sit remedia stimulantia haud parum prodesse in multis morbis qui ab isto vitio pendere credebantur, tamen alia et magis verisimilis ratio tanti beneficii reddi potest. Non dubium vero est humores quosdam secretos præter naturam aliquando spissescere, et hoc vitium per hujusmodi remedia interdum corrigi; cujus quidem rei ratio minime obscura est.

1175. Nonnulla demum ex iis, partim, ut videtur, ob vim suam stimulantem, partim, et magis forte, propter alias vires  
medicinales

medicinales quas una cum illa possident, utilissima sunt ad corrigendam aut præcavendam corporis putredinem (529. 32.) cum generalem, tum partium quarundam præ aliis; quamvis pleraque eorum calefaciendo corpus putredini plane faveant, eandemque sæpe mirum in modum inducant vel augeant.

1176. Denique, multa remedia manifestissime stimulantia sæpe haud parum valent adversus motus illos abnormes qui *spasmi* dicuntur, quos interdum instantes arcent, interdum præsentis solvunt, et ideo non immerito inter remedia *antispasmodica* recensentur, quamvis hæc ad contrarium genus, sedantium nimirum, revera pertineant. Hoc efficere videntur partim vi sua roborante, quæ corpus minus mobile reddat, partim validiore stimulo corpori dato, qui sensum vel actionem prioris superet ejusque effectum impediat, partim forte mutato sanguinis cursu, et simul cum hoc vis nervorum fluxu, qui per



actionem stimuli a partibus prius laborantibus ad alias deriventur.

1177. Postremo, ex effectibus suis in mente ipsa, quam adeo reficiunt atque exhilarant, remedia quædam stimulantia, præsertim quæ vocantur *cardiaca*, interdum idonea fiunt, cum animus hebes, et languidus, et tristis, et spiritus demissi facti fuerint, vi morbi et citra justam quamlibet causam moralem. Maxima autem prudentia et cura hic opus est; talis enim bonus atque exhilarans effectus, utcunque certus, fugax omnino est, et sæpe haud parum nocivus, animumque hebetiorem et tristiorem, corpusque languidius quam antea relinquit. Neque frequentior aut certior existit causa talis animi corporisque conditionis morbidæ, quam abusus ipsarum rerum quæ prudenter usurpatæ eidem quodammodo remedio fieri solent.

1178. Remediorum quæ tot tantisque usibus inservire debent copia ingens est et  
varietas

varietas magna: omnia vero stimulantia remedia hic nominatim recensere omnino supervacaneum foret; sat erit præcipua eorum genera enumerasse.

1179. Imprimis igitur, quod medicamenta stimulantia attinet, diversissima eorum genera existunt, ex animalibus, et plantis, et fossilibus rebus, derivata.

1180. Diversissimæ quoque vires variis medicamentis stimulantibus contingunt; ita ut dum alia tanta acrimonia in corpore pollent, ut vel minima copia in id recepta violentissimos effectus præstent, neque profecto periculo aliquo unquam penitus careant, alia adeo tuta et mitia sint, ut delicatissimis etiam sine periculo dari possint, nec quicquam aut boni aut mali efficiant nisi magna copia assumpta fuerint.

1181. Res fere omnes quæ gustui acres et quasi pungentes videntur, multæque etiam res quæ acrimoniam vel nullam vel  
admodum

admodum exiguam atque obscuram habent, aliis atque aliis musculis stimulo sunt; nam multum abest ut omnes stimuli omnes pariter musculos afficiant. (315.)

1182. Hinc facile intelligetur, plerisque vel omnes forte sales, puros, *neutros*, terreos, et metallicos, aliquid vis stimulantis in se habere, si modo rite fuerint adhibiti: cujusmodi exempla esse possunt, *alkali* fixum fossile, *alkali* volatile, *acidum vitriolicum* et *muriaticum*, sal marinus, sal *Glauberi*, sal ammoniacus, *Tartarus vitriolatus*, *Mercurius sublimatus corrosivus*, vel *præcipitatus ruber*, vel *turpethum minerale*, *Tartarus emeticus*, *vitriolum* album, aut cæruleum, aut viride, alumen, sal *catbarticus* amarus, &c.——Neque hæ res minus vere stimulantia remedia sunt, quod multæ ex iis (secundum ipsarum usum et administrationem, variasque corporis aut singularum ejus partium conditiones) contrarium aliquando effectum præstent, et quidem optima sedantia remedia fiant.

1183. Plantæ



1183. Plantæ quoque quæ vocantur *acres*, vim stimulantem habent satis manifestam. Harum vero plurima sunt genera, seu familiæ, ut dicuntur: *siliquosæ* imprimis, vel *cruciformes*, ut a variis auctoribus nominatæ sunt; cujus exempla esse possunt, sinapi, raphanus rusticanus, *cochlearia*, nasturtium, &c.; omne quoque genus allii, porrum, cepa, allium, scilla, &c.; *umbelliferae* etiam, *carvi*, *angelica*, anethum, &c. multæque aliæ plantæ acres quæ ægre ad certam quamvis familiam seu commune genus referri possint, veluti ranunculus, urtica, arum, asarum, *colchicum*, *nicotiana*, *digitalis*, *ipecacanha*, *jalappa*, *rheum*, *rhamnus*, *helleborus*, *mezerion*, et similia fere innumera, quæ vel universo corpori vel quibusdam saltem ejus partibus præ cæteris stimulo sunt. Variis quoque harum plantarum partibus, veluti radicibus, aut foliis, aut feminibus, constat vis stimulans, neque in aliis ejusdem plantæ partibus pariter reperitur.

1184. Aromaticæ quoque, numerosissima quidem plantarum familia, ad unam omnes vim aliquam stimulantem habent, et quædam ex iis validissima et simul gratissima remedia stimulantia fiunt: cujufmodi exempla esse possunt, piper omne, commune, album, longum, *pimento*, cinnamomum, *canella*, cassia, *caryophyllum* aromaticum, *nux moschata*, *macis*, cortex *Winterianus*, zingiber, &c.; quibus adjungere oportet plantas quasdam aromaticas mitiores, quales frigidiores nostræ regiones ubertim ferunt, mentham, verbi causa, cum vulgarem tum piperitidem, pulegium, thymum, fabinam, *lavendulam*, rorem marinum, et similia. Vis autem stimulans quæ omnibus plantis aromaticis contingit, quamvis in variis earum partibus detegatur, fere tota pendet ex oleo illarum proprio, seu *essentiali*, ut vocatur, quale per vim ignis elici potest; et igitur ubicunque hoc maxime abundat, ibi potissimum reperitur.

1185. Aquæ igitur istorum medicamentorum *destillatæ*, five tenues five *spirituosæ*, ut vocantur, veluti menthæ piperitidis, aut cinnamomi, aut nucis *moschatæ*, iis-  
dem viribus in corpore humano pollent ac  
medicamenta ipsa unde derivantur, sed  
 sæpe haud parum gratiores sunt, et ad u-  
sum medicum melius accommodatæ; sci-  
 licet quæ copiam non exiguam olei aro-  
 matici in se solutam contineant, in quo  
 vis stimulans (1184.) maxime inest, quam-  
 vis hoc oleum plurima aqua vel alio hu-  
 more dilutum, utcunque sua natura acre,  
 adeo mitescat, ut facile et tuto hauriri pos-  
 sit.

1186. Olea demum aromatica ipsa sin-  
 cera, per vim caloris educta, validissima sti-  
 mulantia remedia fiunt, sed plerumque  
 adeo calida et acria ut parum ægrotis con-  
 veniant.

1187. Naturæ non multum ab his alie-  
 næ sunt medicamenta illa quæ vocantur



balsama vel resinæ; veluti balsamum *Canadense*, *Copaibæ*, *Peruvianum*, *Tolutanum*, *terebinthinæ* variæ, &c.

1188. Post hæc memorari debent medicamenta plurima stimulantia, quæ vulgo gummi resinæ vocantur, succi scilicet quarundam plantarum proprii spissati, quos illæ vel sponte fundunt, vel largius præbent si idoneo tempore punctæ vel incisæ fuerint: cujusmodi exempla sunt, *asa foetida*, gummi ammoniacum, galbanum, *fagapenum*, *gambogia*, *aloe*, &c. quæ ad stimulandum vel totum corpus, vel partes quasdam præ cæteris, sæpe præscribuntur.

1189. Omnes demum plantæ amaræ, quamvis cæteroquin satis mites, aliquid stimuli in se habent, quantum scilicet sat fuerit ad partes quasdam corporis delicatiores et mobiliiores afficiendas, vel forte ad novos et insolitas actiones excitandas. Sic folia cardui benedicti, et flores chamæmeli, et radix gentianæ, vel leves tantum illorum

rum infusiones largius vel parcius haustæ, ventriculum vel ad validiorem actionem stimulant, vel etiam vomitum movent. Proxime quoque post hujusmodi amara medicamenta recenferi debet fel, nimirum quod et parem amaritiem et similem vim stimulantem habere videtur, quamvis hoc ex animalibus, illa ex plantis, deriventur. Fel autem raro pro medicamento præscribitur.

1190. Omne denique genus vini, five ex uvis, five ex pomis, five ex aliis fructibus paratum, et cerevisia omnis, et omnis liquor fermentatus, et magis adhuc meraciores illi latices, *spiritus destillati* dicti, qui ex talibus liquoribus per ignem eliciuntur, corpori stimulo sunt certissimo, et gratissimo, et sæpe saluberrimo et satis durabili. Hoc in omni fere debilitate atque languore, five a nimio labore, five a magna exinanitione, five a gravi animi affectu, five a longa inedia, five a longo morbo, five a gravi febre malignioris generis, satis per-

spicuum est: et istiusmodi jam remedia (ubique stimulo interno et generali opus est) a medicis multo largius præscribuntur quam olim fieri solebat, et quidem cum insigni ægrotantium commodo.

1191. Ex animalibus (1179.) paucissima derivantur stimulantia medicamenta. Cantharides sane insigni vi stimulante polent; sed propter nimiam suam acrimoniam, raro, et parce, et caute omnino devorandæ præscribuntur: cuti autem extrinsecus admotæ forma emplastri vel unguenti, omni fere periculo carent, et hoc modo quotidie præscribuntur, et partim suo stimulo, partim aliis effectibus, qui tamen ex hoc primario manifeste pendent, in variis morbis egregie profunt. Millepedæ quoque (quæ olim in tanta æstimatione erant) huc forte referri debent; illarum enim vires medicinales, si quæ iis competant, stimulantis generis esse videntur; hæ autem neque adeo certæ neque tantæ sunt, ut medicorum, quibus tot alia et efficaciora  
ejusdem



ejusdem generis medicamenta suppetant, attentionem mereantur.

1192. Præter vero omnia medicamenta stimulantia, sunt et alia quædam remedia quæ corpus satis efficaciter stimulare solent, et hoc consilio in nonnullis morbis adhiberi.

1193. Hoc inter imprimis memorari debet subtilissima illa atque mobilissima aura quæ per aliquot jam annos philosophis et medicis tam bene nota est sub nomine *fluidi electrici*, quæque multa corpora mirabiliter pervadit, et vel rapidissimo suo motu, vel alia minusque intellecta ratione, variis modis afficit. Animalium autem corpora non modo velocissime pervadit, sed simul validissime stimulat, sensumque in partibus sentientibus, motumque in partibus musculosis, excitat, adeo subito et certe ut nihil magis. Immo musculo cuivis e corpore jam execto, sed vim suam adhuc retinenti, ubi nullus ideo fieri potest

test sensus, admota, hunc, quamvis jam torpentem, neque alii cuiquam stimulo parentem, illico ad contractionem ciet. Quin et tanta est vis stimulans hujus auræ, ut integro et quidem valido corpori nimis large admota, vitam ipsam statim extinguat. Hanc perniciem alii ad solam vim stimulantem plus æquo intensam, alii ad subitam illam atque ingentem debilitatem quæ nimio stimulo succedere solet, referendam esse censent. Constat enim per inspectionem cadaverum hoc modo extintorum, nullam sæpe posse detegi læsionem manifestam qualis mortis causa haberi potuisset. Parcius vero et cautius admota minime periculosa est, et vel totum corpus, vel partes quibus potissimum adhibetur, validissime stimulat; et sic in paralyfi, in *amaurosi*, in suppressione mensium, felicissimo cum successu sæpe usurpatur; minutas enim fibras arteriarum, non secus ac majores corporis et artuum musculos, ad motum ciet, et sic impetum sanguinis expedit atque intendit.

1194. Duplice fere modo corpori adhiberi solet præstantissimum hoc remedium ; per scintillas, nimirum, vel per ictus, quos inter parum omnino interest, præterquam quod illæ mitiores et tolerabiliores sint, hi vero graviores, ideoque delicatis et imbecillis minus accommodati, neque, propter dolorem summamque molestiam quam creant, quotidie repetendi quamdiu opus fuerit ad morbos quosdam sanandos in quibus prodesse videantur. Observandum enim est, hoc remedium, utcunque validum, parum sæpe prodesse, nisi large adhibitum fuerit, diuque continuatum ; et male igitur clinicos quosdam de eo conqueri tanquam parum efficace, cum satis leviter perque paucos tantum dies id tentassent. Non defuere enim exempla ægrotantium qui hoc solo remedio penitus convaluerint, quamvis post aliquot menses et liberrimum remedii usum parum boni ab eo accepissent. Administratio talis remedii per numerum atque mensuram vix definiri aut regi potest ; tamen scire juvat, ictus satis fortes ad trecentos



centos et amplius in horæ quadrante, vel scintillas plurimas, fere innumeras, non modo sine damno, sed cum insigni beneficio, per longum tempus quotidie fuisse adhibita. Hoc vero non ita intelligendum est quasi remedium adeo validum semper conveniret, vel semper periculo careret, in iis etiam morbis qui aliquid stimuli maxime postulare videantur, veluti in *apoplexia*, aut paralyfi, &c.; sæpe enim nocuit, semperque igitur cum prudentia adhiberi debet, vel interdum omnino prohiberi, quum multum febris, aut ingens sanguinis abundantia, aut distributio, aut congestio ejus abnormis, aut demum summa debilitas, adsunt, ne vel priora mala augeat, vel nova, forte graviora, efficiat.

1195. Idem fere monendum est de calore, qui omnium fere qui hætenus cogniti fuerint stimulorum et maxime generalis et efficacissimus esse videtur; scilicet qui non modo musculos animalis jam vegeti et mobilis ad contractionem ciet, sed languentia,

languentia, et torpida, et pene exanimia, ad motum et vitam excitat; qui multis animalibus alter vitæ fons est, ovumque, aliter nunquam victurum, ad vitam brevi perducit; qui omnibus animalibus necessarius est ad varias excitandas propriisque muneribus aptandas partes, præsertim cerebrum, quique ex eo pendent nervos atque musculos; qui denique tantum in corpus humanum imperium habet, ut auctus, sensum et mobilitatem mirum in modum augeat, minutus, minuatur, ad torporem usque et paralyfin.

1196. Nil mirum igitur calorem interillum pro stimulante remedio in quibusdam morbis fuisse adhibitum, et aliquando multum profuisse. Levis enim præter sortum calor levi stimulo est, qualis sæpe et utilis et utilis corpori esse potest; major calor validiorem præbet stimulum, et generi nervoso, et partibus quæ sanguinem movent, et ideo universo corpori; ingens

demum calor, qualis inter urendam partem quamlibet adhibetur, vehementem et intolerabilem stimulum dat, non parti modo quæ uritur, sed reliquo etiam corpori. Hujusmodi vero stimulus (quamvis suis interdum usibus non careat) non verbis opus est ut probe constet quam parum accommodatus sit communi medicorum usui. Quin et calor multo lenior, qualis non modo sine dolore, sed sine magna molestia tolerari possit, vel qui forte multis ægrotis jucundus foret, gravia quædam incommoda in se habet, neque ideo semper pro stimulante remedio adhiberi debet; imprimis quia ex effectibus suis in universo *genere nervoso* generalem mobilitatem plus æquo auget; tum quia impetum sanguinis nimis intendit, quod sæpe valde periculosum erit; tum porro quia cutem, et sane totum corpus multum laxat et solvit, et sic debilitando sæpe plus nocet quam stimulando compensare possit; tum denique quia putredini humorum multum favet, qua nihil fere existit corpori perniciosius.



1197. Proxime post calorem frigus enumerare oportet, scilicet quod, secundum rationem qua adhibetur, corpori interdum validissimo stimulo est, quamvis aliter adhibitum efficacissimum sedans remedium fiat, ut suo loco plenius explicandum erit.

1198. Frigus igitur corpori tantum stimulo est, cum satis intensum est, et subito et per breve spatium adhibitum, veluti si quis in aquam frigidam descenderit, (quod genus remedii satis diu continuatum nonnullos paralyticos sanasse fertur), vel si frigida hausta fuerit instante animi defectione, quæ tum istud malum sæpe arceat, vel si vultus tantum hominis cui animus jam defecisset, aqua gelida sparsus fuerit, quod sæpe vires motusque corporis renovat. Subitum igitur frigus non immerito inter stimulantia remedia recensetur, partim forte propter vehementem sensum quem efficit, (nam omnis sensus vehementior corpori stimulo est), partim quoque propter vim suam propriam qua mus-

culos etiam sine sensu afficit, veluti si cordi animalis frigidi sanguinis e corpore jam execto subito admotum fuerit. — Diuturnum vero frigus, quamvis non nimis intensum, remedium roborans fit haud contemnendum, tamen minime stimulat corpus, sed potius sedat, sensumque minuit, motusque omnes reprimi.

1199. Corporis quoque exercitatio, ratione haud obscura, stimulum ei impertit satis validum, et in quibusdam morbis utilissimum, aliisque omnibus quotquot cogniti fuerint stimulis plane anteponendum. Hoc imprimis verum est siquando motus sanguinis variis de causis præter naturam languet (464.), et functiones quædam ab illo pendentes, secretio præsertim atque excretio per cutem (722.), et interdum per renes, simul deficiunt. Neque profecto defuere exempla, ubi postquam istud vitium eo usque processisset, ut hydrops (467.) plane instaret, vel jam ingravesceret, omnisque igitur valetudo in summo versaretur

versaretur discrimine, per stimulum idoneæ et crebræ exercitationis, sanguinis motu rite expedito (424, 5, 6.), hydrops fugatus fuerit et ægri penitus convaluerint. Hinc etiam, magna saltem ex parte, pendet beneficium istud insigne, et (siquid de viribus remediorum certum dici potest) certum atque constans, quod multi ægri morbis vetustis laborantes a iusta corporis exercitatione accipiunt. (1096. et seqq.)

1200. Hæc autem non modo incitato sanguinis motu vel totum corpus vel partes et functiones quasdam præ reliquis stimulat, verum insuper per effectum suum in *genere nervoso*, minus quidem intellectum, sed non minus certum, totum corpus excitat; et sic in nonnullis morbis ab aliis plane causis quam languidiore sanguinis motu pendentibus, veluti in torpore, aut paralyfi plus minusve perfecta, aliquando plurimum prodest. Ipsorum forte musculorum contractio corpori stimulo est; et via illa ignota seu conatus (324.) qui musculos voluntarii motus ad actionem ciet,



ciet, id manifestius stimulat. Nam omnis sensus (1202.), multique animi affectus (1203.), omnique demum voluntatis actio, corpus aliquantum excitant, eo magis et certius, quo ipsa graviora fuerint.

1201. Stimulus hic, quem corporis exercitatio dare solet, quamvis sæpe saluberrimus fiat, haud raro tamen magno incommodo atque periculo non vacat; neque ideo omnibus pariter ægrotis convenit quibus stimulo aliquo opus est; scilicet, quia interdum dum corpus multum excitat, vires simul ejus mirum in modum exhaurit, hominemque quasi opprimit, quod imprimis notabile est in valde imbecillis; nam semper memoria tenendum est, corporis exercitationem eo graviolem fieri stimulum, eoque plus incommodi atque periculi afferre, quo æger, five a natura five a vi morbi, debilior factus fuerit. Quod sane minime mirum est, cum (præter effectum suum debilitantem (337.) in genere nervoso) motum sanguinis adeo festinat, et sic novum  
auctumque

auctumque laborem, ad quem parum valent, viribus sanguinem moventibus imponit. Quapropter caute omnino debilibus atque exhaustis pro stimulante remedio præscribenda est. Hæc autem de bonis atque malis exercitationis effectibus hic quam levissime memorasse sat erit; quoniam fufius jam alio sub capite (xxviii.) de iis dictum est.

1202. Quod sensum vero attinet, omnis plane sensus aliquid stimuli in se habet, qualis, si modo satis validus fuerit, somnum vel arcere (393.) vel jam præsentem rumpere possit, vel varias demum corporis partes ad motum aliquem ciere. Varii autem sensus corpus plus minusve excitant secundum ipsorum vehementiam, quæ a præcedente aut præsentē statu corporis, et consuetudine (141.), multisque aliis rebus pendet. Sic, dum multi sensus corpus vix aut ne vix quidem ita excitant ut somnum arceant, graviores sensus, vel dolor (176.) magnus, non modo excitant corpus,

corpus, sed plurimum perturbant atque convellunt. Quin et sensus quidam sua natura minime vehementes, et qui sanum hominem parum afficerent, veluti lucis, strepitus, caloris modici, secundum varias conditiones corporis, veluti in febricitantibus, aut *hystericis*, aut puerperis, aut valde mobilibus, idem multum stimulare possunt. In hujusmodi quidem exemplis plane nocent; in aliis vero, ubi sopor aliquis vel torpor urget, haud parum profunt.

1203. Animi autem affectibus, non sane omnibus pariter, sed iis qui, distinctionis causa, excitantes (342.) vocantur, quales sunt, ira, gaudium, spes, hilaritas, &c. vis stimulans major et certior constat, quæ, ut suo jam loco (343.) dictum est, propter vehementiam corpori aliquando nocet, sæpe vero per generalem atque gratissimum suum stimulum mirabiliter prodest. Naturæ non multum ab his alienæ videtur esse animi exercitatio, modica scilicet variisque



riisque constitutionibus atque ingeniis ri-  
 ue accommodata. Sed de his non opus est  
 hic fusius differere, cum præcepta maxime  
 generalia et necessaria huc pertinentia alio  
 loco (1124.) tradita sunt.

VOL. II.

R r

C A P.

C A P. XXXI.

*De remediis sedantibus.*

1204. **R**Emedia sedantia dicuntur illa quæ sensum obtundunt motumque reprimunt.

1205. Plurima medicamenta aliaque remedia, naturæ non modo diversæ sed plane contrariæ, alia atque alia ratione hujusmodi vi in corpore humano pollere, manifestum et certum est; quamvis difficillimum sit explanatu quo pacto multa eorum corpus ita afficiant; præsertim cum alia et quidem simillima medicamenta, vel eadem forte alio tempore et aliter adhibita (1150.), corpori plane stimulo sunt.

1206. Sedantia

1206. Sedantia remedia non fecus ac stimulantia, partes corporis quibus proxime admoventur primo et maxime afficiunt; sæpe autem, si rite adhibita fuerint, aliæ et satis remotæ partes, et demum totum corpus, eundem effectum quodammodo participant.

1207. Hujusmodi remediis in variis morbis, cum generalibus tum quoque partium quarundam, variis de causis sæpe opus est. Non omnia vero sedantia remedia in omnibus morbis qui tali auxilio egent, pariter idonea sunt; scilicet quæ non modo magnitudine et quasi gradibus communis effectus differunt, sed multum quoque variant aliis effectibus quos in corpore humano præstent.

1208. Innumera fere et diversissima remedia variis in morbis, secundum horum causas et corporis conditionem, sensum motumque minuere atque sopire possunt, et sic quodam sensu sedantia remedia fieri.



Omnis nimirum motus (neque aliter res se habet de sensu) a variis rebus pendet; cerebri imprimis, et nervorum, et fibrarum musculosarum certa quadam conditione qua apta fiunt ut a quibusdam causis, puta variis stimulis, certa ratione afficiantur; et natura et vehementia stimuli qui admovetur. Motus igitur qui excitantur aliquatenus respondebunt pro rata parte his variis causis simul sumptis. Sic pulsus arteriarum sæpe aut nimis validi aut nimis frequentes fiunt, propter causas valde diversas; veluti nimiam arteriarum tensionem, aut nimiam, forte generalem, mobilitatem, aut magnam debilitatem, aut vehementem stimulum universo corpori admotum, puta per calorem magnum vel remedia calefacientia. Igitur perspicuum est, interdum omnia remedia relaxantia, veluti exinanitiones varias, aut emollientia medicamenta, interdum vero astringentia et roborantia, nunc exercitationem, nunc quietem, nunc calorem, nunc frigus, nunc opium, nunc aromata vel vinum,

vim

vim fedantem esse habitura. Quod si conditio cerebri, et nervorum, et fibrarum motuum quibus arteriæ instruuntur, ne minimum quidem mutata fuerit, variæ stimuli ipsius conditiones, veluti nimia sanguinis abundantia, aut nimia acrimonia, aut nimius impetus, puta ab exercitatione vehemente, pulsus aut nimis validos aut nimis celeres facere possunt; tum vero, sanguinis detractio, et remedia diluentia, et *demulcentia*, et *antiseptica*, &c. sedantem effectum præstabunt. Pari quoque ratione, multi dolores, multique motus abnormes, febris, alvi fluxus, vomitus, convulsio, inflammatio, a diversissimis sæpe causis oriuntur, et diversissimis aliquando remediis compescuntur; quæ tamen omnia, si ultimum tantum eorum effectum spectamus, sedantia dici possunt.

1209. Missis vero omnibus quæ per alium et magis proprium et simpliciorum effectum, vim sedantem possidere videantur, de iis tantum hic agendum erit, quæ prima

ma et simplicissima sua in corpore humano actione (five hæc perspecta et explorata fuerit necne) sensum motumque jam præfentes sopiunt et reprimunt, et corpus in posterum (dum ipsorum effectus durat) minus sentiens et mobile reddunt.

1210. Medicamentorum autem quæ hoc faciunt copia haud parca existit: optima vero et efficacissima eorum ad duo genera facile referri possunt; *narcotica* nimirum, et refrigerantia; quæ quidem non magnitudine modo, sed natura etiam suarum virium haud parum differunt.

1211. *Narcotica* imprimis (cujusmodi exempla esse possunt opium, hyosciamus, cicuta, &c.) refrigerantibus multo validiora et certiora sunt, verum, ut creditum est, in multis morbis variis de causis minus idonea.

1212. Effectus *narcotici* remedii, et præfertim opii, quod omnium forte optimum est



est et longe usitatissimum, si modica quantitate sumptum fuerit, hi fere sunt: placida quædam animi pariter et corporis quies atque tranquillitas, hebetudo aliqua omnium sensuum cum externorum tum internorum, stupor demum et sopor naturali somno simillimus; pulsus simul arteriarum plerumque tardiores et pleniores fiunt, et spiritus lentior, et calor minor, et alvus astricta, et ventriculus infirmior, et cibi appetitus parvus, aliquando non sine nausea, et omnes fere secretiones et excretiones multum imminutæ, præter sudorem, qui (soluta cutis compage, partim per consensum ejus cum ventriculo, partim per tranquillitatem et quietum somnum quem opium solet conciliare) nonnihil augeri videtur; unde forte alvus tardior, et reliquæ secretiones et excretiones minutæ. Interdum vero etiam in sanis vel leviter ægrotantibus, sed frequentius multo in iis qui magno dolore aut gravi febre laborant, præsertim si nimis parva quantitas opii devorata fuerit, pro quieto somno dira fit quies.

quies cum horrificis somniis, vel forte delirium non leve citra ullum soporem. Hi quidem effectus a modica aut parva quantitate opii observantur; a majore autem vel nimia, ingens sæpe oritur nausea, et tandem vomitus, et nisi hoc modo medicamentum ejicitur, brevi altus somnus, fere inexcitabilis, et in convulsiones et mortem cito defiturus.

1213. Alii quoque interdum in quibusdam hominibus ab opio observantur effectus, secundum varias ipsorum constitutiones variasque corporum conditiones cum medicamentum istud adhibetur.

1214. Sæpe etiam nocere videtur propter metum ægrotantium et repugnantiam qua illud fumunt, nimirum quod valde noxium et periculosum credant; quocirca et licet et oportet nonnunquam ægros hac de re decipere, et remedium non modo tutum et efficax, sed saluberrimum, forte  
etiam

etiam penitus necessarium, clam ipsis adhibere.

1215. Haud raro etiam ægris plurimum nocuit, et pro somno quieto et salutari, qualis vires eorum reficere potuisset, somnum male sanum et imperfectum, horridisque somniis terrificum, vel demum citra ullum soporem, delirium (294.) non leve effecit, in ipsis ægrotis qui tali remedio maxime egere visi essent, cum nimis parce adhibitum fuisset: neque dubium est, utcunque periculosus videatur usus talis medicamenti vix non venenati, ægros plus fere incommodi et damni percepisse a nimis parva quam a nimia ejus quantitate. Medici igitur est, medicamentum adeo validum et sæpe perniciosum caute et prudenter adhibere, et in illis tantum morbis ad id confugere qui aliquid istiusmodi plane requirunt; ubi vero talis necessitas urget, oportet remedium libere et cum fiducia præscribere; tunc enim non sperare modo potest, sed fere polliceri, se effectum



tum illum salutarem quem cupit per suum medicamentum esse præstiturum. Quod si timide et nimis parce datum fuerit, longe alium effectum habebit, et iisdem ægrotis haud parum nocebit, quibus largius datum multum profuisset.

1216. Alii autem ab aliis remediis vere *narcoticis*, veluti hyosciamo, cicuta, solano, sæpe oriuntur effectus; magna imprimis vertigo, et dolor, et gravitas capitis et oculorum, et sensus interdum angustia in gutture, &c. Imo sunt ex iis, quæ, utcumque sedantia sint, intestina quodammodo stimulant, et sic, non sane omnibus ægris pariter, sed multis quibus adhibentur, alvum satis efficaciter solvunt.—— Quapropter haud absimile videtur, quædam ex iis gravibus nonnullis opii incommodis esse caritura, (scilicet quod alvum adeo solet astrictam reddere, et sic ventriculo, et capiti, et quidem toti corpori plurimum nocere), et igitur cum magno beneficio,

neficio, in variis morbis, faltem in multis ægris, in locum ejus fuffectum iri.

1217. Aliud genus medicamentorum fedantium, refrigerantia nimirum, longe aliter ac *narcotica* corpus afficit; et quamvis effectus eorum neque incerti neque obfcuri fint, tamen multum abeft ut tanta vi ac *narcotica* medicamenta in corpore humano polleant.

1218. Non eft dubitandum quin refrigerantia medicamenta, aliorum inftar fedantium, *genus nervofum* primo afficiant: vix autem, ac ne vix quidem, per primam et naturalem fuam actionem, aut fenfum multum obtundunt aut foporem inducunt (1212.); quamvis nonnunquam occurrendo variis caufis morbofis, quæ vel fenfum nimium vel dolorem faciebant, vel quæ fomnum impediebant, utrumque iftorum effectuum præftare videantur.

1219. Creduntur præcipue partes quæ sanguinem movent afficere, ejusque motum temperare, et sic (quoniam tam arctus inter motum sanguinis et calorem corporis intercedit nexus) hoc frigidius reddere; unde nomen suum habent. Sitim quoque restringunt, et putredini aliquantum obstant; scilicet quæ ambæ multum pendeant ab impetu sanguinis et calore corporis.

1220. Observandum est et dolendum, pleraque medicamentorum refrigerantium, forte omnia, multo minus efficacia existere quam auctores medici crediderunt; neque ideo iis solis fidendum esse, utcunque laudatis, cum magnus sanguinis impetus aut ingens corporis calor urget.

1221. Efficacissima autem medicamenta refrigerantis generis sunt sales quidam, tum acidi tum *neutri*; nam omnes sales *alkalini*, et præsertim *alkali* volatile, contrarium prorsus effectum habent, et corpus plane stimulant et calefaciunt.

1222. Neque



1222. Neque huic sententiæ objiciendum est, omnes fere sales, acidos et *neutros* pariter atque *alcalinos*, vim stimulantem (1182.) habere; docet enim experientia certissima, multos sales variorum generum, qui largius sumpti ventriculum, et intestina, et varia organa fecernentia et excernentia stimulare solent, parcius sumptos partes illas parum afficere, et vim sedantem et refrigerantem (1219.) plane habere. Imo sæpe perspicuum est, nonnullos eorum tanta copia sumptos ut partes quasdam, veluti intestina aut renes, satis acriter stimulant, reliquum corpus eodem tempore longe aliter afficere, et non modo non stimulare alias partes, sed earum actiones reprimere atque compescere, et sic, verbi gratia, motum sanguinis temperare, et ideo totum corpus frigidius reddere.

1223. Ex acidis vero salibus, (quamvis omnes forte vim aliquam refrigerantem possideant), *acida* fossilia validissima sunt. Ex his quoque *acidum vitriolicum* longe optimum

timum est, et fere solum jam nunc a medicis adhibetur. Plurima aqua dilutum, et melius et facilius adhuc si aliquid gummi aut sacchari admistum fuerit, quod medicamentum adeo acre involvat atque obtundat, tuto et libere dari potest, et sæpe cum insigni beneficio datum est. Potui quoque communi ægrotantium, ad gratum usque acorem admistum, haud raro egregie profuit. Observandum autem est, hoc medicamentum non modo insigni vi sedante et refrigerante pollere, sed astringente quoque, et roborante, et *antiseptica*; neque ideo omne quod ab eo percipitur beneficium solis effectibus refrigerantibus esse tribuendum.

1224. Hic quoque memorari debet sal ille acidus singularis, qui vocatur, quasi κατ' ἔξοχην, sal *sedativus*. Salem hunc pro sedante et refrigerante remedio nonnihil valere, minime dubium et minime mirum est; nondum vero constitit eum, utcunque a nonnullis laudatum, aliquid peculiaris

liaris commodi in se habere, aut aliis *acidis*, five fossilibus five *vegetabilibus*, aut nonnullis salibus *neutris*, esse anteponendum.

1225. Varia autem *acida vegetabilia*, quamvis multum debiliora et mitiora quam *acidum vitriolicum*, vim tamen refrigerantem non exiguam plane possident, et hoc consilio frequenter et libere præscribuntur, et utilissima reperiuntur, et plerisque ægris quibus tali auxilio opus est, tuta et grata remedia.

1226. Cum puris quoque *acidis vegetabilibus*, tum nativis, tum quæ tantum postquam fermentata fuerint suum acorem adipiscuntur, recenseri debent multi fructus esculenti, qui scilicet, quamvis maturissimi, aliquid semper acoris una cum grata dulcedine retineant. Hujusmodi enim fructus præstantissima medicamenta refrigerantia fiunt, et propter naturam suam mitem et saporis suavitatem, magna copia, non modo non repugnanter, sed sæpe avidissime



avidissime ab ægris devorantur, et sic efficaciores aliquando sunt pro cibo simul et remedio adhibiti quam medicamenta haud parum fortiora, quæ, ob acrimoniam, et saporem insuavem, vel nauseam aut vomitum quem solent excitare, ad paucas tantum guttulas, vel parcam omnino quantitatem, adhibere oportet.

1227. Proxime post tales fructus annumerari possunt omnes fere fruges esculentæ (977. et seqq.) cibique varii ex iis parati, quibus pro alimentis vulgo utimur. Hujusmodi enim alimenta, quamvis recentia nullum habeant acorem, tamen inter concoquendum in ventriculo et intestinis quodammodo acefcunt (621.), et partim hoc acore quem sibimet nacta sint, partim natura sua miti et blanda, corpus, vel sine cibo ullo, vel usu carniū ciborumque ex iis paratorum, haud parum caliturum, satis efficaciter refrigerant. — Sed de variis ciborum generibus, eorumque in corpore

corpore humano effectibus, alio jam loco (cap. xxv.) satis dictum est.

1228. Post hæc forte recenferi possunt femina quarundam plantarum, veluti melonis, cucumeris, cucurbitæ, portulacæ, lactucæ, cichorii, &c. quæ olim insignem vim refrigerandi habere credebantur, unde vocabantur femina frigida. Siquid vis refrigerantis habent, quod parum hætenus constitit, nam certe minime efficacia sunt, neque medici jam iis multum confidunt, eadem ejus ratio erit, ac similis vis, quæ in tot plantis inque tot tenuibus alimentis aut potibus ab iis derivatis (1226. 7.) reperitur.

1229. Quod sales vero *neutros* (1221.) attinet, quidam tantum ex iis vim refrigerantem possident; multi enim, veluti sal communis, vix ac ne vix quidem ita adhiberi possunt, quin corpus plane stimulent et calefaciant, et sitim adaugeant, et putredini faveant. Alii vero, veluti nitrum,

vim sedantem et refrigerantem plane habent. Ratio tam insignis differentię inter varios sales *neutros*, nulla hactenus red-  
dita est,

1230. Ex iis vero salibus *neutris* qui vim refrigerandi possident, nitrum forte optimum est et validissimum medicamentum, et sæpe et cum insigni beneficio adhibetur. Alii vero sales *neutri* eodem consilio haud raro usurpantur; præsertim qui ex *alkali* et *acido vegetabili*, vel ex hoc et *alkali* volatili, constant, veluti sal *diureticus*, vel haustus *salinus* communis, qui a *Riverrio* nomen habet, vel mixtura illa quæ spiritus *Mindereri* vocatur. Sales omnes *neutri* qui ex *acido vitriolico* vel *vegetabili* et variis salibus *alcalinis* formantur, majorem et certio-rem vim refrigerantem habere creduntur, quam illi qui ex *acido* marino cum iisdem salibus *alcalinis* fiunt; quamvis nonnullis persuasum sit unum ex his, sal nempe communem ammoniacum, tali vi pollere, et in febribus quibusdam, præsertim



fertim intermittentibus, plurimum valere, imprimis ubi propter magnum calorem, et ingentem sanguinis impetum, solita et efficacissima remedia roborantia et stimulantia vel inutilia vel perniciofa visa essent.

1231. *Tartarum* quoque, utpote quod salibus *neutris* admodum affine est, hic recenseri debet. Vi sua sedante et refrigerante, qua haud exigua pollet, in febribus, aliisque morbis ubi tali auxilio opus erat, sæpe multum profuit: solet etiam magis adhuc prodesse, alvum atque urinam movendo. Quin et *tartarum* solubile, non secus ac alii sales *neutri* jam (1230.) enumerati, bonum refrigerans medicamentum est.

1232. Medicorum experientia satis jam comprobatum est, quosdam ex salibus *neutris* tum maxime pro sedantibus medicamentis prodesse, præsertim in compescendo vomitu, forte etiam in refrigerando corpore, cum inter effervescendum sumuntur. Hoc

T t 2      beneficium,

beneficium, ut videtur, magna saltem ex parte, pendet ab aere fixo inter effervesendum ab *alcalino* sale extricato; et facile et tuto obtineri potest vel hausta mixtura statim ut sales oppositi infusi fuerint et effervescere incipiant, vel altero prius sale puro sumpto, et statim postea altero hausto, ita ut in ventriculo solo effervescant.

1233. Proxime forte post medicamenta refrigerantia enumerari debent multa medicamenta valde odora, vel plane foetida, quæ nuper et olim in variis morbis pro sedantibus remediis multum fuerunt laudata, et credita præsertim plurimum valere adversus motus illos abnormes fibrarum musculosarum qui *spasmi* (380. 84.) vocantur; unde, communi fere medicorum consensu, *Antispasmodica* dicta sunt.

1234. Hujusmodi exempla esse possunt, castoreum, *moschus*, *zibethum*, oleum animale, sal cornu cervi, ex animalibus derivata; et varia *petrolea* vel bitumina, *ambagrisea*,

*bragrisea*, succinum, ejusque sal et oleum, ex fossilibus rebus desumpta; et plurimæ plantæ medicamentaque ex iis parata, veluti pæonia, atriplex fœtida, *valeriana* sylvestris, *asa* fœtida, galbanum, *camphora*, fuligo, *æther vitriolicus*, et similia fere innumera.

1235. De his vero et similibus medicamenti odoris vel fœtidis observandum est, haud pauca ex efficacissimis eorum manifesta vi stimulante pollere, et merito igitur inter stimulantia remedia jam esse recensita (1181. 90). Neque absimile videtur ea per hanc vim potius quam per ullum effectum vere sedantem adversus *spasmos* prodesse; cujus rei ratio alibi (1176.) jam reddita est.

1236. Illa autem quæ mere odora vel fœtida sunt, nec quicquam stimuli in se habent, quamvis minime negandum sit nonnulla eorum mirabiliter interdum prodesse, non modo adversus *spasmos*, sed alias quoque affectiones morbosas quæ sedantia



dantia remedia postulant, veluti delirium, pervigilium, &c. tamen fatendum est plerumque parum efficacia, et, quod pejus est, parum certa remedia existere.

1237. Quod actionem vero eorum attinet, ubi revera pro sedantibus vel *antispasmodicis* remediis prodesse observantur, illa explanatu difficillima est; nam nullum fere effectum simplicem, et manifestum, atque constantem (939. 43.), in corpore sano præstare solent. Nonnihil forte ad effectus eorum salutare conferre potest odor ipse quem habent, scilicet qui non modo cerebrum et quæ inde pendent partes atque functiones plurimum afficiat, sed imaginationem quoque vehementissime feriat, cujus imperium in *genus nervosum* tantum tamque manifestum est, ut minime mirum sit illius affectiones adversus multos hujus morbos plurimum valere. Et profecto donec morbosæ *generis nervosi* conditiones, plurimæque earum causæ, pene vel penitus ignotæ sunt, vix ac ne vix quidem expectandum

randum est, omnium per quæ iis occurrendum sit remediorum actionem intellectum iri. Quod si talis de actione istorum medicamentorum ignorantia multum dolenda sit, certe multo magis crit dolendum, tanquam pejus medicorum opprobrium, vix melius apud eos de effectibus et usibus quam de actione illorum hætenus constare.

1238. Hic quoque recensenda sunt (siquidem ullum in rationali *Therapeia* locum occupare mereantur) varia medicamenta, neque vi stimulante, neque sedante, neque odore, neque gustu, neque ulla demum qualitate manifesta insignia, quæ tamen pro *antispasmodicis* sæpe fuerunt adhibita, et multum laudata; veluti cinnabaris, cum nativa tum factitia, lichen cinereus terrestris, viscus quernus, *flores zinci*, (nisi hi aliquid facultatis astringentis et roborantis possidere credantur (1034. 41.), et sic aliquando adversus spasmos (1058.) valere), multaque alia similia,

milia, et nonnulla prorsus absurda atque ridicula, quæ majorum superstitio aut ignorantia, aut recentiorum auctorum errores invexerunt, quæque medicorum pariter atque populi credulitas diu retinuit.

1239. Quamvis certissimum sit talia medicamenta sua natura nihil valere, tamen non defuere exempla, neque pauca neque dubia, (siqua scriptoribus medicis fides), ubi plurimum valuisse visa sint: cujus rei ratio hæc forte est; quod multi morbi *spasmodum* generis sæpe sua sponte desinunt, forte nunquam, vel saltem post longa intervalla, redituri; ita ut quicquid medicamenti proxime ante decessum morbi fuisset devoratum, ab ægro, ejusque amicis, forte etiam a medico minus cauto atque sagace, pro remedio ejus haberetur. Præterea, multa istorum medicamentorum una cum aliis et efficacioribus remediis, veluti astringentibus, aut roborantibus, aut variis exinanitionibus, sæpe fuerunt adhibita, et per errorem ægrotis fati naturalem, sed medicis minime decorum, et  
sane



ſane vix condonandum, pro bonis effectibus laudata, quibus nihil omnino contuliſſent. Multa demum ex iis quæ ne minimum quidem in corpora ægrotantium valere potuiſſent, in animos eorum plurimum ſæpe valuerunt; et quantum animi in corpus imperium ſit, cum in faciendis tum quoque in tollendis morbis, non hic eſt locus dicendi. Multos certe ſola fides ſua penitus ſanavit. Denique, haud pauci morbi *ſpaſmorum* generis ab imaginatione magna ex parte pendent: neque proſecto rarum eſt morbos prorſus imaginarios ſpectare atque tractare, quibus igitur remedia vel prorſus imaginaria, vel quæ ſaltem imaginationem maxime afficiunt, quam optime conveniant; ratio enim vetat in tali ſtatu ad validiora remedia conſugere, ſcilicet quæ malum magis ſerium, quod non invenirent, facere poſſent.

1240. Proxime poſt varia medicamenta ſedantia, recensenda ſunt et alia remedia quæ eidem conſilio inſervire poſſunt.

1241. Hæc inter imprimis enumerandum est frigus, quo nihil certe majore aut certiore vi sedante in corpore humano pollet; scilicet quod, dummodo rite admotum sit, et sentiendi facultatem manifestissime obtundit (141. 172.), motusque omnes reprimit, et mobilitatem minuit (376.), et soporem vel somnum altissimum, et brevi mortiferum (393.), inducit.

1242. Quoniam vero tot jam, variis in locis, de frigore ejusque in corpore humano effectibus prolata sunt, hic sat fuerit memorasse, vires ejus sedantes tum maxime apparere, cum diu atque constanter admovetur; nam si satis intensum est, et subito perque breve spatium adhibitum, satis acriter stimulare (1198.) solet. Diutius vero atque constantius admotum, omni stimulo, et nisi nimis intensum fuerit, omni periculo atque incommodo, caret, et saluberrimum sæpe fit et efficacissimum remedium sedans, multisque morbis variis de causis accommodatissimum.

1243. Calor

1243. Calor quoque, de cujus variis effectibus et in corpore humano viribus (1195.) stimulantibus tot jam tradita sunt, inter sedantia remedia non immerito recenseri potest, utpote qui haud raro motus minuere, atque abnormes reprimere, et dolores sopire, et sentiendi facultatem hebetare, et soporem demum inducere, (393.) observetur.

1244. Hujusmodi vero caloris effectus non primæ atque simplici ejus in corpore actioni, (quæ sane longe alia et pene contraria esse videtur), neque excessui virium ejus stimulantium (1152.), sunt tribuendi; manifestissime enim pendent a vi ejus emolliente et relaxante, qua solutis imprimis cute partibusque externis, omnes fere corporis partes, et præsertim fibræ musculosæ, cum grandium lacertorum, tum quoque cordis et arteriarum, aliquantum solvuntur et debilitantur; unde minor impetus sanguinis per totum corpus, ideoque per cerebrum, et vis cerebri nervorumque mul-



tum imminuta, interdum ad summam debilitatem, vel forte ad animi defectionem. Hinc facillime intelligetur, calorem pro sedante remedio tum maxime esse profuturum, cum ita regitur ut hunc emollientem et solventem effectum quam certissime præstet; veluti si una cum aliis remediis emollientibus (1061. 66.) adhibetur, qualia sunt aqua tepida, vel vapores aquæ calidæ, vel varia fomenta, quæ in plurimis morbis ubi sedante remedio plane opus erat, veluti in febribus vel cum vel sine delirio, et inflammationibus, et insania, et convulsionibus nonnullis, sæpe utilissima fuerunt reperta.

1245. Porro, nonnulli animi affectus, quales scilicet deprimentes a medicis dicti sunt, veluti mœror, metus, anxietas aut sollicitudo gravis, vi sedante tam manifesta tamque insigni pollent, ut minime dubitandum sit eos quoque pro sedantibus, non secus ac alterum genus (1203.) pro excitantibus remediis interdum esse profuturos,

fi

fi modo regimen et administratio eorum magis penes medicos essent. Neque profecto defuere exempla haud pauca, ubi tales animi affectus, sive casu sive consilio excitati, in variis morbis saluberrimum effectum sedantem præstiterint; veluti in febribus intermittentibus, in infania, in morbo comitiali, et in morbo *hysterico*, &c. Fertur etiam nonnullos morbos a nimia *generis nervosi* mobilitate pendentes, ideoque aliquid remedii sedantis requirentes, inter æstus belli civilis rarius accidere, vel si prius incubuissent, tum fere cessare et quasi tolli, cum civium animi gravibus curis et sollicitudinibus sive publicis sive privatis occupati et lacerati essent; et magis certum est, nonnullos talibus morbis laborantes, sub gravissimis ærumnis domesticis, quales forte validiores homines oppressissent, interdum præter omnem spem convaluisse.

1246. Non tamen dissimulandum est pleraque hujusmodi exemplorum dubio et suspicione

suspicionem quadam non penitus carere; scilicet ne gravi illi animi affectui qui manifeste adest beneficium istud tribuamus, quod a contrario prorsus affectu, magis obscuro, sed non minus præsentem, derivetur. Spes enim meliorum, quæ pectora infelicium raro deserit, et sæpe in rebus adversis maxime viget, et perpetua occupatio animi magnis seu publicis seu privatis rebus intenti, et conamina, quamvis parum fausta, fortis animi cum rebus adversis conflictantis, longe alia et magis certa ratione in multis morbis prodesse possunt.

1247. Superest et una alia res, quæ inter remedia sedantia plurimum valet, et in multis morbis, cum magna sollicitudine et cura, et sæpe cum insigni ægrotantium beneficio, a medicis adhibetur; illa nimirum administratio seu regimen qua cavetur ab omni stimulo atque irritatione quæ ægrum male excitaret aut calefaceret.

1248. Multiplex



1248. Multiplex profecto hæc et minime facilis administratio ; quippe quia fani etiam, et magis adhuc ægroti, innumeris fere irritationibus semper objicimur, quarum multæ nullo sunt studio aut cura vel evitandæ vel tollendæ. Memoria quoque semper tenere oportet, minutissimas sæpe harum rerum non impune negligi, quoniam multa irritamenta quæ sano homini ne minimum quidem nocuissent, vel quæ corpus rite excitando ad sanitatem potius conducere viderentur, debili et ægroto plurimum aliquando nocebunt. Eo enim gravior a plerisque stimulis fit irritatio corporis, quo hoc debilius jam et irritabilius factum fuerit (1202.) ; quod imprimis notabile est in plerisque morbis acutis, cum puris febribus, tum quoque aliis quorum febris pars magna est, veluti in variis inflammationibus, aut eruptionibus super cutem, aut sanguinis profluviis, &c. in quibus scilicet morbis corpus multum infirmatur, et vi mali præter solitum irritatur,  
et

et alias igitur irritationes, utcunque leves, ægerrime tolerat.

1249. Regimen itaque illud quo conamur irritationes omnes, quantum fieri possit, amovere, in febribus aliisque morbis acutis maxime necessarium est, et non inepte apud medicos regimen *Antiphlogisticum* vocatur.

1250. Multas et valde diversas res complectitur, quæ tamen sub certis capitibus, quo facilior et promptior fiat earum recordatio, ordinari possunt.

1251. Omnis imprimis corporis exercitatio, interdum etiam actio vel levissima musculorum voluntarii motus, omni cura sunt evitandæ; quoniam, ut jam expositum est (1199.), stimulus non levis universo corpori, et præsertim partibus quæ sanguinem movent, inde oritur, non modo propter expeditum sanguinis per venas re-ditum (422. 5.), sed simul propter conamen  
illud

illud vix definiendum quo musculi voluntarii motus ad actionem cientur. Quapropter non sat est acutis morbis ægrotantes ab omnibus laboribus solitisque corporis exercitationibus abstinere; oportet omnino quiescant, et in lectos se recipiant, scilicet quia decumbentibus actio musculorum quam minima est; sedentibus enim, et magis adhuc stantibus, actio haud exigua musculorum semper fit et prorsus necessaria est, qualis nimirum sanissimos etiam et validissimos ferius ocyus fatigaret atque opprimeret, et febricitantibus plerumque multum noceret.

1252. Irritationes quoque a variis sensibus cum externis tum internis oriundas sedulo evitare, vel si penitus evitari nequeant, tunc quantum fieri possit minuire oportet. Abstinendum igitur a studio, aut negotiis, aut multa cogitatione, aut colloquiis, (quæ sane duplici modo nocent, et actione mentis et actione musculorum qui vocem et loquelam faciunt), et omnibus rebus quæ animum multum afficere pos-



sint. Cavendum a luce nimis vivida, aut magno strepitu, aut multo calore, (qui, five ab aere, five a nimio onere stragulorum, five a culcita plumea nimis molli oriatur, plurimum et variis modis solet nocere), et in quibusdam morbis a multo frigore, (quod sæpe vel universo corpori vel partibus ejus quibusdam stimulo esse potest), et ab omnidemum molestia, veluti a situ corporis minus opportuno, aut lectulo inæquali, aut duriore, aut male strato, quæ sensum tactus afficeret.

1253. Cavendum quoque ab irritatione illa (quæ certe haud exigua est) quam aer minus purus, vel respiratione vel exhalatione per cutem impedita, et vestimenta et stragula sordida, retenta et corpori denuo admota materia illa corrupta et noxia quæ jam expulsa est, efficere solent. Quapropter aer purus, et subinde renovatus, et plerumque frigidulus, utilissima res est; utpote qui non modo ipse egregiis usibus (1026. 7.) inservit, sed gravem simul et perniciosissimam

niciofissimam irritationem tollit: oportet quoque, simili de causa, vestimenta ægri, et stragula cum lintea tum lanea, et culcitam ipsam plumeam lecti, sæpe mutare.

1254. Cavendum quoque a variis irritationibus quæ a functionibus, et magis adhuc a vitiis ventriculi et intestinorum oriuntur; concoctio enim alimenti, quamvis sanissima, corpus aliquantum excitat, et pulsus arteriarum nonnihil festinat; prava autem concoctio, qualis fere accidit in morbis acutis (636.), multo magis stimulat, distento nimirum, et irritato, et gravato ventriculo, saburra corrupta et acri, quæ anxietatem, et vertiginem, et dolorem capitis, et nauseam, et vomitum, et tormina, et alvi fluxum inducere possit. Ventriculi igitur ratio semper habenda est, cibisque eligendus parcus, refrigerans, tenuissimus, concoctu facillimus; de quo plene jam dictum est (976. et seqq.). Quod si nihilominus ventriculus male se habuerit, et alimentis, utcunque tenuibus, gravatus

fuerit, tum ejus affectionibus statim occurrendum est, per medicamenta diluentia, *demulcentia*, *antiseptica*, vomitoria, &c.

1255. Oportet etiam medicum ad molestissimam illam sitim (642.) quæ ple-rosque morbos acutos comitari solet attendere, scilicet quæ gravissimam irritationem efficit, illamque vel idoneis remediis tollere, vel si hoc fieri nequit, saltem multo potu diluente, subacido, et grato, ad libitum ægris concessio, sedare atque restinguere.

1256. Ad alvi quoque statum sedulo respicere oportet, quæ in plerisque morbis acutis præter naturam tarda, sæpe etiam mirabiliter astricta est; unde perpetua et perniciosissima irritatio, quæ pulsus arteriarum multum festinat, corpus calefacit, delirium aliquando inducit vel auget, et putredini (partim ob hunc morbosum calorem, partim ob retentam in intestinis materiam corruptam et acrem quæ debu-

isset



isset excerni) multum favet.—Alvus igitur vel lenioribus medicamentis solvenda est, vel idoneis lotionibus emollientibus frequenter ducenda.

1257. Neque demum urinæ status in morbis acutis negligendus est, quæ interdum parce, et cum dolore et molestia redditur, et haud raro prorsus supprimitur; unde brevi magna irritatio, et sane summum periculum, propter rationes jam (733.) expositas. His vero incommodis quam primum occurrendum est medicamentis diluentibus, aut leniter *diureticis*, aut fomentis, aut lotionibus in intestina infusis; vel si hæc minus ad vota cesserint, tum educenda est urina idoneo instrumento in vesicam immisso.

1258. Aliæ denique haud raro in corpore existunt morbosæ irritationes, sed variæ, secundum naturam variorum morborum qui forte adsint: quales sunt variæ humorum acrimoniæ (525. et seqq.), et præsertim

fertim putrida; quibus igitur, per remedia diluentia, et *demulcentia*, et *antiseptica*, obviam ire oportet.

1259. Postremo, utcumque in plerisque morbis acutis necessaria sit regimen hoc *antiphlogisticum*, scire oportet, in nonnullis exemplis ab eo aliquantum esse decedendum; scilicet cum gravior irritatio (quod certe interdum plane observatum, et medicorum attentione non indignum est) a remedio quam a morbo oriri visa est. Sic, verbi gratia, quamvis in lecto decumbere febricitantibus plerumque conveniat, et gratum sit, et sæpe omnino necessarium, aliquando deliranti haud parum prodest surgere, et situm erectum paulisper experiri; præsertim cum auctus sanguinis caput versus impetus delirium induxerit vel auxerit; et certe plurimum sæpe nocuit, et gravissimum aliquando delirium effecit, febricitantem, aut leviter delirantem, in lectulo per vim continere. Pari ratione, irritationes illæ plerumque haud parum nocivæ  
quæ

quæ a visu, atque auditu, atque colloquiis oriuntur, interdum non prorsus sunt ar-cendæ; scilicet quæ delirium, gravissimum futurum si æger in tenebris, et silentio, et solitudine teneretur, minuere (295.), vel forte omnino depellere possint. Neque profecto defunt exempla, ubi febricitantibus, vel etiam phthificis lenta febre tabescentibus, diætam validiorem ex carnibus cum pauxillo vini permittere oporteat; quamvis notissimum sit talem diætam, propter stimulum suum, omnibus febricitantibus, et præsertim phthificis, plerumque nocere: cujus forte rei hæc erit ratio; quod propter debilitatem suam ægrotantes (1202.48.) valde læduntur a multis aliis irritationibus quæ tolli nequeunt, quamvis diæta tenuissima omnique fere stimulo vacua fuerit; per validiorem autem diætam, corporumque conditioni rite accommodatam, resecis suis viribus, ægri et hujus stimulum et aliarum irritationum vires et noxas facilius tolerant.



1260. Varia medicamenta aliaque remedia sedantia (1208. et seqq.), non secus ac stimulantia (1165. et seqq.), variis usibus sive propositis in corpore humano inservire possunt, inque plurimis et admodum diversis morborum generibus alia atque alia ratione multum prodesse. Quoniam vero omnes eorum effectus omnesque morbos in quibus utilia reperta sint nominatim recensere fere impossibile foret, hic sat fuerit præcipuas affectiones morbosas, in quibus adhiberi solent, enumerare, unde usus et effectus eorum in aliis et similibus affectionibus facile intelligentur.

1261. Imprimis igitur, ex effectibus suis in cerebro, et nervis, et musculis, seu *genere nervoso*, ut a medicis vocatur, ubicunque hoc præter naturam excitatum fuerit, veluti in *infantia*, aut longo tantum pervigilio, utilia vel necessaria fiunt. In hujusmodi vero malis, præter *narcotica* et refrigerantia medicamenta, multæ aliæ res bona sedantia remedia fiunt; varix præsertim *exinanitiones*,

manitiones, omnia fere emollientia et infirmantia remedia, et frigus, vel universo corpori vel capiti maxime admotum; neque profecto calor rite adhibitus suis uſibus caret.

1262. Ratione non multum aliena, ubicunque gravis irritatio adest, præſertim dolor fere omnigenus, aut tuſſis frequens et vehemens, aut tenefmus, aut ſtranguria, ſedantibus remediis opus eſt, ad tollendam, vel potius ad impediendam, irritationem illam corpori alioquin multum nocituram; hujus vero ſenſu et mobilitate per vim idonei ſedantis remedii minutis et hebetatis, ſtimulus qui fuit admotus effectu ſuo magna ex parte, vel penitus, ſi remedium ſatis validum fuerit adhibitum, carebit. In hujusmodi malis *narcotica* medicamenta optima remedia ſunt, et ſæpe adeo neceſſaria reperiuntur, ut multi et magni nominis medici non dubitaverint profiteri, ſe artem ſuam aut nolle aut nequire exercere, ſi talibus remediis privarentur.

tur. Optimi nimirum et peritissimi medici fati superque norunt, non semper penes eos esse, sublati illorum causis, mala quæ maxime urgent statim et penitus tollere; neque levis momenti est, ægrum cruciatibus forte brevi mortiferis futuris, et morte ipsa terribilioribus, per idonea remedia furripere.—Hæc vero non ita intelligenda sunt, quasi in omni graviore corporis irritatione, neglecta natura et causa ejus, ad *narcotica*, vel *anodyna*, ut vocantur, medicamenta protinus confugiendum esset. Docet enim ratio, quod et multa experientia satis comprobavit, ad causam mali, ubicunque hæc detegi possit, respiciendum esse, quo facilius, et certius, et tutius, malum ipsum aut corrigatur aut eradicetur. Et profecto haud paucæ ex gravissimis irritationibus quibus corpus in variis morbis obnoxium est, saluberrimæ, et quidem necessariæ sunt ad tollendam pejorem perniciem. Medici igitur erit, istas tantum irritationes aut compescere aut temperare, quæ vel inutiles, vel perniciosæ, vel nimix



nimiæ viſæ ſint ; et cum fieri poteſt, hoc tentare per remedia quæ cauſas earum ſummove-  
re vel minuere queant ; cum au-  
tem hæ vel ignotæ vel immedicabiles fue-  
rint, tum anodynis medicamentis uti lice-  
bit.

. 1263. De his vero medicamentis ſcire oportet, quo gravior irritatio fuerit, eo fere minus valere, niſi magna quantitate ab æ-  
gris devorata fuerint ; ita ut interdum ad ſummovendum dolorem unius dentis, et ſomnum ægro conciliandum, decupla fere quantitas opii quæ ſanum hominem ſopi-  
viſſet neceſſaria fuerit.

1264. Oportet quoque ſcire, opium et ſimilia medicamenta ſæpius repetita, longo uſu et conſuetudine vires ſuas magna ex parte amittere, nec quicquam fere prodeſſe niſi ingente copia ſumantur, corpusque iis ita aſſueſcere ut incredibilem eorum vim, qualis non aſſueto veneno fuiſſet, facile at-  
que impune ferat, et poſt huiusmodi con-

fuetudinem aliquamdiu stabilitam, solito medicamento ægre (938.) neque impune carere, ita ut lente et caute admodum idem detrahere oporteat.

1265. Aliud denique, idque non leve incommodum opium in se habet, nempe, quod ventriculo sæpe valde ingratum fit, et nauseam vel vomitum moveat, et, quod pejus est, ventriculum fere semper (1212.) aliquantum infirmet, et intestina torpida, et alvum ideo valde astrictam reddat. His igitur incommodis sedulo occurrere oportet, vel medicamento aliquo grato stimulante cum opio juncto, vel si nullo modo ventriculus id tolerare potest, opio per clysterem in intestina immisso ; vel diæta tenui, subacida, qualis alvum leniter solvere possit, vel levi alvi purgatione, vel demum, (quæ melior est et usitatior), frequente et modica alvi ductione per idoneas lotiones emollientes.

1266. In nimia quoque aut abnormi actione fibrarum musculosarum, qualis *spasmus* vocatur, sedantia remedia, propter effectus suos in *genere nervoso*, utilia fiunt: in hoc statu adhibita, *antispasmodica* (1233.) dicuntur.

1267. Multa sane, ut jam expositum est, medicamenta (1235.) aliaque remedia adversus *spasmos* interdum profunt; et quidem non sedantia modo, sed stimulantia sæpe, et roborantia, et variæ exinanitiones, et remedia haud raro quorum effectus in corpore humano alioquin valde obscuri atque incerti sunt.

1268. De variis autem remediis *antispasmodicis* hæc fere observanda sunt; beneficium maxime certum atque durabile obtineri ab iis quæ causæ mali fortiter occurrunt; qualia sunt roborantia, et idonea diæta, et nonnunquam quædam exinanitiones; quamvis remedia mere sedantia, veluti *narcotica*, vel stimulantia etiam, quædam



dam *spasmodorum* genera aliquando penitus summoveant.

1269. *Narcotica* vero remedia, et stimulantia quoque, ad perfectam et durabilem sanationem multorum *spasmodorum* haud parum conferunt, sistendo, et quasi abrumpendo pravam illam consuetudinem qua omnes fere *spasmi* mirum in modum (383.) inveterascunt, ita ut qui natura et origine levissimi fuerant, sæpe repetiti gravissimi fiunt, et vix non immedicabiles.

1270. Cum remedia *antispasmodica*, sedantia pariter ac stimulantia, hoc consilio sunt adhibenda, oportet instante jam malo, vel brevissimo intervallo ante ejus accessum, (si quando reditus mali prænosci possit), sumantur; sic enim, ut multa experientia fatis docuit, maxime profunt. Quod si eadem medicamenta diu ante morbi accessum data fuerint, perque longum tempus continuata, tantum abesset ut morbum certius et facilius depellerent, ut eundem sæpe

sæpe, infirmato et debiliore facto corpore, haud parum augerent, ut multi satis superque sunt experti.

1271. Roborantia vero, quæ certe efficacissima remedia *antispasmodica* reperiuntur, longe aliter sunt adhibenda, per longum nempe tempus continuanda, et per intervalla tantum morbi sumenda; quoniam urgente morbo nihil valent, et contraria prorsus remedia, veluti emollientia, et infirmantia, et imprimis exinanitiones, tunc sæpe profunt. — Neque dubium est, utcunque incomprehensibile videatur, remedia quæ adversus præsentēs aut instantes *spasmos* maxime valent, adversus futuros sed remotiores non pariter prodesse, quæque futuris optime occurrunt, præsentēs minime solvere: cujus rei ratio ex notitia variarum causarum quæ *spasmos* (382. 3.) inducunt petenda est.

1272. Ad reliqua vero medicamenta quod attinet quæ *antispasmodicorum* nomen sibi-  
met

met naſta ſint, quamvis neque ſedante, neque ſtimulante, neque roborante facultate in corpore pollere videantur, fatendum eſt eorum adminiſtrationem, non ſecus ac vires, parum adhuc intelligi. Fertur nonnulla ex iis, veluti *moſchum*, caſtoreum, &c. protinus ut ſumpta fuerint, *ſpaſmos* jam præſentes, vel plane iſtantes, arcere atque depellere; dum alia, veluti *valeriana*, *flores zinci*, &c. parum profunt, niſi diu per intervalla morbi uſurpata fuerint; et nonnulla multum jaſtata, veluti lichen, &c. quæ hydrophobiam arcere ferebantur, faſtentibus iſtis auctoriſibus qui ea maxime laudabant, adverſus morbum illum jam formatum nihil valuerunt.—Horum igitur medicamentorum adminiſtrationem, hætenus valde obſcuram atque incertam, oportet plenior experientia doceat.

1273. Ex effectibus porro remediorum ſedantium in temperando ſanguinis motu, ſæpe utilia ſunt ubicunque nimius ejus impetus acciderit; variaque eorum genera  
hoc



hoc consilio a medicis adhiberi solent; præsertim quæ vocantur refrigerantia (1217, 32): *narcoticorum* vero usus in tali statu adeo periculosus diu creditus est, ut plerique medici parce, et caute, et timide iis usi sint. Sed quamvis minime dubium sit talia medicamenta in febribus vehementibus, et inflammationibus, multisque similibus morbis, ægrotis sæpe plurimum nocere; tamen observandum est, ea potius ab opinionibus mere conjecturalibus, et quidem prorsus falsis, de eorum actione, quam ab experientia eorum noxæ in istis morbis fuisse prohibita, et multorum et celebrium medicorum experientiam satis demonstrasse, ea in variis febribus, cum intermittentibus, tum continuis, et multis inflammationibus, et sanguinis profluviiis, aliisque morbis qui auctum sanguinis impetum habent, plurimum sæpe prodesse, et non modo dolores, variasque molestias quales ab his morbis raro absunt, lenire aut tollere, et somnum ægroto alioquin non dormituro conciliare, sed ipsum sangui-

nis impetum plane minuere et temperare, totumque ideo morbum vel prorsus tollere, vel saltem mitiorem et sanatu faciliorem reddere.

1274. Nemo quidem sanus negaverit eorum administrationem in hujusmodi morbis multam prudentiam et circumspeditionem requirere, propter rationes factis manifestas; et unusquisque facile intellexerit, ea non omni pariter morbi tempore ægrotis esse profutura, sed secundum varias corporis conditiones, et naturam et gradum signorum quæ adfunt, in eodem morbo nunc prohibenda esse ægro, nunc imperanda. Longe enim aliter corpus se habet sub accessum, quam sub decessum, acuti morbi, et longe alia remedia postulat et tolerat.

1275. Alii demum usui sedantia remedia inserviunt, variasque exinanitiones morbosas, aut nimias, veluti alvi fluxum, aut urinæ profluvium, interdum etiam  
multa

multa sanguinis profluvia, optime minuunt vel reprimunt.

1276. Quidam ex his morbis a nimia et abnormi actione fibrarum musculosarum partium, unde profluvium fit, ex toto pendent; alii partim ex hac, partim ex nimio et generali sanguinis impetu, ejusque distributione abnormi, oriuntur. Ratio igitur minime obscura erit qua varia remedium sedantium genera, refrigerantia imprimis, et *narcotica*, et regimen *Antiphlogisticum*, iis occurrere possint. Sæpe autem, præter illa quæ strictius sedantia vocantur, alia remedia, veluti astringentia, aut roborantia, in his morbis necessaria fiunt ad perfectam et durabilem eorum sanationem; de quorum administratione variisque effectibus salutaribus alibi jam dictum est.



C A P. XXXII.

*De remediis quæ corrigunt varia humorum vitia ; spissantibus nimirum, attenuantibus, demulcentibus, antacidis, antalkalinis, antisepticis.*

1277. **Q**Uamvis pleraque commentorum de sanguinis aliorumque humorum corporis humani vitiis, quæ antiquioribus medicis, *Galenicis* pariter atque *chemicis* et *mathematicis*, diu in ore fuerant, jam pene obsoleverint, utpote quæ parum certa et parum utilia visa sint; non ideo concludendum est humorum vitia aut prorsus nulla existere, aut adeo rara atque levia ut neque remediis egeant, neque sani medici attentionem mercantur. Suis enim, neque paucis, neque levibus, neque dubiis,

dubiis, humores nostri obnoxii sunt vitiis, fanitati, et haud raro vitæ ipsi infestissimis; quamvis multum absit ut omnes morbi ex hoc fonte deriventur quos medicis olim huc referre placuit. De natura, et causis, et signis, et effectibus vitiorum quæ humoribus nostris interdum inesse creduntur, suo jam loco (519. 539.) dictum est. Superest jam nunc, ut remediorum ratio reddatur quæ adversus unumquodque illorum valere solent.

1278. Quum morbosa humorum, et præsertim sanguinis, tenuitas (519. 22.) inter præcipua illorum vitia merito sit enumerata, remediis plane opus erit quæ istud vitium corrigere possint, et justam et naturalem crassitudinem humoribus nostris iterum conciliare. Hujusmodi igitur remedia non inepte Spissantia dicuntur.

1279. Medicamentorum vero quæ tali vi in corpore humano polleant copia haud  
parca

parca existit, neque actio eorum explanatu difficilis est.

1280. Omnes imprimis boni cibi quibus vulgo utimur, præsertim qui maxime nutrientes et solidi sunt, veluti carnes variae, alimenta que nonnulla ex iis parata, dummodo appetitus atque concoctio bona fuerint, corpus rite alendo, venas bono et denso cruore implent, et sic optima remedia spissantia fiunt. Nec verbis opus est ut unicuique bene perspicuum sit, quantum diæta sicca et solida, tenui et aquosæ, quamvis adhuc satis nutrienti, præstet, cum humores corporis spissare cupimus. Far igitur fere omne quo variae gentes vescuntur, non minus quam carnes, hic recenseri potest.

1281. Præter vero illas res quæ cibi nomine assumi solent, multæ aliæ, (quarum par fere ratio videtur), inter spissantia remedia a nonnullis recensentur; veluti gluten istud ichthyocolla dictum, gummi



mi varia plantarum, ceraforum, traga-  
canthæ, Arabicum, multæque plantæ quæ  
aliquid *mucilaginis* continent, veluti al-  
thæa, tussilago, linum, orchis; quibus  
adjici possunt olea mitia plantarum, veluti  
olivarum, aut amygdalarum; quæ scili-  
cet res ad unam omnes aliquid nutrimenti  
blandi et crassi præbent, quod humores  
præter naturam tenues spissaret, et acrimo-  
niam, si qua iis inesset, aliquantum obtun-  
deret atque corrigeret.

1282. Aliud vero et prorsus diversum  
medicamentorum genus inter spissantia  
recensetur, quod longe alia ratione ac jam  
enumerata videtur prodesse; multa nimi-  
rum medicamenta altringentia, vel robo-  
rantia, vel etiam stimulantia: cujusmodi  
exempla esse possunt, *acacia*, *kermes*, *sangui-  
s draconis*, *rosa rubra*, *alcohol* seu *spiri-  
tus destillati*, et demum *acida fossilia*, *vitri-  
olicum*, *nitrosum*, atque *marinum*.

1283. Quicumque fecum reputaverit  
quam

quam arctus inter varia humani corporis munera, interque statum fluidarum et solidarum partium (521.), intercedat nexus, facile intellexerit hujusmodi remedia in spissandis humoribus multum esse profutura, cum vitia quædam solidarum partium, et ideo variarum functionum, corrigant, quæ vel finerent humores nimis attenuari, vel saltem causa essent cur hi minus facile ad sanum statum redirent. Quamvis enim nonnulla ex iis sanguinem humanum spissandi, et revera coagulandi, potestatem habeant, minime credibile est ea unquam in vivo corpore hoc efficere; roborando vero corpus, et promovendo concoctionem cibi, et præparationem sanguinis, et varias excretiones, in corrigenda morbofa humorum tenuitate haud parum valebunt.

1284. Neque obscurior neque multum ab hac aliena est ratio remediorum quorundam quæ in spissandis humoribus nostris vix minus profint quam medicamenta jam enumerata; qualia sunt, crebra corporis

poris exercitatio, copiosus sudor arte excitatus, et omne quidem auxilium quod tenues excretiones adaugeat, dum simul parce bibendo, vel a potu omnino abstinendo, et cibo solidissimo vescendo, cavetur ne plus æquo humoris tenuis in venas ægri recipiatur.

1285. Contrarium sanguinis aliorumque humorum vitium, nimia scilicet spissitas, cui tot tantaque mala medicis placuit imputare, quamvis revera rarissime accidere videatur (523, 24.), sua quoque remedia habet, quæ recte dicuntur attenuantia vel resolventia; quæque multi et magni nominis auctores testantur in variis sæpe morbis egregie profuisse; ita ut minime dubium sit, opiniones satis futes atque ineptas de causis quorundam morborum, medicos in hoc, ut in aliis exemplis haud raro accidit, ad bona remedia perduxisse. Hujus vero rei ratio petenda est ex notitia naturæ illorum remediorum, variorumque effectuum quos revera in cor-



pore humano præstent; unde facile constabit, ea variis modis in variis morbis, præter spissitatem humorum, multum esse profutura.

1286. Diluentia imprimis medicamenta, aqua scilicet, et omnes potus tenues, quorum aqua longe maxima pars est, humores nostros, præter naturam spissescentes, efficacissime attenuant, modo largius hausta fuerint, et per vasa lactea in sanguinem delata. Non aliter enim quam talibus liquoribus modica copia haustis, a spissitate illa quæ sanissimo cuique per solita munera vitæ brevi (6.) accideret, usque præcavetur.

1287. Medici autem crediderunt morbosæ humorum spissitati sæpe esse occurrendum, non modo hujusmodi liquoribus tenuibus, qui crassiores illorum partes diluerent, forte etiam aliquatenus solverent, verum insuper aliis assumptis medicamentis, quæ  
vim

vim solventem aquæ augerent, vel quæ ipsa vim aliquam solventem possiderent.

1288. Quamvis vero minime negandum sit quædam ex medicamentis attenuantibus vulgo laudatis, veluti sales *alcalinos*, aut saponos varios, miram et plane morbosam humorum tenuitatem aliquando effecisse; non tamen idcirco credendum est novam istam tenuitatem tali vi solventi esse tribuendam, et multo minus omnia alia attenuantia medicamenta simili vi polere; præsertim quum alia et magis verisimilis ratio, cum istius tenuitatis, tum quoque effectuum aliorum ejusdem generis remediorum, satis in promptu sit.

1289. Sales enim *alcalini* putredinem illam ad quam nostri humores natura satis proni sunt (529.), multum adaugent: idem fere dici potest de sapone, qui in ventriculo humano, ubi acor aliquis raro deest, vix potest non in sua elementa resolvi. Verisimile igitur videtur, insignem

illam tenuitatem humorum quam hæ res effecerunt, viribus eorum septicis esse imputandam. Neque dubitandum est, res omnes quæ putredinem augent, tenuitatem aliquam humorum simul esse effecturas, quamvis variis et fatis manifestis de causis pro remediis parum convenient.

1290. Alii vero sales, præfertim *neutri*, veluti sal ammoniacus, sal *Glauberi*, sal *catharticus* amarus, *borax*, nitrum, *tartarum*, sal marinus, vel saltem aqua marina, &c. creduntur vi quadam attenuante pollere, et hoc consilio a nonnullis medicis præscribi solent. Vis autem ista attenuans quæ iis inesse creditur, num a vi aliqua solvente, an ab alio prorsus fonte deriveatur, dubitari potest; nam vix credibile est a sola illa vi septica quam multi opinantur omnibus salibus parce adhibitis contingere, salutares eorum vires attenuantes pendere.

1291. Omnes



1291. Omnes præterea sales isti vim aliquam stimulantem habent (1182.), multaque alia medicamenta vere stimulantia inter resolventia vulgo annumerantur; veluti scilla, allium, aloë, sinapi, *mezereon*, argentum vivum, stibium, et innumera fere medicamenta ex his parata. Neque abfimile videtur hæc, pariter atque sales illos jam (1290.) enumeratos, in variis morbis qui spissitudini humorum imputari solebant, per solum suum stimulum, potius quam per vires septicæ, aut solventes, aut ullo modo attenuantes, sæpe profuisse. Stimulantia enim medicamenta motum sanguinis variis de causis præternaturam languentem incitare atque intendere poterunt, et simul varias secretiones et excretiones forte deficientes, et vix non obstructas, augere vel restituere.

1292. Hinc porro facillime intelligetur, omne genus medicamentorum attenuantium, saltem diluentia et stimulantia, sæpe utilissima futura in variis morbis, quamvis

vis nulla adfit morbosâ humorum spissitudo; veluti in febribus, tum puris, tum quæ inflammationes aut eruptiones super cutem comitantur, aut in multis obstructionibus, morbisque qui ex illis proveniunt; vel demum, quæcunque morbi natura fuerit, utilia esse possunt ad motum sanguinis expediendum, et varias excretiones promovendas. Et multi certe existunt morbi præter humorum spissitatem, in quibus proderit alimenta et quidem sanguinem ipsum diluere, vel vasa blando et tenui humore probe implere, vel corpus refrigerare, idemque relaxare, vel demum urinam vel sudorem movere; quæ omnia, medicamenta quæ dicuntur attenuantia, prudenter adhibita, efficere possunt.

1293. Quoniam medici olim tantum tribuerunt variis, et sæpe parum intellectis humorum acrimoniis, medicamentis quibusdam multum usi sunt, qualia idonea crederent ad corrigendam, vel minuendam  
saltem

saltem omnem fere acrimoniam, partefque noſtrorum corporum ſolidas defendendas a vi et noxa humorum præter naturam acrium. Hujusmodi medicamenta nomen *Demulcentium* ſibiſmet naſta ſunt: deque his obſervandum eſt, utcunque futiles fuerint multæ medicorum opiniones de morboſis acrimoniis quas putabant humoribus noſtris ineſſe, ea interdum utiliſſima fieri. Minime enim negari poteſt, humores corporis humani, natura aliquantum acres (526.), variis de cauſis interdum majorem atque nocivam adipiſci acrimoniam, et, quod eodem fere redit, varias partes per quas acres humores tranſire debent, interdum male ſe habere, et vel ſuo mucos, qui eas defenderet, privari, vel hunc ſaltem ita vitiari ut pro tutamine non amplius ſufficiat.

1294. In hoc igitur ſtatu perſpicuum eſt, omnes potus tenues et blandos, variaſque res oleoſas et mucosas, opem eſſe latu-  
ra. Omnis enim acrimonia multum dilu-  
luta,



luta, debilior, et tandem iners omnino fit ; et acerrimæ res, admistis blandioribus, veluti oleis mitibus, aut variis gummi, ita mitefcunt, ut pristinam suam naturam fere deposuisse videantur : quin et eadem mucosæ aut oleosæ res, partes nostras solidas oblinendo, eas a viribus acriorum multum defendent. Et profecto *demulcentia* generalia de quibus hic agitur, nihil aliud sunt quam diluentia, et mucosa, et oleosa medicamenta, quorum igitur usus et administratio facile intelligentur ; et simul constabit, ea non modo in generali humorum acrimonia, verum etiam in morbofis singularum secretionum aut excretionum acrimoniis, et in variis demum morbis ventriculi et intestinorum, et partium quæ urinæ excernendæ, vel forte quæ spiritui inserviunt, plurimum esse profutura.

1295. Sunt tamen acrimoniæ quædam speciales et definitæ, quarum naturæ satis cognitæ atque perspectæ sunt, quæque i-  
deo

deo specialia remedia requirunt et habent.

1296. Has inter acrimonia acida semper annumeratur, quæ, quamvis sanguini humano, et quidem variis humoribus secretis rarissime accidat (535.), tamen in ventriculo saltem et intestinis, et fatis frequenter et fatis manifeste observatur, et multorum, neque sane levium, morborum origo et causa existit.—Remedia vero quæ illam vel arcent, vel tollunt, vel corrigunt, *Antacida* recte vocantur.

1297. Primum inter *antacida* medicamenta locum merito occupant sales *alcalini* et terræ *absorbentes*, cum quæ vocantur calcariæ, veluti calx, creta, corallium, testæ ovorum variorumque conchyliorum, tum quoque non calcariæ, veluti *magnesia*, terra aluminosa, ossa animalium *calcinata*; quæ scilicet res, ut principia *chemica* docent, et quotidiana experientia fatis de-

monstrat, vi speciali et certa gaudent, aco-  
rem omnem absorbendi et corrigendi.

1298. Vires autem longe diversæ singu-  
lis illarum rerum contingunt; sic sales  
*alkalini*, terræ calcariæ, atque *magnesia*, va-  
lidissima medicamenta reperiuntur, ita ut  
reliqua fere negligantur.

1299. Hæc quoque (1298.) haud pa-  
rum interest, non modo quod ad vires suas  
*antacidæ*, verum etiam quod ad alias vires  
quibus in corpore humano pollent. Sales  
imprimis *alkalini*, ob insignem suum stimu-  
lum, sæpe minus commode adhibentur,  
quoniam si plus justo eorum assumitur, vix  
poterit non nocere. Terræ vero *absorbentes*,  
utpote satis mites, communi usui multo  
accommodatiores existunt; neque valde  
nocere possunt, quamvis etiam majore co-  
pia assumptæ quam ad aco-rem morbosum  
corrigendum sufficisset. Has quoque mul-  
tum interest, ita ut nunc terra calcaria,  
nunc rursus *magnesia* magis conveniat;  
hæc



hæc enim alvum (si modo acoris aliquid adest) satis efficaciter solvit; dum illa contra eandem prius solutam sæpe haud parum firmat.

1300. Sales quidam *neutri*, scilicet quotquot ex *tartaro* pro parte acida constant, veluti *tartarum* solubile, et *borax*, qui ex fale acido *sedativo* componitur, inter *antacida* medicamenta a nonnullis sunt recensiti, quamvis parum apta remedia videantur. Acor quidem ventriculi partem eorum *alcalinam* prehendet, et ab ea corrigetur, sed simul novum, quamvis mitiorem et minus nocivum acorem, ventriculus ab iis accipiet, qui vix utilis esse poterit.

1301. Sapo autem, qui sæpe pro *antacido* medicamento datus est, et multum laudatus, pejus incommodum in se habet, scilicet qui, dum acorem ventriculi corrigit, multum oleum crassum, et forte rancidum, in eo relinquit. Quapropter ab usu ejus pro medicamento *antacido* melius abstinabitur.

1302. Post hæc forte enumerari debent medicamenta quædam gummofa aut mucosa, qualia sæpe pro *antacidis* laudantur; veluti gummi Arabicum, aut glycyrrhiza, et similia, quæ quanvis acorem non bene corrigant, eundem tamen aliquantum obtundunt, et ventriculum saltem, et inferiorem partem gulæ, et intestina, ab eo quodammodo defendunt. Horum autem vires et usus ex jam dictis (1294.) facile intelligentur.

1303. Præter vero has res quæ strictius *antacide* vocari possunt, utpote quæ acorem jam existentem statim corrigant, sunt et multa alia medicamenta quæ *antacida* quodammodo dici queunt, nimirum quæ acorem in ventriculo nasci impediunt. Qualia sunt multa medicamenta astringentia, roborantia, stimulantia. Sunt qui opinantur nonnulla ex astringentibus medicamentis, scilicet quæ ex plantis derivantur, adversus acorem valere per vim aliquam specialem qua acidam materiam sibimet attrahunt, et detinent, et corrigunt, simili fere modo ac  
fales

sales *alcalini* facerent: quod tamen minus certum est; et quoniam certum omnino est tot alias res, quæ ventriculum ipsum vel totum corpus roborant, concoctionem alimenti promovendo, acorem arcere, verisimilius est astringentia illa medicamenta eodem modo prodesse. Sic crebra corporis exercitatio, lavatio frigida, &c. multos a morbo et molestissimo ventriculi acore penitus liberarunt; multi etiam, ope cyathi meri, aut *spiritus destillati*, aut pauxilli falis communis, aut piperis, &c. cum cibo, vel post prandium, vel ante prandium assumpti, bene se habent, bene concoquunt, et ab acore alioquin molestissimo futuro prorsus defenduntur. Immo certum est ipsum *acidum vitrioli*, prudenter adhibitum, adversus morbosum ventriculi acorem sæpe haud parum valuisse: nonnulli etiam testantur se simile beneficium ab usu succi limonum interdum accepisse. Multis quoque varia amara medicamenta plurimum profuerunt.



1304. Hinc medicis quibusdam persuasum est, multa istiusmodi (1303.) medicamenta non tantum viribus suis astringentibus, aut roborantibus, aut stimulantibus, adversus acorem valere, quam sistendo vel temperando *fermentationem* illam ad quam alimenta nostra adeo proclivia (621, 2.) sunt, quæque in acorem brevi defineret. Quamvis vero non sit negandum medicamenta ista magna copia alimentis nostris admista hoc posse efficere, et fel hoc modo in corpore utilissimum esse, et acorem (625.) corrigere, et *fermentationem* compescere, vix credibile est copiam tam exiguam eorum ac ægri assumere solent, in tanta cibi massa aliquid valere, quamvis ventriculum multum roborare aut excitare, aut liberam humorum ejus secretionem promovere posset.

1305. Non tamen levis momenti est ut cibi ab acore vel *fermentatione* alienissimi fumantur, carnes, verbi gratia, alimenta-que ex iis parata, præ frugibus, et præ omnibus,

omnibus, alimenta (cujuscunque sint generis) concoctu quam facillima. Quo difficilius enim et tardius alimentum quodvis concoquitur, eo diutius in ventriculo retinetur, hujusque actionem magis impedit, et sic, quamvis forte sua natura minime acescens, alia alimenta simul assumpta nimis fermentari facit (623.), donec hæc tandem prorsus acescant.

1306. Multum quoque prodest, et nunquam negligi debet, in sanando ventriculi acore, ut materia omnis corrupta et acida quæ in eo adsit, per idonea medicamenta, vel sursum vel deorsum purgetur. Talis enim saburra in ventriculo relicta pro fermento est, omniaque alimenta, alioqui rite concoquenda, in acorem trahit; præterea ventriculum multum infirmit, et sic quoque acori favet.

1307. Quamvis primarius *antacidorum* remediorum usus sit acorem ubicunque existentem corrigere, tamen aliis quoque  
 usibus

ufibus interdum infervire poffunt. Ratio enim docet, et experientia oftendit, ea variis in morbis prodeffe, qui vel oriuntur ab acore, vel cum eo conjunguntur; cujus rei ratio a natura illorum morborum petenda eft. Sic in variis morbis infantum, in *dyspepsia*, et *hysteria*, in podagra, et in calculo veficæ, vel faltem renum, sæpe utiliffima reperiuntur. Quin et nonnulla eorum, dum acorem corrigunt, alvum folvunt, alia urinam, alia exhalationem per cutem, vel etiam fudorem aliquantum movent: fed de hujufmodi illorum viribus non hic eft locus agendi.

1308. Quædam denique ex iis, fales imprimis *alcalini*, et terræ *abforbentes*, diu et large adhibita, incommodo, et interdum forte periculo quodam non carent, nimirum fi non modo morbofum qui adfuerit acorem correxerint, fed omnem acorem abforpferint. Sic enim putredinem aliquam, non modo in ventriculo et inteftinis, fed in omnibus humoribus, et univerfo corpore



pore inducere possunt. Acida enim alimentorum natura, intra certos limites, suos usus habet, corpusque imprimis a putredine tuetur.

1309. Quoniam *alcalina* humorum acrimonia medicis tamdiu in ore fuerat, non mirum est eos remedia quæsiuisse, et sæpe adhibuisse, quibus tali vitio obviam iretur. Istiusmodi remedia *Antalcalina* dixerunt: et certum est multa ex remediis quæ huc referebant, et ita nominabant, quotidie feliciter adhiberi, quamvis, ut suo jam loco (536.) expositum est, *alcalina* acrimonia in vivo homine vix unquam observetur. Eadem scilicet remedia quæ adversus *alcalinam* acrimoniam valuissent, siqua in corpore extitisset, adversus putredinem, quæ et manifestum, et frequens, et gravissimum vitium est, et *alcalinæ* corruptioni aliquantum affine, non minus valent. Remedia vero adversus putredinem adhibita, *Antisep- tica* vocantur.

1310. Horum magna copia atque varietas est, neque omnia in omnibus exemplis morbosæ putredinis pariter conveniunt; quod profecto nil mirum, cum varia, aque variis causis provenientia (531, 4.), existunt putredinis genera.

1311. Cavendum quoque ab errore satis naturali de medicamentis *antisepticis*, neque temere credendum res omnes, quæ extra corpus, et magna copia adhibitæ, putredinem arcent, vel corrigunt, eosdem vel similes effectus, intra corpus, et minuta copia adhibitas, esse præstituras. Quamvis enim pleraque et optima medicamentorum quibus pro *antisepticis* utimur, et intra et extra corpus, et in omni genere putredinis, et qua copia cunque adhibita fuerint, similes effectus habeant; tamen experientia satis demonstravit hoc de omnibus non pariter verum esse.

1312. Singula vero medicamenta *antiseptica* quod attinet, diversissima eorum existunt

istunt genera, quæ tam variis modis prodesse videntur, ut ægre omnino ordinentur.

1313. Imprimis igitur observandum est, maximum sæpe morbosæ putredinis subsidium in idonea diætâ esse positum; neque profecto verbis opus est ut probe perspicuum sit, res, veluti cibum et potum, quæ magna copia quotidie et sine incommodo sumantur, in corrigendo totius massæ humorum vitio, multo magis esse profuturas, quam medicamenta etiam validissima, quæ ob hanc ipsam causam non nisi minutissima quantitate, forte ad pauca tantum grana, assumi possint. Et quidem omnes boni et nutrientes cibi, carnes pariter atque fruges, adversus putredinem haud parum valent, ut in famelicis, aut *scorbuticis*, aut in iis qui victu tantum nimis parco et tenui diu usi sint, manifeste observatum est. — Putrescit enim sua sponte corpus quamvis sanissimum, neque fere aliud neque melius existit istiusmodi putredinis remedi-



um, quam bonus cibus atque potus, qualem provida natura ubique suggerit. Fruges vero multo plus valent in corrigenda putredine quam carnes, partim, ut videtur, propter aëra suum fixum seu *mephiticum* quem nostris humoribus copiosissime impertiant, partim quoque propter naturam suam acescentem, et a putredine alienissimam.

1314. Ob easdem causas, fruges recentes et teneræ, et succi plenæ, veluti poma, radices, olera, &c. ficcis et duris, veluti farribus, multum præstant, quamvis hæc quoque magis quam vulgo creditum est adversus putredinem valeant.— Distinctio illa inter herbas acescentes et *alcalescentes* quæ medicis olim in ore esse solebat, parum certa et parum utilis recentioribus visa est, et nunc fere negligitur. Experientia enim satis demonstravit ipsas quæ olim maxime *alcalescentes* crederentur fruges, veluti brassicam, cepam, porrum, &c. dum fermentantur, prius acescere quam  
in

in putredinem et *alcalinam* naturam abeant; ita ut vix dubitandum fit illas eadem ratione ac aliæ fruges adversus putredinem valere. Neque fane videntur præ aliis frugibus nomen *antiscorbuticorum* merere, quoniam multæ aliæ fruges, præsertim quæ maxime ascescentes sunt, adversus *scorbutum* tantum et amplius valent.

1315. Proxime post fruges recentes et succi plenas, veniunt panis recens fermentatus, et pro potu, cerevisia mustea, vel cerevisia jam cocta et fermentata, et vinum omne, quippe quæ natura, et principiis seu elementis *chemicis*, et viribus quibus in corpore humano pollent, recentes fruges multum referunt.

1316. Hic quoque non immerito recenseri potest aër fixus seu *mephiticus*, qualis a liquoribus inter fermentandum, vel a creta et similibus rebus affuso *acido* aliquo forti, magna copia expellitur. Aër hicce, quamvis in pulmonem copiose receptus, certissimo

certissimo exitio foret, tamen aquæ admistus in ventriculum recipi, aut per anum in intestina infundi potest, non modo sine periculo aut incommodo, sed sæpe cum insigni beneficio. Egregiis viribus *antisepticis* extra corpus pollet; ita ut non modo carnes a putredine defendisse, sed eandem jam inceptam, et quidem haud parum proVectam, correxisse, resque jam putridas ad firmitatem et quasi integritatem restituisse visus sit. Eundem intra corpus, in morbis putridis, et in ægris pene desperatis, multum profuisse, idonei auctores testantur.—Observandum est aëra fixum aquæ immistum non modo vim *chemicam antisepticam* habere, sed corpus plane refrigerare et roborare, ut ex effectibus aquarum quarundam medicinalium satis manifestum est, et satis verisimile est has quoque vires in variis morbis putridis non inutiles esse.

1317. Post hæc forte enumerari debent *varia acida*, cum nativa, veluti succus citreorum



treorum aliorumque fructuum; tum quoque arte facta, veluti acetum omne; tum demum fossilia, et præsertim *vitriolicum*, quod omnium forte optimum est. Observandum est omnia *acida* non modo per mixturam *chemicam* putredini obesse, sed etiam per vires suas astringentes (1042.) et refrigerantes (1223) in multis morbis putridis utilia fieri; et *acida vegetabilia* forte alio adhuc modo opem ferre, scilicet si in corpore similiter ac fruges recentes fermentata fuerint.

1318. Sales vero *alcalinos* quod attinet, et quidem omnes alios sales, *neutros*, terreos, et metallicos, quamvis plerique eorum, vel forte omnes, extra corpus ita adhiberi possint, cumque variis rebus putrescentibus ita misceri, ut putredinem earum satis efficaciter impediant, parum apta remedia videntur, ut hoc consilio in vivo corpore adhibeantur. Imprimis quia tantum eorum assumi nequit, quantum per mixturam *chemicam* cum tanta mole ac corpus humanum

humanum est id præstaret; tum quia nonnulli ex efficacissimis eorum, parce admisti, videntur potius putredinem promovere; tum demum quia multi eorum corpus nimis excitant, et calefaciunt, et sitim intendunt; et omnes forte sanguinem aliofque humores nimis attenuant et nimis acres reddunt. Certissimum est non modo sales *alcalinos*, sed salem quoque marinum, (qui in carnibus condiendis adeo efficax reperitur), vivum corpus a putredine minime defendere, et potius hoc vitium gravius et infestius reddere, ita ut nonnullis medicis persuasum sit, *scorbutum* vix aut ne vix quidem accidere, nisi in iis qui hoc sale usi essent.

1319. Sunt et alia quædam medicamenta, quæ in vivo corpore pro *antiseptics* parum valent, et raro conveniunt, quamvis inter ea a nonnullis recenseantur, et revera res putrescentes extra corpus a putredine optime defendant. Hujusmodi sunt multa stimulantia, aromata præsertim (1184.),

(1184.) et *spiritus destillati*, quæ quidem corpus nimis excitando et calefaciendo putredinem sæpe augerent: interdum vero cum putredo a debilitate oritur, vel cum insigni debilitate conjungitur, veluti in febribus nonnullis putridis, haud abfimile est ea per suum stimulum aliquantum esse profutura: quin et vinum ipsum, similefque liquores, eodem fere modo nonnihil prodesse videntur.

1320. Astringentia quoque et roborantia remedia, pro *antisepticiis* sæpe multum valent; cujus rei cortex *Peruvianus* certissimum exemplum extat. Neque dubium est hunc per vim suam astringentem, vel potius roborantem, et non per mixturam *chemicam*, putredini humorum obesse. Quamvis enim rei cuius putrescenti large admixtus eam quasi condiret et conservaret, minime credibile est copiam ejus adeo exiguam ac ægri solent aut possunt assumere, in vivo et integro corpore similiter prodesse: Præterea, in iis fere putredinis



generibus, quæ a statu solidarum partium multum pendent, veluti febres putridæ aut gangrænæ, utilissimus reperitur, et in *scorbuto*, qui a statu humorum magis pendet, multo minus efficax existit. — Verisimile est multa alia medicamenta ejusdem generis, et imprimis quædam ex amaris, (quæ nonnulli medici inter *antiseptica* enumerare solent), similes vires possidere; sed de his per experientiam nondum satis constitit.

1321. Sedantia quoque remedia inter *antiseptica* interdum sunt enumerata: neque profecto immerito, cum non modo quædam ex refrigerantibus, ut jam expositum (1317.) est, adversus putredinem plane valent, sed opium etiam, quod ad alterum genus sedantium, *narcotica* scilicet, pertinet, in peculiari illa gangræna pedum in qua omnia alia antiseptica remedia parum prodesse solent, miros et saluberrimos effectus habuisse visum est. Qua ratione in ista gangræna adeo proficit parum constat;

flat ; sed observandum est illam fere valde dolentem esse, et opium ad leniendum dolorem adhibitum, majus et insperatum beneficium simul præstitisse ; ita ut satis verisimile sit usum ejus in isto morbo in tollenda aut minuenda morbosâ quæ adest irritatione maxime consistere.

1322. Hactenus de usu generali et interno medicamentorum *antisepti*corum dictum est ; scire tamen oportet sæpe non inutile esse quædam ex iis partibus corporis singularibus variis de causis putrescentibus adhibere. Sic ulceribus *scorbuticis*, et quidem aliis ulceribus valde putridis et fœtidis, haud parum sæpe prodest fomenta imponere ex frugibus recentibus et succi plenis, aliisque rebus acescentibus, multumque aëra fixum continentibus, scilicet quæ fœtorem ulcerum brevi corrigunt, eorumque sanationem multum promovent, simili fere ratione ac putredini corporis generali occurrunt. Et in gangræna fere omni, medici solent partibus affectis adhibere

medicamenta quædam *antiseptica*, præsertim varia stimulantia, veluti *spiritus destillatos*, aut *spiritum terebinthinæ*, quæ creduntur sæpe multum prodesse. Nondum vero constitit num solis suis viribus *antiseptici* in tali statu profint, an potius (quod multo magis verisimile videtur) per vires suas stimulant, quæ vel actionem jam deficientem vasorum quæ sanguinem vehunt renovet atque intendat, vel inflammationem et bonam suppurationem ad marginem fanæ carnis efficiat, quæ partes jam putridas atque corruptas a fanis separet, morbumque ulterius serpere impediat.

1323. Præter vero omnia medicamenta jam recensita, sunt et alia quædam remedia, quæ optimo jure inter *antiseptica* enumerentur, scilicet quæ putredini adeo fortiter obstant, ut sæpe ad illam arcendam fere sufficiant, quamvis nulla adhibita fuerint medicamenta, et medicamentorum quæ data fuerint effectus et actionem multum juvent atque promoveant, nec unquam in  
præcavenda



præcavenda aut corrigenda putredine negligi debeant.

1324. Frigus imprimis adversus putredinem plurimum valet, præsertim in febribus putridis, aliisque similibus morbis, in quibus tutum et saluberrimum, et fere necessarium, remedium est. Satis enim constitit, tales morbos natura atque origine leves, et benignos, et minime putridos, calore sæpe mirum in modum ingravescere, et malignos prorsus et putridos fieri; et alios contra, jam graves, et malignos, et putridos, idoneo frigore adhibito, brevi mitescere, et pristina fere exuta, novam quasi naturam induere. Quoniam vero tot jam res variis in locis de frigoris viribus dictæ sunt, hic sat fuerit memorasse, id non modo viribus suis *chemicis* putredinem arcere, aut jam inceptam reprimere, sed viribus suis sedantibus et roborantibus corpori plurimum prodesse, variaque hujus vitia, veluti debilitatem, aut nimium sanguinis impetum, optime corrigere, quæ aliter in putredinem

dinem brevi definerent. Quapropter in talibus morbis non modo omnem calorem præter solitum evitare oportet, sed frigus, quantum ægri tolerari possint, per aëra, et potum, et omnes demum modos, adhibere.

1325. Munditia quoque in arcenda aut corrigenda putredine incredibiliter fere prodest: ita ut idonea hujus ratione habitata, multi homines pessimis morbis putridis alioquin laboraturi, sani atque incolumes diu vixerint. Neque minus certum est, immunditiam plurimum nocere, gravissimosque morbos putridos, præsertim febres, inter sanissimos etiam brevi producere. Quod profecto minime mirum est, cum corpus, ut suo jam loco expositum est, quamvis sanissimum, non aliter se sanum purumque conservat, quam expellendo particulas quæ jam corruptæ et noxiæ factæ sunt: hæ vero, si non bene expulsæ fuerint, aut corpori iterum admotæ, vel in id receptæ, nequeunt non nocere. Et experientia

perientia compertum est, immunditiam exhalationem per cutem multum impedire. Quod si ita res se habet in sanis, facile constabit immunditiam ægrotis, quorum corpora jam aliquatenus putrida atque corrupta sint, multo magis fore perniciosam; quod sane experientia jam satis superque demonstravit. Quapropter, in omnibus morbis putridis, et præsertim in iis qui febrim habent, ad munditiam omni cura attendendum est; et non modo ad corpora et vestimenta ægrotantium respiciendum, sed ad eorum lectulos atque cubicula, et præ omnibus ad aëra quem spirant, qui purus, optimum remedium, impurus, pessimum fere venenum, reperietur. Cavendumque etiam ne quid putrescentis, quod aëra eorum corrumperet, in cubiculis ægrotantium relinqueretur. Observandum quoque non ægrotantium modo, sed medicorum etiam atque adstantium, plurimum interesse ut munditiæ quam maxime colantur; sic enim simul occurritur



tur morbo, et præcavetur ab ejus contagione.

1326. Prodest quoque haud parum, et in arcenda et in corrigenda putredine, functiones illas aliis modis promovere, per quas res putrescentes e corpore natura excerni debent. His enim languentibus aut impeditis, corpus citius et magis putrescit; rite vero procedentibus, idem corruptioni illi alioquin brevi accessuræ, diu resistit. Sic, verbi gratia, crebra corporis exercitatio, exhalationem per cutem rite promovendo, homines a *scorbuto*, quem pravus cibus aliæque causæ efficerent, aliquandiu defendit, dum idem morbus ignavos breviprehendit. Et in *scorbuto*, et magis adhuc in febribus putridis, multum prodest excretionem per alvum ita promovere, ut nulla in intestinis saburra corruptæ et putridæ materiæ accumuletur; scilicet quæ non modo gravissima ibi incommoda efficere posset, sed generalem etiam corporis putredinem multum intendere.

1327. Postremo,

1327. Postremo, in præcavenda pariter atque medenda putredine, ad causas ejus, quæ sane variæ sunt, sedulo respicere oportet, singulisque, quantum facultas fuerit, obviam ire. Sic quum illa sæpe a debilitate oritur, vel saltem plurimum ingravescit, omnia fere remedia roborantia et stimulantia, ea etiam quæ animum ipsum afficiunt (1124, 8.), adversus putredinem utilia reperiuntur. Cum vero haud raro aut totum corpus aut partes quædam singulares putrescunt, vel a nimio sanguinis impetu, nimioque calore, veluti in febribus, vel a nimia actione vasorum quæ sanguinem vehunt, ut in inflammatione gangrænam inducente, in tali statu stimulantia et roborantia remedia nocebunt, dum contraria prorsus remedia, veluti infirmantia et sedantia, putredinem arcebunt et minuent.

C A P. XXXIII.

*De remediis evacuantibus.*

1328. **P**roxime post ista remediorum genera quæ corrigunt varia vel solidarum vel fluidarum partium vitia, consideranda sunt et illa quæ Evacuantia dicuntur, scilicet quæ exinanitionem quamlibet præter solitum, sive per vias naturales, sive per novas et arte factas, efficiunt.

1329. Hujusmodi remediorum varietas haud exigua est, et cum tot tantisque usibus in tractandis morbis inserviunt, corpusque tam vehementer et tot variis modis afficiunt, de unoquoque eorum nominatim agere oportebit. Quoniam vero  
multa



multa plerisque eorum vel forte omnibus communia sint, non inopportunum fore videtur monita et præcepta quædam generalia de eorum natura, et actione, et usibus, prædicere, priusquam de singulis sermo fiat.

1330. Imprimis autem observandum est remedium evacuantium usum firmissimo fundamento niti; variæ enim insignes atque insolitæ exinanitiones, veluti vomitus, aut alvi fluxus, aut ingens sudor, aut urinæ, aut sanguinis profluvium, sæpe sua sponte accidunt; et haud raro cum felicissimo eventu; ita ut minime dubium sit Naturam per tales exinanitiones variis morbis quibuscum prius conflictabat se quodammodo liberasse. Interdum etiam natura, interdum casu, veluti vulneribus, aut utionibus, ulcera in variis corporis partibus fiunt, quæ morbos quosdam olim familiares vel arceant, vel levent, vel tollant.

1331. Nil mirum igitur medicos, et quidem homines maxime rudes, talibus exemplis, quasi ab ipsa Natura edoctos, tentasse similes in similibus morbis exinanitiones arte efficere, cum plurima idonea medicamenta ubique suppeterent, quorum vires et facultates casus pene quotidiani, et interdum forte felices, iis ostendissent.

1332. Talem quoque in multis morbis medendi rationem arte institutam experientia sæpe comprobaret, et ratio amplius adhuc firmaret, simul ac illorum naturæ et causæ aliquatenus exploratæ et cognitæ essent. Sæpe vero medici de variarum exinanitionum in morbis sanandis usu atque actione male omnino sunt ratiocinati; nimirum cum crederent, (ut olim apud omnes fere medicos opinio fuit, et adhuc apud vulgus et sane multos medicos est), eas non aliter prodesse quam detracta aut expulsa e corpore materia aliqua morbida et noxia, qualem in plerisque morbis adesse, eosque efficere, putabant.

1333. Quasdam

1333. Quasdam exinanitiones, vomitionem imprimis et alvi purgationem, materiam morbidam et noxiam, siqua in ventriculo et intestinis adsit, statim expellere, et sic in multis morbis egregie prodesse, certum et perspicuum est; quamvis hæ quoque aliis neque forte minoris momenti usibus in variis morbis inserviant. De his quidem facile est; de aliis vero exinanitionibus, veluti per urinam, aut sudorem, aut sanguinis detractionem, &c. intellectu difficillimum, et fane prorsus incredibile, eas, relicta sana, morbosam tantum humorum partem evacuare. Neque ullum alium effectum ab earum usu in humoribus expectare par esset quam diminutionem plenitudinis, quæ diminutio interdum utilis interdum perniciosa foret. Non tamen idcirco credendum est, varias exinanitiones hac sola ratione prodesse, cum et ratio et experientia ostendant eas in multis morbis aliis et fane longe diversis modis utiles fieri. Quocirca oportet animum attendere ad varios quos revera in corpore humano præstent



præstent effectus, quo melius intelligantur earum usus et administratio.

1334. Imprimis igitur variæ exinanitiones diminuta humorum circumientium copia in plurimis morbis utiles sunt. Nonnulli enim morbi a nimia humorum abundantia (508. 10.) toti pendent; et multorum et quidem gravium talis plenitudo pars et magna saltem ex parte causa quoque existit. Sæpe etiam cum id vitium adsit, quamvis minime causa fuisset morbi qui urgeat, tamen vires naturæ conservatrices et salutares ita impedit et opprimit, ut ad solvendum morbum non valeant; et in hoc statu perspicuum est morbum per idoneas exinanitiones aut prorsus sanatum iri, aut saltem sublevatis et expeditis salutiferis illis naturæ viribus, leviolem factum iri, et sanatu faciliorem.

1335. Profunt quoque variæ exinanitiones in multis morbis, majore sanguinis, forte etiam et vis *nervose*, derivatione facta eas  
partes

partes versus unde excretiones vel detractio-  
 nes humorum fiunt; non modo propter solu-  
 tas et patefactas in illis partibus vias quas  
 humores legant, sed has quoque egregie fi-  
 mul stimulas, adque novam et validio-  
 rem actionem excitatas, quæ majorem  
 sanguinis ad illas partes quantitatem de-  
 ferri (470, 3), minorem ad alias efficiat:  
 plurimæ enim exinanitiones ope stimulan-  
 tium remediorum (1169, 70.), quædam  
 vero ope emollientium et relaxantium  
 (1081.), fiunt; et omnes quidem, qua ra-  
 tione cunque fuerint inceptæ, nequeunt  
 non vasa per quæ humores effunduntur  
 laxare et patefacere. Hoc modo sæpe uti-  
 les esse possunt ad summovendos vel leni-  
 endos multos morbos aliarum partium,  
 five vicinarum, five remotarum ab illis  
 unde exinanitio fit; sic morbosæ sangui-  
 nis ad partes quasdam derivationes, aut in  
 iis congestiones, aut *spasmi*, forte etiam et  
 obstructions interdum, per idoneas exi-  
 nanitiones a partibus remotis solvuntur.  
 Hoc fundamento nititur doctrina *revul-*  
*sionis*,

*sionis*, quæ medicis diu in ore fuit, et sane nondum omnis obsolevit; et vis *antispasmodica* quoque remedium evacuantium, magna saltem ex parte, eodem referenda est.

1336. Porro, multæ exinanitiones utilissimæ reperiuntur ad tollendas varias affectiones morbosas partium unde ipsæ fiunt, quod imprimis notabile est cum sanguis a partibus inflammatis, sive scalpello, sive scarificatione, sive cucurbitulis cruentis, detractus fuerit, vel *vesicatorium* iisdem impositum.

1337. Magnopere etiam profunt varia remedia evacuantia in removendis impedimentis (sive ab obstructione sive a torpore natis), quæ actioni organi cujusdam fecernentis obstant, et secretionem per id nimis parcam reddant. Hoc beneficium fere totum tribuendum est stimulo remedii admoti, qui derivationem sanguinis et vis *nervose* eam partem versus adaugeat (470.);



(470.) ; impedimento vero, quicquid demum fuerit, sic semel fuolato, secretio postea iusta et naturali copia perficietur. Eximium hujusmodi exemplum in hydro-picis sæpe videre est, quibus urina fere parca contingit ; eadem vero idoneis medicamentis semel mota ita ut copiosius fluat, pergat haud raro libere fluere diu post medicamenta omissa.

1338. Sæpe etiam profunt variæ exinanitiones arte concitata, suppressis nimis vel minutis saltem aliis exinanitionibus morboris, et prius valde molestis, forte etiam vix aliter sistendis. Hoc modo, ad firmandam alvum diu et pertinaciter fluentem, copiosus sudor sæpe utilis, interdum prorsus necessarius ; et alvi purgatio, ad reprimendos nimios sudores, vel ingentem salivæ fluxum, aliquando bonum remedium.

1339. Utiles quoque fiunt multæ exinanitiones, siquando corpus, a suppressis

aliis quibuscvis solitis, five naturalibus, five casu, five arte effectis, aliquid detrimendi passum est. Sæpe etiam, per longam consuetudinem, exinanitiones, vel sua natura atque origine morbosæ, vel saltem præter naturam primo institutæ, veluti *hæmorrhoids*, aut ulcera vetusta, aut alvi fluxus, aut copiosus sudor, aut frequens sanguinis detractio, purgationes potius salutare quam morbi fiunt, et tandem ad sanitatem adeo necessariæ, ut cum maximo hujus discrimine supprimantur. Neque obscura ratio, qua, novæ exinanitiones arte factæ, corpori, a veterum suppressione laboranti, efficacissime opitulentur, non modo obviam eundo nimix illi humorum abundantix quæ aliter fieret, vel hanc tollendo si jam facta sit, verum insuper præcavendo abnormes atque perniciosas illas humorum distributiones, (forte partes versus quæ eas male sustinerent), quæ in tali statu semper sunt metuentæ. Immo non desunt qui putant corpus, istiusmodi (1332.) exinanitionibus diu affuetum,

assuetum, per eas multis humoribus noxiis semet purgare, vi quadam haud facili explanatu; novisque ideo, illis suppressis, opus esse, quibus hi, alioquin plurimum nocituri, ut antea expurgentur.

1340. Multæ demum exinanitiones, urinæ imprimis magnus fluxus, aut copiosus sudor, aut valida alvi purgatio, forte etiam et plena vomitio, mirabiliter sæpe profunt augendo actionem vasorum absorbentium (434, 5.), quæ humores ubique corporis exhalatos vel effusos hauriunt, et in sanguinem iterum deferunt. Hoc interdum efficiunt, aliqua saltem ex parte, per suum stimulum, qui vasa illa, pariter ac omnes corporis partes (1159.), ad novam et validiorem actionem cieat; sæpius vero et magis, detracto vel dissipato plurimo humore tenui qui in venis adfuerat: unde brevi necessitatis novi talis humoris subsidii, cui necessitati Natura quam optime satisfacit, hauriendo quantum opus fuerit ex illo penu qui maxime in promptu est. Bene



enim notum est, in aliis etiam, neque morboſis, exemplis, quo major fuerit neceſſitas ſubſidii humoris tenuis ad diluendum ſanguinem, eo plus talis humoris a ventriculo per vaſa abſorbentia lactea hauriri, et in venas recipi, veluti in iis qui a calore, aut valida corporis exercitatione, multum et diu ſudaverint: homines vero, in hoc ſtatu, importuniſſimæ ſiti, quæ fere oritur, parentes, incredibilem aliquando vim aquæ, aliufve potus tenuis, brevifſimo tempore hauriunt, neque ab ea gravantur, aut ſtomachum diſtentum ſentiunt, propterea quod adeo ſubito inde abſorbetur, ut vix ſentiri queat: quam longe autem aliter res ſe habeat in non ſudantibus aut non ſitientibus, unusquiſque fere, ſiquando forte nimis biberit, in proprio corpore plus ſatis expertus eſt. Hinc facile intelligetur adminiſtratio et uſus multorum remedium evacuantium in ſanandis variis morbis hydropicis, in quibus, ut bene notum eſt, plerumque inſigniter profunt.

1341. Nonnullæ denique exinanitiones, ratione valde obscura vel prorsus ignota, in quibusdam morbis utiles fiunt; quod profecto eo minus mirum est, quod naturæ et causæ proximæ multorum morborum nondum exploratæ sint: Sic, verbi gratia, multæ febres, cum intermittentes, tum continuæ, variis exinanitionibus, sive natura accidentibus, sive arte factis, quam optime solvuntur, et interdum adeo subito ut vix credibile videretur, nisi frequens et manifestum esset. Hanc rem diversi auctores, diversis modis, magna industria torquere solent, ut ad varias de natura februm opiniones quadret quas ipsi tuentur. Præstat vero argumentum adeo obscurum atque incertum in medio relinquere, quam ullam opinionem amplecti nondum penitus exploratam et stabilitam. Verisimile quidem est corpus febricitans per tales exinanitiones variis modis sublevari, viresque ejus conservatrices et salutare multum juvari, detracto quod nimium esset humorum, expulso forte quod plurimum

plurimum noceret, multisque functionibus, prius languentibus, et pene obstructis, denuo expeditis, et rite in posterum procedentibus. Male vero expulsæ cuivis materiæ morbosæ, qualem tot in omni ævo medici pro causâ febrium habuerunt, tribuitur beneficium istud insigne quod ab illis exinanitionibus obtineri solet; scilicet quia materia excreta plerumque neque morbosâ apparet, nec quicquam morboſi continere videtur, cum maximo auxilio est; et sæpe contra, cum valde morbosâ est, ne minimum quidem prodest, et potius nocere videtur. Utcunque vero hæc se res habuerit, sapientis et solertis est medici, experientia freti, hujusmodi auxilia, quamvis parum intellecta, experiri in iis morbis in quibus toties et tam manifeste profuerunt.

1342. Observandum est plurima medicamenta evacuantia, non modo per exinanitiones quas efficiunt, sed per alias etiam quibus pollent vires, corpus multum afficere, inque variis igitur morbis prodesse.



prodesse. Sic multa eorum stimulantia sunt, et quidem validissima istius generis remedia; alia vero emollientia, aut sedantia, aut refrigerantia, aut *demulcentia*. Hinc facile constabit, non omnia medicamenta quæ ad idem genus evacuantium, veluti vomitoria, aut purgantia, aut urinam vel sudorem moventia, referuntur, in omni morbo ubi talibus exinanitionibus opus est, pariter convenire; et idoneam igitur eorum selectionem esse semper utilem, et aliquando prorsus necessariam: sæpe enim eidem ægro, ex duobus medicamentis purgantibus, alterum insigni auxilio, alterum fere exitio, foret.

1343. Ipsas vero exinanitiones quod attinet, quas varia medicamenta evacuantia faciunt, de omnibus, et præsertim de magnis aut diuturnis, certissimum est, eas vires vitales minuere, corpusque plurimum infirmare, eo magis et certius quo ipsæ copiosiores fuerint. Quod si contrarium aliquando effectum habere videantur, id  
 sine

sine dubio tribuendum est aliis earum viribus, quibus variis morbis, aliisque debilitatis causis, obviam eant: nam omnes fere morbi, utcunque cætera diversi, hoc commune habent (377.), quod debilitatem aliquam efficiant: cujusmodi eximium exemplum esse potest nimia sanguinis abundantia (509.). Nil mirum igitur, remedia quæ illam adeo efficaciter minuant, aliosque morbos sublevent vel summoveant, debilitati cujus non alia esset origo, optime occurrere, quamvis corpus alioquin multum infirmatura.

1344. Hinc porro sequitur exinanitiones, propter effectus suos debilitantes, forte etiam et alios vix minoris momenti qui ab iis pendeant, nisi necessariæ fuerint, fere semper perniciosas fore, ita ut quod olim de uno genere earum *Celsus* optime monuerit, de omnibus verissime prædicari possit, *non semper agris prodesse, semper sanis nocere*. Memoria igitur semper tenere oportet, remediis adeo validis non temere esse ludendum.

dum. Remedia, qualiacunque fuerint, ubi nullis opus est, adhibere, prava est, et plerumque pernicioſa, conſuetudo: Multa vero ex medicamentis jam ſub variis capitibus enumeratis, adeo mitia et pene inertia ſunt, ut diu ſæpe ſine magno incommodo aut periculo, vel ægris dari, vel a ſanis uſurpari, poſſint, quamvis etiam minime neceſſaria fuiſſent. Exinanitiones vero gravius et præſentius periculum ſecum afferunt, et majorem in adminiſtrando prudentiam requirunt; ægrotis caute præſcribendæ, et ſanis ſemper prohibendæ: ſcilicet quæ in variis morbis intempeſtive factæ, multis ægris tantum quaſi puncto temporis inferre poſſint detrimentum, quantum neque medicorum peritia, neque medicamentorum vires, poſtea compenſare potuerint; et in ſanis inſtitutæ aliquid ſemper viribus ſalutaribus corpori inſitis detrahant, hujusque functiones intendant, impedian, perturbent, ipſumque, deficientibus viribus ſuis conſervatricibus, innumeris morbis opportunius reddant. Ne-



que minimum earum incommodum est, quod frequente usu, aut longa consuetudine, ipsa vitia ad quæ præcavenda fuissent præscriptæ haud raro inducant vel augeant, et quod sæpe, quamvis revera perniciosæ, quodammodo necessariæ fiant, vel ad arcendam pejorem perniciem (1339.), vel ad promovendas functiones, quæ tali auxilio diu assuetæ, sine eo perfici nequeant.

1345. Hæc quicumque bene consideraverit, is facile perspiciet quam gravis et perniciosus illorum error fuisset, qui credebant non alio magis modo sanitatem esse tuendam morbosque arcendos, quam idoneis exinanitionibus certis temporibus factis. Talis autem apud veteres opinio communis et passim recepta fuit, ita ut nonnullis exinanitionibus, vomitionibus præsertim, et alvi purgationibus, multo magis uterentur pro præfidiis bonæ valetudinis quam pro remediis morborum. Præ omnibus autem, doctrina *Stabliana*, quæ ple-rosque morbos nimix sanguinis abundantix imputabat, isti opinioni favebat: non  
mirum

mirum igitur errorem, antiquitate sua quasi consecratum, et magnorum nominum auctoritate ornatum et stabilitum, apud populum in multis gentibus adhuc valere, et nondum sane apud medicos quosdam penitus obsolevisse. — Neque profecto negandum est, talem quarundam exinanitionum usum, quamvis plerumque perniciosum, interdum non inutilem esse; scilicet in iis qui perpetuo luxu et ignavia vitam degunt, quippe quorum corpora lauto et copioso victu nimis implentur, nec unquam per idoneam exercitationem rite exinaniantur; dum partes quædam, ventriculus præcipue et intestina, nimio et nocivo onere gravatæ atque oppressæ, et vitæ genere parum idoneo amplius debilitatæ, neque onus quod acceperint concoquere, neque ut debent excernere possint. In hoc igitur statu variæ exinanitiones, sanis inutiles atque nocivæ, ratione haud obscura, perutiles vel necessariae prorsus fieri possunt hominibus qui vix sani haberi debeant, nimirum qui, si nondum ægrota-

rent, saltem mox essent ægrotaturi. Et profecto satis æquum est, et minime mirum, eos qui adeo contra naturam vivunt, auxiliis non minus præter naturam sæpe egere. Qui vero secundum naturam vivunt, iis vires ejus conservatrices (nisi causa aliqua gravior morbi accesserit) fanitatem satis tuebuntur: nullis enim remediis sana Natura potest egere: *Cujus quidem administratio* (si verba Ciceronis mutuari liceat) *nihil habet in se quod reprehendi potest; ex iis enim naturis quæ erant, quod effici potuit optimum, effectum est: doceat ergo aliquis potuisse melius: sed nemo unquam docebit: et si quis corrigere aliquid volet, aut deterius faciet, aut id, quod fieri non potest, desiderabit.*

1346. Exinanitiones demum, quamvis tot salutares effectus (1333. 45.) in corpore præstent, et in multis morbis non utiles modo, sed prorsus necessariæ sint, tamen non semper conveniunt, neque sane periculo carent, etiam cum variis de causis  
maxime



maxime requiri videantur : variæ scilicet sunt corporis conditiones, quibus existentibus, hoc omne fere genus remediorum evacuantium male tolerat. Hinc sæpe magna difficultas, cum vitium aliquod gravius hujusmodi remedium plane et vehementer requirit, et corpus simul hoc tolerare nequit. De hujusmodi vero difficultatibus, iisque expediendis, alibi (960.) jam satis dictum est. Hic igitur sat fuerit memorasse quænam corporis conditiones ab usu exinanitionum alienissimæ sint. Neque omnes sane ejus conditiones quæ unicuique exinanitioni specialiter videntur alienæ hic sunt enumerandæ, (nimirum quæ cum de singulis earum generibus sermo fiet, fusius erunt recensendæ), sed illæ tantum quæ omnes generatim male ferunt.

1347. Has inter imprimis recensere oportet debilitatem; cujus rei ratio satis in aprico est: neque profecto mirum remedia quæ corpus adeo debilitant huic jam multum debilitato non convenire. Notandum

tandum quoque debilitatem adeo multiplex esse vitium, et a tot causis et in tot morbis accidere, ut ob illam solam ab exinanitionibus sæpissime abstinendum sit.

1348. Morbosa quoque proclivitas ad putredinem, vel putredo jam in corpore existens, evacuantia remedia minus idonea reddit. Hujus rei ratio aliquanto obscurior videtur: ipsa autem certa est; et satis constat debilitatem atque putredinem conjunctissima esse vitia, ita ut alterum alteri semper faveat, et quasi viam sternat.

1349. Magna etiam corporis mobilitas ab exinanitionibus fere semper aliena est: non modo propter nexum illum et conjunctionem vix non perpetuam mobilitatem inter et debilitatem, sed quia remedia adeo valida corpora delicata atque mobilia sæpe mirum in modum perturbant atque convellunt.

1350. Strumosa

1350. Strumosa demum corporis constitutio (sive malum istud sese aperte prodiderit necne) inter conditiones illas quæ id omnium fere exinanitionum minus patiens reddunt, non immerito recensetur. Cujus forte rei non alia ratio est, quam quod strumosi corpora laxi et flaccidi et debiles existunt, et remedia igitur valde solventia et debilitantia male tolerant.

1351. Plurimæ denique res, præter signa præsentia morbi, in variis ægris observandæ, sæpe ostendunt quasdam exinanitiones parum idoneas esse, quasdam magis convenire, et cæteris omnibus facile esse anteponendas. Huc pertinent ætas, et magis adhuc peculiaris constitutio, interdum etiam forma corporis, ægroti, cœlum sub quo vivit, vitæ genus quod degit, et demum generalis natura morbi qui adest.

1352. Sic pueri detractionem tenuium humorum per alvi purgationem, aut *epispastica* imposita, mirum in modum tolerare solent,



solent, sanguinis vero jacturam, ægrius ; adulti autem hanc melius, illam difficilius.

1353. Sunt qui talem corporis constitutionem habent, qualis ad sudandum vix ullis cogi possit remediis ; sunt contra qui facillime sudant, et per sudorem a multis levioribus morbis, gravedinibus, febriculis, &c. convalescere solent. Sunt, ut fertur, qui vomere nequeunt ; et multi certe nunquam vomere possunt sine magno dolore et immani nixu, et fere convulsione generali ; dum alii bene multi facillime, et fere ad arbitrium suum, et sine medicamento vomunt. Nonnulli, alioquin sani et satis validi, valde minuta sanguinis jactura animo linquntur ; dum alii incredibilem vim sanguinis facile et sine incommodo amittunt.

1354. Sub cœlo fervido qui vivunt sanguinis detractionem ægre tolerant ; purgationes melius ; frigidarum vero regionum

num maximas fere sanguinis detractiones tolerant.

1355. Qui laboriose et duriter vitam degunt, sanguinis jacturam optime ferunt; qui ignavam, et sedentariam, et mollem vitam agunt, neque illam, neque sane ullam validam exinanitionem bene tolerant, et sæpe dum ægrotant leniores purgationes ferunt atque requirunt.

1356. Variis morbis tam diversa facies pariter ac natura est, ut aliæ aliis primò statim aspectu exinanitiones convenire videantur. Sic in vehemente febre, aut valida inflammatione, toto sanguine, et quidem toto corpore, fervente et æstuante, ipsa morbi facies et natura usque docet sanguinem esse copiose detrahendum; dum in hydrope, vultus pallidus, corpusque exsangue, et aquoso humore obrutum, fatis superque monent non tali opus esse auxilio, sed aliis, et longe diversis, quæ humores aquosos detrahant.

1357. Varias exinanitiones quibus medici solent uti, scriptores distinguere et ordinare voluerunt, vel secundum naturam humoris qui effunditur, scilicet prout hic crassus fuerit seu tenuis, et sic eas distinguunt in sanguineas et *serosas*; vel secundum vias per quas ille effunditur, nimirum prout hæ naturales fuerint, seu arte factæ; et sic ad unum genus referunt vomitoria, cathartica, et urinam, sudorem, salivam, menses, &c. moventia, et ad alterum genus, omnem sanguinis detractionem, et exinanitionem tenuis humoris vel puris, per *epispastica*, vel *fonticulos*, vel cauteria, &c.

1358. Hæc quidem scire decet, et scitu certe minime difficilia sunt; sed in singulis tractandis exinanitionibus, non alius videtur ordinis usus, quam ut illæ proximè considerentur quæ plurimum similitudinis aut convenientiæ inter se habent, veluti vomitio et alvi purgatio, copiosa sudoris excretio et magnus urinæ fluxus, &c.



&c. quo melius intelligatur quid unicuique earum proprium fit, quid pluribus commune.

C A P. XXXIV.

*De remediis vomitoriis.*

1359. **R**emedia Vomitoria vel *Emetica* dicuntur illa quæ vomitum movent.—Qualis sit actio vomendi, qua partium machinatione fiat, quibus causis frequentissime excitetur, et qua maxime ratione vel prodesse vel nocere soleat, suo jam loco (666, 71.) expositum est. Superest tantum nunc ut præcipua recensentur medicamentorum genera quæ ad ciendum vomitum adhiberi solent, et ut singulorum vires et usus explanentur; et ut ordo aliquis sermonis fiat, non inutile erit a lenissimis incipere, postea ad validiora, deinde ad violentissima progredi. Sci-

re

re enim oportet ventriculum adeo delicatum et irritabilem esse, tantumque cum aliis partibus consensum habere, ut non modo per plurima vehementiorum stimulantium, si in eum ingesta fuerint, sed sæpe per res mitissimas, omnique fere stimulo vacuas, interdum etiam per res vere sedantes et quidem *narcoticas*, ad vomitum cieatur. Memoria quoque tenere oportet insignem varios inter homines hac de re differentiam esse, ita ut aliis facillime, aliis ægerrime vomitus moveatur; et, quod magis mirum est, leniora interdum medicamenta efficere quod per validissima frustra fuisset tentatum.

1360. Imprimis igitur observandum est, omnem potum, utcunque blandum, et mitem, et gratum, ad ciendum vomitum nonnihil valere; tantum saltem ut vomitum, alioquin difficillimum, et laboriosum, et dolentem, et parcum, vel forte nihil præter inanes nixus, futurum, promptiorem, faciliorem, et copiosiore, reddat. Quo  
magis



magis bibitur, intra certos limites, de quibus postea (1395.) dicendum erit, eo citior et facilior vomitus; ita ut vix dubitari possit, distensionem ventriculi stimulum satis validum et efficacem fibris ejus musculosis impertire. Hanc enim omnibus partibus musculosis efficacissimo esse stimulo, alibi (302, 3, 18.) jam demonstratum est.

1361. Potus vero promptius adhuc vomitum movet si ipse (quamvis adhuc mitissimus) nauseosus fuerit. Multæ nimirum res, quæ alioquin nullum stimulum habent, gustui ingratißimi sunt, et per saporis sui insuavitatem, ut videtur, ventriculum vehementer afficiunt, sæpe etiam ad nauseam usque et vomitum, (unde nomen habent), quamvis ne buccæ quidem rei ipsius fuisset devorata; magis vero et certius, si non modo gustatæ fuerint, sed in ventriculum receptæ. Pura aqua tepida, qua nihil blandius existit, vel tepida cum multo saccharo aut melle commista, vel  
oleum

oleum viride et mite, multis et præsertim inassuetis hoc faciunt, et cibus vel potus corruptus aut gustui ingratus, et longe maxima pars medicamentorum quæ in officina Pharmacopolæ reperiuntur. Nonnulli quidem aliam de aqua tepida nauseam movente rationem reddere volunt, credentes tepidam, infirmando fibras ventriculi musculosas, has ad motus abnormes, cujuscumque vomitus et forte nausea est, proclives reddere.

1362. Multæ vero res simul nauseosæ sunt, et aliquid stimuli in se habent, quæ ideo ad ciendum vel promovendum vomitum, si alio quovis medicamento excitatus fuerit, magis idoneæ sunt. Cujuscumque sunt infusiones multæ amaræ, veluti *thæe* viridis, aut florum chamæmeli, aut cardui benedicti, &c.

1363. Alia quoque et haud parum fortiora medicamenta stimulantia ex herbis desumpta pro vomitoriis sæpe adhibentur.

1364. Horum

1364. Horum certe princeps est radix *ipecacoanhæ*, medicamentum sane valde nauseosum, sed adeo mite, et simul adeo efficax, ut communi usui accommodatissimum videatur; scilicet quod parva quantitate, vel aqua aut vino infusum, infirmissimi fere quibus vomitorium medicamentum conveniat, tuto sumere possunt, dum validioribus aut difficilius vomentibus ad quadruplam quantitatem et amplius dari potest sine periculo aut incommodo. Neque profecto aliud fere incommodum habere solet, si plus satis ejus sumptum fuerit, quam quod vomitionem citiorem, sed non eo graviolem, efficit.—Tale medicamentum vomitorium, tutum simul et efficax, omnibusque fere ægris accommodatum, veteribus defuit; et *Sydenhamus* noster, quo neque apud veteres neque recentes sanior aut sagacior extitit medicus, istum defectum satis perspexit et doluit.

1365. Nonnullæ etiam herbæ acres ex variis generibus jam (1183.) recensitis ad  
ciendum



ciendum vomitum utiles sunt; veluti raphanus rusticanus, cujus radicis infusio hoc consilio interdum sola data est, sæpius vero ad promovendam actionem aliis medicamentis; vel sinapi, cujus pollen aquæ admixtum, et in ventriculum ingestum, efficax reperitur et tutum medicamentum, et paralyticis præsertim, vel interdum iis qui a stomacho laborant, creditum esse accommodatissimum, si forte his, quacunque de causa, vomitorio opus sit.

1366. Radix etiam scillæ, (quæ ad genus illi pertinet (1183.), utpote quæ et valde amara, et nauseosa, et simul acerrima sit, pro vomitorio medicamento sæpe data est, sed communi usui parum apta videtur; nam effectus ejus adeo incerti sunt, ut dum parva admodum quantitas huic vomitiones immanes civerit, decupla forte illi ne nauseam quidem moverit.—— Creditur a multis vi speciali gaudere spiritum promovendi, et ideo iis ægris maxime convenire quibus pulmones, vel multo mu-

co, vel aliis rebus quæ excreari debent, gravantur.

1367. Aliæ quoque bene multæ herbæ acres ad movendum vomitum interdum datæ sunt, et a nonnullis laudatæ, qualia sunt asarum vel erigerum, &c. quæ tamen nihil peculiaris commodi habere videntur, et nunc igitur a medicis fere negliguntur.

1368. Multæ demum herbæ vere *narcotica*, medicamentaque ex iis desumpta, veluti *nicotiana*, *digitalis*, *cicuta*, et quidem opium ipsum (1212.) aliquando, vomitum satis efficaciter movent; sed multa vetant ut hoc consilio frequenter adhibeantur, quamvis nonnullæ ex iis, *nicotiana* imprimis, inter vomitoria medicamenta sæpe recenseri soleat. Hæc quidem, siquid aliud, vi certa et speciali gaudet ventriculum afficiendi et vomitum excitandi; scilicet quæ non modo, si in ventriculum ingesta fuerit, horrendam nauscam, et vehementem vomitum, cum immanibus nixibus atque doloribus,

loribus, et magna anxietate, efficit, sed idem fere facit, inassuetis saltem, si in ore tantum manfa fuerit, vel si fumus ejus in pulmonem receptus fuerit, vel folia pro cataplasmate super ventriculum imposita, vel demum si decoctum vel infusio ejus in intestina pro clystere fuerit infusa. Hoc sane scire oportet, non ut tam horrendum medicamentum pro vomitorio præscribatur, sed ut ab ejus usu, metu tam certæ et crudelis vomitionis abstinenceatur, siquando aliis modis profutura videretur, ubi tamen hujusmodi vomitus parum conveniret.

1369. Multi sales largius assumpti nauseam et vomitum cient: pauci vero hoc consilio adhiberi aut inter vomitoria recenseri solent.

1370. Sal marinus aquæ admixtus, vel potius aqua marina, si forte hæc præsto esset, apud veteres pro leniore medicamento multum in usu fuit, et quidem satis idonea videtur ut adhibeatur cum



usitata medicamenta (1362.) non sunt in promptu.

1371. *Alcali* volatile, *spiritus* scilicet cornu cervi, eodem consilio interdum neque inepte adhibetur, præsertim si validiore medicamento vel non est opus, vel si validius datum fuerit, sed propter varias causas non bene responderit, cuius ideo actionem *alcali* volatile juvare et promovere possit.

1372. Ex metallis, aliquot pro vomitoriis sæpe præscribuntur, et revera bona medicamenta fiunt; præsertim in formam salium per idonea *acida* redacta, quo facilius in aqua solvantur, et in minutissimas, qualibus sæpe opus est, quantitates dividantur. Non omnia vero metalla quæ vomitum cient pro remediis conveniunt, veluti cuprum, quod inter vomitoria recenseri solet, quamvis nulla peculiaria commoda habere videatur, et propter insignem suam acrimoniam et naturam vix non venenatam

tam nunquam dari debeat, nisi res valde urgeat, et nullum aliud tutius medicamentum in promptu sit.

1373. Varia quoque medicamenta ex argento vivo parata vomitum cient; sed unum tantum eorum, *turpethum* scilicet *minerale*, seu *Mercurius flavus*, inter vomitoria enumeratur: hoc quoque ob infirmitatem suam acrimoniam, et violentissimos effectus quos in corpore habere solet, raro adhibetur, neque profecto communi usui omnino accommodatum est. Narratur in nonnullis morbis, venereis imprimis, et hydrophobia, mirabiliter interdum profuisse; et satis verisimile est id præter vomitum, magnum sæpe salivæ fluxum esse moturum. Sed hæc omnia beneficia a viribus ejus vomitoriis minime pendent.

1374. *Zincum* etiam medicamentum vomitorium præbet valde efficax, et quamvis generali usui minus idoneum, propter subitam et validam suam actionem, in multis

tis

tis exemplis utilissimum, *vitriolum* scilicet album, quod non adeo acre aut venenatum est quin fatis tuto dari possit, et simul adeo validum est, ut quasi puncto temporis plenissimam vomitionem cieat, et ideo præ omnibus fere hujus generis remediis conveniat, si quid perniciosi aut venenati in ventriculum fuerit ingestum, vel si hunc, quacunque de causa, subito et plene exinannire cupimus.

1375. Ex omnibus vero metallis, forte etiam et ex omnibus aliis rebus, stibium maximis viribus ad ciendum vomitum pollet, multaque medicamenta ex eo parata in usu quotidiano sunt, quæ creduntur, in multis saltem morbis, omnibus aliis vomitoriis facile præstare. — De singulis autem medicamentis ex stibio paratis hic verba facere minime opus est: omnibus enim similes facultates, his tantum minores, illis validiores, constant.



1376. Sæpe inter medicos controversia fuit, hujusmodi (1362. 7.) medicamenta, num vi quadam speciali qua in ventriculo pollebant, num stimulo suo generali qui ventriculo primum admotus hunc maxime afficiebat, vomitum cierent. Omnia fere, ut ex eorum enumeratione satis perspicuum est, medicamenta vere stimulantia sunt, multaque ex iis alias corporis partes præter ventriculum satis efficaciter stimulant; quod de intestinis imprimis verum et notabile est, ita ut omnia validiora medicamenta vomitoria parva quantitate data, qualis ventriculum ad abnormem et inversum motum qui ea ejiceret stimulare non posset, si per ostium ventriculi inferius transierint, et intestinis admota fuerint, hæc quoque multum stimulent, et haud raro vehementem alvi purgationem efficiant. Sic, verbi gratia, multa medicamenta ex stibio aut argento vivo parata, et *ipécacouba*, quamvis merito inter vomitoria recenseantur, tamen ita adhiberi possunt, ut nullum vomitum moveant, et bona cathartica fiant.

Horum,

Horum quoque nonnulla, et etiam alia, veluti scilla, si minore adhuc copia sumpta fuerint, quam vel vomitum vel alvi purgationem ciere possit, alias sæpe partes stimulant, aliasque sic exinanitiones, veluti urinæ, aut sudoris, aut salivæ, efficiunt. Sæpe etiam medicamentum vomitorium nimis validum, et vomitum et alvum ciet: et pari fere ratione, catharticum nimis acre vomitionem una cum alvi purgatione efficit. Quin et omnia fere cathartica, si nimia copia data fuerint, vomitum movere solent, ita ut quodam sensu vomitoria dici possent. Hinc facile constabit, vires hujusmodi medicamentorum non adeo esse speciales ac quidam medici sibimet persuaserint. — Nihil ad rem pertinet quædam ex vomitoriis in venas infusa ventriculum plane afficere, vomitumque ciere: constat enim per experimenta haud adeo felicia, ut repeti mereantur, multa acria medicamenta, vomitoria pariter atque cathartica, et quidem multas alias res quæ lenissimæ viderentur, in sanguinem ita infusa, totum

tum corpus sæpe mirum in modum convellere, et vomitionem imprimis et alvi fluxum efficere. — Non tamen idcirco negandum est ullam specialem convenientiam inter quædam medicamenta vomitoria et ventriculum intercedere, aut hunc esse magis sentientem aut irritabilem quam intestina, et ita majorem quantitatem medicamenti cujusvis aut acriora medicamenta, tolerare. Perspicuum enim et certum est, ventriculum a variis rebus multo magis et multo facilius affici quam intestina; et quædam ex medicamentis quæ utraque vehementissime afficiunt, veluti *tartarum emeticum*, aut *ipecacuanham*, alias partes, veluti cutem, aut linguam, aut oculum, quæ certe neque sensu neque mobilitate carent, vix aut ne vix quidem stimulare. — Neque demum mirum est eadem remedia et ventriculum et intestina multum afficere, et sic vomitoria nunc alvum solvere, cathartica nunc vomitum ciere, cum fabrica iis partibus adeo similis est, ipsæque artificio conjunguntur nexu non modo vi-



cinia et communis officii (353.), sed acutissimi sensus et consensus egregii.

1377. Præter vero hæc jam recensita, multaque alia similia medicamenta, sunt et alia quædam remedia quæ vomitum ciere possint. Sic certi motus, navigatio imprimis, vel gestatio in curru, vel rotatio capitis aut universi corporis, quales scilicet vertiginem inassuetis inducunt (264, 8.), nauseam et vomitum sæpe movent; conjunctissimæ enim sunt istæ affectiones, ita ut vertigo nauseam, nausea vertiginem, facillime creet, et utraque ideo ab iisdem causis sæpe inducatur. Sunt qui credunt navigationem, frequente vomitione, et nausea fere perpetua, quam in non aliutis per longum tempus sæpe efficit, in quibuldam morbis egregie prodesse. Et proinde, si talem medendi rationem experiri convenit, non alio modo tutius quam navigatione, diuturna nausea et crebra vomitio excitari potest: rarissima enim exempla sunt ubi nausea maritima, quam-

vis ingratissima et vehemens, corpori multum nocuerit; nemo vero similem et æque diuturnam nauseam, per medicamenta excitatam, aut experiri volet, aut si voluerit, tolerare poterit.

1378. Irritatio quoque faucium, veluti immisso digito vel penna, propter consensum has partes inter et ventriculum et magnos musculos respirationis qui in vomitu (666.) convelluntur, nauseam, et ad vomendum nixum, sæpe etiam plenam vomitionem, efficit; hinc sæpe utilis ad promovendam actionem medicamenti in difficulter vomentibus; haud raro etiam nullo assumpto medicamento sufficit ad vomitum ciendum in iis qui facile vomunt, si modo ventriculus vel plenior (1360.) fuerit, vel a cibis crudis aut corruptis gravatus, et nauseabundus.

1379. Vomitoria medicamenta plurimos salutares effectus præstant non modo in ventriculo ipso, partibusque vicinis, aut

conjunctis, aut conspirantibus, verum et in remotissimis sæpe, et quidem in toto corpore. Horum effectuum alii manifesti, et simplices, et intellectu facillimi sunt; alii satis obscuri et explanatu difficiles; omnes autem scire oportet quamvis ratio qua fiunt vel prorsus lateat, vel parum accurate intelligatur; nimirum quia hoc plane fundamento nititur eorum in morbis tractandis administratio.

1380. Imprimis igitur perspicuum est ea ventriculum efficaciter et subito exinanire.—Hinc plane utilia esse debent siquid venenati, vel infalubris saltem, in eum receptum fuerit, vel si ventriculus ipse cibi corrupti onere gravatus atque oppressus fuerit, quod sæpe accidit, et facile dignoscitur, vel ex causis præcedentibus mali, puta crapula aliqua, aut cibo minus idoneo, vel ex signis multis et manifestis ventriculi male se habentis, qualia sunt defectus cibi appetitus, multa sitis, frequens ructus, sive acidus sive putridus, nausea  
aut



aut vomitus naturalis, inflatio et dolor ventriculi, anxietas, inquietudo, vertigo, gravitas vel dolor capitis, lingua fordida, prævus fapor oris, præsertim mane, &c. quæ omnia in febre pariter multisque aliis morbis passim observantur.

1381. Promovent quoque secretionem vel fluxum humorum ventriculi et intestinorum, partiumque vicinarum aut conspiciantium, veluti oris, cujus saliva sub vomitionem (666.) copiosissime fluit, vel jecoris, unde sæpe inter vomendum, præsertim si vomitus vehemens et diuturnus est, plurimum fel elicitur.—Hinc igitur utilia in defectu istorum humorum, qualis interdum accidisse creditur, unde oris ficcitas, tarda et prava cibi concoctio, et alvi durtia; vel in obstructo felle, quod minime rarum vitium est, et morbum regium facit. In hujusmodi malis prodesse videntur partim stimulo suo ventriculo admo-  
to, perque consensum cum aliis partibus communicato, partim vehemente agita-  
tione

tione et inverso motu ventriculi et superioris partis intestini, partim demum ingente pressura, quæ, inter vomendum, a septo transverso musculisque abdominis valide contractis, omnibus quæ in abdomine continentur partibus datur.

1382. Pari fere ratione in aliis obstructionibus viscerum abdominis, præter illas quæ morbum regium faciunt, vomitiones dicuntur interdum utiles fieri, scilicet quæ motum sanguinis ibi sæpe languidum variis modis haud parum expediunt, partesque affectas probe agitant et excitant. Hinc quoque aliqua saltem ex parte pendere videtur beneficium istud quod multi ægri *dyspepsia* aut *hypochondriasi* laborantes ab iis acceperint. — De usu vomitionum ad rumpendos abscessus in gutture, aut pulmone, aut ventriculo, &c. vix opus est verba facere; non quia dubium sit eas id sæpe esse effecturas, aut incredibile idem cum felice eventu interdum fuisse effectum, sed quia rarissima sint exempla ubi tali  
opus

opus est auxilio, et rariora adhuc, in quibus remedium adeo asperum et periculosum experiri, aut convenit, aut licet; nimirum quod non modo abscessum qua non oporteret rumpere posset, sed ægrum forte, præsertim debiliorem, statim suffocare.

1383. Vomitiones autem non modo per abdomen sanguinis motum promovent ejusque viscera stimulant, sed totum *genus nervosum* quodammodo excitant, et partim hoc stimulo, partim magnis nixibus et agitationibus quas efficiunt, pulsus festinant, motumque sanguinis per totum corpus accelerant, et simul æqualem ejus distributionem efficiunt, congestiones aut distributiones abnormes tollunt, variasque secretiones et excretiones, præsertim sudorem aut exhalationem per cutem, promovent, et actionem vasorum absorbentium (1340.) intendunt:——hinc sæpe utiles in generali languore aut torpore, aut paralyfi, aut insania, aut obstructione mensium, aut cohibita exhalatione per cutem, aut quibusdam



quibusdam sanguinis profluviis, aut *apoplexia*, aut hydrope vario, &c.

1384. Magnopere profunt in omnibus fere febribus, præsertim primis diebus, quamvis nihil obftet quo minus omni earum tempore postulante ægrotantis conditione præscribantur. Tanta vomitionum utilitas in talibus morbis, neque stimulo quem *generi nervoso* impertiunt, neque incitato sanguinis motui, (jam forte nimis vehementi), tribuenda est, neque fane hætenus bene explorata aut intellecta videtur.——Sunt quibus persuasum est causam proximam febris in *spasmo* seu contractione valida et ægre superanda vasorum extremorum, et præsertim cutis, maxime consistere, et vomitiones non alio fere modo in isto statu prodesse, quam solvendo illam contractionem, motumque sanguinis per minuta et extrema vasa denuo expediendo. Et hoc facere creduntur per consensum aliquem mirabilem et manifestum, quamvis explanatu difficillimum, cutem  
inter

inter et ventriculum, ita ut hujus affectio illius statum multum mutet, ipsamque solvat et laxet, et exhalationem per illam expediat, forte etiam sudorem eliciat, et actionem vasorum ejus intendat, majoremque demum sanguinis derivationem eo efficiat, et sic liberam, æqualem, naturalem, et lenem sanguinis motum per totum corpus restituat.

1385. Utcunque obscura atque incerta magna hujusmodi doctrinæ pars videatur, hoc saltem certum et manifestum est, in omni fere febre, præsertim primis diebus, cutem arefcere, ita ut vix dubitari possit exhalationem per eam valde reprimi, eandemque postea, decedente febre, iterum humescere, et mollem fieri; et vomitoria medicamenta tempestive adhibita talem cutis statum sæpe efficere, cum insigni et subito totius morbi levamine; ita ut satis verisimile sit nauseam et vomitionem, magna saltem ex parte, tanti beneficii causam fuisse.

1386. Multum vero abest ut hac sola ratione vomitoria in febribus profint, eorumque usus opinionibus de causis febrium nitatur: aliis enim neque dubiis modis sæpe utilissima fiunt; ventriculum, rarissime non male affectum (648.), gravi et valde nocivo onere liberant, et sic naturalem nauseam et vomitum summovent (668.), et anxietatem (189.) minuunt, et dolorem capitis (650.) levant, et vires alioquin plurimum exhaustiendis conservant (377.), et somnum aliquando conciliant (393, 8.), et ægrum a vehemente et perniciosissimo alvi fluxu (656.), qui in istiusmodi morbis sæpe accidit, plerumque tuentur.

1387. Observatu dignum est, vomitoria medicamenta adversus febres tam mirabiliter valere, ut vehementissimas etiam interdum quam citissime solvant, et nonnullas pessimi generis instantes, vel jam ingruentes, arceant vel depellant, et sæpe etiam multum profint, quamvis tam exigua quantitate



quantitate sumpta, ut nauseam tantum citra ullum vomitum moveant: hinc satis perspicuum est, ea non solum exinanito ventriculo, et quæ inde profluant beneficiis (1384.), sed aliis quoque modis, auxilio esse.

1388. Cavendum autem ab errore valde periculoso de usu vomitionum in tractandis febribus, in quem multi clinici incidisse videntur, qui eas fere promiscue in omnibus ægris movere solent, quasi semper convenirent, et omni periculo et incommodo carerent. Rem vero longe aliter se habere experientia satis superque demonstravit; sua enim neque levia incommoda habent, et sæpe periculo non vacant, siue initio febris, cum nimia sanguinis abundantia, et ingens impetus, forte caput versus, adsunt, siue sub finem, cum vires ægri jam fractæ et pene exhaustæ sunt, tentatæ fuerint, siue demum per totum morbi decursum nimis frequenter repetitæ, vires ejus, quibus morbus pepercisset, plus æquo attenuaverint. Quapropter, neque in violenta

febre prius vomitorium medicamentum dare convenit quam sat sanguinis detractum fuerit, neque in summa infirmitate tam vehemens remedium experiri, neque idem jam frustra tentatum nimis sæpe repetere, nimirum quod non semper febrim discutere poterit et non poterit non corpus multum infirmare.

1389. Prodest etiam vomitio in multis affectionibus ventriculi et intestinorum, nausea, vomitu, singultu, alvi fluxu, *dy-senteria*, &c. partim expulsa materia aliqua acri et morboſa, quæ morbum vel faciebat vel ſaltem intendebat, partim æquali sanguinis et vis *nervosæ* fluxu, et libera percutim exhalatione quam efficit, et interdum fortasse inverſio ventriculi et ſuperioris partis intestini motu, qui nimium et acceleratum reliqui intestini motum reprimere ſaltem vel forte invertere poterit.

1390. Vomitiones a nonnullis creduntur vi aliqua *antispasmodica* pollere, non  
modo

modo in omni genere febris, et in morbis intestinorum, verum insuper in veris convulsionibus magnorum muscutorum trunci corporis aut artuum. His forte nonnunquam auxilio esse possunt vel magno suo stimulo et agitatione corporis, vel nova et saniore sanguinis et vis *nervosæ* distributione, quam efficiunt; vel si tales convulsiones a vitiis aut irritationibus ventriculi originem ducerent, (quod minime rarum est), tum facile constabit quo pacto vomitiones sint profuturæ.

1391. Frequens vomitio corpori multum nocet: ventriculum imprimis valde infirmat, concoctionem ideo ciborum corrumpit, et sic quodammodo necessaria fit: vires quoque exhaurit, et nimiam sanguinis in capite congestionem, vel ad id forte derivationem, facit.

1392. Evitanda est (nisi res valde urgeat) non modo in valde debilibus aut mobilibus non secus ac aliæ exinanitiones,  
fed



fed et in iis qui longum collum et guttur angustius habent (nimirum qui difficulter vomere solent), et in magna sanguinis abundantia, præsertim ubi congestio aliqua in capite vel auctus hoc versus impetus adest; vel si necessaria videtur, tum sanguis prius mittendus est: et in ventriculi aut intestinorum inflammatione, aut dolore colico, aut demum in diuturna et pertinace alvi duritia, satis manifestis de causis vomitio semper periculosa est.

1393. Tutior est multo quam primo aspectu videretur, in gravidis, et phthificis, iisque qui sanguinis profluviiis, veluti a naribus, aut pulmonibus, aut ventriculo, aut utero, laborant; et sæpe in gravissimo dolore capitis et tuta et necessaria, nimirum qui haud raro a statu ventriculi oritur.

1394. Facilius vomitur pleniore, ægrius vacuo ventriculo; hinc plerumque vespere, rarius mane tentatur; cum vero aliquid  
boni

boni ab agitatione aut stimulo vomendi expectamus, non alienum erit vacuo fere ventriculo, et tempore matutino, vomitionem ciere.

1395. Juvat, et plerumque oportet, (cum ventriculum probe exinanire cupimus), aliquantum bibere ad illum implendum vel distendendum (1360.), quo plenior, et facilior, et promptior, vomitus fiat. Cavendum autem ne plus æquo bibatur; quoniam tunc aliquando nullus fieri potest vomitus, et ingens oppressio, et anxietas, et dolor, et immanes et crudeles nixus, et fane periculum non leve, accidunt a ventriculo nimis distento, et simul forte circa sua ostia constricto, ita ut nihil ejicere possit. Adulti fere libram unam alteramve idonei potus (1396.) tuto et non inutiliter bibunt ad promovendum vomitum; raro autem tres libras vel ultra bibere convenit, nisi quod prius haustum erat, jam, aliqua saltem ex parte, rejectum fuerit. Infantes fere bibere nolunt, neque opus

pus est ut cogantur, quoniam plerumque sine tali auxilio facillime vomunt.

1396. Præstat multo ad promovendum vomitum potus adhibere leniter stimulant-  
tes, veluti infusiones florum chamæmeli,  
aut cardui benedicti, aut raphani rusti-  
cani; aut aquam cui pauxillum pollinis  
sinapi vel *alcali* volatilis admistum fuerit,  
quam puram tepidam, quoniam plus hu-  
jus utpote mitioris requiritur, et ventricu-  
lus, et majore et diuturniore distentione, et  
vi solvente aquæ tepidæ, magis infirmatur  
et læditur.

1397. Raro necessarium est ulla medi-  
camenta dare ad resolvendam, aut attenu-  
andam, aut mobiliorem reddendam mate-  
riam quæ evomi debet; quamvis sane  
nonnunquam ventriculus materia adeo  
glutinosa et tenace gravetur, ut communia  
medicamenta parum respondeant, et ideo  
validioribus plane opus sit, quibus multo  
magis quam solventibus confidere licet.

1398. Præter



1398. Præter vero istum similesque status materiæ quæ in ventriculo adest, sunt et quædam ipsius et quidem universi corporis conditiones, quæ effectus medicamentorum hujusmodi valde incertos reddunt; quales sunt torpor, sive specialis sive generalis, et ignota ista conditio *generis nervosi* quæ in infania occurrit.

1399. Quamvis haud raro vomitionem aliquoties repetere conveniat, cavendum est ne quis eam repetere suscipiat donec nihil amplius morboſi in vomitu appareat; sæpe enim, veluti in iis qui glutine aut acre ventriculi, vel febre intermittente, laborant, multa materia morboſa reperietur, quamvis vomitus quotidie, vel sæpius in die, repetitus fuerit. Quin et vomitus nimis frequens, infirmato scilicet ventriculo, et læsa alimenti concoctione, talem morboſam materiam sæpe gignere videtur.

1400. Prodest sæpe, præfertim in valde infirmis, iisque qui multum agitati fuerint, post vomitum, anodynum dare, quod tantam agitationem componat, somnumque conciliet, viresque reficiat. Tale etiam medicamentum in hoc statu datum, sudori multum favet, quem vomitus solet elicere,

C A P.

C A P. XXXV.

*De remediis catharticis.*

1401. **R**emedia Cathartica dicuntur illa quæ alvum cient. — Horum magna varietas in usu est, ex diversissimis rerum generibus derivata, variisque ægrotantium conditionibus optime accommodata. Quædam enim adeo mitia sunt, ut infirmis tantum et delicatissimis conveniant, neque fere validiores afficiant; alia vero adeo acria et vehementia, ut robustissimis etiam caute admodum et parce dari debeant; alia corpus multum excitant et calefaciunt, alia idem plane refrigerant, motusque abnormes reprimunt; alia igitur in vehemente febre



aut gravi inflammatione, alia in paralyfi aut hydrope, conveniunt; alia quoque in putridis morbis, alia in morbofo acore, recte dantur; alia tarde, alia subito purgant; alia alvum astrictam relinquunt, alia creduntur eam potius solutam relinquere; alia cum magnis doloribus et ventris torminibus, alia facile et fere sine dolore, suo funguntur officio; alia cum magno stimulo et irritatione, parcam et sæpe incertam, alia cum exigua omnino irritatione, copiosissimam alvi purgationem, efficiunt; alia superiorem intestini partem, alia inferiorem, maxime stimulant.

1402. Mitissima hujusmodi remedia sunt, saccharum, multæque res quæ aliquid sacchari aut saccharo similis in se continent, serum lactis, cerevisia mustea, cerevisia mitis, multi fructus maturi et dulces, mel, *manna*; multa oleosa blanda et mitia, veluti oleum olivarum aut amygdalarum, aut jus pingue, aut oleum *ricini*, (cui tamen multo majores vires quam  
meris

meris oleis contingunt), fapo quoque, et sulphur, multæque res acidæ vel acefcentes, fructus fubacidi, *tamarindi*, fruges pleræque efculentæ, lac *ebutyrtum*, cryftalla *tartari*, multi fales *neutri*, veluti fal *Glauberi*, &c. *magnesia*, (quæ forte prius in formam falis per acorem, qui in ventriculo fæpe adest, reducitur, quam cathartica fiat), multæque aquæ medicinales, ferratæ, sulphureæ, falſæ, marina, ita ut nonnulli auctores non dubitaverint aquam ipſam, quamvis puram et dulcem, inter leniora medicamenta cathartica recepſere; et demum herbæ quædam, veluti roſa pallida aut viola: his tamen vires valde exigux atque incertæ contingunt.

1403. Validiora ſunt, et magis calefacientia, (priora enim (1402.) refrigerantia habentur), ſinapi, *rheum*, *fenna*, *ſencka*, aloe, *guiacum*, *jalappa*, terebinthina, gummi quædam calida, ammoniacum, galbanum, &c. et, ut nonnulli volunt, fel ſpiſſatum, aliaque medicamenta amara;  
his

his tamen parum fidendum est. Quædam denique medicamenta inter vomitoria jam enumerata, veluti *ipeacacoanha* aut *tartarum emeticum*, hic quoque annumerari possunt.

1404. Acriora adhuc sunt, rhamnus catharticus, helleborus niger, veratrum, colocynthis, scammonium, elaterium, *gambogia*, et similia bene multa, quæ vix opus est recensere. Cum his quoque acribus medicamentis ex herbis desumptis annumerari debent nonnulla ex metallis, argento vivo præsertim et stibio parata. Hæc omnia, quamvis admodum exigua quantitate assumpta, intestina fortiter irritant, alvumque cient, sæpe cum gravibus torminibus, nec raro cum vehemente vomitu (1376.); pulsus quoque sæpe festinant, et corpus haud parum calefaciunt, et interdum mirum in modum convellunt, et intestinis imprimis, partibusque vicinis, nonnunquam insigniter nocent, ita ut multa eorum haud immerito  
jam



jam vel raro præscribantur, vel penitus obsoleverint. Nec verbis opus est, ut omnis medicus satis perspiciat quanta in iis adhibendis prudentia opus sit, siquando, urgente necessitate aliqua, ad talia medicamenta confugere oporteat.

1405. Effectus salutare medicamentorum cathartorum multiplices sunt; et ex his bene perspectis eorum usus in variis morbis facile intelligetur.

1406. Imprimis igitur intestina, et quodammodo ventriculum ipsum, subito et efficaciter exinaniunt; — hinc plane utilia, cum hæc, vel nimio onere gravata, vel acrioribus rebus, sive putridis sive acidis alimentis, sive stercore duro, sive corporibus extraneis, sive calculis in ipsis formatis, sive vermibus in ipsis genitis, læsa et irritata fuerint; cujusmodi aliquid subesse suspicari licet ab alvi duritia, ventris torminibus aut inflatione, frequente desidendi cupiditate, prava cibi concoctione, et  
 sæpe

sæpe in alvi fluxu naturali (656.), et certius adhuc in *dysenteria* (661.) et in *colica*.

1407. Alvi autem purgatio, plena saltem et valida si fuerit, non modo res omnes quæ in intestinis continerentur expellit, sed per stimulum medicamenti iis admoti, et motus validi qui excitatur, omnium humorum qui in ea funduntur (quales sunt mucus, alique succi ipsorum, liquor *pancreatis*, et fel) secretionem et fluxum promovet et auget, et simul majorem sanguinis et *vis nervosæ* derivationem abdomen versus efficit, motumque sanguinis per omnia hujus viscera promovet, et multum humorem tenuem ex sanguine detrahit, et sic exinanitio generalis fit, et tensionem vasorum quæ sanguinem ubique corporis vehunt, minuit, et sanguinis ideo impetum temperat, et alias secretiones et exinanitiones minuit, et actionem vasorum absorbentium excitat atque intendit, et corpus demum multum infirmat. Quod si acriora et calidiora medicamenta data fuerint,

rint, non modo intestina, sed totum corpus satis valide stimulare possunt.

1408. Hinc facile constabit, alvi purgationem in innumeris fere morbis, et quidem diversissimi generis, egregie esse profuturam, si modo rite et prudenter fuerit adhibita; et imprimis in variis obstructionibus viscerum abdominis, in morbo regio, in torpore intestinorum, et quidem in torpore generali, et in multis morbis remotarum partium, veluti capitis, paralyfi, *apoplexia*, morbo comitiali, infania, phrenitide, dolore capitis, (multiplice quidem malo, cujus in omni fere genere alvus liquidior juvat); in omni etiam morbo in quo nimia humorum abundantia nimis usque impetus accidunt, et ubi magna et prompta exinanitione opus est, veluti in malis quæ a suppressis solitis exinanitionibus proveniunt, et in febribus variis, multisque inflammationibus, et sanguinis profluviiis, et *variola*, et *rubeola*, &c. et in hydrope ad educendam aquam, aucta va-



forum absorbentium actione, et in nimio et morbofo sudore, aut urinæ aut salivæ fluxu, ad reprimendas has exinanitiones.

— In multis quidem hujusmodi morborum alvi purgatio caute tentanda est, nec raro potius evitanda, scilicet quæ neque in omni exemplo, neque omni morbi tempore, satis manifestis de causis, pariter conveniat.

1409. Maxime solet prodesse corporibus plenis, crassis, obesis, iisque qui copioso utuntur victu et parum se exercent, aut quibus alvus natura liquidior, veluti infantibus, quacunque de causa astrictior facta fuerit; vel si hujusmodi ægris minus profuerit, saltem parum nocebit, quippe qui talem fere exinanitionem bene tolerant.

1410. Credita fuit olim, et adhuc apud multos creditur, utilissima esse, et vix non necessaria, primo vere, quo scilicet tempore sanguinis nimia abundantia, si qua adsit, manifestissimis

manifestissimis signis semet prodere solet. — Sed de tali medicamentorum usu satis jam dictum (1345.) est. — Rationi autem pariter atque rei factæ consentaneum est, leniorem alvi purgationem temporibus et regionibus calidis quam frigidis magis esse necessariam.

1411. Diu solenne fuit, (neque sane aut populus aut omnes medici hætenus istum morem prorsus abjecerunt), post multos morbos acutos catharticum medicamentum dare, et idem interdum sæpius repetere; quo nihil fere inutilius excogitari potest, neque in plerisque exemplis perniciosius corpori jam plus satis purgato et valde infirmato. Quod si interdum, decedente morbo acuto, et gravioribus ejus signis sublatis, vel saltem sublevatis, quædam adhuc molesta sunt, et tali remedio egent, nihil sane obstat quo minus adhibeatur. Hujusmodi vero necessitas multo rarior est quam vulgo creditur, et longe aliam rationem habet.

1412. Periculosa est alvi purgatio infirmis, mobilibus, gracilibus, (ut fertur), phthificis, gravidis, puerperis, fœminis (ut iis sanctissime persuasum est, non fecus ac omnes aliæ exinanitiones) quibus menses vel fluunt vel instant, iisque demum qui vel laborant *hamorrhoides* vel huic saltem morbo obnoxii sunt, præsertim si acrius sumptum fuerit medicamentum, veluti aloe, quæ solutu tardissima ad anum usque suam deducit acrimoniam : et caute admodum tentanda est, etiam per medicamenta lenissima, in ventriculi aut intestinorum inflammatione, aut in quavis horum teneritudine, veluti a *dysenteria*, aut alvi fluxu diuturniore.

1413. Nimis frequens alvi purgatio, quamvis primo necessaria, multum nocet, cum universo corpori, quod valde infirmat, tum maxime intestinis ipsis, quæ interdum præter naturam debilia, et tenera, et irritabilia reddit, sæpius vero torpida et tarda; unde alvi duritia, et necessitas al-



vi subinde per medicamenta ciendæ. —  
Sanguinem quoque ipsum, non aliter quam  
frequens illius detractio, tenuem et palli-  
dum facere solet.

1414. In alvi purgationibus ratio non  
levis habenda est peculiaris constitutionis  
ægri, cum quod ad naturam medicamen-  
torum attinet, tum quoque quod ad ho-  
rum quantitatem, mixturam, præpara-  
tionem, et demum tempus quo debent as-  
sumi.

1415. Commode sumuntur cathartica  
vel hora somni, vel bene mane, prout ipsa  
promptius vel tardius alvum moveant.

1416. Prodest sæpe medicamentum non  
omnem simul exhaurire, sed divisis por-  
tionibus, per idonea intervalla, paulatim  
sumere; sic enim neque ventriculus plus  
æquo gravatur, neque vomitus accidit,  
neque fere plus satis sumitur, neque intes-  
tina nimis irritantur, et alvi purgatio  
multo facilior, et quidem certior fit.

1417. Medicamenta

1417. Medicamenta quæ fluida forma hauriuntur, scilicet vel prorsus soluta, vel saltem plurima aqua diluta, promptius, facilius, et certius purgare solent, quam quæ dura, vel solida saltem, devorantur.

1418. Quapropter cum solidiora data fuerint, præsertim si simul acriora sunt, diluendum est multo potu tenui et leni, decocto avenaceo, fero lactis, jusculis levibus, et similibus. Hoc modo medicamentum vel solvitur, vel bene diffunditur in intestinis, et his minus nocet, et tormenta vel nulla vel levia, et dejectiones copiosissimas efficit. Minime vero diluendum est cum aliquid beneficii a stimulo et irritatione medicamenti expectamus, veluti in hydrope, in quo non tantum ad purgandam alvum, quam ad excitandum corpus, et augendam actionem vasorum reforbentium, cathartica dari solent.

1419. In gravi et diuturna alvi duritia, non tantum medicamentis per os haustis  
(quæ

(quæ fane periculo suo (1412.) non carent) fidendum, ut alvi ductio per idoneas lotiones negligatur, quæ nihil periculi in se habet, et actionem medicamentorum tutiorem et faciliorem reddit.

1420. Cum nausea vel vomitus urget, non modo per exiguas portiones medicamenta cathartica dare oportet, sed simul, vel brevi antea, aliquid anodyni tentare, vel (quod fere optime respondere solet) tale medicamentum per clysterem in intestina infundere, ad compescendum ventriculi tumultum, ut catharticum, alioquin mox rejiciendum, in eo retineatur.

1421. Sæpe etiam prodest, veluti in magno dolore, aut diuturna vigilia, anodynum una cum cathartico dare, scilicet quod hujus actionem non tantum impedit, quam tardiores reddit.

1422. In valde debilibus et mobilibus, juvat sæpe post alvi purgationem, non secus



cus ac post vomitum, et iisdem de causis, anodynum dare.

1423. Inter alvi purgationem ægri a frigore facillime læduntur, non magis forte propter corpus tunc infirmatum, et solutum, et languens, quam propter cursum humorum præter solitum ab externis derivatum, et ad internas partes versum; neque ideo inutile est frigus tunc temporis diligenter evitare.

1424. Haud parum sæpe præstat alvum per lotiones seu clysteres ducere, quam per medicamenta ore devoranda purgare.

1425. Alvi ductio enim promptius, et certius, et facilius, et mitius reperitur auxilium quam alvi purgatio, et ideo valde infirmis et irritabilibus magis convenit, præsertim cum alvum non tantum purgare, quam semel solvere cupimus, quod sæpe necessarium est cum copiosior purgatio perniciosissima foret. Effectus vero  
medicamenti

medicamenti per os sumpti adeo sunt incerti, ut dum huic alvum ne minimum quidem moverit, illum vehementissime purgaverit.

1426. Lotiones vero per anum infusæ, plenius intestinum satis efficaciter exinanunt, partim stimulo suo, (si acriores fuerint), qui id excitat ejusque motum accelerat, et secretionem et fluxum humorum qui in id funduntur promovet, et defidendi cupiditatem inducit; partim quoque mollito aut diluto stercore duriore, viisque per quas excerni debet fortis, et madefactis, et quasi inunctis, quo facilius dejectio fiat.

1427. Ad hunc finem medici adhibere solent aquam tepidam, multaque decocta emollientia, et mucosa et oleosa medicamenta, et omnia fere cathartica, a lenissimis ad acerrima, prout leni aut acriore stimulo opus fuerit. Fumus *Nicotianæ* creditus est validissimum stimulum intestinis impertire, sed sua, neque sane levia, ut jam

(1368.) expositum est, incommoda habet. Stimulus plerumque satis efficax et omnino tutus dari potest, lenissimis rebus ea quantitate infusis ut plenius intestinum aliquantum distendant. Tantum quidem aquæ per idoneum siphonem interdum immissum est, ut hæc non modo plenius intestinum impleret, sed, superato isto renixu qui ab imperfecta valvæ *coli* oriri posset, tenuius intraret, perque id ad ventriculum ascenderet, ex eo evomenda. Sed hoc, satis manifestis de causis, non temere est tentandum. Non multum ab hoc alienum fuit vetus remedium, aëre per follem immisso intestina distendere.

1428. Profunt vero lotiones non modo exinanito pleniore intestino, sed hoc quoque partibusque vicinis quasi balneo quodam fœtis atque solutis, et *spasmo*, si quis forte adesset, liberatis, et sanguinis motu per anum ventrem expedito. Hinc utiles in doloribus colicis, et calculosis, et in stranguria, &c. et in inflammationibus aliisque



liisque morbis remotarum partium, veluti capitis, aut pectoris; et quidem in omnibus, vel plerisque saltem, morbis, ubi cathartica medicamenta per os sumpta prodesse solent.

1429. Hic quoque observari potest multa medicamenta, præter cathartica, aliasque res, eisdem fere in corpore effectus præstare si in intestina per anum infusa fuerint, ac solent habere per os devorata; ita ut clysteres medicati merito in magno usu sint. Hoc modo enim nutrientia, diluentia, refrigerantia, anodyna, roborantia, antiseptica, stimulantia, &c. commodè sæpe dantur, cum aliter dari non possent. Multi enim nervi, sensusque valde acutus, inferiori non secus ac superiori intestini parti insunt, neque desunt vasa absorbentia et lactea.

1430. Ante clysterem medicatum sæpe necesse est communem præmittere, ad excitandum plenius intestinum, quo red-

dito, alter immittendus est. Qui vero retinendi sunt, ad paucas tantum uncias infundi debent, ne distento et irritato intestino (1427.) brevi rejiciantur.

1431. Lotiones plerumque tepidæ immittuntur, ut neque calore, neque frigore suo, intestino noceant: nihil vero obstat quo minus (ubi tali opus est auxilio) frigidissimæ infundantur.

1432. Nimis frequens lotionum usus, aut lotiones nimis acres, pari ratione nocent ac nimis frequens alvi purgatio (1413.), aut medicamenta nimis acria (1404.).

1433. Medicamenta cathartica interdum solida forma in anum immittuntur, et hoc modo adhibita, *suppositoria*, vel *glandes* dicuntur. Horum effectus boni pariter atque mali ex jam dictis (1425, 32.) facile intelligentur. Interdum adversus vermiculos illos *ascarides* dictos qui in imo intestino  
solent

solent nidulari, interdum ad provocandam hæmorrhoidem, ubi hæc male suppressa fuerit, vel aliquid boni ab ipsa fluente expectatur, haud inutiliter adhibita sunt. Non minimum vero eorum incommodum est, acriora præsertim si fuerint, quod fluxum istum, non omnibus aut utilem aut tutum, intempestive nonnunquam inducant.

1434. Aliquando observatum est, odores, partesque volatiles medicamentorum quorundam cathartorum, nonnullis delicatioribus alvum brevi et satis valide solvere, et fertur populos quosdam rudes tali alvi purgatione vulgo uti. Medici vero huic nequeunt confidere: non desunt tamen qui testantur, quædam medicamenta infantes nonnunquam bene purgasse, cum parvulorum abdomina iis probe illita fuerant; et hoc forte interdum ufui esse poterit.

1435. Haud parum sæpe prodest ad solvendam alvum, sive medicamentum antea datum tormina tantum citra dejectionem effecerit,



effecerit, five tormina a statu intestinorum morbofo sponte nata fint, abdomen, vel forte totum corpus, aqua aliisque rebus calidis fovere. Quod profecto minime mirum est, cum calor tanta vi gaudeat corpora nostra relaxandi, *spasmusque* resolvendi.

1436. Superest et alia ratio alvum solvendi, quæ quidem minime certa est, quamvis haud raro mirabiliter responderit, multosque ægros pene desperatos a suo morbo liberaverit. Hæc autem nihil aliud est quam frigidam partibus inferioribus subito aspergere. Tantus enim inter pedes aliasque partes inferiores et intestina consensus intercedit, ut nonnullis, si pavimento tantum frigido aliquandiu institerint, vel si pedes madefactos, vel quacunque de causa frigidos habuerint, alvus statim fere fluat. Quod si frigus subito et inopinato pedibus et cruribus admotum fuerit, efficacius adhuc alvum ciet, cum non modo consensus per nervos externas inter  
et

et internas partes, sanguinisque cursus mutatus, sed ingens simul et generalis stimulus juvare possit. Asperum quidem remedium videtur, neque leviter tentandum, sed minime periculosum, neque ideo negligendum ubi usitatiores parum valerint.

C A P.

C A P. XXXVI.

*De remediis diureticis.*

1437. **R**emedia *Diuretica* dicuntur illa  
quæ urinam movent. Pluri-  
ma quidem medicamenta aliaque remedia  
tali facultate gaudent, ut ex innumeris fere  
observationibus, nec paucis experimentis  
de industria factis, fatis constat; neque  
dubium est multos a gravissimis aliquando  
morbis ope remediorum hujusmodi peni-  
tus convaluisse. Verissimum tamen est,  
et maxime dolendum, eorum effectus adeo  
esse incertos, ut nemo medicus polliceri  
possit se ægro cuiquam per ulla medica-  
menta urinam esse moturum; sæpe enim  
quæ



quæ jure validissima habentur, urinam ne minimum quidem movent.

1438. Quo facilius eorum actio intelligatur, recordandum est, multum tenuem humorem, et omnem fere falem qui nimis in sanguine inesset, multamque materiam corruptam et acrem varii generis, per renes excerni.

1439. Hinc non ægre cogi potest, multum potum tenuem, variosque fales, multaque acria medicamenta in corpus recepta, urinam esse citura. Et profecto omnia efficaciora medicamenta *diuretica* sunt vel potus diluentes, vel fales aliqui, vel varia acria, quæ cum sanguine ad renes delata hos stimulent, et ad secretionem solito copiosiore excitent. Sunt quidem qui opinantur, stimulum idoneum aliis et satis remotis partibus, veluti intellinis aut cuti admotum, cum renibus ita posse communicari ut urinam moveat; et aliquid hu-

jusmodi interdum accidere fatis manifestum est.

1440. Actio quoque salium, et omnium acrium medicamentorum, valde promovetur bibendo multum potum diluentem: hoc autem in quibusdam morbis non semper convenit, et minus adhuc sæpe convenit diluentia sola dare ad provocandam urinam; quamvis enim hæc aliquando plus augeant urinam quam portione potus qui haustus fuerat, et sic vere *diuretica* fiant, id minime perpetuum est, et nisi fit nihil fere proficitur, neque sane tantum potus incommodo aut interdum periculo aliquo carebit.

1441. Observandum est actionem omnium *diureticorum*, diluentium pariter, et salium, et aliorum acrium, pendere multum a statu corporis quod ad calorem vel frigus, exercitationem vel quietem; omnis enim calor, et vehemens exercitatio, exhalationem per cutem et sudorem insigniter

niter promovent et augent, et urinam pro rata parte cohibent; frigus vero, et lenior exercitatio in aëre frigido, contrarium prorsus effectum habent; quo fit ut omnia fere *diuretica* medicamenta ita adhiberi possint, ut pro urina sudorem eliciant; omniaque fere ad sudorem eliciendum præscribi solita, urinam aliquando moveant.

1442. Singula vero medicamenta *diuretica* quod attinet, adeo numerosa sunt ut ægre recenseantur; quapropter sat fuerit præcipua eorum genera enumerasse. Hæc inter imprimis (1439.) venit aqua pura, et omnis fere potus, quamvis mitissimus, veluti serum lactis, multæ infusiones herbarum aliarumque frugum, multæque aquæ medicinales sua natura minime acres. Potus vero qui aliquid acrimoniæ in se habent prioribus plane efficaciores sunt; quales sunt cerevisia tenuis et acris, et omnis sane cerevisia vetustior et jam ad acorem vergens, et multa vina aspera, ve-



luti *Rhenanum*, et potus noster *punch*, et similia.

1443. Salium omne genus ad ciendam urinam nonnihil valet; ex *acidis* vero, *vegetabile*, veluti acetum, aut succus citreorum, maxime in usu est, et fossilia raro præcipiuntur, quamvis non dubium sit unum saltem ex iis, nitrosum scilicet, simili vi pollere: sal quoque succini a nonnullis multum laudatus est; et crysalla *tartari* non immerito frequentissime adhibentur. Ex *alcalinis*, fixa pro *diureticis* sæpius præscribuntur, et præsertim fossile, cujus vires haud exiguae creditæ sunt, sed parum certæ reperiuntur; volatile, utpote quod corpus nimis excitet, et sudorem elicere soleat, ad movendam urinam raro datur.— Ex *neutris* demum salibus, quamvis omnes nonnihil valeant, nitrum forte optimum est; sal ammoniacus vero, et sal *polychrestus*, et *spiritus Mindèri*, et haustus *Riverii*, &c. suos laudatores habent. Iluc quoque referri

ferri debent aquæ illæ medicinales quæ aliquid falis *neutri* continent.

1444. Multæ herbæ acres varii generis inter *diuretica* recte enumerantur; veluti finapi, raphanus rusticanus, allium, scilla, daucus, genista, *seneka*, *pareira brava*, *colchicum*, &c. Multa quoque olea *essentia-lia* herbarum, vel balsama, simili vi gaudent, veluti terebinthina, oleum juniperi, &c. Herbæ etiam haud paucæ amaræ, et quidem vere astringentes, veluti *uva ursi*, huc a nonnullis relatæ sunt: sed de harum viribus parum constat.

1445. Stimulantia medicamenta ex animalibus derivata (1191.), *millepedes*, cantharides, &c. inter *diuretica* semper recensentur; et certum est cantharides omnes fere partes quæ urinæ secretioni et excretioni inserviunt acerrime stimulare, non sine gravi incommodo, vel etiam periculo, si incautius adhibitæ fuerint. Nihilominus vero plurimum abest ut urinam efficaciter moveant,

moveant, et ideo hoc consilio raro præcipiuntur.

1446. Quamvis multa et fatis acria medicamenta stimulantia ex metallis deriventur, quæ forte ita adhiberi possent ut urinam cicerent, talia medicamenta vix inter *diuretica* enumerantur, et pauca eorum ad movendam urinam adhibentur. Argentum vero vivum hic optimo jure recenseri potest, non quod vi ulla speciali gaudeat renes irritandi et urinam movendi, (bene enim notum est id alias partes aliasque secretiones facilius et magis afficere), sed quia toti corpori, omnibusque præsertim partibus fecernentibus stimulo est, qui haud difficulter ita dirigiqueat, ut quasdam præ cæteris excitet. Raro quidem et parce, ut vulgo solet adhiberi, urinam movet; cujus rei non alia videtur esse ratio, quam quod omnes fere qui illo utuntur præter solitum calidi servantur, vel saltem a frigore vel levissimo diligenter defenduntur. Quod si corpus modico frigori objicitur, vel nullus saltem præter solitum

tum



tum calor adhibetur inter argentum vivum fumendum, tum sæpe urinam insigniter movet. Hoc autem certius adhuc facit, si non solum datum fuerit, sed una cum alio medicamento, veluti scilla, quod id quasi ad renes dirigat. Hujusmodi compositio et conjunctio medicamentorum, remedium *diureticum* omnium forte quæ hactenus cognita fuerint efficacissimum præbet.

1447. Postremo, inter remedia *diuretica* recensere oportet oleum commune et mite, quod, ut idoneus auctor testatur, et experientia haud parca ostendit, ita adhiberi potest ut urinam insigniter moveat; nimirum, si abdomen eo inunctum fuerit et probe fricatum. Ratio hujus rei satis obscura est: oleum ipsum nullum stimulum, fricatio, exiguum omnino corpori dare potest; et vix credibile est oleum cuti admotum exhalationem per illam ita impedire ut urina inde copiosior fiat. Notum est fricationes, præsertim cum oleo, actionem vasorum re-  
forbentium

forbentium plurimum augere, et interdum tumores insignes artuum hydropicorum brevi discutere, neque abfimile videtur, magnum illum urinæ fluxum qui in solis fere hydropicis a frictionibus cum oleo observatus est, magna saltem ex parte, fuisse effectum ab aquis denuo resumptis et ad renes delatis.

1448. Effectus *diureticorum* satis simplices sunt, et intellectu minime difficiles; varii autem, secundum naturam variorum medicamentorum quæ data fuerint; quorum scilicet alia (ut ex eorum enumeratione satis perspicuum est) plane calefacientia sunt, alia refrigerantia, alia urinæ acrimoniam haud parum augent, alia eandem minuunt atque obtundunt; ita ut probe constet, non omnia in omnibus morbis pariter idonea futura.

1449. Effectus vero maxime generales omnium hujusmodi medicamentorum, et ipsius exinanitionis quam efficiunt, hi fere sunt;

sunt; impedimenta vel obstructiones quæliacunque urinæ secretioni et excretioni obessent, summovent; renes, et meatus et vesicam urinæ, aucta hujus quantitate, probe eluunt; tenuiores partes sanguine detrahunt, ipsumque ideo spissiore reddunt; et quantitatem humorum circumventium minuunt, eorumque itaque impetum temperant; et majorem eorum ad renes, et minorem igitur ad alias partes derivationem faciunt; et alias secretiones et excretiones, veluti per cutem aut alvum, cohibent; et actionem demum vasorum reforbentium promovent atque intendunt.

1450. Hinc facile intelligetur *diuretica* remedia varii generis multum sæpe esse profutura hydropicis, calculosis, (præsertim cum calculi adhuc valde minuti sunt et in renibus tantum hærent), iisque qui urinam nimis parcam, ejusque secretionem aut excretionem variis de causis impeditam aut obstructam habent, iisque demum



quibus sanguis nimis tenuis et aquosus est. Narrantur quoque, magis forte ob rei verisimilitudinem quam ipsius experientiam, interdum prodesse in nimis sudoribus, aut alvo nimis cita, aut sanguinis nimia abundantia, aut nimio impetu, veluti in febre vehemente, aut distributione abnormi, multisque morbis partium a renibus remotarum, veluti capitis, aut pectoris, qui forte a morbosa sanguinis in iis congestione, aut ad eas derivatione, quodammodo penderent. Dicuntur quoque iis ægris optime convenire, qui, propter infirmitatem aliasque causas, graviores exinanitiones non possint tolerare, et tamen aliquid exinanitionis requirant. — Hæc omnia vero minus firma sunt; et quamvis minime dubium sit febres aliquando et inflammationes, forte et alios quosdam morbos cum insolito urinæ fluxu solvi; tamen minime certum est hunc esse causam soluti morbi, cuius sæpe effectus potius esse videtur, et minus adhuc constat num magnus urinæ fluxus arte excitatus similes in talibus morbis

morbis salutare effectus unquam præstiterit.

1451. Medicamenta quædam inter *diuretica* recensita, veluti diluentia, (scilicet quæ urinam simul copiosiore et mitiorem faciunt), haud parum sæpe profunt in variis irritationibus aut vitiis viarum per quas urina transit; veluti a calculo, inflammatione, ulcere, *gonorrhœa virulenta*, defectu aut conditione morbosa muci naturalis. Hujusmodi vero beneficium viribus eorum *demulcentibus* (1294.), potius quam *diureticis* (1442.), planetribuendum est.

1452. Quamvis *diuretica* rarius ita dentur ut corpori multum noceant, tamen satis perspicuum est prudentia aliqua in eorum administratione opus esse, scilicet quorum abusus haud parum periculosus esse poterit, ut nonnulli plus satis experti sunt, siue nimis acria data fuerint, siue nimis

frequenter repetita. Sic enim totum corpus valde infirmatur, et renes imprimis ita læduntur, ut vel torpidi facti ægre in posterum ad suum munus valeant, vel laxati et soluti nimium humoris, ejusque a sana urina longe diversi, excernant; quod malignus, *diabetes* dictum (726.), molestissimum aliquando reperitur, et sanatu difficillimum. Præterea, irritatio acriorum medicamentorum, meatibus urinæ, et vesicæ, multum nocere potest, eorumque mucum abradere; unde forte stranguria (734, 5.) et similia mala, præsertim in senibus, qui natura etiam istiusmodi malis admodum proclives existunt.



C A P. XXXVII.

*De remediis diaphoreticis et sudorificis.*

1453. **R**Emedia *diaphoretica* apud medicos dicuntur illa quæ exhalationem per cutem promovent; *sudorifica* vero quæ sudorem eliciunt. Conjunctissima autem sunt hæc bina genera remediorum, et vix, ac ne vix quidem, separanda aut distinguenda, cum eadem auxilia, secundum eorum administrationem, utrumque effectum præstare possint, qui sane specie et magnitudine magis quam natura diversus est.

1454. Illorum vero naturam et actionem quod attinet, imprimis observandum est,  
adhuc

adhuc valde dubium esse num ulla existant medicamenta vi aliqua speciali prædita cutem stimulandi, vasaque ejus, quæ vel tenuem vaporem exhalant, vel sudorem fundunt, ad actionem solito validiorem ciendi. Neque profecto stimulantia generalia in corpus recepta ad cutem natura ita diriguntur, ut hanc præ aliis partibus afficiant, quod de nonnullis ex *diureticis* (1439.) et renibus fatis manifestum et certum est.

1455. Alia igitur et haud parum diversa ratione, excretio per cutem (quicum exhalatio per pulmonem comprehendere debet, utpote vel ejusdem, vel simillimæ saltem naturæ) per varia medicamenta promovetur, quorum usus et actio ex jam (702, 19.) dictis de sudore et halitu cutis facile intelligentur. Multus enim humor per cutem usque transit, (præsertim si hæc calida servatur), eo fere liberius et copiosius quo plus in sanguine abundaverit; sanguinis quoque motus incitator, qualiscunque fere ejus causa fuerit, excretionem

nem per cutem promovere solet, nisi aliquid præter solitum huic obstiterit; quicquid porro cutem solvit et laxat, ejusque foramina patefacit, sudori multum favet; et demum, propter consensum illum notabilem qui cutem inter et alias quasdam partes, ventriculum imprimis, intercedit, certæ hujus affectiones, veluti nausea aut vomitus, exhalationem promovent, et quidem sudorem sæpe eliciunt, partim forte aucta vasorum ejus actione, partim quoque soluta ejus compage, ita ut humoribus exhalandis minus resistat.

1456. Quin et experientia fatis ostendit, medicamenta, quæ maxima et certissima vi pollent in hac excretionem promovenda, esse vel diluentia, vel stimulantia, vel sedantia, vel emollientia, vel vomitoria, vel demum varias hujusmodi medicamentorum compositiones et conjunctiones, quales sæpe, variis de causis, plus solent in eliciendo sudore valere quam ulla medicamenta simplicia.

1457. Ex



1457. Ex diluentibus, præter aquam, omnem fere potum tenuem adhibere possumus ad promovendum sudorem; veluti serum lactis, decoctum avenaceum aut hordeaceum, multaque herbarum decocta et infusiones.

1458. Potus vero tenues et simul aliquantum stimulant, qualia sunt serum vinosum, potus ille *punch* dictus, omnis fere liquor fermentatus, vel cui pauxillum medicamenti cujuscvis stimulantis admixtum fuerit, magis adhuc quam priora (1457.) valere solent.

1459. Multi sales, non modo stimulant qui habentur, sed ipsi etiam qui optima refrigerantia medicamenta (1221.) sunt, hic quoque enumerari debent; cujuscmodi sunt *acidum vegetabile*, veluti acetum, aut succus citreorum, nitrum, mixtura *salina Riverii*, &c. Effectus vero *acidi vegetabilis* in sudore eliciendo sunt admodum exigui et incerti; ejusque usus plane tribuendus est opinioni  
parum

parum certæ, sed olim apud medicos receptæ, de vi aliqua sanguinem solvendi et attenuandi, quam illi imputare placuit; nunc vero et opinio ista et medicamentum simul fere obsoluerunt. Nitrum vero a multis medicis, et mixtura *salina Riverii*, et *spiritus Mindereri*, &c. ab omnibus fere quotidie præscribuntur, et profecto non-nihil prodesse videntur, et in refrigerando corpore, et aliquando in promovendo sudore. Sed his etiam, et similibus. utcunque sub nomine *diaphoreticorum* refrigerantium decantentur, parum fidendum est, nisi multo largius sumantur quam vulgo solent.

1460. *Alcali* fixum raro ad sudorem elicendum datur, neque omnino idoneum remedium videtur; volatile autem frequenter, et olim multo frequentius. Hoc autem, solida forma si fuerit devoratum, quamvis corpus multum stimulet et calefaciat, nullum sæpe elicit sudorem, nisi multus simul haustus fuerit potus tenuis; et me-

lius fere fumitur jam multa aqua aliove potu idoneo dilutum.

1461. Ex herbis, omnes fere aromaticæ (1184.), aliæque bene multæ acres, veluti *contrayerva*, *guaiacum*, *seneka*, *serpentaria*, *sassafras*, &c. earumque olea *essentia*lia, et *camphora*, et similia, in eliciendo sudore utilia reperiuntur, præsertim si cum multo potu tenui fuerint assumpta. Sic quoque *sarsaparilla*, quamvis natura admodum lenis, efficax sæpe fit medicamentum.

1462. Ex metallis, stibium et argentum vivum (quorum inter stimulantia et evacuantia medicamenta sæpius jam facta est mentio, et semel atque iterum posthac erit facienda) ad promovendam exhalationem per cutem haud raro adhibentur; et interdum non leniorem tantum exhalationem, sed copiosissimum sudorem efficiunt. Medicamenta ex stibio parata hoc sæpe faciunt, quamvis neque vomitum neque nauseam moverint, quapropter sudor quem eliciunt



eliciunt non solis eorum viribus (1455, 6, 64.) vomitoriis tribuendus est. Argentum quoque vivum, innumeris et quidem diversissimis formis in corpus receptum, (modo quantitas ejus idonea fit), excretionem per cutem plane auget, nisi aliquid præter solitum huic obstiterit. Fertur tamen quædam medicamenta ex eo parata, veluti *mercurium sublimatum corrosivum*, pro *diaphoreticis*, aliis multum præstare, quæ scilicet alias partes magis quam cutem afficere videntur.

1463. Ex sedantibus medicamentis, non modo refrigerantia quædam (1459.) ad eliciendum sudorem sæpe præcipiuntur, quorum sane vires ancipites (1158.), effectusque neque certi neque magni (1459.) sunt, sed *narcotica* etiam, et præsertim opium, quod pro *diaphoretico* aliquando insigniter prodest, partim forte (1212.) laxata cute, ejusque sic foraminibus patefactis, partim quoque somno, vel quiete saltem ægro conciliata, quæ sudori multum faver, et cutem solvit, per naturalem corporis

calorem, et exhalationem perpetuam, quæ tunc circa id quasi accumulatur.

1464. Vomitoria medicamenta, præsertim ex stibio parata, vi haud exigua (sed minime certa aut perpetua) pollent excretionem per cutem promovendi, quamvis etiam minore quantitate sumpta quam quæ plenam vomitionem cieat. De hujus rei ratione, quæ quidem valde obscura videtur, alibi jam dictum est.

1465. Sunt quibus persuasum est similem virtutem in catharticiis medicamentis inesse, et nonnulli non dubitarunt ea generatim inter *diaphoretica* recensere. De nonnullis eorum, veluti *guiaco*, aut *terebinthina*, aut *argento vivo*, &c. res satis certa est, scilicet quæ natura valde stimulantia et calefacientia, ita possunt adhiberi, ut alterutram exinanitionem efficiant; neque absimile est, multa alia ex validioribus catharticiis per suum stimulum duplicem quasi effectum, dejectionem nempe et sudorem,

dorem, aliquando esse præstitura, ut sagax olim clinicus expertus fuisse videtur; quin et interdum sudorem solum efficere, alvumque ne minimum quidem movere possunt, nimirum si vel parcius data fuerint, vel cum aliis quibusdam remediis conjuncta, vel demum si corporis ipsius conditio variæque res externæ sudori favent, et alvi purgationi adversantur. Hæc etiam, quibuscunque remediis fuerit effecta, quamvis primo statim aspectu sudaturis alienissima videretur, interdum non inutilis esse potest, laxato scilicet toto corpore, ita ut facilior sudori per foramina cutis transitus concedatur. — Multum vero abest ut cathartica medicamenta, qualiscunque demum illorum actio fuerit, in promovendo sudore æque profint ac vomitoria; et profecto hoc consilio rarissime adhibentur.

1466. Variæ medicamentorum quæ jam enumerata sunt conjunctiones, in eliciendo sudore plus solent valere quam eadem seorsum



orsum adhibita ; cujus rei ratio aliquatenus saltem intelligetur, si recordamur quot diversis modis (1455.) exinanitio ista promoveri possit. Effectus vero quorundam ex hujusmodi compositis medicamentis, multo majores sunt quam a viribus simplicium ex quibus constant, sagacissimi medici potuissent sperare.

1467. Sic vomitorium medicamentum cum opio junctum, sudorem multo efficacius elicit quam alterutrum solum faceret. Et medicamentum omnium forte quæ ad movendum sudorem adhibentur efficacissimum, constat ex opio et *ipecacanha*, quibus quadruplum et amplius salis *neutrius* adjectum est. Hoc modo neque somnus a fatis ampla opii portione, neque vomitus ab *ipecacanha* plerumque efficitur ; et ingens fere sudor prorumpit. Et compositio ipsa, quam multi medici tanquam absurdam et ridiculam olim aspernabantur et repudiabant, nunc omnium consensu utilissima habetur. — Fertur cathartica similiter

militer cum opio juncta, in eliciendo sudore haud parum aliquando prodesse.

1468. Stimulantia quoque cum opio juncta sudorem haud male eliciunt, neque alio magis remedio quam tali compositione per multa secula medici usi sunt, ubi illis sudorem provocare videbatur. Hujusmodi sunt Mithridaticum antidotum, et the-riaca *Andromachi*, et alia quædam ejusdem generis remedia; quæ quidem, numero rerum ex quibus constant, ridicula videntur, et non immerito medicinæ dedecus et medicorum opprobrium habita sunt; natura vero earum, minime sunt absurda; quamvis enim multæ res inutiles et parum idoneæ in iis insint, aromatica aliaque stimulantia medicamenta, et opium, semper eminent, et junctis viribus bonum remedium efficiunt.

1469. Haud parum sæpe prodest, veluti in hydrope, vires argenti vivi cum aliis remediis conjungere quæ ad eliciendum sudorem præcipiuntur. Hoc optime fit si  
id

id per aliquot dies prius datum fuerit quam alia remedia adhibeantur, ut corpus probe pervadat, et os aliquantulum afficiat.

1470. Diluentia demum medicamenta (siquidem medicamenta vocari debeant tales res) cum omnibus fere aliis ad promovendum sudorem, in plerisque saltem morbis, recte dantur, præsertim cum sudor jam proruperit, vel aliquandiu forte manaverit.

1471. Præter vero hæc et similia bene multa medicamenta, sunt et alia quædam auxilia in sudore eliciendo efficacissima; qualia sunt varia remedia emollientia, veluti balneum calidum, fomenta, vapores calidi aquæ vel *spiritus* vini, et calor denique, quocunque fere modo adhibitus fuerit. Hæc profecto, utpote quæ summam cutem mirabiliter relaxant, interdum ad copiosissimum provocandum sudorem, nullo assumpto medicamento, sufficiunt. Sæpe etiam  
necessaria



necessaria sunt, vel utilissima duntaxat, antequam medicamenta ad eliciendum sudorem devorentur; quorum effectus, alioquin exiguos, et incertos, et aliquando perniciosos futuros, (scilicet si nullum efficerent sudorem, corpusque tantum calefacerent), certiores et tutiores reddunt. — Hoc modo quoque, sudor a parte singulari, veluti artu quovis, ubi generalis minus conveniret, facile elicitur, reliquo corpore parum sudante.

1472. Observandum tamen est calorem omnem, sive siccum, sive per balneum, aut fotum, aut vapores admotum, non modo cutem relaxare, sed stimulum simul validissimum toti corpori, partibusque imprimis quæ sanguinem movent, impertire, ita ut duobus plane modis sudorem eliciat. — Idem quoque monendum est de usu potus calidi, qui sæpe vel solus, vel cum aliis medicamentis, ad movendum sudorem adhibetur.

1473. Idoneus etiam vestitus ad pro-

movendam exhalationem per cutem et elicendum sudorem haud parum confert; qualis scilicet et corpus a frigore satis defendat, et humorem cutis bene absorbeat, ut nihil madidi aut frigescentis hanc contingat. Quocirca indusium laneum, pro linteo, remedium sæpe haud contemnendum reperitur. Munditia quoque vestimentorum, ratione non multum aliena, utilissima res est,

1474. Cœlum quoque calidius petere, egregium omnino auxilium est; scilicet quod excretionem per cutem, alioquin parcam futuram, et sæpe penitus cohibendam, per totos menses, vel per annos integros, si opus fuerit, efficacissime promovet.

1475. His omnibus quæ de calore aliisque remediis emollientibus tradita sunt, primo saltem aspectu, valde dissentaneum videbitur, frigus quoque inter remedia enumerare, quæ vel exhalationem per cutem promovere, vel sudorem etiam elicere possint: res tamen non eo minus vera est.

Talis

Talis quidem frigoris effectus minime perpetuus est, scilicet qui multum pendeat a statu corporis cui admovetur; robustis autem et validis, quæ id bene tolerare possunt, egregio sæpe remedio est. Sic, multis, haustus aquæ frigidæ sudorem aliquando movet, et usus balnei frigidi exhalationem per cutem insigniter promovet: nec desunt multæ observationes quæ fua-  
dent, et homines nonnulli qui testantur se fuisse expertos, aëra frigidum (modo ficcus fuerit) corpori libere admotum similes præstare effectus, juvante præsertim idonea corporis exercitatione. Hujusmodi frigoris effectus viribus ejus stimulantibus (1198.), forte etiam et roborantibus (1108, 21.), plane sunt tribuendi.

1476. Idonea corporis exercitatio inter præstantissima et saluberrima remedia *diaphoretica* merito recensetur; modica enim, exhalationem per cutem optime promovet; vehementior, copiosum fere sudorem elicit, ipsis etiam hominibus qui omnibus



medicamentis vulgo usitatis ad sudandum vix, ac ne vix quidem, cogi possint. Effectus vero talis exercitationis in promovendo sudore, plane pendet (maxima saltem ex parte) ab incitato (425. 702.) sanguinis motu.——Sed de variis exercitationis viribus et usibus satis jam (1096. 1107. 1199. 1201.) dictum est. Crebra quoque frictio exercitationis vice (ubi huic plane non est locus) aliquatenus fungi potest.

1477. *Aura electrica*, cujus vires stimulant jam sunt (1193, 4.) memoratæ, exhalationem per cutem haud parum promovere videtur; et satis verisimile est eam hoc modo interdum profuisse; sed plerumque ubi hac exinanitione opus est, ad efficaciora remedia confugere oportet.

1478. Denique, animi affectus excitantes insigni vi pollent exhalationem per cutem promovendi, et minime dubium est, eos hoc modo interdum saluberrimos effectus præstare.

1479. Effectus

1479. Effectus vero quod attinet copiosi sudoris, aut exhalationis per cutem liberioris, ex jam dictis de effectibus aliarum exinanitionum, facile intelligentur. — Hæc nimirum quantitatem humorum circum-euntium minuit, tenuiores illorum partes detrahit, impedimenta quæ naturali per cutem excretioni obstabant summovet, humores cutem versus derivat, æqualem eorum in partibus internis distributionem efficit, *spasnum* sæpe solvit, impetum humorum temperat, alias exinanitiones cohibet, actionem vasorum absorbentium promovet et auget, cutem mollit atque relaxat, et demum, ut medicis semper persuasum est, nociva quædam, per cutem natura excernenda, promptius et efficacius expellit.

1480. Facile igitur constabit, in variis morbis haud parum esse profuturum, exhalationem promovere, sudoremque elicere; et in iis imprimis qui a suppressa aut deficiente per cutem excretionem proveniunt,

vel

vel in quibus hæc præter naturam cohibetur, quod plerumque signis haud ambiguis sciri potest, rigore imprimis, vel cutis siccitate et duritia, siue calida fuerit siue frigida; et præterea suspicandum est a cognita causa morbi externa, veluti frigore collecto. Hujusmodi exempla esse possunt, febres variæ, alique morbi quorum febris pars magna est, gravedo, tussis, *rheumatismus*, et multæ aliæ inflammationes, et quædam sanguinis profluvia, et phthisis, &c.

1481. Utile quoque fit, ubicunque sanguinis distributiones abnormes acciderint; et hoc modo, pariter ac priore (1480.), in multis ex jam dictis morbis, aliisque similibus, prodesse videtur.

1482. Prodest etiam, ratione satis manifesta, in alvi fluxu, aut magno urinæ profluvio, aut hydrope varii generis, in quo haud raro inter sudandum aquæ adeo subito et copiose resorbentur, ut non modo  
ingens



ingens et diuturnus sudor, sed magnus simul urinæ fluxus accidat, quibus dirus ille morbus interdum prorsus depellitur.

1483. Prodest demum in multis morbis vetustis quæ cutem maxime afficiunt, veluti lepra varii generis, aut lue venerea; in quo sane morbo, siue externas siue internas partes occupaverit, exhalationem per cutem promovere, vel sæpe etiam copiosum elicere sudorem, eximium remedium est.

1484. Diu profecto atque acerrime inter medicos disputatum est de sudoribus in omni genere febrium eliciendis, neque hactenus lis adeo composita est, ut apud eos stabilitum sit, quando, et quousque, et quibus remediis, talis medendi ratio in febribus conveniat.

1485. Constat vero multas febres per naturalem sudorem frequentissime sublevari vel solvi; neque dubium est multa remedia

dia ad sudores eliciendos data, veluti diluentia, refrigerantia, vomitoria, et præsertim medicamenta ex stibio parata, febricitantibus sæpe egregie prodesse, morbumque vel prorsus depellere, vel mitiorem saltem et tutiorem reddere; neque demum negandum est, sudores interdum profuisse per medicamenta validissima et maxime calefacientia, et multum calorem, extortos.

1486. Contra autem, non minus certum est sudorem etiam naturalem in febre prorumpentem, morbum sæpe neque solvere neque levare, et ægrotanti aliquando plurimum nocere; ita ut ne naturalis quidem sudor semper promovendus sit. Sudor vero arte provocatus multo magis anceps auxilium est, iis præsertim qui difficilius sudant; his enim non modo validiora medicamenta ad sudorem eliciendum data, sed ipsa etiam quæ lenissima videntur, veluti potus tepidi, haud parum sæpe nocent, læso nimirum ventriculo, labefactis

befactis viribus, et corpore male irritato et calefacto.

1487. De medicamentis vero valde stimulantibus et calefacientibus, et calore quo modo cunque adhibito, satis superque certum est, ea (quamvis nonnunquam utilia esse (1485.) potuerint) in febribus plerumque inutilia esse, et sæpe perniciosissima; scilicet quæ non semper sudorem elicere possint, et quamvis elicuerint, parum forte juverint, et simul per suum stimulum febrim intendant, et vires ægri consumant, et putredinem augeant; in diversissimis febrium generibus fere pariter, quamvis variis de causis, nociva; præsertim in iis quas eruptio super cutem comitatur.—Triste sane est mente revolvere, quam funesta generi humano fuerit talis medendi ratio, diu stabilita et passim adhibita. Vix enim dubitari potest, magnam febricitantium partem cui morbus pepercisset, remediis hujusmodi turpissime fuisse trucidatam.



1488. Hæc exinanitio, non fecus ac aliæ, sæpe nocet, valde debilibus imprimis, aut mobilibus, et sane omnibus, si nimis copiosa aut diuturna fuerit, aut frequentius justo repetita; corpore scilicet multum exhausto atque soluto, et cute præsertim adeo relaxata et delicata facta, ut ne levissimum quidem frigus sine damno tolerare possit. Infantibus, fatis manifestis de causis, parum accommodata est; et puerperis, quibus diu necessaria fuit credita, non modo inutilis, sed sæpe valde perniciofa.

1489. Modica et diuturna per cutem exhalatio, qualis facile, vel idoneis medicamentis, vel corporis exercitatione, vel vestitu, vel cœli mutatione, effici potest, in multis morbis, veluti lue venerea, podagra, *rheumatismo*, &c. sæpe magis prodest quam sudor copiosissimus sed brevis, validioribus medicamentis provocatus; et quidem multos sanavit, quibus hic nihil profuisset; qui sane periculo suo non semper caret, et interdum perniciosissimus foret, veluti

veluti phthificis, cum lenior et constans per cutem excretio insigniter prodesset.

1490. Copiosissima enim fieri potest et utilissima sæpe per cutem excretio citra ul-  
lum sudorem; nec desunt argumenta quæ  
suadeant, plus interdum hoc modo intra  
certum tempus exhalari, quam cum tota  
cutis sudore madet. Hic nimirum a sola  
fere cutis relaxatione haud raro pendet;  
exhalatio vero a corporis vigore, et sangui-  
nis impetu, et actione vasorum summæ cu-  
tis, magis exprimitur.

1491. Inter sudandum multus potus di-  
luens plerumque utilis est, et sæpe prorsus  
necessarius; cavendum autem diligenter,  
ne nimia ejus quantitate ventriculus gra-  
vetur.

1492. In magno et diuturno sudore,  
præsertim si æger valde infirmus est, ali-  
quid medicamenti stimulantis, veluti li-  
quoris fermentati, &c. illi permittendum

est, et sæpe etiam præcipiendum, cum ad sustinendas ejus vires, tum quoque ad promovendum sudorem.

1493. Sudaturus, rejectis omnibus vestimentis et stragulis linteis, laneis folis se involvere debet. Quod si tali consilio obtemperare noluerit, tum inter sudorem lintea subinde mutare debet, et recentia, sicca et calida (1496.) induere.

1494. Idoneis fomentis, &c. conandum est ut sudor ad pedes usque probe eliciatur; inæquales enim sudores, et quarundam tantum partium, raro ullum morbum solvunt.

1495. Cavendum a nimio calore, five aëris, five vestitus, five potus, five medicamentorum quæ inter sudandum fumuntur; tali enim auxilio raro opus est, neque semper tuto adhibetur. Sudores enim per calorem extorti raro profunt, et calor in multis morbis insigniter nocet.

1496. Cavendum



1496. Cavendum quoque a frigore, non inter sudandum modo, sed aliquandiu post finitum sudorem; scilicet quod tunc, ratione minime obscura, præter solitum periculosum est, ut multi qui credebant se per bonum sudorem fuisse sanatos, miserrime sunt experti.

C A P.

C A P. XXXVIII.

*De remediis errhinis, et sialogogis, et expectorantibus.*

1497. **I**Nter evacuantia remedia recenferi solent illa quæ secretionem et excretionem humorum narium, et oris, et pulmonis promovent; quibus humoribus hoc commune est, quod omnes certo intra corpus usui destinati, neque in sanis copiosius secreti quam suis usibus impenduntur, in isto statu nunquam excerni debeant: per morbos vero sæpe vel deficient, vel nimis abundant, vel demum vitiuntur, et simul (cum permagni interesset ut libere excernerentur) difficiliter eji-  
ciuntur. Ad talia igitur vitia corrigenda  
remediis

remediis interdum opus est, quæ, non fecus ac reliqua evacuantia, aliis quoque u-  
sibus (1334. et seqq.) inservire possint.

1498. *Errhina*, vel *apophlegmatizonta*, dicuntur remedia illa, quæ fluxum muci aliorumque humorum e naribus promovent: horum quoque pleraque, vel forte omnia, inassuetis saltem, sternutationem excitant; et hoc consilio adhibita, sternutamenta, vel *ptarmica* medicamenta vocantur.

1499. Fertur varia remedia emollientia naribus admota talem exinanitionem efficere; sed multo frequentius est et efficacius, idonea stimulantia, nunc leniora, nunc acriora, prout res postulaverit, iis adhibere. Variis quoque formis, veluti aqua diluta, aut in pulveres redacta, vel demum solida et integra, naribus indi, aut in eas recipi, possunt, vel etiam forma vaporum cum spiritu trahi.

1500. *Saccharum*,



1500. Saccharum, varii fales, multæque herbæ acres, veluti afarum, betonica, *lavendula*, *majorana*, pulegium, ruta, *nicotiana*, helleborus, euphorbium, &c. inter *errhina* ab auctoribus medicis enumerantur. Ex his vero, posteriora duo, propter summam suam acrimoniam, raro adhibentur, et profecto non temere adhibenda sunt; et *nicotiana* omnium hujus generis remediorum usitatissima est, magis fane luxuriæ causa quam pro remedio.

1501. Effectus eorum, ex jam dictis de evacuans remediis generatim, facillime intelligentur. — Exinanitio quidem ipsa quam efficiunt nimis exigua est, quam ut generalem massam humorum et totum corpus afficiat; sed partes vicinas et conjunctas haud parum afficere potest.

1502. *Errhina* igitur, nares imprimis, postea, per consensum illum generalem de quo sæpius jam dictum est, totum corpus excitant; majorem secretionem et fluxum

um mucī narium, aliorumque qui cum eo excernuntur humorum, quales sunt lachrymæ aliique humores oculorum, per suum stimulum efficiunt; distributionem sanguinis aliquantum mutant, majore nimirum ejus ad nares et minore igitur ad vicinas partes derivatione facta; et demum, excitata sternutatione, totum corpus quatiant, et pene convellunt.

1503. Hinc interdum utilia, præsertim assuetis, in defectu aut nimia spissitate mucī narium, (unde olfactus vel nullus vel depravatus, et alia forte et majoris momenti vitia, veluti oculorum aut totius capitis morbi), et in torpore, sive speciali sive generali, et in lethargo, et paralyfi, et surditate, et *amaurosi*, et lippitudine varii generis, cum sicca, tum humida, et dolore capitis, et quibusdam, ut fertur, narium morbis.——Narrantur quoque interdum prodesse in aliis, et quidem remotiorum partium morbis, veluti gravedine, phthisi, inflammatione pulmonis, &c.

Sed de eorum usu in his morbis minus constat.——Fertur porro sternutatio ipsa idoneis remediis excitata aliquando profuisse in morbis quibusdam *nervosi generis*, convulsionibus, torpore, paralyfi, &c. Ingens nimirum et subita ista corporis agitatio, et fere convulsio generalis, abrupta prava consuetudine (383.), et superata forte irritatione illa unde aliæ convulsiones penderent, his quodammodo remedio esse potest, partesque antea torpentes et paralyticas ad sensum motumque denuo ciere, ut ex artubus paralyticis nonnunquam inter sternutandum subsilientibus manifestum est.

1504. *Errhina* vero intempestive adhibita haud parum nocent, exinanitione scilicet, et sanguinis caput versus derivatione, omnino præter naturam facta: olfactum quoque obtundunt, visum aliquando lædunt, et ventriculum sæpe infirmant. Sed hoc, maxima saltem ex parte, viribus *narcoticis* medicamenti vulgo adhibiti plane  
tribuendum



tribuendum est. — Utcunque vero absurdus et perniciosus bene valentibus sit primus *errhinorum* usus, tali consuetudini aliquandiu stabilitæ (1344.) sæpe obtemperare oportet.

1505. Sternutamenta denique, alia et minime obscura ratione, sæpe periculosa sunt, in nimia sanguinis abundantia, aut in capite aut pulmonibus congestionem, et recente et vehemente oculorum inflammatione, et in ramicosis: neque profecto temere sunt præcipienda iis qui vel *hysteria* vel morbo comitiali (1503.) laborant.

1506. *Sialogoga* remedia dicuntur illa quæ salivam movent.

1507. Hoc autem variis modis effici potest; fluit enim saliva copiosius solito si os idoneis *gargarismatis* emollientibus colluitur atque fovetur; fluit etiam insigni quantitate inter mandendum, scilicet quia actio musculorum, et motus maxillæ et linguæ, glandulas quæ illam secernunt, et

meatus qui in os deferunt, probe expriment atque emulgent, quamvis res ipsa quæ manditur mitissima fuerit: *gargarismata* vero, atque *masticatoria* aliquantum stimulantia et acria, per suum stimulum *chemicum*, salivam multo efficacius movent. — Hinc actio multorum salium, et ceræ, mastiches, myrrhæ, aromatum, *nicotianæ*, ejusque fumi, &c. in cienda saliva facile intelligetur.

1508. Quidam animi affectus, et soni nonnulli acerrimi, auribusque ingratissimi, magnum salivæ fluxum sæpe efficiunt; sed hæc nihil ad usum medicum pertinent.

1509. Nausea et vomitus, quo modo cunque excitata, etiam sapes nauseosi, salivam movent; hinc omnia vomitoria medicamenta ad illam ciendam utilia. — Sed de tali eorum usu suo jam loco (1381.) dictum est.

1510. Ex omnibus vero remediis, argentum vivum maxima et certissima vi pollet

pollet salivæ ciendæ, et solum profecto specialem hujusmodi vim possidere videtur, qua via cunque in corpus receptum fuerit, modo quantitas ejus satis ampla sit, ipsumque idonea præparatione actuosum redditum. Efficacissimum enim hoc remedium vires suas salutares quodammodo ab arte accipit; natura enim, scilicet dum purum et fluidum est, pene iners videtur, et ingente sæpe quantitate, sine incommodo, aut fane ullo effectû, assumptum est. Per trituram vero cum oleosis aut mucosis rebus extinctum, aut per idonea *acida* atque *alcalina*, aut ignem, in formam salis, vel *calcis*, vel vaporis, redactum, insignes, et fere incredibiles vires adipiscitur; ita ut minutissima ejus quantitas in corpus recepta, nunc saluberrimos effectus præstet, nunc gravissimas noxas efficiat. Medici atque *chemici* per aliquot jam secula gnæviter semet occuparunt in variis excogitandis hujus remedii præparationibus, quarum sexcentas protulerunt: his omnibus vires nec prorsus eædem, nec tamen multum



multum diversæ constant; et suas singulæ laudes, vel saltem suos laudatores, habent. De minutis vero earum differentiis, variisque quibus accommodatæ sint usibus, non hic est locus dicendi. Sat fuerit memorasse, quamvis omnes salivam moveant, quasdam tardius quam alias os afficere; et sales et *calces* illius, generatim, exhalationem (1462.) per cutem magis promoveri, quam medicamenta quæ ex eo per trituram cum sevo aut melle fiunt, quæque salivam promptius fere cient.

1511. Varia autem remedia *salogoga*, similes fere effectus ac alia evacuantia præstant. Per suum stimulum, os, et linguam, et partes vicinas, et aliquatenus totum corpus excitant, et partim hoc, partim exinanitione quam efficiunt, motum sanguinis in iis partibus promovent; impedimenta vel obstructions quæ naturali oris humorum secretioni obessent summovent; et distributionem sanguinis aliquantum mutant, majore eo derivatione facta;

facta ; et demum fluxus salivæ etiam modicus, partes vicinas nonnihil deplet, copiosior vero, et diuturnus, totum corpus exinanit.

1512. Hinc *sialogoga* remedia, præsertim quæ ori ipso admoventur, inque eo manduntur, aliquando utilia fiunt in defectu aut spissitate humorum oris, et torpore et paralyfi præsertim linguæ ipsius, sed non negligenda, imprimis affuetis, in paralyfi generali, et in proclivitate ad *apoplexiam*, aut lethargum ; et in inflammatione interdum, aut sanguinis congestione, aut quibusdam irritationibus variarum partium oris, faucium, gutturis, et capitis, veluti dentis aut capitis dolore, et hujus hydrope, et vertigine, et aurium tinnitu, et surditate, et lippitudine, et cæcitate, et gravedine, et angina, &c.— Credita sunt utilia sæpe fuisse ad præcavendam pestis aliarumque febrium contagionem, quam multi putant in os receptam cum saliva devorari ; nec defunt, præsertim *nicotianæ* amatores, qui contendunt,

tendunt, constantem eorum usum haud parum prodesse multis hominibus, cum torpidis, tum quoque valde pituitosis.

1513. Nocent vero omnibus fanis; et magis adhuc quibus ventriculus infirmior est; saliva enim alimenti concoctionem multum juvat.

1514. De saliva per argentum vivum cicnda ad luem veneream sanandam, vix opus est verba facere; satis enim constat apud medicos, talem in isto morbo exinanitionem nunquam esse utilem, nunquam non perniciosam; et ægros optime fere et certissime sanari, (quæcunque demum remedii actio fuerit), quibus argentum vivum ita datur, ut neque hanc, neque sane ullam exinanitionem manifestam efficiat. Ingens vero salivæ fluxus, qualis magna solertia olim effici solebat, et cum horrendis ægrorum cruciatibus diu continuari, corpori gravissime et plurimis modis nocet.—Non tamen inutile est argen-  
tum



tum vivum ita dare ut os aliquantum afficiat; sic enim medicus certo sciet, remedium ægri corpus pervasisse, et plerumque etiam non dubius judicare poterit, tantum ejus jam esse assumptum, quantum illi sit profuturum, donec os ad statum magis sanum rediverit.—Maxime profecto dolendum est, quosdam tales corporis constitutiones habere, ut vel minima hujus medicamenti portio, qualis ad morbum istum sanandum plane non sufficiat, iis salivam copiosissime moveat, forte cum gravi oris inflammatione; et alios ingentem ejusdem medicamenti vim aliquandiu tolerare, ore plane intacto, et morbo minime sanato, donec tandem ad os subito et vehementer ruat, ibique miserrime sæviat. Omne quidem hac de re tulerit punctum, qui talem argenti vivi præparationem invenerit, qualis et luem veneream penitus eradicet, et simul neque salivam moveat, neque os, neque ventriculum, neque intestina lædat. Interea vero ea præparatio eaque administratio remedii

optimæ habendæ sunt, quæ, dum morbum tollunt, illis partibus minime noceant.

1515. *Expectorantia* dicuntur remedia illa, quæ excreationem a pulmone et aspera arteria promovent.

1516. Talibus profecto remediis sæpe opus est, cum partes illæ adeo frequenter vel tenui et acri mucositate irritantur, vel nimia muci quantitate pene obruuntur, vel denum mucositate nimis spissa et tenace gravantur, qualis difficillime per tussim (597. et seqq.) ejici possit. Aliæ præterea res, veluti sanguis, pus, aqua, &c. in pulmone accumulatae aut effusæ, similiter ac nimis copiosus aut morbosus mucus sunt excreandæ; et morbi quidam tali excreatione optime solvuntur.

1517. Nil mirum igitur, medicos talia remedia quærentes, multa medicamenta hoc consilio adhibuisse. Omnia vero, quibus nomen *expectorantium* imponere placuit,

cuit, vel admodum exiguas, vel, quod pejus est, admodum incertas hujusmodi vires habent. Nondum enim constitit, num ullis medicamentis vis specialis contingat promovendi secretionem aut excreationem muci a pulmonibus; et stimulantia generalia in corpus recepta pulmones haud multum afficere solent; et medicamenta illa quæ forma vaporum cum spiritu trahi possunt, neque multum profunt, neque (satis manifestis de causis) communi usui omnino accommodata sunt.

1518. Ex ampla farragine medicamentorum quæ *expectorantia* a variis auctoribus dicta sunt, duo genera maxime eminent, stimulantia nimirum, seu attenuantia, et emollientia, seu *demulcentia*, seu *incrassantia*, ut promiscue vocantur.

1519. Ex stimulantibus, efficacissima fere sunt scilla, gummi ammoniacum, *asa foetida*, et forte *nicotiana*, vel in ore manfa, vel fumo in pulmonem recepta; sed mul-



ta alia minoris momenti remedia, veluti arum, hedera terrestris, erysimum, iris, &c. cum his enumerari solent. De hujusmodi medicamentorum actione nonnihil inter medicos certatur; alii enim credunt, quicquid beneficii ab iis accipiatur, nausæ (1522.), vel vomitioni forte quam moveant, totum esse tribuendum; dum aliis persuasissimum est, aliquid stimuli ab iis derivatum, et cum sanguine ad pulmones delatum, partibus quæ mucum fecernunt irritare, et hunc ideo copiosiore et tenuiorem reddere.—Hoc genus *expectorantium* in nimia muci pulmonis spissitate et tenacitate maxime prodest.

1520. Ad alterum genus (1518.) pertinent medicamenta mitia, oleosa, gummosa, mucosa; qualia sunt oleum olivarum, amygdalarum, palmæ, *sperma ceti*, gumi Arabicum, tragacantha, saccharum, linum, althæa, glycyrrhiza, tussilago, et similia. Ex his autem, oleosa, utpote quæ ventriculum sæpe gravant, plerumque minus

nus idonea sunt, et gummofa igitur, aut mucosa medicamenta, iis fere anteposenda.

—— Hoc genus utilissimum est, ubi mucus nimis tenuis et acer, tussis valde frequens et pene inanis, et magna irritatio pulmonis et asperæ arteriæ adfunt.——

De hujusmodi quoque medicamentorum actione lis aliqua est; scilicet quæ alii in sanguinem recepta, adque pulmonem delata, alii tantum inter devorandum, (faucibus nimirum et *glottide* illitis, et sic a quibusdam irritationibus defensis), prodesse opinantur. Et hoc saltem certum est, multa eorum tussim adeo subito sistere, et irritationem prius molestissimam tollere, ut minime credibile sit vel minutissimam illorum particulam cum sanguine ad partes laborantes pervenisse; tussi vero sopita, et, quæ inde penderet, pulmonis agitatione paulisper composita, mucus qui in pulmone et aspera arteria aderat, quamvis prius nimis tenuis, et forte acer, per remoram spissescit atque mitescit, viribusque interim ægri aliquantum relictis, prima  
tussicula

tussicula postea accidente, facile et copiose ejicitur.—Præterea, morboſa iſta mucitenuitas et acrimonia, quamvis interdum accidere videatur, neque adeo certum neque adeo frequens vitium eſt, neque tanti momenti, ac multi medici exiſtimaverint; pleraque enim ſigna atque moleſtiæ quæ ab ea provenire creduntur, veriſimilius imputari poſſunt, partim, defectui iſtius mucitenuitatis, qualis ſub inflammationem mucosæ membranæ accidere ſolet; partim quoque, acriori illi ſenſui, auctæque ſtimuli cujuſvis impatientiæ, quæ omnibus partibus inflammatis contingunt; partim demum, graviffimæ irritationi tuffis crebræ, totum pulmonem quatientis, et aſperam arteriam, et præſertim *glottidem*, irritantis, earumque mucum abradentis. Horum omnium tanta eſt vis et noxa, ut aër ipſe, quamvis leniſſimus, ſtimulo tandem ſit, neque ſpiritus quidem ſine gravi irritatione atque dolore, et tuffi frequentiffima, poſſit recipi.



1521. Eadem porro ratio est somni naturalis, qui sane excreationem aliquandiu sistit, eandem vero postea efficacissime promovet; et opii quoque eodem consilio adhibiti, ut nunc sæpe solet, cum insigni ægrotantium beneficio.

1522. Omnia vomitoria medicamenta, siue plenam vomitionem, siue nauseam tantum civerint, excreationem a pulmone et aspera arteria plane promovent. Hoc non soli agitationi vomendi (quamvis hæc sane nonnihil interdum prodesse possit) tribuendum est; stimulus forte medicamenti, veluti scillæ, ad pulmonem pervenit, et sic juvat; et nausea demum, per consensum illum egregium ventriculum inter et multas alias partes, vel *spasmodum*, siquis forte adsit, minutissimorum vasorum fecernentium et exhalantium pulmonis solvere potest, vel vasa ista (ut de vasis summæ cutis multi opinantur) ad validiorem actionem excitare, unde mucus copiosior

piofior fimul et fanior, ejufque exfcreatio facilior.

1523. Idem fere prædicari poteft de fudore, vel fponte fua profluente, vel idoneis remediis excitato; qui fane interdum *expectorans* remedium fit haud contemnendum. — Forte etiam huc referri debet beneficium iftud, non leve profecto, quod ab idonea exercitatione, et imprimis ab equitatione, percipitur, cum multum a pulmone exfcreandum eft.

1524. Vapores aquæ calidæ cum fpiritu in pulmonem haufti, hunc foyent, humectant, molliunt, laxant, *fpaſmum*, ſiquis adfit, ſolvunt, exhalationem et mucî ſecretionem promovent, hunc quoque diluunt et attenuant, ejufque ſic exfcreationem promptiorem et faciliorem reddunt, et demum bonum remedium *expectorans* fiunt. — Vapores acriores, veluti aceti, et *nicotianæ* fumus, interdum adhibentur, et nonnullis ægris haud male convenire poſſunt,

sunt, sed multis inassuetis pene intolerabiles sunt.

1525. Denique, *epispastica* remedia, veluti *vesicatoria*, pectori, aut lateri, aut dorso imposita, excreationem haud raro manifeste promovent. Hæc quoque, ut postea fusius exponendum erit (Cap. XLl.), per consensum illum egregium qui<sup>d</sup> externas inter et internas partes intercedit, has variis modis afficiunt, et *spasmus* solvunt, et inflammationem tollunt, et magis æqualem ideo sanguinis distributionem restituant, siquando hæc antea abnormis fuisset.—His, ut videtur, facultatibus, potius quam stimulo ulli quem pulmoni impertiant, vires eorum *expectorantes* sunt imputandæ.



C A P. XXXIX.

*De remediis emmenagogis.*

1526. **R**Emedia *emmenagoga*, vel *menagoga*, apud medicos dicuntur illa quæ menses movent.

1527. Fluxus iste, mulieribus per magnam vitæ partem naturalis et necessaria, duntaxat salutaris, interdum sub pubertatem non ut debet prorumpit, et sæpe postquam mulieribus aliquoties vel diu justis intervallis rediverit, deficit, vel prorsus subsistit, quamvis ipsæ neque uterum gerant, neque ubera infanti præbeant. Hinc pluri-  
mi et graves morbi, nec raro (ut suo jam  
loco

loco (Cap. XXI.) expositum est) valetudo ab omni fere parte labefacta.

1528. Medici vero, docente ipsa natura per exempla pene quotidiana, innumeros, et alioquin insanabiles morbos, a tali mensium defectu oriundos, iisdem denuo fluentibus sublevare vel solvi, summa sæpe opentuntur ut fluxum istum arte sua eliciant; multaque imprimis medicamenta adhibere solent, qualia credita sunt specialem istiusmodi vim possidere.

1529. Quamvis autem plurima et diversissima medicamentorum genera, a variis, neque sane parvi nominis auctoribus, tanquam egregia, et quidem certissima in mensibus provocandis auxilia, nuper et olim miris laudibus fuerint cumulata, parum adhuc constat num ulli medicamento specialis ejusmodi vis contingat; non quod dubium sit multa medicamenta id sæpe effecisse, sed quia per aliam et magis generalem actionem, salutarem istum effectum

præstitisse videantur, neque vel uterum specialiter afficere aut irritare, neque menses ciere, per facultatem ullam singularem, quali argentum vivum, aut scilla, aut aloe, salivam, vel urinam, vel alvum movent. Et interim satis certum est, pleraque medicamentorum, quæ mulierculæ, et quidem multi medici, ad provocandos menses diligenter adhibent, vel prorsus inefficacia esse, vel in illum duntaxat finem minime accommodata.

1530. Non tamen dissimulandum est, quædam medicamenta, quæ nullas alias vires ostendant, nec ullas alias partes afficiant, uterum insigniter afficere, mensesque efficacissime movere, interdum visa esse. Clarus enim auctor, omnique fide dignus, testatur, se talem in herba haud magni nominis in medicina, rubia, scilicet, tinctorum, virtutem deprehendisse; cujus radix in plurimis casibus, cum novis tum vetustis, aque variis causis provenientes, signaque diversissima habentibus, multisque aliis remediis prius adhibitis minime cedentibus,



dentibus, mirabiliter profuisse, mensesque præter omnem spem provocasse, visa fuit. Quo pacto talis herba, alioquin nullius vis aut stimuli, utrum irritet, vel ullo modo afficiat, et sanguinem adeo efficaciter foras propellat, explanatu difficillimum est: hoc autem plenior experientia doceat. Interim, magis forte dolendum est quam mirandum, remedium adeo lene et tutum, delicatissimis etiam fœminis facile tolerabilem, omnibusque morbi casibus pariter accommodatum, non semper pari cum successu adhiberi, et quidem in multis jam ægris frustra fuisse tentatum.

1531. Alia vero medicamenta quod attinet ad provocandos menses adhiberi solita, quæ alias, et magis generales et manifestas vires possident, quibus in suppressis mensibus opem ferre videantur; quamvis naturæ non modo diversæ, sed plane contrariæ (810.) sint, actio et administratio eorum facile intelligentur, si nobiscum perpendimus quam variæ (808, 9.) causæ menses

ses vel sistere vel arcere soleant, et quot  
 quamque diversæ affectiones morbosæ ab  
 illorum defectu in variis casibus proveni-  
 ant. Quicquid enim causam mali summo-  
 vet, ipsi quodammodo remedio erit ; quic-  
 quid præterea mala a suppressis mensibus  
 oriundis sublevat vel tollit, vel quibusdam  
 tantum ex iis occurrit, menses sæpe denuo  
 revocabit, corpore nimirum, propter hujus-  
 modi levamen, ad solita sua munera melius  
 in posterum valente. Non secus enim ac  
 menses rite fluentes ad prosperam valetu-  
 dinem, prospera valetudo ad istum fluxum  
 maxime conducit.

1532. Menses vero a duabus causis ge-  
 neralibus frequentissime deficiunt ; scilicet  
 vel a defectu vis quæ sanguinem per vasa  
 atque foramina uteri propellere debuisset,  
 nihil præter solitum exitui ejus obstante ;  
 vel a renixu aut impedimento aliquo præ-  
 ter naturam, quale neque solitæ corporis  
 vires, quæ sanguinem propellerent, neque  
 sane multo majores, quas vel natura vel  
 ars

ars fuscitaverit, superare queant. Sæpissime vero utrumque vitium simul adest, vel ab initio casus, vel si hic ab alterutro, et præsertim a posteriore, primo inceperit, tamen ipse mensium defectus alterum haud raro efficiet, unde morbus gravior, diuturnior, sanatu difficilior.

1533. Si, propter pravam uteri vel vaginæ fabricam, five a natura derivatam, five morbo corruptam, sanguis vel in illum exprimi vel per hanc elabi nequeat, cujusmodi apud idoneos auctores nonnulla, quamvis rarissima, extant exempla, perspicuum est, tale impedimentum vel sola chirurgia esse summovendum, vel morbum omnino insanabilem fore, et omnia duntaxat medicamenta ad provocandos menses frustra adhibitum iri.

1534. Quod si menses, (ut sæpe solent), propter impedimentum multo levius, et sublato facilius, substiterint, veluti nimis arctam vasorum et foraminum uteri contractionem,



tractionem, seu *spasmus*, a frigore, aut gravi animi affectu, aut febre, &c. inductum; vel si, propter generalem corporis infirmitatem, sanguinisque imprimis motum nimis languidum, menses defecerint; vel si, propter abnormes alias partes versus sanguinis derivationes, hic minore quam par esset impetu et quantitate ad uterum fuerit delatus; vel si, per diuturnum menses defectum, vasa atque foramina uteri paulatim coarctata et pene conclusa fuerint; vel demum, si, nullo dato per uterum exitu sanguini illi qui debuisset effundi, toto corpore multum turbatum fuerit, et nimius imprimis sanguinis impetus, ejusdemque distributiones morbosæ, lumborumque, et ventris, et capitis dolores, et convulsiones *hysterica*, &c. acciderint, cunctaque tandem corporis munera impedita vel læsa fuerint; tum plane variis remedium generibus erit locus, veluti emollientibus, infirmantibus, stimulantibus, sedantibus, anodynis, *antispasmodicis*, variisque demum evacuantibus.

1535. In mensium defectu, memoria usque tenere oportet, non semper ullis opus esse remediis ad ipsos eliciendos aut revocandos, siue solita ætate non proruperint, siue, postquam aliquoties profluxissent, præter naturam substituerint; præsertim si valetudo cætera bona fuerit. In tali enim statu, natura ipsa, menses, si antea nulli fuerant, suo tempore, arte vix festinando, proferre solet, eosdemque aliquandiu subsistentes denuo reducere. Neque alia profecto videtur esse ratio virium quas nonnullis imputare placuit remediis quibusdam anilibus, quæ revera nullas in mensibus eliciendis habent: si vero per tempus satis longum adhibita fuerint, corpore interim reliquis suis mediocriter functo muneribus, menses fere iterum prodibunt; laudesque sic, tempori et naturæ solum debita, inutilissimo forte medicamento facile tribuentur. Hinc quoque cogi potest, quæcunque ad menses provocandos dentur remedia, idoneum victus et vitæ genus, quale scilicet ad generalem corporis sani-

tatem, variis sæpe modis læsam, maxime conducat, nunquam esse negligendum.

1536. Singula vero remedia quod attinet ad eliciendos menses dari solita, tametsi uniuscujusque actio et usus haud male intelligantur, tamen ægre in pulchrum aut accuratum ordinem reducuntur; propterea quod multa et efficacissima eorum non uno tantum sed variis modis profint, variosque simul necessarios aut salutares duntaxat effectus sæpe præstent; variis ideo consiliis, inque variis casibus, pariter adhibenda.

1537. Sic idonea corporis exercitatio, (quæ omnium hujusmodi remediorum longe optimum est, diversisque casibus accommodatissimum), siue a defectu virium quæ sanguinem propellere debuissent, siue ab insolito impedimento atque renixu, iis ægre superando, menses substiterint, siue utrumque simul vitium adsit, totaque demum valetudo labascet, utilissima esse poterit;



terit; corpore scilicet probe excitato, *spasmo*, si quis forte adesset, soluto, motu sanguinis expedito, impetuque ejus intenso, derivationibus ejus abnormibus atque morbosis submotis, et æquali et naturali distributione per totum corpus effecta, hujus simul viribus resectis, cunctisque demum corporis muneribus, a morbo læsis et languentibus, efficacissime adjutis atque promotis.

1538. Proximum forte huic, inter remedia quæ menses eliciunt, locum occupare meretur aura *electricæ*, quæ etiã toti corpori per ictus (1194.) admota, sed promptius et certius adhuc circa lumbos, et abdomen, et pubem, adhibita, menses adeo potenter movet, ut sæpe ipso temporis puncto quo adhibetur, inopinantibus prorumpant; et hoc stimulo ejus plane tribuendum est.

1539. Excitantes etiam animi affectus, quorum tantus tamque salutaris sæpe re-

peritur stimulus (1203.), haud parum sæpe valent in reducendis mensibus, non secus ac contrarium genus affectuum eisdem sæpe cohibet.

1540. Plurima quoque medicamenta stimulantia ad ciendos menses sæpe dantur, et haud raro manifeste profunt; pleraque etiam et optima medicamentorum quibus specialis istiusmodi vis imputari solet, nihil aliud sunt quam stimulantia generalia; neque obscura ratio, qua, stimulado corpore, motuque imprimis sanguinis incitato, menses, quacunque causarum jam (1532.) expositarum suppressos, talia medicamenta sæpe propellant. Ex his forte, gummi calida seu foetida, et *castoreum*, et similia, optima sunt et efficacissima; non desunt tamen qui varias herbas acres, earumque olea *essentialia*, aliasque præparationes multum laudant; veluti rutam, sabnam, pulegium, helleborum nigrum, aliasque bene multas minorum et magis incertarum virium; quales sunt aristolochia,

crocus,

crocus, scordium, marrubium, *matricaria*, &c.—Amplissimum profecto, et prorsus mirum, de viribus hellebori nigri in mensibus eliciendis, testimonium accepimus a viro experientissimo et celeberrimo, qui summos in arte medica honores diu occupavit. Non dubitavit clarus hic auctor firmissime asseverare, tantam in ista herba inesse virtutem, ut vix meminisset eam, cum ad menses eliciendos data esset, spem suam unquam fefellisse; seque præterea notasse, quotiescunque, propter pravam partium conformationem, vel aliam quamcunque causam, frustra adhibita fuisset, tum sanguinem per alias vias fuisse propulsum; unde collegit, egregiam et singularem prorsus vim sanguinem propellendi remedio suo constare.—Sed dormitabat certe bonus senex, nunquam aliter tantum de tali medicamento, inque tali morbo, testimonium daturus, honesti scilicet viri et sapientis medici gravitate atque prudentia pariter indignum, et experientiæ pene quotidianæ dissentaneum.

Quamvis



Quamvis enim herba adeo laudata bonum aliquando remedium fiat, et sanguinem forte, per uterum minus exeuntem, per alias vias nonnunquam foras propulerit, (quod fane de omni acriore medicamento stimulante credibile est); tantum abest ut hoc perpetuum aut certum sit, quod ne decimæ cuique ægræ quæ eam hauserit remedio fuerit, neque millesimæ cuique alia et morbosa sanguinis profluvia effecerit.

1541. Cum stimulantibus quoque remediis *emmenagogis* recenferi debet argentum vivum, quippe cujus non alia videtur esse vis et usus in eliciendis mensibus. Olim quidem creditum fuit menses sæpissime supprimi a morbofo sanguinis lentore seu spissitate, et argentum vivum insigni vi pollere sanguinem resolvendi et attenuandi: nunc vero ambæ hæ opiniones pariter obfoluerunt; remedium autem interdum non inutile est, præsertim in diuturno mensium defectu.

1542. Proxime

1542. Proxime post hæc veniunt remedia quædam quæ menses aliquando movere aut reducere videntur, per vim aliquam mixtam et ancipitem, roborantem scilicet simul et stimulantem, qualis in multis herbis amaris (1092. 1189.) inesse videtur. Huc quoque referri possunt quædam ex medicamentis jam (1540.) recensitis: nonnulli vero omnia amara inter *emmenagoga* enumerare volunt; sed eorum vires neque magnæ neque certæ reperiuntur.

1543. Ferrum variis modis præparatum, et aquæ medicinales ferratæ, quorum vires roborantes certe haud exiguæ sunt, in eliciendis mensibus insigniter sæpe profunt. Quæ vero hoc consilio fontes medicinales ferratos petunt, alia simul, neque forte minoris momenti, auxilia (1130.) habere solent.

1544. Ex roborantibus vero remediis, balneum frigidum in eliciendis mensibus longe optimum et efficacissimum existit, non magis forte ob vires suas roborantes,  
quam

quam saluberrimum illum stimulum quem corpori impertit. — Recordandum est hæc et similia remedia stimulantia et roborantia, non modo impetum sanguinis intendere, verum insuper, submotis abnormibus, æqualem et naturalem ejus distributionem efficere, ipsumque *spasum*, quem primo statim aspectu auctura videntur, haud raro solvere atque arcere.

1545. Variis modis medici conati sunt stimulantia medicamenta ita adhibere, ut uterum quam maxime afficerent. Hoc consilio emplastra stimulantia ex gummi calidis, &c. abdomini partibusque vicinis interdum imposuerunt. Talis autem medicina nunc pene, vel penitus, obsolet. — De ictibus vel scintillis *electricis* prope uterum adhibendis, jam (1538.) dictum est.

1546. Cathartica acriora, solutu præsertim difficilia, adque imum usque intestinum suam acrimoniam deducunt, non illud modo, sed, propter vicinitatem partium  
tium



tium vaforumque conjunctiones, uterum quoque insigniter irritant, et menses sæpe efficacissime eliciunt; neque aliud fere medicamentum quam aloe hoc consilio frequentius aut felicius adhibetur. Hæc quidem, et sane omnia hujusmodi medicamenta, in mensibus provocandis adeo sunt efficacia, ut ipsos sæpe intempestive eliciant, mulieribus scilicet quæ uterum gerunt, unde ingens profluvium, et abortus, vel forte vitæ ipsius discrimen. — Lotiones quoque acriores per anum infusæ, eadem ratione, menses aliquando movent.

1547. Sunt quibus visum est medicamenta *diuretica* acriora, et præsertim cantharides, eodem consilio præcipere; et factis verisimile est medicamentum quod vesicam adeo vehementer irritat, tantamque eam versus sanguinis derivationem faciat, uterum quoque aliquantum esse affecturum, mensesque forte citurum: sed de tali *diureticorum* usu hætenus per experientiam minus constitit.

1548. Nonnulli demum non dubitarunt stimulantia medicamenta, pro pessis, naturalibus condere, vel fluida forma in uterum ipsum infundere. Talis vero medicina communi usui minime accommodata est, quippe quam honestæ fœminæ, ob speciem turpitudinis, vix admitterent. Præterea, effectus ejus parum certi sunt, viresque valde ancipites; uterus enim natura delicatissimus, adque obstructionem, et fane *schirrum*, admodum proclivis, non temere est irritandus.

1549. Huc tamen referri debet aliud remedium satis tutum et naturale, et sæpe efficacissimum; justus scilicet Veneris cultus. Quantum hoc in mensibus evocandis valeat remedium, plurimæ puellæ, donec virgines erant, pallidæ, macræ, male sanæ, felice conjugio, nitidæ, vegetæ, roscæ, brevi factæ, non ambigue testantur.

1550. Multa quoque remedia *antispasmodica*, non modo stimulantia (1176.), aut  
fœtida

fœtida (1540.), quorum vires ancipites sunt, sed plane sedantia, et quidem *narcotica*, veluti opium, cicutā, hyoscyamus, ad evocandos menses sæpe data sunt, et haud raro insigniter profuerunt. Parum fane constat de singularibus viribus quas nonnullis cicutæ et hyoscyamo imputare placuit; sed non dubitandum est hæc interdum, similiter ac opium, etsi vix magis, esse profutura. Opium vero, in multis casibus, menses efficacissime movet, et sæpe omnibus aliis medicamentis plane anteponendum est; nimirum cum solita naturæ molimina fiunt, et sanguis non modo velocius solito movetur, sed ad uterum simul copiosius derivatur, quamvis, propter contractionem nimis validam, seu *spasmodum* vasorum et foraminum uteri, exire nequeat: et talis corporis conditio haud ambiguis plerumque signis sciri potest, pulsu imprimis frequente et valido, auctoque cutis calore, et gravibus uteri lumborumque doloribus, et nausea, et vomitu, aliisque signis ventriculi male se habentis, et capitis



dolore et gravitate, omnibusque demum notis sanguinis ab utero quasi pulsī, inque alias ideo partes derivati. In hoc statu, opium, etiam per os sumptum, *spasimum* solvit, vasa atque foramina uteri laxat, et sic sanguini per illum exitum sæpe conciliat; sed multo fere efficacius reperitur, in ima intestina per clysterem immissum; cujus rei ratio minime obscura est.

1551. Eodem fere consilio, et sæpe haud exiguo cum successu, in similibus casibus præcipiuntur remedia quædam emollientia et infirmantia, et imprimis evacuantia. Etiam sanguinis detractio sæpe utilis, interdum prorsus necessaria; præsertim in casu recente, in vetusto enim tali rarius opus est auxilio. Non sane expectandum est hanc exinanitionem, quamvis quadruplo forte largiorem naturali quæ defecerat, mala ab ejus defectu provenientia æque subito et efficaciter esse sublaturam. Ubi tamen multa febris, et irritatio, et graves dolores,

dolores, et pulsus plenus, frequens, validus, adsunt, plerumque utilis est; et non modo ista signa morboſa ſublevat, et noxis quibuſcunque a defectu menſium oriundis aliquatenus occurrit, ſed ipſos quoque, laxatis omnibus vaſis, haud raro brevi reducit.

1552. Vomitiſ quoque menſes aliquandiu ſuppreſſos ſæpe evocat; partim forte ſtimulo medicamenti quod hauſtum erat; partim agitatione et ingentibus nixibus vomendi, quæ totum corpus, et abdomen præſertim, quatiunt, et excitant, ejuſque viſcera probe comprimunt, et multas eorum obſtructiones tollunt, et ſanguinis motum per ea expediunt; partim demum, *ſpaſmo* ſoluto, vaſiſque per totum corpus laxatis, ita ut libera et naturalis denuo fiat ſanguinis diſtributio. — Qualiſcunque vero rei ratio fuerit, hoc duntaxat firmum eſt, menſes ſæpe, intra paucas horas a vomitione, fœminis redire quibus diu defeciffent,

defecissent, et interdum etiam inter vomendum subito prorumpere.

1553. Alvi demum purgatio ad eundem finem aliquando conducit, non modo stimulo, five generali, five speciali (1546.), medicamenti quod adhibetur, sed corpore simul soluto, vasis omnibus, præsertim in abdomine, laxatis, obstructionibus et morbosis sanguinis in eo congestionibus sublatis, motuque sanguinis per omnia ejus viscera partesque vicinas probe expedito. Hinc etiam per leniora medicamenta, et quæ dicuntur refrigerantia, effecta, interdum utilis, in iisdem fere casibus, et ratione non multum aliena, ac sanguinis detractio prodesse solet.

1554. Multa denique remedia, præsertim emmollientia, quæ sanguinem deorsum invitant, utrumque versus copiosius derivant, vel reducunt, vel cogunt, ad evocandos menses sæpe egregie profunt. Ad hunc finem, crebra et valida femorum crurumque



rumque frictio, et calor variis modis iis partibus admotus, et balneum imprimis calidum, et fomenta, et lotiones, et vapores aquæ tepidæ, vel artubus inferioribus, vel ipsis naturalibus, vel partibus vicinis, sæpe adhibentur, nec raro, satis manifesta ratione, multum profunt.——Semper quoque utile est, in omni casu mensium deficientium, pedes et crura calida servare, vel a frigore saltem, et humore, diligenter et curiose defendere; nimirum quia nulla fere frequentior existit hujusmodi defectus causa quam frigus artubus inferioribus admotum.

1555. Postremo, insigniter aliquando profuit, idonea imposita ligatura, quæ cochlea ad libitum constringeretur, femorum arterias ita comprimere, ut sanguis per eas minus transiens, inque vasa uteri copiosius et majore impetu derivatus, hæc patefaceret et permearet. Hoc genus auxilii (cui sua plane incommoda sunt) menses sæpe quam citissime exprimit, juvantibus

bus præsertim remediis quibusdam emollientibus et laxantibus jam (1554.) recensitis.

1556. Cum varia remedia quæ ad menses eliciendos præcipiuntur adeo diversa et quidem contraria sint, medici est, diligenter cavere ne quid eorum intempestive adhibeatur. Absurdum certe foret, et sæpe nocentissimum, validiora stimulantia præcipere ægris, jam forte febricitantibus, doloribus cruciatis, et variis modis fatis superque irritatis; et vix minus ineptum, infirmantia, et sedantia, et evacuantia mulieribus dare, jam longa valetudine fractis atque exhaustis, et dudum nimis relaxatis.—Ipsum vitæ et victus regimen, pro diversis morbi causis et temporibus, corporisque conditionibus, variare oportet.—Rari quidem casus quibus per longum tempus exercitatio non conveniat.

1557. Cavendum de his, non secus ac de aliis evacuantibus remediis, iisdemque  
de

de causis, ne validiora duntaxat et acriora valde infirmis aut mobilibus adhibeantur.

1558. Cavendum præ omnibus ne gravidis per incuriam dentur; quod temeritate satis frequente, sed minime decora, haud raro factum est. Honestæ etiam matronæ hac de re interdum decipiuntur, et medicos ideo in turpem et periculosum errorem ducunt: innuptis vero, ex plebe saltem, de mensium defectu conquerentibus, propter causas satis manifestas, nunquam temere credendum est.

1559. In mensibus per medicinam eliciendis, memoria semper tenere oportet, naturam multo magis quam artem valere, illaque repugnante, aut nil juvante, hanc parum efficere; et pleraque igitur remediorum jam recensitorum, stimulantium pariter, et anodynorum, et relaxantium, &c. tum maxime, vel solum forte, esse adhibenda, cum naturæ molimina ad menses producendos fiunt; namque per vim consuetudinis, talia



in diuturno etiam mensium defectu, per intervalla, sæpe æqualia et menstrua, molimina repetuntur. Docuit enim experientia amplissima, optima quæque remedia, ubi istiusmodi molimina nulla fierent, non modo frustra plerumque dari, sed postquam hoc modo diu intempestive fuerant adhibita, minus etiam valere ipso tempore, quo, juvantibus naturæ moliminibus, maxime profuissent, nisi prius vires eorum prava administratione perditæ essent atque consumptæ.—Hoc autem de omnibus non æque verum est; et præsertim de argento vivo, et corporis exercitatione, quæ per intervalla etiam, vel maxime sunt adhibenda.

C A P. XL.

*De sanguinis detractiōe.*

1560. **P**roxime post varias exinanitiones per foramina naturalia concitatas, considerandæ sunt et illæ quæ per vias novas et arte factas perficiuntur. Harum plane princeps est sanguinis detractio, eximium sane remedium, nimirum quo nulum existit in variis et quidem gravissimis morbis potentius aut præsentius auxilium; neque profecto pauci sunt morbi in quibus sæpe unica spes et perfugium videtur. Frequenter vero anceps fit et periculosum remedium, neque ulla fere exinanitio intempestive facta, magis, aut certius, aut citius nocere solet, majoremque in adhiben-

do prudentiam et circumspeditionem requirere.

1561. Sanguis autem variis modis in variis morbis detrahitur; vel grandiore scilicet incisa vena, vel interdum forte arteria, vulnere adeo amplo ut plurimus sanguis per id brevi effluat; vel hirudinibus cuti admotis, quæ sanguinem lentius et parcius exfugant; aut cuti prius cæsæ et scarificatæ cucurbitulis impositis, quæ sanguinem, alioquin vix profluxurum, per multa minuta vulnera educant; aut demum partibus quibusdam probe scarificatis, quibus neque cucurbitulæ neque hiru-  
dines possint admoveri.

1562. Prior modus (1561.), magna fere, et subita duntaxat, exinanitione facta, quamvis forte partes unde sanguis detractus esset primo et maxime exhauriat, tamen totum corpus similiter et brevi afficit; et propter hunc subitum et generalem effectum,



fectum, detractio sanguinis generalis apud medicos non inepte vocatur.

1563. Alter vero modus (1561.) sanguinis eliciendi, distinctionis causa, specialis vel singularis ejus detractio vocatur. Exinanitio enim hoc modo effecta, exigua fere est, et semper lenta, neque remotas partes aut totum corpus multum afficit; nimirum quia vasa quantitati humorum quam habent intra certos limites facile se accommodant, dummodo mutatio (518.) lenta fuerit; partem vero unde sanguis elicitur, partesque etiam vicinas egregie sæpe afficit, nec raro in variis singularum partium vitiis multo plus valet generali sanguinis detractio, quamvis decuplo forte largiore; et, quod vix minoris momenti est, tuto sæpe adhibetur, et aliquoties forte repetitur, ubi generali sanguinis detractio, corpore scilicet jam valde exhausto et infirmato, locus plane nullus foret.

1564. Effectus

1564. Effectus sanguinis per venas modica quantitate detracti, hi fere sunt: copiam humorum circumeuntium minuit, vasa itaque quæ eos continebant laxat, horum sic (318, 20.) vires attenuat, et igitur impetum sanguinis, utpote qui ab eorum contractione (421, 2.) magna ex parte pendet, temperat cohibetque, pulsus debiliores et tardiores reddit, vires musculorum infirmat, corpusque demum totum refrigerat, et simul aliquantum relaxat.

1565. Quod si interdum pulsus post sanguinem detractum pleniores, validiores, frequentiores fiunt, sanguinisque impetus plane augetur, et corpus firmari, et vires ejus refici et expediri videntur, hoc non dubie tribuendum erit sublato per exinanitionem tanto sanguinis oneri et moli, quantum et arterias plus æquo (321. 509.) distenderet, earumque vires opprimeret, et totum corpus gravaret.

1566. Effectus

1566. Effectus vero naturales et communes hujus exinanitionis (1561.) in sanis pariter et plerisque ægris, vel inter ipsum sanguinem detrahendum, aut brevi post, satis manifeste spectantur; ille nimirum, cum primo inciditur vena, quasi æstuans, et magno impetu profiliens, paulatim languidior effluit, et brevi fere stagnat, neque frictione brachii, neque actione (424.) ejus musculorum, facile exprimendus, nec raro, deficientibus viribus quæ propellerent, prius omnino sistitur quam ad idoneam quantitatem missus fuerit. Sæpe etiam brevissimo post tempore a sanguinis detractio impetus ejus insigniter minui videtur, quamvis dum ipse efflueret nulla fere mutatio observanda esset. Neque profecto rarum est, sanguine semel neque large detracto, nulloque alio adhibito remedio, morbos quosdam a nimio ejus impetu provenientes brevi et penitus tolli. Et pari fere ratione, multa sanguinis profluvia suum quodammodo secum remedium asserunt.

1567. Magnæ



1567. Magnæ vero sanguinis detractio-  
tiones, graviores et fere perniciosiores ef-  
fectus habent; arteriis enim variisque cor-  
dis faccis multum et subito relaxatis, viri-  
busque eorum sic imminutis, sanguinis  
impetus adeo deficit, ut ad excitandum  
suisque muneribus aptandum cerebrum  
non amplius sufficiat, unde vertigo, nau-  
sea, vomitus, animi defectio, et non modo  
cordis arteriarumque actio, sed omnis mo-  
tus atque sensus interruptus. Qui in hunc  
statum per magnam sanguinis jacturam  
deducti sunt, quamvis animi defectio bre-  
vis fuisset, et sublato facilis, pristinas vires  
ægre et tarde sæpe recuperant, et interdum  
vix unquam penitus convalescunt, præser-  
tim si morbo antea fracti et infirmati essent.  
Quin et ob hanc generalem infirmitatem,  
sanguinisque præsertim motum languen-  
tem, plurima corporis munera haud pa-  
rum impediuntur; viresque ejus conserva-  
trices imprimis, quibus multos morbos ar-  
cere, vel cum jam præsentibus conflictari  
solet, mirum in modum deficiunt. Ipsius  
denique

denique sanguinis conditio et temperatio tali exinanitione haud parum afficitur, scilicet qui postea tenuior et pallidior sæpe fit, partibus ejus crassis tardius (519.), tenuioribus brevi resectis. — Incredibilis vero hac de re inter varios homines differentia (1353.) existit, ita ut dum alii aliquot libras sanguinis facile et sine incommodo amittant, alii paucaram unciarum jactura vel animo linquantur, vel plurimum duntaxat infirmentur. Insignis quoque etiam in his rebus est vis consuetudinis; assueti enim tantam facile tolerant exinanitionem, quanta inassuetis, quamvis plane validioribus, haud parum noceret. Neque profecto inter singulos tantum homines, sed aliquatenus inter totas gentes, hujusmodi differentia intercedit. Neque medicina Gallica, verbi gratia, Anglis tuto adhibenda est, neque Anglica semper Gallicis præcipienda, qui, ob pravam et inveteratam consuetudinem sanguinem in omnibus fere morbis mittendi, istam sæpe exinanitionem et tolerant et plane requi-

runt, cum minus affuetis, quamvis fimilibus morbis laborantibus, inutilis prorsus, vel admodum perniciofa foret.

1568. Ingens autem et subita sanguinis jactura omnibus brevi et multum nocet, nec raro mortem affert. Hæc enim non modo insignem debilitatem, et vertiginem, et nauseam, aut vomitum, et animi defectionem (1567.), sed convulsiones quoque generales, et plerumque lethales, inducit.

1569. Frequens demum sanguinis detractio sua quoque incommoda et pericula habet, et profecto raro non nocet, corpore nimirum infirmato et relaxato, multis ejus muneribus læsis, motu sanguinis paulatim languente, variisque ideo secretionibus et excretionibus, præsertim per cutem, impeditis, et sanguine ipso tenui et pallido facto; unde varii et graves morbi, et imprimis hydrops, partim ob humores nimis attenuatos eorumque motum languidum, partim quoque ob partes solidas infirmatas



firmatas atque solutas. Sæpe etiam a nimis frequente sanguinis detractiōe, corpus admodum obesum fit, cujus rei ratio alibi (102.) jam reddita est; et quod magis mirum videtur, sed non minus verum est, frequens istiusmodi exinanitio, homines sanguine nimis plenos reddit; cujus forte rei non alia est ratio, quam quod corpus laxatum simul (508.) et infirmatum nimiam humorum abundantiam facilius accipit, et ad ea munera minus valet, quibus a tanto tamque nocivo onere se tueri aut liberare debet.

1570. Ex variis effectibus sanguinis detractiōis jam (1564, 9.) recensitis, perspicuum est, eam in omni sanguinis abundantia interdum utilem fore, et fane non modo in vera, ut vocatur, *plethora*, verum etiam in (514.) *spuria*, inque *plethora* ad spatium (513.), vel ad vires (515.), et in omni morbo qui a nimia sanguinis abundantia provenit, vel cujus hæc pars est, (nimirum ut vires naturæ salutares, tanto

impedimento liberatæ, ad sua munera melius valeant), et in omni sanguinis distributione abnormi, ejusque in partibus quibusdam congelationibus morboſis, et nimio impetu, aut nimia arteriarum in parte aliqua ſingulari actione, veluti in (373.) inflammatione; et in nonnullis impedimentis quæ libero ſanguinis, præſertim per cor atque pulmones, motui obſtarent; veluti variis obſtructionibus aliisque vitiis magnorum vaſorum, aut cordis ipſius, aut ſpirandi difficultate, (cujus in omni fere genere ſanguinis detractio aliquid levaminis affert, quamvis non ſemper, variis et ſæpe manifestis de cauſis, idoneum auxilium ſit), et ſæpe in magno dolore aut gravi irritatione, veluti a calculo in renibus aut veſica, aut acrioribus ventris torminibus, aut ramice ſtrangulato, aut partis cujuſvis vulnere, contuſione, fractura, luxatione, &c. cum ad leniendum dolorem, et irritationem ſic minuendam, tum quoque ad relaxandas arterias, et venas, et ſane omnes corporis partes, quo facilior fiat quorundam

quorundam malorum sanatio, et minus inflammationis aut febris periculum; et demum in singulari illa cerebri nervorumque irritatione, vel potius conditione ignota, qualis in mente captis accidere videtur, sine ullis aut nimix sanguinis abundantix, aut inflammationis, aut febris indiciiis.

1571. Nocet vero frequentissime sanguinis detractio, iisdem de causis, sed fere magis et citius quam alix exinanitiones, flaccidis, relaxatis, infirmis, mobilibus, iisque qui vel longa inedia, vel pravo et parum nutriente cibo, vel gravibus aut diuturnis morbis, vel magnis exinanitionibus jam fracti et exhausti sunt, iisque præsertim qui morbis putridis, vel cum vel sine febre, laborant.

1572. Sæpius necessaria vel utilis est in illo genere morborum qui *pyrexia* apud *nosologos* dicuntur, rarius in *neurosis*ibus, rarissime in *cachexiis*. Sed nulla istiusmodi  
regula



regula certa aut perpetua esse potest. Et profecto in multis febribus similibusque morbis, sanguinem mittere neque necessarium neque tutum est; et in multis morbis *nervosi generis* idem remedium utilissimum fit, et in nonnullis etiam morbis ex *cachexiis*, variis de causis, non inutile.

1573. Cum sanguinis detractio tot varios effectus in corpore humano præstat (1564, 9.), quorum alii utilissimi, dum alii eidem ægro valde perniciosi forent, perspicuum est, etiam in morbis simplicioribus qui tale auxilium requirant, prudentia aliqua opus esse in remedio adeo ancipite adhibendo. In morbis vero compositis et mixtis, quales plerumque tractamus, major adhuc circumspectio requiritur, nimirum cum signa quædam morbi postulant, dum alia vetant sanguinem mitti; vel cum medicus, (quod vix minoris momenti est), ex morbi natura et solito progressu, bene novit signa præsentia, sanguinisque detractionem postulantia, brevi esse desitura, novaque,

novaque, prioribus contraria, et ab hac exinanitione alienissima, cito esse adventura. Semper quoque memoria tenendum est, tantam sæpe quasi puncto temporis ab intempestiva sanguinis detractiōe corpori inferri perniciem, quantam neque optimi medici peritia, neque omnia medicinæ subsidia postea compensare potuerint. Sanguis enim semel missus nunquam in venas redit, viresque cum illo amissæ in variis morbis haud facile reficiuntur.

1574. Sic, in nimia sanguinis abundantia, quamvis certissimis signis manifesta, nisi res valde urgeat, et vehementior aliquis morbus vel jam eruperit, vel plane duntaxat instet, veluti febris, aut sanguinis profluvium, aut inflammatio, aut *apoplexia*, aut *hysteria*, aut morbus comitialis, parum fere convenit sanguinem detrahēre. Tametsi enim tali vitio certissimo et promptissimo remedio fit, breve fere et quodammodo anceps reperitur auxilium, scilicet quod corpus adeo relaxat atque infirmat,

et

et excretiones adeo cohibet, ut brevi major quam antea sanguinis abundantia, et (ob corporis conditionem) fere nocentior, de-  
nuo congeratur. Quapropter, ubicunque tempus datur, aliis omnino modis (511.), lentioribus profecto, sed magis certis et tutis, nimiam sanguinis abundantiam tollere atque arcere oportet.

1575. Ratione quoque fatis simili, in morbo comitali, et in *hysteria*, multo rarius convenit sanguinem mittere quam nonnulli medici sibi met persuaferint; quamvis enim minime dubium sit nimiam sanguinis abundantiam, aliqua saltem ex parte, ambos istos morbos sæpe efficere, et sanguinis detractionem huic vitio statim fere remedio fore; tamen corpus simul, ob infirmitatem et relaxationem quam sanguinis jactura efficere solet, non modo ad plenitudinem (1569.) illam proclivius, sed multo etiam mobilius fiet. Neque profecto rarum est insignem corporis mobilitatem,  
et



et demum veram *hysteriam*, magna aut repetita sanguinis detractione induci.

1576. Quin et in multis morbis ubi nimius sanguinis impetus et corporis calor a nimis vehemente cordis et arteriarum actione fiunt, non semper convenit sanguinem mittere; nimirum quia status iste sæpe cum magna infirmitate conjungitur, vel in hanc saltem brevi definit, veluti in febribus varii generis, cum intermittentibus, tum continuis; interdum etiam idem status ad putredinem vergit, veluti in febribus quibusdam, aut *variola confluyente*, aut angina maligna: in his igitur et similibus casibus, utcunque urgentes videantur, sanguis vel cautissime detrahendus est, vel omnino non mittendus, quoniam talis exinanitio, quæ primis morbi diebus minus cauto medico prorsus necessaria videretur, postea, per suos effectus infirmantes, non modo inutilis, sed nocentissima plerumque foret.

1577. Quapropter, cum sanguinis detractio adeo anceps auxilium est, in iis etiam morbis qui primo aspectu eam maxime requirere videntur, oportet, in casibus præsertim dubiis, multas alias, et quidem minutissimas interdum res, præter signa manifestiora morbi, diligenter considerare atque perpendere, quæ commonere possint hanc exinanitionem vel necessariam, vel utilem, vel tutam saltem futuram, vel plane inutilem et perniciosam.

1578. Huc pertinent imprimis variæ corporis ipsius conditiones, ætas, sexus, constitutio, vires, consuetudo; et multæ etiam res externæ, cœlum, anni tempus, victus, et vitæ genus; et demum morbi ipsius natura, atque origo, et tempus, et remedia jam adhibita, et molimina virium naturæ conservatricium et salutarium, &c.

1579. Sic juvenes, et homines constantis ætatis, quam infantes aut senes, viri, quam fœminæ, firmi, quam molles et flaccidi,  
graciles

graciles fere, quam obesi, robusti, quam infirmi et delicati, assueti, quam inassueti, astuosi, quam ignavi et delides, copioso et valido, quam parco et tenui victu vefcentes, frigidarum, quam calidarum regionum incolæ, hanc exinanitionem frequentius requirunt et melius tolerant. Eadem hyeme et vere, quam æstate atque autumno, in plerisque morbis magis necessaria est; in plurimis morbis, veluti febribus, et inflammationibus, qui a frigore proveniunt, tuta, et plerumque utilis; in multis qui a contagione fiunt, inutilis et perniciofa; in recente casu, five febre, five inflammatione, sæpe utilis vel necessaria; in vetusto, quamvis ejusdem generis, plerumque nocens et periculosa; post alias, et præsertim magnas exinanitiones, minus fere tolerabilis; et ubicunque salutares excretiones sponte acciderint, plerumque haud parum nociva.

1580. Oportet præ omnibus, in sanguine detrahendo, pulsus rationem habere, sci-



licet quo nullum fere existit certius indicium, unde medicus judicare possit talem exinanitionem vel utilem vel tutam duntaxat fore. Sic plenus et validus pulsus sanguinis detractionem (si hæc vel a natura et causa, vel aliis signis morbi necessaria visa fuerit) plerumque bene tolerat; durus vero, et simul frequens pulsus, talem exinanitionem non modo bene tolerat, sed in plerisque morbis qui febrem habent, plane requirit. Pulsus vero debilis, parvus, intermittens, utcunque frequens, a sanguinis detractione plerumque alienissimus est; et profecto, mera pulsus frequentia (445, 50.) hanc exinanitionem rarissime postulat.

1581. Hæc vero non adeo sunt firma aut perpetua, quin interdum sanguinem etiam largius et sæpius mittere oporteat, quamvis pulsus parvus, et debilis, et abnormis sit; veluti in quibusdam inflammationibus, præsertim viscerum abdominis, et nonnunquam pulmonis. Et in morbis quibusdam

quibusdam capitis, veluti *apoplexia*, aut fracturis calvariæ, quamvis pulsus molliſſimus fuerit, et minime frequens, vel fortasse etiam solito tardior, sanguis nihilominus audacter et large detrahendus est. In hujusmodi scilicet casibus, a natura morbi parti ad vitam necessariæ incumbentis, et ad exitum infaustum properantis, perspicuum est gravius et præsentius periculum ab eo instare, quam a magna sanguinis jactura, et a debilitate, aliisque malis quæ inde provenire solent.

1582. Medici porro sæpe solent judicare de sanguinis detractiōe repetenda, a conditione sanguinis jam missi, et ab effectibus prioris detractiōis.

1583. Sic, cum sanguis ruberrimus et crassus est, et magis adhuc si tunica alba et tenace tegitur (503.), æger alteram detractiōem sanguinis tolerare poterit, in omni fere morbo ubi alia signa monent tali opus esse remedio. Multi profecto morbi,

morbi, in quibus tunica ista apparet, omnino requirunt ut sanguis largius mittatur; minime vero soli huic signo semper fidendum est, aut conandum sanguinem iterum iterumque mittere, donec illo tegmine penitus careat; scilicet quod sæpe admodum periculotum esset, et haud raro prorsus impossibile.

1584. Ubicunque vero sanguis tenuis et pallidus est, et male cogitur, et jam coactus lividus aut viridis apparet, et facile et brevi dilabitur, et foetet, et putrescit, detractio ejus minime convenit.

1585. Cum, sanguine semel, vel aliquoties fortasse, detracto, æger istam exinanitionem bene tolerat, pulsusque vel plenior et validior quam antea fit, vel saltem parum infirmatur, morbusque aut non sublevatur, aut postquam mitior factus vel pene sublatus fuerit, denuo recrudesceat, tum fere audacter ad idem remedium iterum confugere licebit.

1586. Si



1586. Si vero, post sanguinem semel vel sæpius jam detractum, vires ægri subito et multum deficiunt, pulsusque debiliores et frequentiores, vel forte abnormes, fiunt, suspicandum erit nimium sanguinis per venas jam esse detractum. Quod si morbus adhuc urget, et tale auxilium desiderat, sanguis a parte laborante per hiru-  
dines vel cucurbitulas tuto sæpe detrahi potest (1563.), quamvis corpus largiorem et magis subitam sanguinis detractionem minime pati potuisset.—Hæc vero non ita intelligenda sunt, quasi ab altera sanguinis detractione semper abstinendum esset, si æger priorem male tolerasset; multi enim qui prima, et fortasse exigua sanguinis detractione, animo relinquuntur, plures postea, et multo largiores, et desiderabunt et optime patientur.

1587. In casibus dubiis, quales fati-  
s frequenter occurrunt, sanguis caute sem-  
per et parce mittendus est; neque profecto  
absurdum est exiguam ejus detractionem  
interdum

interdum experiri, quo clarius constet quænam fit morbi natura, aut quidnam auxilii ab hac exinanitione expectandum. In talibus enim casibus, vix credibile est jacturam paucarum unciarum sanguinis quicquam esse nocituram, et ex ejus effectibus, qui sæpe manifestissimi sunt, et a statu ipsius sanguinis, medicus scire poterit quid a largiore exinanitione aut sperandum sit aut metuendum.

1588. Ipsa animi defectio quæ a sanguinis jactura sæpe inducitur, in variis morbis, veluti febribus, inflammationibus, sanguinis profluviis, doloribus, irritationibus, *spasms*, infania, &c. nonnunquam prodesse videtur; nec defuerunt medici, præsertim apud veteres, qui ausi sint sanguinem in quibusdam casibus eo usque detrahere, donec æger animo lineretur. Hoc autem (quamvis insigniter aliquando prodesse potuerit) rarissime tentandum est; salutares enim effectus talis animi defectionis minime certi aut perpetui sunt; ipsaque

saque suo incommodo, et sane periculo interdum non caret; et præterea nunquam scire possumus quantum sanguinis sit detrahendum, cum differentia tam insignis hac de re inter varios homines (1567.) existit. Alii enim prius animo linquentur quam sat sanguinis amiserint ad morbos quosdam summovendos, alii vix, et ne vix quidem animo linquentur, donec tanta sanguinis jactura fuerit, quanta maximam et periculosissimam infirmitatem inferat, vel in quibusdam morbis brevi lethalis fiat. — Animi defectio inter sanguinem mittendum minore fere hujus jactura induci potest, si ex majore vulnere, et ægro stante, detrahatur.

1589. Sæpius vero talem animi defectionem inter sanguinem mittendum, utpote inutilem et perniciosam, diligenter præcavere oportet, in iis præsertim qui animo facile linqui solent. His (si omnino sanguis mittendus est) decumbere expedit; vulnus quoque parvum esse debet, et vertigine vel nausea accedente, sanguinis



fluxus paulisper fisti potest, viresque, idoneis adhibitis medicamentis, aliquantum refici.

1590. Diu atque acerrime inter medicos disputatum est, unde, in variis morbis singularum partium, sanguis detrahendus esset; utrum scilicet a parte laborante, vel huic quam proxima, an a parte remotissima. Multis enim medicis sanctissime persuasum erat, insignem sanguinis eam partem versus ubi vena inciditur derivationem, et parem ideo ejus a remotis, et imprimis ab oppositis partibus revulsionem fieri. Hujusmodi autem derivationem, siqua revera fit, neque tantam neque tam perpetuam esse ac quidam auctores sibi perluaferant, vel ex hoc luculenter constare potest, quod vena incisa, sanguis primo magno impetu profiliens, tæpe vel languide effluit, vel omnino subsistit, priusquam aut multum ejus effluxerit, aut ægri vires manifeste defecerint.

— Sed controversiam fere de lana caprina,

na, et jam obsoletam, non opus est fufius tractare. Scire fat est experientiam abunde jam demonftraffe, quod et ratio, poft verum fanguinis motum deprehenfum, viresque quæ illum propellerent exploratas, docuiffe debuit, omnem fanguinis detracti-  
 onem tum maxime prodeffe, cum a parte laborante, vel huic quam proxima fit. Hoc quidem in magna et generali fanguinis detracti-  
 one minoris momenti est, per-  
 magni autem in fpeciali, per hirudines, aut cucurbitulas; ita ut in plurimis inflam-  
 mationibus, quæ nullam, vel leviffimam tantum febrem generalem habent, exigua omnino fanguinis detractio a parte inflam-  
 mata, vel huic quam proxima, morbum vel prorfus folvat, vel insigniter fublevet, cum maximæ fanguinis detracti-  
 ones a re-  
 motis partibus nihil profuturæ effent. Quin et interdum idem modus fanguinem detra-  
 hendi et convenit et fufficit ad quasdam inflammationes fummovendas, quamvis etiam aliquid generalis febris adfit; ni-  
 mirum quia irritatio ipfius inflammationis

nonnihil febris accendere potest, illa autem submota vel sublevata, hæc simul, vel paulo post subsidit.

1591. Nonnulli medici sibi met perfuaserunt, haud parum in multis morbis præstiturum, sanguinem ex arteriis potius quam ex venis detrahere; nec defuere et nuper et olim qui ausi sint varias arterias hoc consilio incidere. Nondum vero aut ratione aut experientia demonstratum est magis prodesse ex arteriis quam ex venis sanguinem mittere; et interim probe constat, arteriam incidere operosum semper esse, et fortasse periculosum, cum venam incidere sit expeditissimum atque facillimum, et (quod opus ipsum attinet) omni periculo vacuum. Præterea, detractio sanguinis per arterias admodum incerta est; aliquando enim vix satis effluit, interdum nimis, priusquam sanguis cohiberi possit: ægri quoque detractiorem sanguinis per arterias quam per venas, utpote magis subitam, difficilius fere patiuntur, et citius  
animo



animo linquuntur, et tardius convalescunt. Quapropter nulla arteria incidi debet, præterquam ramus aliquis *temporalis*, ubi opus neque periculofum neque valde ope-  
rofum est: fed ne hæc quidem arteria, nifi res valde urgeat, incidenda est. In gra-  
viore autem morbo, et præsertim capitis, aut oculorum, haud absurdum erit tale auxilium experiri, nimirum quod insigni-  
ter interdum profuisse visum est.

1592. Satis verifimile est, egregie esse profuturum, arteriam partis inflammatae, vel ramulos etiam aliquos majores cum ea communicantes atque conjunctos, si facultas esset, incidere. Neque profecto abfi-  
mile est, detractionem sanguinis per cucurbitulas cruentas eo magis valere adver-  
sus inflammationem partis cujusvis vicinæ, quod minutæ arteriæ, pariter ac venæ, ab instrumento in eo opere promiscue secan-  
tur.

1593. Innumera

1593. Innumera fere monita atque præcepta de sanguinis detractiōe a variis auctoribus data sunt, et passim apud vulgus, et fane multos medicos recepta; quorum multa adeo inepta et pene ridicula sunt, ut neque observari neque recenseri mereantur; alia, quodammodo bona et sana, sed nihilominus negligenda ubicunque gravior aliqua necessitas urget; et nisi res urget, raro aut opus est aut prodest sanguinem mittere. Sic, quamvis minime conveniat pleno ventriculo, aut instantibus aut præsentibus mensibus, sanguinem mittere; tamen in vehemente febre, aut visceris inflammatione, aut morbo capitis, &c. quicquid incommodi aut periculi a tali exinanitione accidere possit audacter subire oportet, scilicet quia gravior multo pernicies ab ipso morbo instat.—Menses vero quod attinet, satis jam compertum est, eos multo minus et multo rarius quam vulgo creditur per sanguinis detractiōem turbari vel fisti.

C A P. XLI.

*De remediis epispasticis.*

1594. **Q**Uæcunque remedia vel tenuem humorem, vel pus, per inflammationem et suppurationem ex ruptis vasis educunt, *Epispastica* generatim dicuntur : speciatim vero hoc nomen datur *vesicatoriis*, emplastris scilicet ex cantharidibus aliisque acris medicamentis factis, quæ cuti imposita, inflammationem excitant, et cuticulam, multo interposito tenui humore, a subjecta cute separant, et in vesiculas elevant. Sed non modo tenuis et pellucidus istiusmodi humor per recentem inflammationem quam cantharides excitant detrahi potest, verum etiam pus crassum et album copiose educi,



educi, si idoneum unguentum vel emplastrum acrius parti jam inflammatae diu et frequenter imponitur, quod inflammationem producat, et fere ad libitum perpetuet. *Vesicatorium* autem, ut vocatur, perpetuum, tantum doloris et molestiae facessere solet, ut communi usui minime aptum sit; et magis fere prodest nova *vesicatoria* iterum iterumque, vel eidem loco, si hic satis firmam et sanam cutem denuo adeptus est, sin minus, partibus vicinis imponere.

1595. Quod si necessarium creditur non tenuem tantum humorem, sed verum pus, elicere, hoc non difficulter, sed tardius aliquantum effici potest, ulceribus in locis idoneis arte factis, quæ variis artificiis ad libitum aperta, et inflammata, et purulenta servari possint. Talia vero ulcera fiunt vel urendo, vel secando, vel perforando: uritur autem pars quælibet vel ferro candente, (quod, propter causas satis manifestas, raro tentatur), vel medicamento caustico; secatur scalpello; et vulnere vel ulcere sic facto pisum,

sum, vel globulus ligneus, vel aliquid durius, et, si opus fuerit, acri medicamento tinctum, conditur, quod id irriter, ejusque sanationem impediat; et ulcus hoc modo factum, et apertum servatum, *fonticulus* vocatur: perforatur vero et quasi transuitur cutis duobus locis non nimis distantibus acu lata grandiore, apta fistula sive vagina tota præter mucronem inclusa, et filum crassum et molle ex gossipio factum ducente: protrusa primo acu, deinde subducta fistula, filum in cute relinquitur, ejusque capita inter se deligantur, ipsumque subinde per foramina trahitur atque movetur, ut ulcus purulentum fiat, et facilis puri exitus detur: hujusmodi ulcus *setaceum* vocatur.

1596. Inter *vesicatoria* autem, et *fonticulos* vel *setacea*, haud parum interest, quod ad varios quos in corpore humano præstent effectus: illa enim satis subito, hæc tarde omnino humores eliciunt; illa igitur in acutis et urgentibus, hæc in vetustis et lentis morbis conveniunt: illa parvam fere

exinanitionem efficiunt, nisi in quibusdam et quidem rarissimis exemplis, ubi, propter singularem corporis conditionem, incredibilis vis humoris tenuis effluit, qualis corpus insigniter exhaurire et infirmare nonnunquam visa est; hæc, utpote quæ pus detrahunt, quod ex crassiore, et glutinoso, et maxime nutriente parte sanguinis fit, corpus multo magis quam pro mole humoris qui elicitur exhauriunt: illa igitur pro evacuantibus remediis parum prodesse possunt; hæc autem, et natura et diuturnitate exinanitionis quam efficiunt, utilissima sæpe fiunt: illa demum magnum et subitum stimulum, nunc saluberrimum, nunc perniciosissimum, parte cui imponuntur, partibusque vicinis, et quodammodo toti corpori impertiunt; hæc vero stimulum fere exiguum et brevi desitutum dant, qualis neque prodesse multum neque nocere potuerit: omniaque, partim stimulo (1159.) suo, partim exinanitione (1335.) ipsa, sanguinis cursum et distributionem aliquantum mutant, nimirum  
qui



qui ab aliis partibus, præsertim vicinis, avertitur, adque illam unde exinanitio fit, vel cui *vesicatorium* imponitur, copiosius derivatur. Hoc modo nimiam et abnormem arteriarum partis cujusvis actionem sæpe temperant et cohibent, et *spasimum* solvunt, non modo arteriarum, sed et aliarum partium. Quin et experientia amplissima et felicissima fatis jam demonstravit, *epispastica* remedia rite et tempestive adhibita, non modo cutem partesque proxime sub illa jacentes, sed partes et viscera quæ in intimis corporis penetralibus conduntur insigniter afficere, diversisque morbis laborantibus variis modis opem ferre.

1597. Per hos varios effectus (1596.) *epispastica* remedia haud parum profunt in præcavendis vel submovendis nimia humorum abundantia, aut derivatione aut congestione abnormi, variisque morbis, cum vetustis, tum acutis, qui a talibus vitiis suam originem ducunt, vel cum iis

conjunguntur; veluti sanguinis quibusdam profluviis, et phthisi, et *apoplexia*, et paralyfi, five generali, five partis cujusvis singularis, et morbo comitiali, et dolore capitis, et vertigine, et lippitudine, et cæcitate, et hydrope varii generis, præsertim capitis, vel pectoris, vel testiculi, et in multiplice spirandi difficultate, et in gravedine, et tussi vehemente, et excreatione difficili, et in variis irritationibus, vel *spas-  
mis* fortasse, viscerum abdominis, doloribus colicis, singultu, vomitu, &c. et præ omnibus, in variis inflammationibus, quarum fere omnibus *vesicatoria* partibus affectis quam proxime imposita insigniter opitulantur; quod profecto inter certissima et utilissima hujus seculi reperta non immerito recenferi potest, quamvis enim quædam remedia *epispastica* ab antiquissimis fere temporibus cognita fuerint, et a nonnullis medicis, in quibusdam inflammationibus, veluti lateris dolore, adhibita atque laudata, diu antequam emplastra ex cantharidibus in usu essent, et hæc quoque,

que, per ducentos fere annos, a multis medicis, in variis morbis, et præsertim in febribus, frequenter et libere fuissent imposita, tamen egregiæ illorum vires, et adversus inflammationes utilitas, et idonea administratio, nuper tantum sunt deprehensæ. In leviori inflammatione, ubi febris aut nulla, aut lenissima saltem, adest, super partem inflammata[m] imposita, nullo omnino detract[o] sanguine, sæpe ad morbum submovendum sufficiunt; et in gravissimis etiam, ubi vehemens simul febris urget, sanguine jam semel, atque iterum fortasse, misso, utilissima reperiuntur, et magnas et repetitas sanguinis detractiones, alioquin solam spem atque per-fugium, minus necessarias reddunt, et majus præterea levamen sæpe afferunt quam maximæ sanguinis detractiones, et simul valde infirmis et exhaustis optime conveniunt, qui sanguinis detractionem nullo modo tolerare potuissent.



1598. Olim apud medicos opinio fuit, (liquidem de tali re omnino opinati fuerint), parum interesse ubinam corporis *vesicatoria* imponerentur; experientia vero jam satis demonstravit, ea, non secus ac sanguinis detractionem per hirudines aut cucurbitulas, tum maxime, vel solum fortasse, in inflammationibus prodesse, cum super partem inflammata, vel huic quam proxime, imponuntur. Neque sane verbis opus est, ut unusquisque probe perspiciat quantum similitudinis et convenientiæ sit inter hæc bina remediorum genera.

1599. Non tamen dissimulandum est, *vesicatoria* sæpe per suum stimulum totum corpus aliquantum excitare, pulsusque imprimis festinare, quod gravi inflammationi, fortasse cum vehemente febre, omnino alienum videtur; sublevata vero inflammatione, febrem ipsam brevi minuunt: hinc autem fit, ut omne eorum beneficium non semper prius perspicuum sit quam ipsa sublata fuerint, eorumque irritatio deficiat;

fierit; et ut nonnunquam primo nocere videantur, quamvis post aliquot horas utilissima futura.

1600. Constat quoque *fonticulos* interdum, vel *setacea*, adversus inflammationes quasdam vetustas et inveteratas haud parum valuisse. Patet quoque *setaceum* pus ex abscessu facillime et efficacissime esse educturum, si modo acus vomicam perforaverit, similiter ac aquam ex testiculo hydropico detrahat. Creditur autem pus interdum per *fonticulos*, vel *setacea*, ex vomicis profundis atque remotis educi, quas illa neque tetigissent, neque tangere potuissent, pure scilicet ex suis abscessibus resumpto, adque nova hæc ulcera delato, vel per telam reticulatam eo viam sibi aperiente.

1601. A tempore *Herculis Saxonie* ad nostrum usque, multi medici, et præsertim *Iatro-mathematici*, et nusquam magis quam in Britannia nostra, in plerisque febribus *vesicatoria* adhibuerunt, sibi et populo persuaserunt

persuaserunt ea adversus febres insigniter valere, variisque modis tanti beneficii rationem reddere conati sunt, quod alii, detractæ morbosæ humorum parti (1332), alii, meræ exinanitioni, alii, stimulo quem corpori impertiunt, alii, sanguini antea nimis spisso, per cantharides in illum delatas resoluta et attenuata, alii demum, soluto *spasmo* vasorum summæ cutis, humoribusque ab externis partibus antea pulsis ad easdem denuo revocatis, tribuendum esse voluerunt.

1602. Prius vero quam de his aut similibus commentis operæ pretium sit disputare, oportet certiores fieri de re facta cujus rationem reddere cupimus; hæc enim multo magis dubia est quam vulgo creditur; quamvis enim constet inter omnes, *vesicatoria*, sublevatis quibusdam morbi signis quæ maxime urgeant, in nonnullis febribus interdum prodesse, multi et experientissimi medici negant illa pro generali febris remedio quicquid valere, et credunt



credunt ea potius nocere, quod sane in multis casibus satis superque certum est.

1603. Credita sunt præsertim respondere sub finem febrium, et in iis casibus ubi magna infirmitas, et stupor vel sopor aliquis aderant. Talis autem sopor non semper (401.) nocet, aut hujusmodi remediis eget; et viribus multum fractis, motuque imprimis sanguinis deficiente, non defunt alia, promptiora, et efficaciora, et magis grata, et magis tuta, remedia stimulantia, externa pariter et interna. Sive enim debilitas illa cum putredine conjuncta fuerit, sive cum nimia mobilitate, et tremoribus, et *tendinum subsultibus*, *vesicatoria* plane adhiberi non debent.

1604. Neque hic silentio præterire fas est experimenta clari auctoris, infelicia quidem illa, sed non eo minus utilia, quæque ipse honesto et liberali animo palam indicavit. Hic auctor experimentis de febrium remediis incumbens, ægros aliquot,

posthabitis plerisque aliis auxiliis, *vesicatoriis* fere solis commisit: febricitantium vero hoc modo tractatorum major pars periit; eorumque qui evaserant, nemo multum boni ab illo remedio percepit, plerique haud parum mali.

1605. Ad summam igitur, concludere æquum esset, medicinam in puris febribus tali haud ægre carituram esse auxilio, nisi magnorum quorundam nominum auctoritas isti opinioni adversaretur. Litem ideo ulteriore experientia dirimendam relinquere præstabit, quam temere et festinanter dijudicare. Interim vero juvat novisse, amantissimos quosque eorum *vesicatoria* nunc multo parcius et cautius quam olim febricitantibus imponere.

1606. Administratio et incommoda remedium *epispasticorum* quæ constantis et diuturnæ exinanitionis causa adhibentur, ex jam dictis de evacuantibus remediis generatim, facile intelligi poterunt. Memo-

ria vero usque tenere oportet, haud parum sæpe periculosum esse, præsertim adultis, (nam juniora corpora tali mutationi facilius fere se accommodant), *fonticulos* vel *setacea* aliquandiu fluentia tandem detrahere. Talis enim exinanitio, humorumque derivatio singularis, consuetudine aliquot mensium, vel fortasse annorum, nonnullis vix minus necessariæ fiunt quam naturales corporis excretiones, quas minuere, earumque interdum vice quodammodo fungi, videntur. Quapropter ab isto periculo, idoneo victus genere et vitæ proposito, aliisque nonnunquam exinanitionibus, (siquæ opus sint), sedulo cavendum est.

1607. *Vesicatoria* autem quod attinet pro stimulantibus remediis adhibenda, quamvis multa de aliis istiusmodi remediis jam (cap. xxx.) dicta ad hæc quoque pertineant, tamen multa adhuc dicenda supersunt de eorum administratione, quæ hic quam levissime tetigisse sufficiat.



1608. Nonnullis, ob singularem corporis constitutionem, pene intolerabilia sunt, eosque plurimum et pessime irritant et calefaciunt, et sitim, et magnum dolorem, et tremores, et demum convulsiones excitant: Plerumque flaccidi, pituitosi, torpidi, quam firmi, sicci, atque mobiles, infantes quam adulti, foeminæ quam viri, frigidarum quam calidarum regionum incolæ, *vesicatoria* melius patiuntur.

1609. Ipsa quam excitant inflammatio suis aliquando periculis non caret, scilicet quæ in quibusdam casibus facillime in gangrænam definit; veluti in febribus putridis, et hydrope intercute, et sane nonnunquam in paralyfi. Artubus vero hydropicis, et morbis putridis laborantibus, nunquam imponi debent; et artus paralytici quibus imposita sunt, frequenter et sedulo sunt explorandi.

1610. Non minimum certe eorum incommodum est, quod stranguriam sæpe molestissimam

molestissimam tam frequenter excitant. Hæc in adultis frequens, in infantibus rarissima, particulis quibusdam cantharidum per cutem in sanguinem assumptis, et ad renes et vesicam delatis, plane tribuenda est, et minime (ut quidam volunt) irritationi ipsius cutis cum illis partibus communicatæ. Accidit maxime siquando pars cui *vesicatorium* imponitur antea aliquo modo cæsa fuerat, veluti cum post cucurbitulas cruentas, aut capiti nuper raso et novacula aliquantum lacerato, *vesicatoria* imponuntur. Fit quoque interdum stranguria, cute prius sanissima, propter ea nimis diu super illam relictæ, ipsamque pene exulcerantia. Quapropter, ubi fieri potest, caput pridie radendum est quam *vesicatorium* ei imponatur, et cicatriculæ, siquæ sint, et vulnera scalpellorum in aliis partibus quibus cucurbitulæ cruentæ prius admotæ erant, sedulo tegenda sunt, ut a cantharidibus defendantur. Præ omnibus vero curandum ut tempestive amoveantur; plerumque enim maximus eorum usus ob-

tinebitur,

tinebitur, si modo inflammationem effecerint, et cuticulam aliquantum elevaverint; et omnis quæ supra est irritatio, nocet. Neque demum inutile est tenui linteolo emplastrum ipsum tegere. Prodest quoque ad minuendam stranguriam, vel ipsam sæpe penitus arcet, vel jam præsentem summovet, potum aliquem lenem et diluentem bibere; neque sane valde copiosa potione plerumque opus est. Sunt quibus persuasum est, *camphoram*, aut emplastro admistam, aut exigua omnino quantitate devorata, ægros a stranguria quam cantharides alioquin efficerent optime defendere. — Cuticula per *vesicatoria* elevata minime detrahenda est, sed relinquenda donec areseat et sponte decidat, nova interim subtus crescente; quo minor fiat pruritus molestia, multis alioquin pene intolerabilis futuri.

1611. Ab hoc incommodo prorsus immunia sunt cataplasmata ex sinapi multisque aliis herbis acribus, quæ eosdem fere salutare



salutares effectus ac *vesicatoria* (præter exinanitionem) efficere solent, iisque in multis casibus longe præstant, utpote quæ non modo stranguria carent, sed multo acrius et multo citius stimulant, et sæpius repeti possunt. Quin et hujusmodi rube-facientia, ut vocantur, ita adhiberi possunt ut cutem exulcerent; et *vesicatoria* detrahi, cute tantum inflammata, cuticula autem nondum in vesiculas elevata.

C A P. XLII.

*De remediis anthelminthicis.*

1612. **C**ONsideratis jam variis remedi-  
orum generibus, quæ diver-  
sa vel humorum vel solidarum partium vi-  
tia corrigunt, quæque varias exinanitiones  
efficiunt, superest nunc ut de iis sermo  
fiat quæ contra vermes in intestinis hos-  
pitantes, calculosque in viis urinæ hæren-  
tes profunt; hujusmodi enim auxilia ad  
nullum jam recensitorum genus referri  
queunt.

1613. Remedia quæ adversus vermes  
valent, *anthelminthica* apud medicos vocan-  
tur. Vermium autem varia genera in in-  
testinis

testinis solent nidulari; teretes imprimis, et lati, seu *tæniæ*, et *ascarides*, et demum cucurbitini, qui tamen pro fragmentis, et quasi juncturis lumbrici lati, rupti et dilabentis, a multis medicis habiti sunt. Alia quoque interdum in illis observata sunt vermium genera, et vermes aliquando in aliis corporis partibus præter intestina deprehenfi sunt.

1614. Lumbricorum etiam qui intestina frequentissime occupant origo, et in corpus introitus, parum hætenus intellecta sunt; utpote qui non modo in infantibus solo lacte materno vefcentibus, et in recens natis, et demum in fœtibus in utero materno adhuc latentibus detecti sunt, verum etiam diverfi generis sunt a lumbricis terrestribus, et vel nunquam, vel rarissime duntaxat reperiuntur, nisi in corporibus aliorum animantium.

1615. A multis creditum est, nimium, et fortasse morbosum intestinorum mucum,



iis quodammodo nido esse, eorumque præsertim ova excipere et fovere donec vermiculi prodeant: hoc autem minus certum est; quamvis enim pueri quam adulti vermicibus multo frequentius laborent, minime constat eorum intestina magis esse mucosa. Mucus etiam qui a verminosis sæpe per alvum excernitur, effectus potius quam causa mali esse potest, intestinis scilicet læsis et infirmatis, et ab hospitibus infestis haud parum irritatis: præterea, lumbrici ipsi admodum mucosi sunt, et mucus qui excernitur, ab ipsorum fortasse corporibus magna ex parte derivatur.

1616. Creditur quoque infantes, et sane adultos etiam, infirmos, male sanos, prave diætæ, et aëri, et vitæ generi affluctos, ob defectum idoneæ concoctionis, et languentem intestinorum motum, lumbricos sæpius habere quam sani et validi habent, bono cibo et aëre, et multa corporis exercitatione utentes: quod profecto admodum verisimile est; sed neque adeo firmum,

num, neque adeo perpetuum, quin multi pueri, quibus tota vita nihil præter longum morbum erat, a vermibus tamen immunes vixerint, dum alii, fani et robusti, lumbricos aliquoties ex inferioribus partibus reddiderint.

1617. Quamvis multi medici, nuper et olim, ab antiquissimis etiam temporibus, huic rei operam dederint, adhuc valde difficile est, fortasse impossibile, certo judicare num lumbrici in intestinis adsint, nisi ipforum aliqui vel per os vel per alvum redditi fuerint. Multa animalia talibus hospitibus rarissime, si unquam, carent, neque fere ab iis quicquam detrimenti patiuntur: multi etiam homines, et præsertim pueri, quamvis alioquin sanissimi, lumbricos habent; nec facile quis dixerit quota pars puerorum iis careat. Hinc nonnulli sibi met persuaserunt, lumbricos sæpe vix morbosos esse habendos, et tantum nocere, cum, deficiente idoneo pabulo propter ipforum multitudinem, aut corpore variis

modis male se habente, intestina gravius irritarent, suumque domicilium roderent.

1618. Sæpe autem, quamvis neque valde numerosi, neque alimenti inopes, corpori gravissime nocent. Ex innumeris fere signis morbosis quæ ab iis provenire creduntur, sequentia fere sunt frequentissima, et maximi momenti. Ventriculus et intestina variis modis male se habent, ægerque vexatur torminibus, nausea, vomitu, singultu, doloribus inedia ingravescentibus, ventris, et ventriculi, et laterum; alvumque habet nunc nimis astrictam, nunc nimis solutam et mucosam, et sitim et cibi appetitum admodum inæqualem, interdum fere nullum, interdum nimium, et urinam variam, interdum albidam, interdum limpidam; venter quoque haud raro tumet, et sæpe murmurat, reliquum corpus marcescit, halitus oris insigniter foetet, saliva præter solitum fluit, vultus pallet, et aliquando fere livet, et quasi virescit, præsertim sub oculis; interdum vero brevi  
et



et morboſo rubore identidem ſuffunditur; tuſſis ſicca et moleſta ſæpe adest, pulſusque admodum varius eſt, et lenta et miſera febris accedit; ſtridor dentium inter ſomnum ſæpe obſervatur, nec raro convulſiones magis generales, et demum morbus comitialis frequens et vehemens, et ex hoc aliquando fatuitas: vermes denique frequentiffime per anum, haud raro vero per os, redduntur; nonnunquam etiam, ſed rariffime, ante mortem, ſæpe poſt, inteſtina ipſosque abdominis parietes perforant, et ſic ſeſe produnt.

1619. Præter vero hæc et ſimilia ſigna morboſa, quorum ratio aliqua haud ægre reddi poſſit, alia quædam, magis ambigua, et explanatu difficiliora, a medicis recenſeri ſolent; qualia ſunt, amplificatio oculi pupillæ, tumor aliquis palpebrarum inferiorum, pruritus narium, quas infantes uſque ſcalpere dicuntur, et naſi albor, ejuſque et labii ſuperioris tumor aliquis inſolitus: amplitudo enim pupillæ multum variat; quæ  
ſane

sane pueris fere amplior est quam adultis : et reliqua signa in strumosis plerumque observantur, et interdum a gravedine oriuntur : et omnes demum infantes nares subinde sibi scalpunt.

1620. Diligenter autem cavendum est ab errore apud populum passim recepto, et sane apud multos medicos minime raro, qui, ubicunque vermes deprehenduntur, nihil ulterius respiciunt aut quærunt, non dubii quicquid mali in corpore adsit iis solis esse tribuendum. Non desunt tamen multa argumenta et observationes, quæ ostendant, etiam in verminosis, vermes sæpe esse minimam, interdum fortasse nullam, morbi partem qui urget ; neque alia igitur remedia esse negligenda, ut iis expellendis omnis medici opera detur. Cum iis vero medicis vix locus est ratiocinationi, qui serio profitentur, se omnem fere morbum insolitum, et præsertim *nervosi generis*, qui in junioribus occurrit, quique natura et origine obscura est, et explanatu  
difficilior,

difficilior, lumbricis imputare, et omne igitur curandi consilium huc dirigere.

1621. Medicamentorum adversus lumbricos valentium varia existunt genera, quæ variis modis prodesse videntur; scilicet quæ vel lædunt et lacerant tenera eorum corpora, vel iis veneno sunt, vel ipsos tantum infirmant aut stupefaciunt, vel illis adeo ingrata sunt ut hospitio suo sponte decedant, vel demum quæ vermes neque læsos, neque veneno necatos, neque infirmatos, neque stupefactos, neque domicilii sui pertæsos, quasi vi et armis foras expellant. Nonnulli denique præcipiunt medicamenta dari, quæ nidos lumbricorum destruant atque ejiciant. Neque sane absurdum aut inutile est ad vermes arcendos et submoven-  
dos, idonea diætæ et vitæ genere, interdum quoque et aliis remediis, generali corporis sanitati, variis sæpe modis labefactæ, diligenter consulere.

1622. Multa



1622. Multa autem ex his nimis subtilia sunt, et communi ufui parum accommodata; et, quod pejus est, et magis dolendum, idonea remedia, quibus, secundum talem rationem medendi, opus esset, non adeo sunt in promptu ac vulgo creditur. Parum enim constat quid vermibus gratum futurum sit, quidque ingratum; quidve eos infirmet, aut stupefaciat, aut necet, (contraria enim experimenta et observationes de his rebus extant; et medicamenta plurima, quæ vermibus ex corpore vivis expulsi certissimo exitio sunt, intra corpus vix adhiberi queunt, utpote hominibus pariter ac vermibus perniciofa); et minime certum est, qualis sit nidus lumbricorum, aut quomodo destruendus, aut qualis diæta iis gignendis vel opportuna sit vel aliena.

1623. Ex iis medicamentis quæ per suam asperitatem vermes lædere vel lacerare creduntur, laudatissima sunt, pulvis stanni, aut stanni aut ferri scobs, aut pulvis *corallina*;

*linæ* craffior; quibus annumerare oportet remedium nuper jactatum, *coubage* vulgo dictum, tomentum fcilicet, vel potius fpicula, quæ crefcunt fuper filiquas arboris cujusdam *Jamaicenfis* quæ *dolichos pruriens* vocatur. Fertur etiam fabulum commune eodem confilio feliciter interdum fuiſſe datum.—Non defunt tamen qui opinantur, ſtannum, et quidem ferrum etiam, liquoribus ventriculi ſolutum, vermibus potius veneno eſſe; nam *ſal martis* ipſe adverſus eos sæpe datus eſt, et a nonnullis laudatus, et ſtannum portionem haud exiguam arſenici in ſe continet.

1624. Medicamenta vero quod attinet quæ vermibus veneno eſſe credita ſunt, eoſque ſaltem infirmare et ſtupefacere; innumera fere variis temporibus prolata ſunt, quæ neque adhiberi neque recenſeri merentur, utpote quæ revera nullas vires habent; veluti radix filicis, quæ nuper in uſum revocata eſt et egregie laudata, poſtquam diu et merito fuiſſet neglecta; quic-

quid enim ab illa, et multis similibus, beneficii perceptum fuisse visum est, aliis et multo efficacioribus medicamentis, simul, vel paulo post, adhibitis, plane tribuendum est.

1625. Efficacissima hujus generis (1624.) medicamenta sunt, (quamvis multum absit ut hæc etiam medicorum spem nunquam fallant), cortex *Geofræe Jamaicensis*, radix *spigeliæ Marylandicæ*, et multa quoque amara, folia abrotani aut absinthii, folia et semina *tanaceti*, semen *santonicum*, radix *anthoræ*, flores *lupuli*, et flores et folia *persicæ*; et metallica quædam medicamenta, præsertim ex argento vivo parata, veluti *mercurius sublimatus corrosivus*; et *sal martis*, sive *vitriolum viride*; cœruleum quidem lumbricis certissimo veneno est, sed corpori humano vix minus infestum, neque ideo aptum remedium; et denum *sal commune*, et *mel*, et *oleum*, et *spiritus destillati*, præsertim *spiritus juniperi*, et *acetum*, et *aqua calcis*, a multis credita sunt



sunt lumbricos vel necare, vel ita lædere, ut facilius postea ejiciantur. — Observandum est quædam etiam ex his remediis, nullo alio adhibito cathartico, alvum interdum satis fortiter solvere.

1626. Medicamenta nonnulla foetida adversus vermes sæpe præcipiuntur, utpote quæ credita sunt iis vel nociva vel ingratissima saltem esse, ita ut vel sponte decedant, vel per cathartica facilius dimoveantur. Horum præcipua sunt, *asa* foetida, allium, sulphur, *valeriana* sylvestris, ruta, sabina, &c. — Hæc vero per os devorata parum prodesse solent, magis vero, imprimis adversus *ascarides*, per clysteres in intestina immissa.

1627. Omnium vero remediorum quæ adversus lumbricos adhibentur, longe optima et efficacissima sunt cathartica, præsertim acriora, scammonium, *jalappa*, aloë, *rheum*, &c. vel pura, vel certius adhuc cum aliqua portione *mercurii dulcis*

adjecta. Validioribus fere ad vermes expellendos opus est catharticiis, quia hi intestinis quodammodo se figunt, multo difficilius, quam primo aspectu expectare par esset, hospitio suo dimovendi. Leniora autem, diu adhibita, veluti aqua marina, et aquæ medicinales purgantes, *Harrowgatensis* imprimis, interdum haud male respondent, præsertim adversus *ascarides*.—— Si lumbrici ventriculum occupant, vomitoria medicamenta dare oportebit; si vero ima intestina tenent, idoneæ lotiones ex foetidis medicamentis et catharticiis acrioribus his sæpe immittendæ sunt.—— Fertur *nicotianam* hoc consilio adhibitam, five fumi five decocti forma, egregie aliquando profuisse.—— Fertur etiam haud male aliquando respondisse, abdomina infantum verminosorum idoneis medicamentis *anthelminthicis*, et catharticiis præsertim, illinere. Tali autem remediorum administrationi minime fidendum est.

1628. Interim vero, alia adversus vermes auxilia non sunt omittenda; quamvis enim cathartici maxime fidendum sit, hæc, præsertim acriora, frequenter repeti nequeunt, et præterea magis valebunt, si vermes aliis medicamentis necati, vel læsi, vel infirmati, vel stupefacti fuerint: alia igitur remedia (1623, 5, 6.) cathartici recte interponuntur, quæ ægris satisfaciant, et valeant quantum valere possint,

C A P.



C A P. XLIII.

*De remediis lithontripticis.*

1629. **I**Nter præcipuas morborum causas, calculi suo jam loco (57.) enumerati sunt, eorumque, qui in renibus nati, inque iis vel meatibus urinæ hærentes, vel in vesicam demissi, ibique in majorem molem per remoram crescentes, illamque lædentes et irritantes, vel demum in ejus cervicem et urinæ iter delapsi atque impacti, tot tamque crudelia mala efficiunt, ratio aliqua jam (738, 43.) reddita est: cumque hi sæpe neque natura expelli queant, neque arte evelli, cumque ipsa chirurgia ad eos evellendos sit admodum operosa, et summum dolorem, et profecto

fecto periculum vitæ non leve afferat, inque multis ideo casibus minime suadenda sit, remediis plane opus est quæ illos vel dissolvant, vel conterant, vel quivis demum modo comminuant, atque expellant; et talia medicamenta, five jam inventa, five adhuc invenienda, *Lithontriptica* vocata sunt.

1630. Quamvis omnes ab omni ævo medici talia remedia expetiverint, et nonnulli variis temporibus diversa medicamenta hoc consilio adhibuerint, et testimonio fatis amplo commendaverint, tam parum in hac re profecerant, ut omnia fere remedia quæ ad hunc finem protulissent, per experientiam damnata atque rejecta essent, tanquam inutilia, et sæpe perniciofa; et miseri calculosi aut formidolosæ chirurgiæ semet committere coacti essent, aut cum morbo crudeli et immedicabili, indiesque ingravescente, per totam vitam conflictari.

1631. Tandem

1631. Tandem vero, medicis de talibus remediis pene desperantibus, vel parum fortasse opinantibus, anus quædam, arcanum suum (quod per viginti fere annos ad calculos in corpore humano comminuendos adhibuisset, et, ut aiebat, felicissimo cum successu) honesto fatis pretio senatui Britanno pro bono publico vendidit; medicis atque chirurgis nonnullis honestis et peritis, aliisque viris famæ integerrimæ, quorum curæ et fidei a senatu demandatum erat ut medicamentorum adeo jactatorum vires et usus per experimenta explorarent, incorrupto certe, sed fortasse minus cauto, testimonio suo confirmantibus, remedium ejus calculos in vesica revera comminuisse, et calculosos aliquot a suo morbo penitus liberaffe.

1632. Absurda medicamentorum farra-  
go quam illa in medium protulit, quam-  
vis tanti testimonii parum digna, et præ-  
terea adeo nauseosa, ut maxime etiam ani-  
mosi sæpe in ejus usu fatis diu persistere  
nequirent,



nequirent, et multi ex timidissimis etiam chirurgi se committere mallent quam remedium tam horrendum quotidie devorare, tamen non prorsus inutilis fuit; nimirum quæ nonnullis aliquid levaminis attulit, et, quod multo majoris momenti erat, medicos et philosophos haud paucos ad talia medicamenta exploranda impulit, ut vel eadem in formam magis simplicem et minus insuavem reducerent, vel alia, sive ejusdem sive diversi generis, efficaciora, et tutiora, et ventriculo tolerabiliora, sibi compararent.

1633. His satis perspicuum erat totam illam farraginem facile resolvi in calcem vivam (eandemque male paratam) et saponem: ipsaque muliercula candide fatebatur, testas quæ calcem præberent fuisse primum suum remedium; et saponem postea fuisse adjectum ad alvum modice solvendam, quæ alioquin ab usu pulveris testacei insigniter solebat durescere, quamvis multa experientia edocta persuasissi-

mum haberet saponem quoque ipsum ad comminuendos eliciendosque calculos haud parum conducere; reliqua demum medicamenta se non alio consilio admiscuisse, quam ut suum arcanum curiosos celaret.

1634. Medicorum quoque et philosophorum industria brevi compertum fuit, calcem vivam tutissime et commodissime adhiberi forma aquæ calcis; quæ rite parata insigni vi calculi extra corpus solvendi pollet, ut ex innumeris experimentis abunde constat; et credita fuit interno usui accommodatissima fuisse, utpote quæ calcem plurima aqua dilutam et valde attenuatam contineret, quo hæc facilius et promptius in sanguinem delata cum eo ad renes et vesicam perveniret, dum aquæ multitudo, viribus calcis salutaribus nihil imminutis, corpus ab ejus acrimonia aliquin nocitura satis defenderet, omnesque simul urinæ meatus et receptacula usque elueret, fragmentaque calculorum actione calcis comminutorum, et sabulum, siquid adesset,

adeffet, et mucum, aut sanguinem, aut quicquid demum novis calculis nucleo esse posset, subinde eliceret: quin et nonnullis persuasum erat aquam calcis ulceribus et gravibus irritationibus vesicæ aliarumque partium per quas urina transiret, calculosis sæpe familiaribus et molestissimis, insigniter prodesse, et morbosis ventriculi et intestinorum affectionibus egregie opitulari, et vitia quædam totius molis humorum optime corrigere, et generali corporis sanitati plurimum favere: nec defuere aquæ calcis laudatores qui sperabant largo et diuturno ejus usu, statum sanguinis, atque ideo urinæ ex eo secretæ, eo usque traductum iri, ut hæc novam fere naturam adepta nihil amplius calculosi contineret, neque solitum sedimentum demitteret, sed hoc potius denuo dilueret, et calculos præterfluens, eos vel comminueret, et prius asperos et angularcs, detritis angulis, lævigaret, vel nihil saltem novæ materiæ iisdem adjiceret, donec tandem molliti atque abluti, in crustulas, et quidem



merum fabulum, paulatim dilaberentur. Et demum, quo major hujusmodi ratiocinationis esset fides, plurimæ prolatae sunt et idoneis testimoniis confirmatae ægrotantium historiæ, qui usu aquæ calcis, ventriculi affectionibus morbosis, et multis aliis morbis liberati, bonam et firmam valetudinem sibimet comparaverant, et multam urinam reddiderant solito rubro et calculoso sedimento carentem, et crassum, albidum, atque mucosum deponentem, calculosque quibus extra corpus affusa erat non modo non augmentem, ut naturalis urina fecisset, sed plane comminuentem; quique plurimum fabulum, et multa et haud exigua calculorum fragmenta, et crustulas, et demum nucleos, cum urina excreverant, et tandem calculo quo prius laboraverant caruisse visi erant, vel hunc saltem, sine magno, et interdum sine ullo incommodo, minimeque crescentem, per multos annos in vesica gesserant.

1635. Saponis autem vires et actionem explorantes haud ægre judicabant, quod et multis observationibus et experimentis manifestius constabat, non oleum ejus ad calculos comminuendos et expellendos quicquam prodesse, et siquid revera adversus calculos valeret, beneficium istud alteri ejus elemento, *alkali* nimirum caustico, et, ut nonnulli, neque profecto parvi nominis, auctores sibimet persuaferant, particulis quibusdam igneis atque acerrimis quas illud a calce quicum commistum fuerat accepisset, totum esse tribuendum. Brevi quoque per simplicissima atque certissima experimenta deprehensum fuit, in comminuendis calculis extra corpus, et saponem, et aquam calcis, et illum hac dilutum, nihil esse ad purum *alkali* causticum. Quin et ex scriptis quorundam medicorum fatis constitit, salem *alkalinum* variis modis paratum per aliquot secula ad calculos expellendos in usu fuisse, neque suis laudibus caruisse.

1636. Nihilominus

1636. Nihilominus vero et sapo et aqua calcis, neglecto, vel rarissime saltem et a paucis tantum medicis adhibito puro *alkali* caustico, variis modis per aliquot annos frequenter et large fuerunt adhibita; metu scilicet ne *alkali* purum corpori veneno esset, vel adeo saltem acre foret, ut neque in sanguinem acciperetur, neque ad renes et vesicam, utcunque dilutum, perveniret. Sperabant præterea medici plus ejus forma saponis in corpus receptum iri quam aliter ingeri posset: et nonnullis varios et saluberrimos effectus saponi imputare placuit; neque sane dubium fuit eum alvum saltem modice et efficaciter esse soluturum.

1637. Tandem vero medicus, lucri magis quam honestæ famæ, aut scientiæ aut virtutis præmiorum, studiosus, nomen aliquod et magnum emolumentum sibimet comparabat, palam professus se remedium arcanum possidere, quod calculum, quamvis inveteratum, diuque in vesica commoratum,



moratum, facile et penitus comminueret atque expelleret, quodque sine fastidio a delicatioribus etiam assumi posset, et diu sine incommodo aut periculo continuari, seque nihil magis cupere, quam ægros suos eum sic esse remuneraturos, ut a diro quo prius laboraverant malo per medicamenta ejus fuissent liberati.

1638. Remedium suum adeo jactatum, locupletibus folis accommodatum, pauperibus inutile, et tanti constans, ut non nisi magno pretio vendendum esset, diligenter et curiose celabat, aliis nimirum admistis medicamentis quæ sensibus imponerent, omnibusque jure vitulino dilutis, ne sincera dispensata tali investigationi subjecta essent qualis arcanum facile detexisset.

1639. Brevi autem quod metuebat accidit, tanta ejus cura parum valente, et planis experimentis compertum est, pretiosum illud remedium nihil aliud esse præter

ter *alkali* causticum, pro re nata nunc magis nunc minus dilutum.

1640. Hoc igitur remedium, quamvis tantis laudibus quantis diu cumulatam erat minime dignum, tamen apud medicos per aliquot jam annos receptum est, et frequenter adhibitum, et interdum calculosis profuisse visum est; et saponis locum fere penitus, et aquæ calcis locum magna ex parte, in his morbis, non immerito occupavit. Neque multum nuper in eo parando aut adhibendo profectum est, præterquam quod *chemici* rationem docuere, qua ejusdem vis et efficacix, et quam maxime causticum, semper fiat, ad medicorum arbitrium, variorumque ægrotantium necessitudines, idoneis liquoribus lenibus et glutinosis aptum dilui.

1641. Effectus demum hujusmodi (1633, 40.) medicamentorum, eorumque imprimis vires medicinales in calculis comminendis eliciendisque, haud facile definiuntur.

Quo

Quo plus enim de eorum natura et actione medici ratiocinati sunt, eo fere obscurior et intellectu difficilior res facta est; quo plura de iis prolata sunt testimonia, eo minor fides iis data est; quo plura denique experimenta et observationes de eorum viribus facta sunt, eo magis dubium fuit quid revera in corpore humano valerent: neque jam post quadraginta et amplius annos disputando, et experiendo, et scribendo de his remediis consumptos, ullum hætenus cognitum est quod tantum efficiat, quantum de ridicula farragine anili, qualis primo prolata fuit, idonei iudices testati sint.

1642. Profectus tam exigui, tantorumque incertorum, in re adeo aperta et exploratu facili, ratio multiplex est, et minime indigna ut exponatur, quo melius in posterum medici atque philosophi a similibus erroribus caveant. — Testimoniis imprimis de arcanis remediis, plurimis et fatis manifestis de causis, vix unquam



fidendum est : quæque igitur de his prius prolata erant quam ipsorum natura pervulgata esset, hic negligenda sunt, et recentiora tantum et magis credibilia consideranda.—Ex his autem, quæ certissima videntur non semper certa sunt, neque credendum est calculum in vesica fuisse comminutum, et ex ea cum urina redditum, quamvis antea manifestus, post usum remediorum quorundam explorando detegi nequiret, nec quicquam gerenti doloris aut incommodi facesseret : plurima enim exempla ostenderunt hoc fieri posse, calculo adhuc in vesica hærente ; sive hic facculum quendam sibi formaverit inque eo latuerit, sive vesicæ firmiter adhæserit ægre detegendus, sive tantum chirurgi explorantis tactum effugerit, sive demum prius asper et angulosus, lævis atque rotundus factus, vesicam, nonnihil fortasse perpetua ejus frictione callentem, minus læserit,

1643. Medici porro cum de natura et viribus talium remediorum primo ratiocinari inciperent, in plurimos et graves errores inciderunt, seque confusione haud facile expedienda implicuerunt; quod profecto nil mirum, cum vera calcis vivæ, atque ideo *alkali* caustici, natura tunc temporis minime intellecta esset. Quin et postquam pulcherrimis clari *chemici* experimentis demonstratum fuisset, ea non aliam ob causam quam aëra suum fixum expulsum five extractum caustica fieri, et hoc reddito denuo mitescere, hæc etiam reperta adeo neglexerunt, ut plurimis institutis experimentis et ratiocinationibus, minime dubitasse visi sint calcem et salem *alkalinum*, non modo pura nulloque cum *acido* conjuncta, sed caustica adhuc, per ventriculum, et intestina, et vasa lactea, et cor, et pulmonem, ad renes esse perventura, et cum urina secreta inque vesicam delata, calculum ibi commorantem non aliter comminutura, quam si extra corpus ejusdem fragmento pura et sincera affusa essent.

1644. Ratio autem plane docet hoc impossibile esse, et nupera quædam experimenta ostenderunt, neque *alkali* mite, quamvis purum et parum dilutum, neque aquam calcis, neque *alkali* causticum, urinæ recenti satis large admixta, quamvis neque ventriculi neque pulmonis vires experta essent, fragmenta calculorum vel minimum comminuere.—— Ea igitur experimenta et observationes sola perpendi merentur, quæ urina eorum qui hujusmodi remedia affatim fumerent, vel extra corpus vel intra facta sunt, siquando calculosis medendi magis quam experiendi causa data fuerint.

1645. Multum vero abest ut his etiam omnibus fides aut debeat aut possit haberi, scilicet quæ adeo contraria sibi que adversa sunt, ut probe perspicuum sit plerosque medicorum qui his rebus incumberent, nimis avidis et nimis credulis oculis (quod sane in re medica nimis frequens error est) sua experimenta fuisse intuitos, et nimis festinanter



festinanter et temere de remediorum viribus judicasse, veteris *Hippocratis* moniti de experimento difficili et judicio fallace plane immemores.

1646. Postremo, non semper considerabant, calculos varii esse generis et quodammodo diversæ naturæ; alios nimirum durissimos, læves, comminutu difficillimos; alios vero asperos, molliores, friabiles, fabulosos, sua fortasse sponte in urina aut aqua tepida paulatim dilapsuros: minime ergo quod de uno calculo aut uno ægro verum esset, de omnibus credere aut expectare licuit.

1647. Omnium vero consensu qui de his rebus scripserint, quædam saltem de viribus remediorum *alcalinorum* fatis cognita sunt atque comperta. Largo imprimis sive aquæ calcis sive *alcali* caustici usu, urina haud parum mutatur, et parum materiæ veræ calculosæ aut demittit aut continet, et, pro solito rubro et arenoso,

fo, fedimentum albidum, et mucosum, et molle deponit, et siqua aut scriptis medicorum, aut aliorum hominum testimoniis fides habenda fit, adeo non calculorum fragmenta quibus affunditur auget, (quod naturalis urina faceret), ut eadem in quibusdam exemplis, nam hæc res minime perpetua est, plane, quamvis admodum lente, comminuere visa sit. *Alcali* vero causticum largius assumptum, siue forma saponis, siue purum devoratum fuerit, urinam plane *alcalinam* reddit; eamque simul satis acriter movet, partesque per quas transitura est fortiter sæpe irritat, præsertim si hæ calculorum attritu vel alia quacunque causa jam inflammatae aut exulceratae fuerint, atque ideo multis calculosis adhiberi nequit, quamvis etiam valde dilutum, et glutinosi rebus commistum, et semper igitur caute et prudenter adhibendum est. Contra vero, aqua calcis, quamvis diu et large hausta, urinam neque *alcalinam* neque acrem reddit, neque renes neque vesicam male irritat, sed ea-

rum

rum partium irritationes, et dolores antea fortasse gravissimos, sæpe sublevat. Constat quoque utrumque diu et satis large posse assumi, si modo cum prudentia datum fuerit, generali corporis sanitate nihil imminuta. A temerario vero et nimis largo illorum usu, fertur, et minime incredibile est, totum corpus variis modis fuisse læsum, humoresque imprimis insigniter computruisse. Certum quoque est varia ventriculi et intestinorum vitia, et præsertim acorem, calculosis sæpe familiarem, talium remediorum usu vel prorsus submota, vel plurimum duntaxat sublevata fuisse. Neque demum negandum est per ea multos calculosos insigniter fuisse levatos ab ipsis malis quæ a calculis in renibus et vesica oriuntur, plurimosque interdum calculos et multum sabulum cum urina reddidisse. Adhuc vero valde dubium est an calculus grandior et per longam remoram confirmatus, eorum ope, vel in renibus, vel in vesica, unquam fuerit comminutus et e corpore penitus expulsus. Et si testimoniis,

utcunque



utcunque ambiguis, quæ de tali curatione prolata sunt fidem habere placeat, hoc duntaxat certum erit, successum adeo felicem rarissimum esse, inque paucis omnino casibus expectandum.

1648. Remediorum vero, quæ tanto malo quamvis incipienti occurrere, vel idem nondum inchoatum, sed, propter notam corporis proclivitatem, suspectum, arcerere, vel incremento ejus obstare, vel cruciatus tantum quos efficit lenire possint, utilitas certe haud exigua erit; et maxime dolendum est hæc etiam beneficia non magis esse certa.

1649. Ratio denique qua varios effectus jam (1647.) enumeratos, et a variis medicis iis imputatos, præstent, neque adeo certa neque adeo perspicua est ac multi crediderint.——Commenta de illorum actione antequam vera calcis vivæ et *alkali* caustici natura detecta esset, vix opus est perpendere. Et postquam cognitum erat, causticam

sticam eorum naturam ab aëre fixo detracto omnino pendere, medici nimis temere crediderunt hoc nodum istum esse soluturum. Verissimum quidem est calculos ex variis elementis constare, plurimumque aëra fixum continere, qui aliis partibus quodammodo vinculo esse videtur, ita saltem ut hoc detracto reliqua compago facile dilabatur, et satis verisimile, fragmentum calculi aqua calcis aut *alkali* caustico immersum non alio modo comminui atque dissolvi; sed in corpore humano, parum verisimile est medicamenta adeo caustica tuto posse circulari, et minutissimas vias viscerum, pulmonis, totius demum compaginis libere permeare, priusquam ad vesicam aut renes pervenerent. Præterea, in ventriculo et intestinis aër fixus raro deest, plerumque adeo copiosus adest, ut ipso fere temporis puncto quo caustica devorantur nequeant non mitescere. Quod si, nullo ibi existente aëre fixo, caustica adhuc per tenera vasa lactea et *glandulas* conglobatas *mesenterii*

in sanguinem delata, per cor, ad pulmonem missa fuerint, unde perpetua fit et copiosa exhalatio aëris fixi a sanguine derivati, ibi saltem brevi mitia reddentur.

1650. Quin et in ventriculo, et in superiore fortasse intestini parte, acoris aliquid, et imprimis in calculosis, adesse solet, quantum saltem *alkali* vel calcem quam aqua tenebat facile saturaverit. Neque sane haëtenus demonstratum est purum *alkali* in sanguine vivi hominis unquam extitisse, neque verisimile est talem ejus statum gravi et præfente periculo esse cariturum. Urina ipsa *alkalina* facta minime probat sanguinem ejusdem fuisse naturæ; quoniam partes humorum maxime putrescentes, adque statum *alkalinum* properrantes, per renes secernuntur, quæ ideo per remoram in vesica, vel brevissimo tempore postquam redditæ fuerint, *alkalinæ* fieri possint. — Experimentis insuper constat, neque *alkali* mite, neque salem neutrum



*trum* qui ex *alkali* et *acido vegetabili* fit, calculos vel minimum comminuere.

1651. Ut his et similibus difficultatibus obviam iretur, quidam medici suaferunt, et nonnulli tentarunt, aquam calcis, vel puram, vel lenibus quibusdam medicamentis mollitam, per idoneam fistulam in hominis vesicam immittere. In brutis quoque animalibus tentatum est aquam calcis, adjecta aliqua portione *alkali* caustici, eodem modo infundere. Hoc autem parum haftenus profuit, nec multum beneficii pollicetur, cum non modo operosum fit, multumque doloris afferat, et post aliquot repetitiones pene intolerabile fiat, sed experimentis quoque constat, neque calcis aquam neque *alkali* causticum urina commistum in comminuendis calculis quicquam prodesse.

1652. Aliis vero modis remedia *alkalina* calculosis opitulari possunt; absorbendo nimirum quicquid nimii acoris in ventricu-

lo adesset, unde sanior cibi concoctio, sanius nutrimentum corpori suggestum, humoresque omnes, tam circumeuntes quam secreti, magis naturales, et urina fortasse ob hanc causam minus calculosa, et partes solidæ firmiores, et secretiones rite procedentes, omnisque demum valetudo melior. Præterea, aqua calcis diluendo, et *alcalini* sales, sive caustici sive mites, sive demum in *neutros* per ventriculi acorem conversi, stimulando, urinam movent, quæ sic et suum sedimentum melius diluit, et renes et vesicam probe eluit, et sabulum et minus calculos facilius expellit.

1653. Hæc quoque videtur esse ratio beneficii, sæpe haud exigui, quod multi calculosi a remediis plane astringentibus, veluti *uva ursi*, et aquis quibusdam medicinalibus, veluti ferratis, et demum bona cerevisia tenui, perceperunt, quamvis hæc a natura *alcalina* plane sit alienissima, et nullis eorum magna, plerisque ne minima quidem vis calculi dissolvendi contingat.

1654. Non

1654. Non tamen silentio præterire fas est alia quædam remedia, ad comminuos calculos a nonnullis medicis adhibita, præfertim cum unum ex iis pro insignibus suis viribus plurimum fuerit laudatum.

1655. Paucis abhinc annis, ingeniosis et pulcherrimis clari *chemici* experimentis compertum fuit, aëra fixum aqua commistum terram calcariam haud segniter dissolvere. Aqua calcis enim, quæ admisto aëre fixo calcem suam demiserat, illo largius commisto, hanc denuo, et quidem vix minus copiose quam antea diluit. Quin et hoc modo aliæ terræ dissolvi possunt, veluti *magnesia*, quæ pura aqua minime dissolubilis est.

1656. Hinc egregia medicis occasio novum experiendi remedium, corpori tutum et adhibitu commodum, quod calculos dissolveret, variisque modis facillime ingeri posset; vel forma scilicet aquæ *mephiticæ*,  
(qualem



(qualem fontes quædam medicinales uberime fuggerunt, quæque, si tales fontes ad-eundi, eorumque aquas obtinendi, copia non est, commode fieri potest ex aqua fontana communi aëre fixo expleta et saturata); vel in idoneo sale *alcalino* latens, unde statim ut devoratus fuerit aër expellendus est hausto multo citreorum succo, vel alio quivis *acido* quod aptum videatur. Nec defunt exempla quædam, ubi hoc remedium insigniter profuisse, plurimumque fabulum, et quidem calculos, et fragmenta haud adeo minuta, expulisse visum est. Maxime autem dolendum est hujusmodi beneficium non magis esse frequens atque certum; sed vix sane mirandum, cum haud perspicuum sit quo modo aër fixus ita in corpus receptus, pristinas suas dotes adhuc retinens, per tot vias, et præsertim per pulmonem, sit transiturus, et tandem ad vesicam deferendus; et simul per experimenta constet, neque purum aëra fixum, neque aquam eo saturatam, calculos humanos, qui neque ex terra calcaria neque ex *magne-*  
*sia*

*sia* constant, extra corpus vel minimum dissolvere. Aqua autem aëris fixi saturata, et haustus isti effervescentes, largius assumpta, hi leniter stimulando, illa copiose diluendo, urinam movere, et renes et vesicam eluere, et arenulas et calculos expellere poterunt. Præterea aër fixus corroborato corpore, et imprimis ventriculo, alimentique concoctione sic saniore facta, aliis quoque modis (1652.) calculosis utilis erit. Et demum experimenta quædam extant quæ ostendant, salem istum qui ex *alcali* volatili et *acido vegetabili* constat, extra corpus saltem calculos dissolvere.

1657. Postremo, alii quidam sales, tam acidi quam *neutri*, qui calculum extra corpus comminuunt, a nonnullis crediti sunt aliquid intra id beneficii polliceri. Sed de his pro remediis adhibitis experimenta defunt, et ratio pariter et aliorum hujusmodi remediorum experientia, nos satis monent cautos esse, et non nimis sperare.

1658. Omnia

1658. Omnia *acida* fossilia calculos extra corpus dissolvunt: nitrosum et marinum optime cum fortia et sincera adhibentur, et hoc quidem vix nisi sincerum. *Vitriolicum* autem forte calculum in quibusdam experimentis vix tangere visum est, quamvis plurima aqua dilutum cum satis prompte dissolveret. Cum talia remedia fortia et pura non possint adhiberi, et nitrosum et marinum tenuia facta parum valeant, superest tantum *vitriolicum* dignum quod periculum ejus fiat in calculosis. Creditum est aliam ob causam aptissimum esse, nimirum quod minus per concoctionem aliasque vires corporis quam reliqua immutetur, et quantitate haud exigua tuto sumi possit.

1659. Ex *neutris* autem salibus, illi qui *alkali* volatile cum *acido vitriolico* vel *vegetabili* continent, aqua diluti, extra corpus calculum dissolvere visi sunt: quantum vero intra corpus valeant, et quousque illi, et quidem ipsum *acidum vitriolicum*, immutentur



mutentur antequam ad vesicam perveniant, ulterior experientia doceat.—Remedium arcanum nuper celebratum tanquam utilissimum adversus calculos, parum medicamenti cujusvis præter nitrum continere videtur. Cum vero tot incerta et incredibilia traduntur de remediis hujusmodi quorum natura et compositio omnibus notæ sunt, fabulas quæ de arcano, utcunque laudato, a venditore aut vulgo narrantur, perpendere aut perscrutari inane et supervacaneum foret.

---


Hæc demum, utcunque exigua et imperfecta, de sani corporis muneribus, deque origine et natura morborum qui munera illa impediunt, mortemque sæpe afferunt, deque viribus et administratione remediorum quibus ad istos morbos tollendos utimur, quicunque rite consideraverit, is bene perspiciet, ratione quam obscura, nec raro

fallace, arteque quam rudi, et sæpe parum valente, fragilem vitæ spem tueri conemur; et simul bono BOERHAAVIO facile assentietur, non temere profitenti, “ NULLUM se cognovisse remedium, quin “ solo tempestivo usu tale fieret.”

F I N I S.







RB 2.12.1991





TIGHT BINDING  
- SOME TEXT  
FALLS INTO  
GUTTERS

24ColorCard Camera C ray.com

RIGHT

0 1 2

8 9

